

تمثيل غير مشرف

تمثيل غير مشرف

رواية

محمود كامل

تصميم الغلاف : محمد كامل

تدقيق لغوي : أحمد الناصر

رقم الإيداع : ٢٠١٣/٢٢٥٥٠

ISBN: ٩٧٨-٩٧٧-٤٨٨-٢٥٣-١

دار اكتب للنشر والتوزيع



الإدارة : ١٠ ش عبد الهادي الطحان من ش الشيخ منصور،

المرج الغربية، القاهرة

المدير العام : يحيى هاشم

هاتف : ٠١١١٠٦٢٢١٠٣ - ٠١١٤٧٦٣٣٢٦٨

E - mail : daroktob1@yahoo.com

دار أكتب للنشر والتوزيع : Facebook

الطبعة الأولى ، ٢٠١٣ م

جميع الحقوق محفوظة ©

دار اكتب للنشر والتوزيع

تمثيل غير مشرف

محمود كامل

رواية



دار اكتب للنشر والتوزيع

تنبيه هام

هذا العمل من وحي خيال المؤلف، و أي تشابه بينه و بين الواقع في الأماكن
أو الأشخاص هو بمحض الصدفة.

لقد فعلناها

كانت ليلة لا تنسى في حياة كريم. نظر حوله ليجد الجمهور في كل مكان يهتف له. ليس له وحده، بل للفريق كله حتماً. لكنه أحب إقناع نفسه أن من في الملعب جاءوا من أجله، ليشجعه ويسانده وحده. هو بطل و عريس هذه الليلة. رجّت الضوضاء أنحاء استاد القاهرة الدولي احتفالاً بالفوز الغالي. لطالما بالغ في اعتبار الكثير من الأوقات في حياته هي أفضل اللحظات، لكن بالتأكيد تفوقت هذه اللحظة على غيرها وأصبحت هي الأسعد في حياته إلى الآن. مسح العرق المتصبب على جبينه ناظراً حوله ليستوعب المشهد جيداً. ما أحلى النهايات السعيدة! تنفس هواء القاهرة و كأنه مختلف. شعره أكثر نقاءً مع صرخات الجمهور من كل صوب. التفت محاولاً أن يجد أخاه أو أباه، رغم علمه باستحالة رؤية أحد من موقعه.

- "كسبنا بطولة الشباب!" صاح كريم بأعلى صوته. "كسبنا!!!!!!"

- "أيوة يابني كسبنا! احنا عدينا خلاص مع اللي عدوا" رد أحد الزملاء

بالفريق

اصطف الفريقان في انتظار تسليم الجوائز. كانت أكبر كأس للشباب يمكن للاعب كرة ناشئ الحصول عليها. علم كريم ذلك جيداً، و علم أيضاً أنه ربما انفتحت له طاقة القدر كما يقولون. أصبح بإمكانه الآن التمتع بالاحتراف في الخارج و الحصول على كل المبالغ التي يحلم بها. حياة الشهرة و الثراء لم تعد بعيدة

النال كذي قبل. لقد وصل إلى ما طمح إليه السنوات الماضية من عمره. لقد فعلها.

"الفريق الوصيف يتفضل بتسلم الميداليات الفضية" صاحت المذيعة الداخلية بأعلى صوت لتلفت انتباه الجمهور.

تقدم أعضاء الفريق الخاسر، أو الوصيف، لتسلم الميداليات الفضية والحسرة تملأ وجوههم، فقد فاتهم فرصة كبيرة للفوز بكأس تحت ٢١ عام، حيث اجتمع كل مستكشفي الفرق العالمية المهتمون بالموهب الشابة للمشاهدة. لم يكن من السهل اكتشاف المواهب الشابة الناجحة تلك الأيام، و في الوقت ذاته لم يسهل على المواهب الشابة إظهار نفسها سوى في بطولة كهذه.

- "تفكر مين في العيال دي هيبقى قدامه فرصة حلوة يحترف؟" همس حمزة زميل كريم في الفريق

- "الواد فريد حلو. أنا سامع إن فيه ناس متكلمة عليه" رد كريم بدون تفكير
- "عقبالنا كدة. يا رب"

اعتدلت المذيعة وأضافت: "دلوقتي الفريق الكسبان بكأس كوكاكولا يتفضل".

علت الصيحات جميع أرجاء الاستاد، و سار الفريق الفائز بخطوات ثابتة لاستلام الميداليات والكأس. تولى وزير الشباب تسليم الميداليات بنفسه للتأكيد على أهمية الأنشطة الرياضية بالنسبة لمصر، و أنها من أكثر البلاد المدعمة للرياضة. لو لم يكن وجهه يوحى بالملل و أن لديه أشياء أهم ليقوم بها، لخدع الجميع. بات من الواضح أنه يفضل تناول العشاء عن إضاعة الوقت في عملية تكريم الفائزين.

استمرت الصيحات و الهتافات في الاستاد. و بدأ الفريق الفائز يحتفل بفوزه وتبادل اللاعبون حمل الكأس. نظر كل منهم إلى الآخر و في عينيه ابتسامة تحمل معنى واحد. "لقد فعلناها. دقت ساعة الاحتفال".

- "العزومة دي عليا يا شباب" صاح فهمي كابتن الفريق الجالس على رأس الطاولة، "أنا أكبر واحد فيكوا. البرنس هيعمل معاكوا الواجب"
- "خيرك سابق يا معلم. خليها علينا احنا المرة دي" رد حازم
- "يا بني سيبه يعزم. هو ده خبر بنسمعه كل يوم؟ سيبه يهز جيوبه شوية" داعبه كريم
- آمال أبوك الحاج شريف مجاش ليه ياض يا محمد؟ ولا قاعد بيهري على الناس في أي ستوديو تحليلي؟" قال فهمي ضاحكاً
- "أنت قلبك أسود يا برنس، ما تعمل عبيط" قال محمد في خجل
- "فاكر الجملة العالمية اللي أبوك قالها دي هاهاها" ضحك كريم في هستيريا، و النبي فكرنا بيها"
- اعتدل محمد في جلسته، و تنحنح ثم قال بأعلى صوت:
- "يا جماعة اللي انتو مش واخدين بالكوا منه ان الأهلي لو خسر الماتش ده... مش هيكسب!"
- "أوباننا ايه المعلمة دي؟ الكبير كبير يا بني هاهاهاهاها"
- "و الناس سكتله كدة عادي؟"
- "لأ ما هو قال عفواً و خلاص. كلمة عفواً دي بتشيل أي حاجة قبلها" رد محمد و قد غلبه الضحك
- "يا راجل هي عفواً دي تأثيرها جامد أوي كدة؟" كاد كريم يموت من الضحك
- "أبوة يا بني دي جبارة. تعرف انك ممكن ترجع عادي في وش الناس و تقول عفواً؟ كدة أنت خلصت كل الكلام" أضاف محمد
- "كويسة عفواً دي ياض؟ أستعملها يعني؟" سأله حازم
- "أه يا بني عفواً دي اللي هتظبك"

- "طب عفواً، أنا هقوم أجيب سلطة. مين عاوز؟" تطوع حمزة و قام من مكانه

- "هاتلي كول سلو أنا و الواد حازم" قال محمد

- "التومية بقى مش هوصيك. على قد ما تقدر" غمز له فهمي

حفظ حمزة بقية طلبات الشباب ثم قام و توجه إلى بوفيه السلطات لإحضار الأصناف المرغوبة. أخذ أحد الأطباق و بدأ يملأه في فهم.

- "مساء الخير" باغته صوت خشن من خلفه. التفت حمزة من المفاجأة ليجد رجلاً أنيقاً، طويل القامة و حسن المظهر. ارتدى بدلة سهرة سوداء و بدا في الأربعينيات من عمره

- "مساء النور. أهلاً و سهلاً"

- "مبروك يا شباب"

- "الله يبارك فيك شكراً" رد حمزة و قد علت الابتسامة وجهه. دار بخاطره أن آثار النجاح بدأت بالفعل

- "كان ماتش حلو أوي. أنا فخور بيكوا"

- "متشكر جداً. ده من ذوقك"

- "هو أنني واحد فيكوا كاكأ؟" سأل الرجل على الفور و كأن لا وقت لديه للمجاملات

- "هو حضرتك مشفتش الماتش؟" نظر حمزة إليه في شك

- "أكيد شفته"

- "طب حضرتك أكيد عارف إن أنا مش كاكأ"

- "بص" ابتسم الرجل ابتسامة شخص نفذ صبره، "أنا قاعد على الترابيزة اللي هناك دي. خليه لو سمحت يجيلي"

استغرق بقية الزملاء في الضحك و المرح بينما عاد حمزة و جلس بجوارهم دون أن يتحدث. لم يستحق الأمر ذلك منه، لكن ضايقته لهجة الرجل السخيفة بعض الشيء. لم يجب أن يتحدث معه أحد بهذه الطريقة.

- "بس الجون الأولاني تحفة يا واد يا محمد. ده اللي فتح الماتش أوي" قال فهمي

- "انا متخيلتش بصراحة هو ازاى حطها كدة" أضاف حازم في إعجاب
- "بكرة صحيح ماتش برشلونة و تشيلسي عندي هه. لازم نشوفه سوا. أكيد هيبقى ضرب نار" قال كريم متحمساً
- "مانشستر برضه هيلعب" أضاف محمد
- "مانشستر دي فرقة عجيبة يا أخي مش ممكن. و برشلونة أغرب. بيكتسحوا أي فرقة تقف قدامهم" علق كريم في ضيق
- "الله أكبر يا أخي في عينك" قال حازم
- "يا بني أنت محسني إفهم ولادك. ههههه. أنت تقرب لميسي؟" ضحك

فهمي

- "خفيف أوي يا واد. هاهها" أجابه حازم في سخافة
 - "مالك يا حمزة تنحت ليه أنت كمان. خايف حد من ولادك يتحسد؟" سأل
- فهمي مداعباً
- "لأ لأ قشطة يا جدعان مفيش حاجة. فيه حوار بس. اتلخمت كدة" اعتدل الكل فجأة و نظروا إليه. كان ذلك بمثابة فيلم السهرة. كعادة أي شاب كلمة "حوار" دائماً توحى بأمر مثير للاهتمام
 - "حوار ايه يا معلم؟" سأل محمد
 - "هممم. كريم. فيه حد سأل عليك" رد حمزة في تردد
 - "هي ماما كلمتك برضه؟ قتلها مليون مرة تكلمني أنا على طول" أجاب كريم ساخطاً

- "لأ. يا جماعة. شايفين الرجل اللي قاعد هناك ده؟" أشار حمزة إلى الطاولة البعيدة في ركن المطعم، "سأل على كريم"

- "سألك أنت عليا؟" تساءل كريم في انزعاج

- "أيوه زي ما بقولك كدة. منين بيقول شاف الماتش و مبروك و في نفس الوقت ميعرفش شكلك"

- "استرجل يا ض يا حمزة أكيد مفيش حاجة يعني. قوم يا كريم شوف الحكاية" قال فهمي متظاهراً بالرصانة. كان الفضول يقتله لكن يجب أن يلعب دور "الكبير" عليهم

- "خلاص أنا هروح أشوف ايه الحوار. بسيطة" قال كريم في حسم

قام من مكانه و توجه إلى الطاولة. كانت طبيعة حمزة أن يعطي الأمور اهتماماً زائداً. توقع كريم أن يكون شخصاً ما يريد تهنتته بالفوز. ربما أحد المعارف أو صديق لأحد الأصدقاء. تفحصه من بعيد فوجده يعبث بماتفه الخلوي و يبدو عليه الملل. اقترب منه و صافحه:

- "كريم رأفت"

- "اهلاً أهلاً. فينك يا راجل اتأخرت" رد الرجل بسرعة و كأنه يحضر تلك الإجابة منذ زمن

- "معلش ظروف. كنت قاعد بعيد. أصلي دايماً بتوه في الأماكن اللي على النيل"

- "كريم رأفت. الشهير بكাকা. هتتم ١٨ سنة شهر أغسطس اللي جاي. صانع ألعاب هابل. لعبت في أشبال المقاولين عشان مكانش عندك واسطة تلعب في الأهلي. من الناحية الدراسية متوسط. تجارة إنجليزي عين شمس. سموك كاككا عشان لعب زي كاككا مع إن عمره ما كان مثلك الأعلى ولا ركزت معاه. عايش مع باباك و مامتك و أخوك. حلمك إنك تحترف بره مصر" أنهى الرجل كلامه و نظر إلى كريم في ثقة كأنه أنهى لتوه محاضرة فيزياء أو اكتشاف لغز ميكاني.

- "هو حضرتك أمن دولة؟ أنا ماليش نشاط سياسي خالص على فكرة. أنا بلعب كورة كدة بس. أنا حتى مش لعب أوي"

- "يا سلام" رد الرجل ضاحكاً، "أنت مالك خفت ليه؟ مفيش حاجة خالص. الموضوع أبسط من كدة. أنا الهاردة جي عشان أحقق لك حلمك اللي أنت نفسك فيه"

- "اللي هو ايه حضرتك؟"

- "أنت بتسألني؟"

- "ما هو شكل حضرتك عارف أكثر مني. أنا أصلاً مكتتش أعرف أنا في كلية ايه"

- "دمك خفيف كمان" رد الرجل في برود شديد، "أنت مش نفسك تحترف برة؟"

- "أكيد طبعاً مين مش نفسه"

- "خلاص. أنا جايلك الهاردة عشان كدة"

- "طيب كان ايه لازمتها دخلة توم كروز اللي حضرتك دخلتها عليها؟ ما كان من الأول"

- "معلش يا سيدي لو كنت فاجنتك. المهم، أنا تبع شركة اكتشاف مواهب و تبنيها. يعني من الآخر هبقى مدير أعمالك. هتسافر و تحترف برة و تعيش حياتك. دي الحكاية باختصار؟"

- "و حضرتك مستفيد ايه؟"

- "مستفيد ايه ازاي يابني. هو أي واحد بيستفيد ايه من حاجة زي دي؟"

- "اكتشاف المواهب و التنمية يعني؟" قال كريم في استخفاف. نظر إليه الرجل في دهشة و تسللت الابتسامة الساخرة إلى شفثيه

- "هو أنت معلوماتك عن الدنيا دروس العربي بتاعة تالته ابتدائي؟ أي حد بيعمل مشروع في الدنيا دي بيبقى عشان دعاية و فلوس. خليني صريح معاك، هي

البطولة اللي أنت كنت فيها دي أصلاً معمولة ليه؟" تردد كريم، و لكن منعه
ذكاؤه من أن يخطئ

- "عشان الفلوس"

- "برافو مانت شاطر أه. احنا بنأخذ نسبة من الفلوس اللي أنت بتأخذها. و
بنكسب من وراها بس أكيد أنت المستفيد الأول. فمتقلقش خالص مفيش حد
بيعمل حاجة لله و الوطن". تفاجأ كريم من هذه الصراحة الشديدة

- "بس حضرتك معرفتش شكلي. يبقى تعرفني منين بقى؟"

- "كريم" أجابه في لهجة حازمة، "لما المدير الفني مثلاً لفريق زي مانشستر
بيجي يقول إنه معجب جداً بالوهبة الفلبينية الشابة الصاعدة الواعدة. يبقى راح
الفلبين أصلاً أو متابع الدوري الفلبيني؟"

- "هي الفلبين فيها كورة أصلاً؟"

- "شوف أنت بقى. فيه ناس شغلتها كدة يا كريم. اللي أعرفه إن احنا
عاوزينك. أنت مش عاوز تستفيد؟ ده الكارت بتاعي. أنا مسافر لندن الشهر
الجاى. فكر و كلمني قبلها عشان تيجي معايا تأخذ فكرة"

- "فيه عروض موجودة أصلاً ولا احنا لسة هنشوف؟"

- "خليك دائماً عارف يا كريم اننا مبنأخذش خطوة من غير ما نبقى حاسينها
كويس. يعني اشمعنا اخترناك أنت و فريد؟ أكيد احنا واثقين من ان ليكوا مستقبل
كويس"

- "هو حضرتك قعدت مع فريد؟"

- "قعدنا معاه. مش مهم مين اللي قعد"

- "طيب خلاص ماشي. أنا بس عاوز أصلح لك معلومة. أنا مش لعب زي

كاكا"

- "التواضع ده مش هينفعك خالص على فكرة"

- "أنا لعب أكثر من كاكا" ابتسم في غرور

- "أبوة. كدة أحبك. مستني تليفونك"

قام الرجل و وضع الحساب على الطاولة. قبل أن يرحل استوقفه كريم قائلاً:

- "طب و الإسم هنعرفه آخر رمضان؟"

- "لا هنعرفه لما تبص في الكارت اللي معاك"

- "أو كيه يا أستاذ.... عامر الشربيني"

ابتسم الرجل و التفت متوجهاً لباب المطعم.

ماتت الرجولة

مر أسبوعان منذ نهاية بطولة كوكاكولا المثيرة. تحسنت حياة كريم بشكل كبير، فقد فاز ببطولة هامة و بدأ يتلقى مكالمات هاتفية من الفتيات في الجامعة وكأنه ظهر فجأة على شاشات الرادار الخاصة بهن، فمنذ اقتحام الفتيات ملاعب كرة القدم عقب بطولة أمم أفريقيا ٢٠٠٦، أصبح لاعب الكرة بمثابة نجم سينمائي أو حساس الجيل. ازداد ثراؤه أيضاً على المستوى الشخصي؛ إحدى المميزات العديدة للفوز بالبطولة. بالتأكيد صارت مسألة عرض الاحتراف الذي جاءه هي أهم مشاكله في الوقت الراهن. للأسف لا تأتي الثلاجة دائماً بما تشتهيحه المعدة، فقد تحفظ والده على مسألة السفر دون أن يكمل تعليمه، فرغم أن كريم تقدّم بطلب لمنحة دراسية بإحدى جامعات لندن، لم يضمن ذلك أن يقبلوا به فعلاً.

بدأ كلام عامر يسيطر عليه، فسرعان ما أصبح مهووساً بفكرة الشهرة و النقود. لم يفكر من قبل في أي من تلك الأشياء. أحب كرة القدم منذ طفولته و كان من كبيري مشجعي الأهلي كعادة كل الأطفال وقتها. مع مرور الزمن اتجه مثل معظم الشباب المصريين إلى الكرة الأوروبية. لم يعد يستسيغ الكرة المصرية بالسيطرة الواضحة لفريق واحد. فشل المنتخب المصري المتواصل في الصعود لكأس العالم أفقده الأمل أيضاً في تحقيق أي إنجاز عالمي. رغم تعدد نجاحات المنتخب المصري على الصعيد الإفريقي، لم يكفه ذلك.

أثرت والدته كريم بشكل كبير في حياته. عملت كمدير أبحاث تسويقية بإحدى الشركات الاستشارية. شعرت بموهبة كريم منذ صغره وحثته على تطويرها ومارستها. لم تفهم كثيراً ما يميز اللاعب الجيد لتقدر موهبة ابنها، لكنها اكتفت بما سمعته من الناس عن مدى براعته و توسع آفاق مستقبله الكروي. صداقتها مع والدته فهمي، و التي تعمل مدير علامة تجارية في شركة كوكاكولا، هي العامل الرئيسي لما وصل كريم إليه الآن. لم يتم قبول استمارة فريق "النسور" عن طريق الصدفة، و الذي رآه كريم اسماً مبتدلاً، من ضمن مئات الاستثمارات المقدمة للمسابقة. استدعى الأمر بعض الضغوط من والدته فهمي لإقناع من يجب إقناعه. طبقاً لما قالت، فقد احتاجت لاستخدام طرقها الخاصة. لم يحاول كريم أن يفكر ما يعنيه ذلك.

رنّ جرس هاتفه الخلوي، نظر ليجد اسماً أنثوياً؛ إحدى الفتيات اللاتي تعرف عليهن بعد الإنجاز التاريخي. لمعت عيناه و قرر أن يرد سريعاً، لكنه تراجع فجأة و انتظر رنتين. رد بعدها بصوت خافت و كأنها أيقظته من النوم

– "أأالووو"

– "هاي كوكي. ازيك؟ أنا فريدة. أنا صحتك ولا ايه؟" أتاه صوت أنثوي

ناعم

– "فريدة؟ أأاه. لأ أبداً" قالها و تئاءب بصوت واضح ليؤكد لها أنها أيقظته

فعلاً. حلم منذ زمن أن تأتيه الفرصة لذلك

– "صح النوم. يلا عشان هنطلع على كايرو جاز نسهر. هعدي عليك. اليس

بسرعة، باي"

أغلق كريم الخط و ظل ينظر إلى المجهول، ثم قام من مكانه صائحاً "هي حصلت كمان كوكي؟ ماتت الرجولة خلاص"

- "مالك يا كريم مش في المود ليه؟" سألت فريدة و هي تَهْتَز مع إيقاع الموسيقى في النادي الليلي

- "هه؟ لأ عادي أبداً، مندمج مع الموسيقى" كان كريم شارد الذهن، و أيقظه صوت فريدة من سبات عميق.

- "يا سلام؟ دي حتى موسيقى أبلفتينج ترانس. أنا قلت مش هتدخل دماغك أوي. دي بتاعة الناس اللي عامله دماغ"

- "يا بنتي مصر كلها بقى ليها في الترانس غصب عنها. و حتى اللي مالوش فيه و ليه في الهاوس، بيبقى فاكرا الهاوس اسمه ترانس برضه. هو حد بيعرف يفرق يا بنتي؟ كله بيتخبط و يعمل دماغ خلاص"

- "ماشي يا فيلسوف. بعد كدة هجيبك هنا على طول مادام بتنسبسط"

لم يناسب الجو كريم بأي شكل من الأشكال، لكن يكفيه أن يتواجد معها في مكان واحد حتى لو بناد ليلي. حتى لو تظاهرت بفهم الفارق بين موسيقى الهاوس و الترانس. لم يمانع أن تتظاهر حتى بأنها بارعة في الرقص إلى حد كبير. يكفيه التواجد معها حتى لو تظاهرت بعشقها للسوشي كي تعلق إلى الطبقة الراقية في مصر. يكفيه رقتها، أناقتها، و بالتأكيد ثوبها الذي ترتديه. وجوده معها فقط زاد من رصيده بشكل كبير. سيتحدث الناس عنهما أكثر مما تحدثوا عن عماد متعب و يارا. رأى فريدة جميلة الجميلات. ليس وحده ، بل كل شباب الجامعة، و على ما يبدو، رواد النادي الليلي أيضاً.

- "ممکن نرقص بقى شوية؟" تساءلت فريدة و قد ظهر الإحباط على وجهها

- "طب ماحنا ممكن نتهز في مكاننا و احنا واقفين. مش كفاية مفيش

كراسي؟"

- "أيوة يا حبيبي، هو ستايل المكان كدة. منها شياكة و منها استغلال مساحات" خفقت قلب كريم عند كلمة "حبيبي". هل قصدتها فعلاً، أم استخدمتها مع أي شخص؟ قرر أن يتماسك

انطلق معها إلى ساحة الرقص الضيقة بشكل مثير للاشمئزاز. لم ير سوى مجموعة من الشباب يتحشرون بنظائرهم من الفتيات. لم يظن الأمر شيقاً أو مثيراً بأي حال. تخيل أن الرقص معها سيكون لحظة ساحرة، لكنه وجدها مجرد لحظة خانقة من فرط تكديس البشر في الساحة و كأنها حرب أهلية قائمة. استمر في الرقص و حاول الاستمتاع بوقته قليلاً و الاندماج مع الموسيقى؛ على الأقل هو في صحة فنة جميلة. فجأة صرخت فريدة في أذنه بصوت عال و هي تضحك. لم يفهم ما تقول نظراً للضوضاء في المكان.

- "جعااااااااااااانة"

[illegible]

- "بقولك جانااااااعااااااانااااااة" أشارت إلى بطنها و تحسستها كأنها تربت على كرشها. فابتسم وعاد بها إلى الطاولة.

— "هتا کلی ایہ؟"

- "نجیب سوشی بقی"

- "هو يا بنتي السوشي ده أكل؟ معرفش السوشي ماله لم كدة. محدش كان بياكله يعني. الناس كلها هجمت عليه فجأة بأمرأة ايه؟"

- "يا كوكي محدش واحد منها حاجة. أنا هروح أطلب. ايه ده ميزو، ازيك يا اباايبسي" تركت مكانها فجأة لتحية صديقها. عانقته و أعطته قبلة على خده. شعر كريم بالدم يغلي في عروقه حيث تعاملت فريدة و كأنها وحدها، "أعرفك يا كوكي، ده ميزو صاحبي. و ده كوكي اللي كلمتك عنه يا ميزو" ربما لازالت تتذكر وجوده على أي حال

— "ایہ یا معلم مالک متنع کدة لیہ؟ أنت متعشی جامد؟" داعبہ میزو

- "لا خالص دانا كنت لسة هروح أطلب لنا الأكل" ردت فريدة ضاحكة

- "طيب أوكيه. أسيبكوا أنا تعيشوا سوا" انسحب ميزو في لباقة

وقف كريم مكانه شارداً بينما ذهبت فريدة لتطلب الطعام. كان عليه أن يتوقع ما حدث، فالفتيات مثل فريدة هن أسلوب معيشة مختلف عنه. عليه أن يتقبل ذلك أو يرحل. في الوقت الراهن قرر التزام الصمت و السكون. عادت فريدة بعد دقائق.

- "عازة أروح سينما بكرة. نروح بقى توابلايت آخر جزء. يقولوا يجن."

- "هو أكيد يجن. و احنا نبقى مجانين لو دخلناه"

- "بطل غلاسة يا كوكي. ده فيلم تحفة. آه يا إدوارد"

- "إدوارد مين؟ ده عيل أقحوبان"

- "أقحوبان؟ يعني ايه؟"

- "لأ مش عارف. بس حسيت اني محتاج أقول كدة"

- "ايه يا كريم مالك؟" سألت فريدة في انزعاج

- "شوية ميزو و شوية إدوارد. انتي أصحابك كتروا أوي يا فريدة"

- "أنت متضايق عشان ميزو؟ ده ولا حاجة أصلاً. ده صاحبي عادي"

جاء النادل حاملاً ما لذ و طاب من أصناف السوشي. وضع الصينية على الطاولة ثم التفت للرحيل.

- "طب ممكن تجيلنا ريد بول معاك عشان نفوق؟" صاح كريم، لكن لم يستجب له النادل. نادى كريم خلفه "طب و تعبت نفسك و جبت الصينية ليه ما كنا نيجي احنا ناخذ الأكل. أجيلك كرسي طيب؟"

- "خلاص يا كوكي كبر دماغك، هتوديني الفيلم ولا لأ؟" سألت في رقة قد تكون مصطنعة

- "أكيد هوديكى يا فرفورة هو أنا أقدر"

- "يا ايه؟" تساءلت في دهشة

- "لا ولا حاجة أنا بكح، ياه الأكل شكله فظييع" راح يلتهم أصناف السوشي بنهم. منعه الجوع في أن يفكر فيما يأكل

استمرت السهرة قليلاً، و قرر كريم الاستمتاع بكل لحظة فيها إلى النهاية. تطلع للخروج معها في اليوم التالي بغض النظر عن الفيلم الذي سيشاهدان. لم يطق الانتظار كي يحكي لفهمي و حمزة ما حدث الليلة و يشاهد نظرات الحقد و الغيرة في عينيهما. لم يعرفا فريدة سوى من حكاياته. رغم فارق السن بينه و بينهما، كانا أقرب صديقين له. لم تربطه نفس العلاقة الوثيقة مع حازم، زميله في الكلية. ربما عليه أن يخبره ليثير غضبه و حقه هو الآخر. شعر بأنه في حلم سيستيقظ منه ليجد نفسه لم يفز بالبطولة أصلاً. لم ينقصه سوى رضا والديه لتتويج هذا الحلم بالاحتراف. نظر في ساعته ليجدها قد تعدت الثانية صباحاً. يقع بيته في مصر الجديدة بينما تسكن هي في الزمالك، و لذلك أمامها رحلة قيادة طويلة بالتأكيد. عزأؤه الوحيد أنها من ستتولى عجلة القيادة.

- "مش نتحرك بقى ولا ايه؟ أصلك لسة هتوصليني و بعدين ترجعي بيتك" سألها في قلبي

- "ايه ده مش هنروح الأفترباري؟"

- "و دي فين بقى؟" سألها في ملل

- "عند ميزو في البيت. لسة باعتلي على الموبايل"

- "عند ميزو في البيت؟! أنا هطلع أتمشى برة شوية" صاح كريم في انزعاج

و استنكار

- "برة فين؟ كريم...استنى! الحساب لو سمحت"

اندفع كريم تجاه الباب مصطهماً بالراقصين الهائمين في المكان. كانوا أشبه بالموتى يتمايلون مع الموسيقى ولا يفهمون شيئاً سواها. أصبحت الموسيقى بمثابة جهاز تنظيم ضربات القلب لهم. يتحركون طالما لازالت تنبض. إن توقفت تتوقف معها القلوب. مع ظهور الشارع أمامه بدأ يتنفس الهواء الطلق و يشعر بتحسن بسيط. لم يفهم سر غضبه فقد علم منذ البداية نشاط فريدة الاجتماعي. لطالما تبنى نشاطاً مثله لكن تعارضت الظروف معه. كيف توقع من فريدة أن تكون ملكاً له؟

لن يحدث ذلك أبداً. طوال حياته لم يصل أبداً لما يطمح إليه. و لذلك، لن يتنازل عن حلم الاحتراف.

راح يتجول في شارع ٢٦ يوليو باتجاه أحمد عرابي حيث ساد الظلام الدامس. انتشر الصمت أشبه بوحش كاسر يتأني للانقضاض على فريسته للتأكد من عدم وجود أي مقاومة على الجانب الآخر. اخترق الهواء أذنيه و عزله عن العالم الخارجي. تمنى لو اختفى في تلك اللحظة و لم يذكره أحد، فذلك أسهل بالنسبة له من أن يعد إنساناً فاشلاً. تمنى أن يتلعه الظلام و يكتب نهايته في تلك الليلة. لكن لم يكن ليحدث ذلك حتماً. ليس من السهل أن تترك له الحياة فرصة الهروب بهذه السهولة. للحياة طريقتها في تعذيبك مع الحرص على إبقائك حياً. تماماً مثل ضباط معتقلات جوانتنامو.

- "هتسب بنت حلوة زبي كدة تمشي لوحدها عشان تتعاكس؟" اخترق صوت فريدة الجميل أذنيه كاسراً حاجز الصمت، "مش كفاية سبتي أجري وراك في الضلمة، لأ و كمان و أنا لابسة كعب عالي؟" أضافت في رقة شديدة محاولة أن تشعره بالذنب.

- "لأ طبعاً ميخلصنيش، أنا حيوان. أنا بس اتخفقت شوية" انفارت مقاومة كريم بسهولة

- "خلاص يا سيدي مفيش حفلة، قتلهم مش هاجي. مبسوط كدة؟"

- "يا سلام؟ ليه كدة؟" تفاجأ كريم، فلم يتوقع أن تفعل شيئاً لأجله

- "عشان حضرتك متبقاش زعلان"

- "همم. بس أنا لسة زعلان" همس كريم في خبث. شعر بأن حظه سيتحسن

- "زعلان؟ طب و يا ترى ازاى متبقاش زعلان؟" ابتسمت فريدة وقد تفهمتم

ما يطمح إليه. أشار كريم إلى خده مبتسماً

- "عاوز بوسة في خدك؟"

- "أه. فيها حاجة دي؟"

- "لأ البوسة في الخد دي أي كلام. دي للعيال اللي زي ميزو. إنما أنت حاجة تانية"

اقتربت فريدة من فمه ببطء. تسارعت ضربات قلبه و شعر بالدماء تجري في كل مكان. لم يصدق ما سيحدث. تمنى أن تستمر تلك اللحظة إلى الأبد. بدأت رائحة عطرها تتسلل لأنفه، رائحة ناعمة دافئة تنهّدي في رقة و دلال كحورية من حوريات الجنة. رائحة لن تُهدأ إلا بعد قيام حرب ضارية بين أقوى الرجال للظفر بصاحبها. عرف أن تلك الرائحة لن تتكرر أبداً إن لم يعتنقها الآن.

- "الله الله. عصفورين يا اخواني طاييرين في السما" فاجأه صوت مختلف. صوت أجش ينوي الخراب

- "سبب الراجل ينسبط يا زكي"

- "ايه ايه ده فيه ايه؟" صاحت فريدة في فرع

نظر كريم في توتر و قد عرف الموقف السي الذي وقع فيه. وجد شاوين راكبين على دراجة بخارية. أحدهما ضخم الجنة كثيف شعر الرأس و الوجه، بينما الآخر طويل و نحيل. بدت علامات التشرد عليهما. لم يخدمه كثيراً نواياه السيئة أو الذنب الذي أوشك على ارتكابه أمامها.

- "بس يابني. دي حاجة متخصصكش" صاح كريم بهما كي لا يظهر عليه أي علامة من علامات القلق

- "ازاي ميخصناش؟ البت دي تخصنا"

- "عيب يابني أنت و هو. دي زي أختكم يعني" علم كريم مدى تفاهة ما حاول أن يفعل. كيف سيقنعان بكلامه بينما كان هو على وشك التصرف بعدم مسئولية معها؟

- "أخت مين يا باشا، أنت هتعملي فيها محترم؟ ما كله باين قدامك أهه"

- "بقولك ايه ياض اظبط كدة أنت و هو خلي ليلتكوا تعدي على خير" لم يدر كريم ما يقول حيث بدأ الغضب يعميه .

- "ياض دي منطقتنا. عيب عليك الكلام ده هتزعل"

دفعه كريم من على الدراجة البخارية في عنف. ابتعدت فريدة و راحت تصرخ.

- "يا بني بقولك دي منطقتنا. و الله هتزعل" أصر الفتى النحيل

- "أنت اتجننت في دماغك يا بني أنت؟ فاكر نفسك جامد؟" دخل كريم في مرحلة اللا وعي؛ لم يع ما يقول تماماً. أصبح في حالة أنه يشاهد ما يحدث مثله مثل الآخرين تماماً. كأنه انقسم لشخصين، أحدهما يتحاور و الآخر يشاهده في دهشة.

- "يا بني أنت ليه بتبق؟ أنت شكلك عاوز تزعل، و أنا مقدرش أرفضلك طلب" أجابه الفتى الضخم

- "طيب ورييني آخرك يا عم الجامد"

- "عاوز تشوف آخري؟ أهو آخري أهه" قالها و أخرج من جيبه مديّة

ثبت كريم مكانه لحظة بينما راحت فريدة تصرخ. ظل الفتان يتسمان في سخرية و تلذذ. أثارهما فكرة أن يأخذا منه الفتاة و التحرش بها كثيراً. تمنيا لو يعطيها لهما طواعية بدلاً من إهدار الدماء. شعر كريم بذلك مما دفعه للتظاهر بالشجاعة. علم أن أحدهما مجنون بينما الآخر لديه بعض العقل. أراد الفتى النحيل إنهاء الأمر دون مشاكل كبيرة، فلم يبعد أقرب مكان مأهول بالسكان كثيراً، بينما بات واضحاً أن الفتى الضخم تحت تأثير المخدر و لا يهتم ما يحدث. أصبح كريم في حيرة من أمره. تذكر والده و خيبة أمله في حالة وفاته، والدته و ما قد يصيها من أمراض قلبية. تذكر حلمه بالاحتراف الذي سيضيع. نقطة ضعفه تكمن في الأمور التي يخاف عليها. ذلك الشك في موقفه أعطى الفتى الضخم فرصة للتمادي. بدأ الشك يتسلل بالفعل إلى أطراف كريم، و اشتتم المجرمان رانحته.

خسر معركة القوة، و لم يتبق له سوى الفوز بمعركة البقاء. بدأ يشك في أن فريدة تستحق الإنقاذ، ربما عليه أن يتركها. و نعم الرجولة!

- "واضح ان آخري معجبكش. مش قلتلك يابني هتزعل"

- "هو أنت ياض كدة راجل لما تبقى ماسك مطوة و اتنين على واحد؟ كدة أنت راجل و مالي بنطلونك؟"

- "أه يا عم أنا راجل. ليك فيه؟"

اندهش كريم من موقفهما. لم يهمهما أي إهانة للرجولة أو الكرامة. من الواضح أنهما يجدان فريدة أجمل من أن يضجيا بها لأجل كرامتهما. فهما يتويان الحصول عليها بأي ثمن. فجأة ركضت فريدة حافية القدمين تاركة حذاءها كي لا يعوق حركتها. أدار الفتى الضخم المحرك و انطلق خلفها. ركضت فريدة تجاه الرصيف. لم يكن ذلك ليوقف دراجة بخارية لكن على الأقل سيعطيها بعض الوقت. ركض كريم خلفها إلى أن مر بمنى كبير بوابته الأمنية مفتوحة. خطرت له فكرة الاختباء بداخل المبنى الذي لا يفتح سوى من الداخل أو من الخارج بمفتاح. فنادي على فريدة بالتراجع. استدارت مسرعة في طريقها للعودة إليه. استغرق الاستدارة بالدراجة البخارية بعض الوقت. وصلت فريدة مسرعة بشق الأنفس إلى كريم فجذبها إلى داخل المبنى و أغلق الباب بسرعة. عندما وصل الفتیان كان كريم وفريدة في أمان نسبياً. راح المجرمان يدقان على الباب بقوة و غباء شديدين وكأنه سينكسر إثر ضرباتهما؛ دون جدوى بالتأكيد. بدأ كريم يتنفس الصعداء. وجد الفتیان يقومان بمحاولات لاستخدام جهاز الاتصال الداخلي لإقناع أحد السكان بفتح الباب لهما. من الواضح أن تأخر الوقت هو الحائل الوحيد أمامهما، فمعظم سكان المبنى نيام بكل تأكيد. أخرج كريم هاتفه الخلوي و اتصل بحمزة سريعاً. طالباً المدد العسكري. دعا كريم ألا يستيقظ أي من سكان المبنى إلى حين وصول الشباب. أخذ يحلم بلحظة وصول أصدقائه ليخرج و يلقي هذين درساً

قاسياً و يظهر أمام فريدة كالملاك الحارس الذي أنقذها من الخطر. علم أن أسهمه قد امتازت بالنسبة لها تماماً.

- "متخافيش يا فريدة. خلاص كله هيقى تمام"

- "...." راحت فريدة ترتعش في مكانها. حاول أن يضمها إليه ليطمئنها

- "متخافيش"

- "ابعد عني. أنت اتجننت؟!"

- "يا سلام مانتى نطقى أهه!" صاح كريم في انزعاج

امتعض في كراهية واضحة و راح يلوح بإصبعه للشابين بالخارج ليثير غضبهما أكثر. مرت نصف ساعة سمع بعدها أصوات آلات التنبيه معلنة وصول الدعم. تلاعبت الأفكار برأسه، فقد حانت ساعة الانتقام، أو ربما خمس دقائق الانتقام. اتضح بعدها أنه لن يحدث أي انتقام من أي نوع لأن الفتيان قد فرا بمجرد وصول الدعم البشري. فتح كريم الباب و راح يلوح بذراعيه إلى أن لمح فهمي. اقترب كريم مع فريدة إلى أن وصلا للسيارتين. لم يصدق أن النجاة قد أتت أخيراً. منذ أقل من ساعة واحدة شعر أنها النهاية.

- "أنت مجنون. فيه حد يعمل كدة" صاحت فريدة في هستيريا. "كنت

هتوديني في ستين داهية"

- "أنا؟ هو أنا عملت حاجة يا هيلة انتي؟" رد كريم في استهجان

- "حصل أي حاجة؟ فيه ايه؟" نزل محمد من السيارة و هرع إليهم في دعر

- "محصلش حاجة يا محمد. متخافش عليا أوي كدة" أجابه كريم في ملل

- "محصلش حاجة؟ أنت عارف لو كانوا قتلوك كانوا عملوا فيا ايه؟" ردت

فريدة في انهيار

- "قتلوني؟ عملوا فيكي ايه؟ يعني أنا مت و كمان المفروض أفكر فيكي؟ أنتي

عبيطة؟"

- "ما تروح في ستين داهية أنا مالي"

- "يا نهار أزرق. مش من شوية كنت كوكي؟"
- "كوكي؟! سمع كريم صيحات الاستهجان من حوله
- "أنت تهتزر؟ يعني مش كفاية مدخلاك مكان و أنت لسة حتة عيل تحت السن، و كمان سبتني أذفع الحساب؟ في الآخر تسيب عيلين تافهين يعملوا فيا أنا كدة؟ أنا؟!" ردت فريدة في غضب
- "أهزر ايه؟ انتي عارفة اللي أنتي خلتيه يموت ده يبقى ايه؟ يا بنتي دي الناس كلها بتجري ورايا. دانا عقود الاحتراف بتطاردني في كل حتة. أنا كاكا اللي مصر كلها بتكلم عنه" صاح كريم في نرجسية واضحة
- "أنا عاوزه أروح حالاً" قالت فريدة في انفعال
- "أيوة طب و أنا دورى ايه؟ ما تروحي" تخلى كريم عن رجولته في ثوان
- "يعني ايه يا كريم أنت اتقبلت؟ دي مهما كان برضه بنت و لازم ناخذ بالنا منها. تعالي نوصلك" تقمص فهمي دور شجيع السيمة
- "لأ أنا معايا عريية. ودوني عريتي"
- "لأ مينفعش. معلنش نروحك النهاردة و خلاص" أصر محمد
- "خلاص خلاص هنمشي وراها بعد ما نوصلها العريية" اقترح فهمي من جديد في حكمة يحسد عليها
- ركب كريم مع فهمي و حازم و معهما فريدة. بينما استقل حمزة و محمد السيارة الأخرى. توجهوا جميعاً إلى سيارة فريدة.
- "باي باي يا فريدة. بكرة بقى توايلايت مش كدة؟" حاول كريم أن يجرب حظه
- "أنت هتستهيل؟!" صاحت فريدة في غضب و خرجت من السيارة
- "طب أي فيلم تاني؟ طيب هنمشي وراكي هه؟ على فكرة بقى اسم كوكي ده زباله و أصلاً مش عاجبي!" صفقت بعدها الباب في وجهه.

حلم العمر

سار كريم في ممرات الجامعة إلى أن وصل للغرفة التي سيقام بها المقابلة الخاصة بالمنحة الدراسية. طرق الباب و دخل في ارتباك.

- "اتفضل يا أستاذ كريم. اقعد" أشار إليه الأستاذ بالجلوس

- "صباح الخير" همس في أدب

- "صباح الخير. ممكن تكلمني عن نفسك شوية"

- "ههههه. أنا كريم رأفت. خريج ثانوية عامة أدبي. حالياً بادرس تجارة إنجليزي في جامعة عين شمس. حلمي اني أحترف لعب كرة القدم برة مصر. كان حلم بعيد عني أوي في الأول و متخيلتش اني ممكن أوصله لحد ما واحد صاحبي عنده واسطة خلانا نشترك...."

- "خلاص هعيط منك كفاية" قاطعه الرجل في وقاحة. تعجب كريم لكن قرر أن يتناسى الأمر، "بتحب تلعب كورة يعني؟ تقدر تقول ده حلم العمر بالنسبة لك؟"

- "حاجة زي كدة. بس أنا مباحش الابتدال فبلاش حلم العمر دي"

- "تمام تمام. طب احكي لي ازاى إدوارد أنقذ إيزابيلا من الموت في الجزء قبل الأخير من تواليلايت"

- "أفندم؟"

- "السؤال مش واضح؟" أصر الرجل في سخافة و كأنه سؤال طبيعي

- "ايه علاقة تواليلايت بالموضوع؟ فيه حاجة غريبة. هي فريدة هنا؟"

- "فريدة مين؟ أنت شكلك مش جاهز للامتحان"
- "ثانية واحدة!" صاح كريم و هب واقفاً، "الموضوع ده مش مطبوط. فيه حاجة غلط. حضرتك قليل الأدب أوي معايا. عمال تسألني عن تفاصيل شخصية و قاعد لابس كت و شورت. و كمان بتسألني عن توابلايت؟ كل ده معناه إني بحلم وش. أنا هقوم من النوم"

- "رايح فين؟" استوقفه الرجل بصوت حاد
- "هقوم من النوم" أجاب كريم في براءة و كأنه يعلن عن ذهابه للحمام
- "أنت هتاخذ المخاطرة دي عادي؟ انك تمشي و تسبب الامتحان عشان عندك شك ان ده ممكن يكون حلم؟" سألته في هدوء
- "بس ده حلم فعلاً" رد كريم و قد بدأ الشك يتسلل إليه
- "بس ممكن يكون مش حلم و ساعتها تبقى سقطت في الامتحان، كل ده عشان عندك شك انك بتحلم؟ ده حتى يبقى عيب"
- "طيب أنت قصدك أما أنقذها في أهني لقطة بالظبط؟" جلس كريم مرة أخرى متأثراً بكلام الرجل

رن جرس الهاتف الخلوي لكريم بصوت عال ليوقظه من أحلامه. تقلب وسقط من الفراش.

- "ألو! مين؟ فين؟" أخذ كريم يردد في غباء
- "كريم. أنا فهمي البرنس. اصطحب و قول يا صبح. أنا كتبتلك يا برنس الطلب بتاع التقديم على المنحة اللي يثبت جدارتك و استحقاقك انك تاخذها. دانا ظبطتلك تظيط. قعدت أشحتلهم كأنك كابتن ماجد في بداية أيامه. عاوز تحطله عنوان ايه؟"

- "ممكن تسميه..." صمت كريم لثوان ليستوعب ما حوله، ثم ابتسم في رومانسية، "حلم العمر"

- "ايه الابتذال ده ياض؟" صاح فهمي في استهجان

- "أمال أسميه ايه يا فهمي طيب؟ أسميه ايه؟ و النبي عاوز أدرس؟"
- "خلاص نتصرف أنا. أنت عايش من غيري ازاي؟"
- "عادي و الله أعيش و أتعاش أهه"
- "اتلهي يابني. بقولك ايه. هو عامر قالك مسافر امتي؟"
- "المفروض الشهر الجاي. الكلام ده كان من ٣ أسابيع"
- "بص، خش قدم على فيزا لإنجلترا على الت لحد ما أخلصك أنا بقية حوارات الجامعة. كلم عامر عشان تشوفه مسافر امتي"
- "و هقول للوالد و الوالدة أنا مسافر بأماره ايه؟"
- "قولهم أي حاجة يا كريم. قولهم الجامعة عاوزة تقابلني مثلاً و روح مع عامر شوف الأجواء"
- "الجامعة عاوزة تقابلني؟ طيب هشوف متشكرين أفضالك يا برنس"

- "جرى إيه يا عامر؟ مكانش حتة عيل يعني هنوديه يحترف. هي دي أول مرة؟" نفخ مدير شئون اللاعبين لشركة "الطومح" لاكتشاف المواهب الشابة في غضب
- "معلش يا مسيو عصام اتقل على الرز" أجاب عامر في برود
- "رز ايه يا عامر، ايه أمثال خالتك دي؟ ده محمدي مخدش في ادينا خمس دقائق. نيمار البرازيلي لما راح يلعب مخدش دقيقتين و نص. دانا لو عاوز أودي جدي تحلل في قناة الجزيرة كان زماي ودقما"
- "هو الفكرة ان الولد لسنة متردد عشان مش مستعد للحياة هناك. بس حضرتك فاكرك إن احنا سايبينه؟"
- "خلينا نفترض إني فاكرك كدة. صححلي معلوماي يا سيدي" عقد المدير ساعديه أمام صدره

- "لا طبعاً يا مسيو عصام. احنا مراقبين تحركاته خطوة خطوة. ده لو رفع سماعة التليفون بنعرف عمل كام دقيقة. أنا قلت ألوي دراعه سنة و قتلته إني رايح لندن الشهر الجاي. ممكن أزقها لآخر الشهر يكون لم أموره. نطلع على هناك نتعجبه البلد و الدنيا فهيريل عليها. عيب، احنا مش لسة ماسكين الشغلانة دي الأسبوع اللي فات أول النهار" غمز عامر في خبث و كأنه ينوي بيع كريم في سوق العبيد

- "عاوزك على آخر الأسبوع تكون قايلي كريم ده بالظبط رايح فين وهيعمل ايه. مش الواد فريد خلاص مضى عقد الاحتراف؟"

- "أه، مضى خلاص. وديناه البرازيل. و كمان أبو حتاتة و شمس و فادي. بس العيال دي شحاتة و مش بتاعة تعليم"

- "دول اللي طلعلنا بيهم من البطولة؟" تساءل عصام في انزعاج، "ده ايه الفقر ده؟"

- "معلش هم دول اللي كان ليهم منظر و طلب. بقية العيال كلها أي كلام. دي مصر شكلها في خطر مفيش لعبية"

- "أمال عاوزين يوصلوا كاس عالم منين بس؟ محدش هيرضهالنا خالص" وافقه عصام في سخرية

خرج عامر من الغرفة في هدوء. ساعدته سنوات عمله في تلك المهنة أن يتحلى بالصبر و البرود. لم يتوتر أو يفقد أعصابه بسهولة. لطالما أحاطت به المشاكل من كل جانب، و عانده الكثيرون للوصول إلى صفقة أكبر، و أحياناً فشل في الطريق مما جعل لديه مناعة ضد القلق. اختلف عصام المدير الجديد عنه في ذلك. بدأ العمل منذ عامين فقط و لذلك فهو دائم التوتر. لم يتزوج عامر سوى مرة واحدة و انتهت بالفشل الذريع. لم يحظ بأطفال من زوجته مما سهل عملية الانفصال، أو الخلع إن شئنا الدقة. فشخص مثله لن يدفع مليماً واحداً في صفقة فاشلة مثل الطلاق. بالتالي لم يتبق ما يشغل باله سوى العمل، و العمل فحسب. اختلفت لعبة

القط و الفأر بينه و بين كريم بعض الشيء، نظراً لانقطاع الاتصال بينهما تماماً منذ لقائهما في المطعم. لم تقم بينهما أي مفاوضات مما أثار غضبه. توقع منه الحماسة المفرطة كغيره من الشباب، لكن كريم التزم الصمت. عزاؤه الوحيد أنه يعرف بالخطي التي يتخذها كريم لأجل السفر، فساعدته هذا على التماسك بلعبة القط والفأر بينهما. فجأة، رن جرس الهاتف الخليوي. ابتسم عامر لرؤية اسم كريم على الشاشة.

- "أيوة يا أستاذ عامر. أنا كريم"

- "أه كريم افكرتك" أجابه عامر في سخافة

- "يا أستاذ عامر أنت نسيته؟ أنا كريم رأفت" صاح كريم ثانية في غباء

- "أيوة والله عارفك يا كريم. ازيك عامل ايه يا فنان؟ أخبار لعب الكورة

ايه؟"

- "والله منقطع. مركز بقي في مستقبلي و كدة..."

- "عال عال. وصلنا لحاجة؟" قاطعه عامر و قد شعر أن الحديث سيتخذ مجرى

مل

- "أنا كنت عاوز أعرف حضرتك مسافر امتي عشان بظبط أموري"

- "همم. بص، عشان خاطرك هعطل نفسي شوية. يوم ٢١ ممكن. مديك أهه

٣ أسابيع تزيط فيهم. حلو الكلام؟ أقنعت أهلك خلاص؟"

- "يعني لسة شوية"

- "كريم. كلمتك في الشغلانة دي عقد. لازم الناس تبقى عارفة انك هتوافق

عشان تدليك عروض" نفخ عامر في عصبية

- "نعم؟ يعني ايه؟ ده سوق الانتقالات طول النهار قدامنا عروض بالعيط

وناس بتوافق و ناس بترفض"

- "دي حركات كدة يا كريم عشان الناس تتسلى و الإعلام يشتغل و الناس

تاكل عيش. أنت فاكّر ده بيحصل بجد؟ كله بيبقى مظبط كله. أنا قديم في

الشغلانة دي. بص يا كريم، احنا مسافرين يوم ٢١. يوم ٢٢ تكون عارف هتعمل ايه. أنا جيتلك تذكرة معايا. اعمل حسابك يوم ٢١ طائرة ثمانية إلا ربع الصبح. الطيران البريطاني. عد الجمايل

- "مبعرش أعد خالص"

- "كريم. متقولش نكت تاني. يلا ظبط أمورك و أنا مستنيك"

أغلق السماعة بسرعة قبل أن يتفوه كريم بأي مزحة أخرى. ظل كريم محدقاً في الفراغ لثوان ثم قال "هو ليه حس الفكاهة مات عند الناس كدة؟ استمر ياض يا كريم أنت كويس" صفق لنفسه مشجعاً

مرت الأيام، و تحصل كريم على تأشيرة السفر إلى إنجلترا، و لم يتبق سوى خطوة واحدة على تحقيق حلم العمر و هي إقناع والديه بالسفر لاستكشاف الأجواء في لندن. لم يعتد الكذب كثيراً، لكنه قرر أن احتراف الكذب هو طريقه لاحتراف كرة القدم. لن يخسر والداه شيئاً من سفره يومين إلى لندن. علما باحتمالية سفره بأي حال منذ قرر الاشتراك بالبطولة. سيفقد المدينة التي سيقم بها و النوادي المهمة بالتعاقد معه. لندن من أكبر المدن المشهورة بكرة القدم و بكثرة الفرق، فتأكد أن فرصة احترافه بناد محترم كبيرة جداً مما زاد من حماسه. شركة "الطموح" ستتكفل بكل نفقاته في لندن هذين اليومين فقلل هذا من شعوره بالذنب. لم يجزؤ على إخبار والديه أنه يأخذ خطوة ناحية الاحتراف قبل إتمام مسألة الجامعة. توجه إلى باب غرفة والديه و طرق الباب.

- "ست الكل" دخل كريم محاولاً كسب رضا والدته التي انهمكت في

التحدث عبر الإنترنت عن طريق برنامج المحادثة الشهير "سكايب"

- "عاوز ايه يا كريم؟" سألت والدته، سيدة مجتمعة من الدرجة الأولى، فلم يخل

عليها محاولات المداعبة السخيفة أو الضعيفة.

- "لأ عادي، أنا مسافر لندن الأسبوع الجاي. الجامعة عاوزة تعمل معايا
مقابلة عشان يشوفوا مدى أحقيتي بالمنحة الدراسية"

- "يا سلام؟ معرفش ليه شاكة فيك" نظرت إليه والدته في ذكاء

اقتحم والد كريم الغرفة و كأنه انتظر إشارة خفية أو كان يتجسس عليهما.
نظر إليهما في شك. راح يقيس أجواء الغرفة ليستنبط أي معلومات لكن دون
جدوى. نظر إلى كريم و قال:

- "شكلك عامل عاملة يا كريم، صح؟"

- "كريم خلاص مسافر من غير ما ياخذ رأينا. بيقول رايح الجامعة" مارست
والدة كريم هواية أي أم مصرية في إثارة الأحداث

- "جامعة ايه يا كريم؟ هو أنت اتقبلت؟"

- "لأ لسة. هيعملوا معايا مقابلة يشوفوا أنا أستاهل المنحة الدراسية دي ولا
لأ. يومين و راجع. يومين و راجع. يومين..."

- "و راجع؟" قاطعه والده بنفاد صبر

- "ايه ده عرفت ازاي؟" ابتسم كريم في سخافة

- "أنا مش هتكلم كثير. أنت عارف مصلحتك فين، بس شغل موبايلك
تجوال"

عانق كريم والده، و ابتسمت الأم و قد خضعت لرغبته هي الأخرى. اعتاد
كريم على تحقيق الرغبات فقط بتلك الطريقة، لم يمتلك أي قدرات إقناعية. كسب
تعاطف الناس ليحققوا له ما يريد. قدراته الجدلية و طول نفسه لا يستهان بهما
أبداً، لكن ليسا سر نجاحه، بل ملل الناس من طيلة الحديث فبالتالي يخضعون
لرغبته. اتخذ كريم من السفسطائيين مثلاً أعلى، كان محامياً للشيطان نفسه كما
يقولون. أدان بجزء كبير من الفضل، إن لم يكن كله، إلى فهمي الذي لطالما اعتنى
به كثيراً و رعاه. لم يتفهم كريم أبداً كيف سيعيش دونه. قلما تجد صديقاً بهذين
الإخلاص و الاهتمام الحقيقيين. تعهد كريم بأن يحاول رد الجميل لفهمي عند

مقدرته، و لحسن الحظ، لم يأت اختبارٌ مثل هذا بعد. لم تجذبه فكرة السفر بمفرده لكن توجب عليه أن يتجلد و يأخذ المخاطرة حتى يعود غائماً. تلك الطريقة الوحيدة ليحظى بحياة كريمة في نظره، أو بفتاة مثل فريدة. لو كانت الحياة فيلماً، فسيضع له نهاية سعيدة. لن يوقفه أحد أو يمنعه من تحقيق حلم العمر، مهما بدا المبدأ مبتذلاً.

أثناء توجهه لغرفته أخذ يفكر في حسن حظه بأن تواتره فرصه كهذه بينما لم تأت لأي من أصدقائه. ربما هذا ما يدفعهم لمساعدته بتلك الطريقة. فجميعهم يخشون ضياع فرصة لم تواتهم. لهذا يسعى فهمي و كأنه يسعى لنفسه؛ لهذا يساعده حمزة و كأنه شقيقه الأصغر. ليس هذا حلمه وحده، بل حلمهم جميعاً. نجاح كريم يعني أن بإمكان أي منهم تحقيق نفس النجاح. لم يفعلها أي منهم لأجل كريم بل لنفسه، كي يشعر بنفس الأمل في مستقبل أفضل. كريم نفسه لم يفعلها لأجله فحسب، بل لأجلهم جميعاً. أدرك في تلك اللحظة أن ليس من حقه إضاعة تلك الفرصة لأنها ليست مجهوداته وحده، بل مجهودات مجموعة من الشباب وقفوا بجواره و ساندوه طوال الفترة الماضية. يدين كريم لهم بأن يسعى و يحاول الوصول للمجد و تشجيعهم على اللحاق به. ما المشكلة في كذبة أو اثنتين كي يصل إلى ذلك؟ في النهاية الغاية تبرر الوسيلة، و الوسيلة نفسها ليست بذلك السوء. لن يفعل شيئاً دون موافقة والديه. سيسافر للاحتراف و يحقق حلمه و حلم أصدقائه. شعر بارتياح كبير و ابتسم عندما توصل لذلك الاستنتاج. وضع رأسه على الوسادة و نام كالأطفال.

مارس عامر رياضته اليومية بالركض في شوارع مصر الجديدة، تحديداً بمحاذاة سور شارع عمار بن ياسر الشهير. سكن بإحدى أقدم الشقق في المنطقة. رأى أن طبيعة عمله بالرياضة تستدعي بقاءه رشيقياً و سليم الجسد. يساعده على ممارسة الرياضة عقله الذي لا يتوقف عن العمل. يقضي قرابة الساعة في الركض دون أن يلحظ ذلك. كان على وشك إنهاء آخر صفقة له من حصيلته الموسمية، مما يعني له كلمة واحدة: المال.

ظل واثقاً من إتمام صفقة كريم على أكمل وجه. فجأة شعر بالحماسة وراح يعدو بقوة إلى نهاية السور، ثم التف و عاد ينظم نفسه و أفكاره مرة أخرى. من الصعب إثارة اهتمام رجل مثل عامر، حيث تقلب مزاجه بشكل كبير لدرجة أن أشار البعض إلى إصابته بما يعرف بالاضطراب الوجداني ثنائي القطب. لم يلتفت لتلك الاتهامات، فهو لا يعتليه الاكتئاب كي يخشى إصابته بذلك. فسر البعض، وعلى رأسهم طليقته، صمته اكتئاباً مما دفعهم إلى ذلك التشخيص النام عن الجهل الطبي مع كثرة مشاهدة المسلسلات الطبية على شاكلة "هاوس" التي جعلت أي شخص يتظاهر بغزارة معلوماته الطبية، بينما في الواقع معلوماته عن الطب لا تتعدى أن البرتقال يحتوي على فيتامين سي. لطالما فكر عامر في أن يعمل بمجال الإعلانات نظراً لخبرته في علم النفس و شعر أنه من السهل عليه قراءة سلوك المستهلك؛ لكن يستحيل أن يترك تجارة رابحة مثل كرة القدم. ضحك عندما راوده ذلك الخاطر. في تلك اللحظة رن هاتفه. اضطر عامر إلى السير قليلاً لتنظيم الأنفاس قبل أن يرد. وجد أحد أرقام الشركة التي يميزها بالنظر.

- "أيوة مستر عامر، معاك رنا" ردت موظفة الاستقبال بالشركة

- "أهلاً يا روني" ابتسم عامر. أدرك أن دور رنا في انفصاله عن زوجته لم يكن بسيطاً

- "احم...مستر عصام كان عاوز يعرف يبلغ الحسابات يقفلوا الدنيا ولا الصفقة بتاعة كريم دي هتيجي؟"

- "يقفل الحسابات ايه؟ لسة بنعمل الحركات دي؟ احنا في شهر كام. عموماً يوم ٢٣ كريم ده هيبقى ماضي على العقد"

- "ايه الثقة دي يا مستر عامر؟ ده بقاله كتير أوي منيمنا"

- "اللي زي كريم ده أنا عارف هيبجي ازاى. هعرف ازاى أقنعه"

- "طيب كويس ان فيه خبر حلو. عشان... ترددت رنا قليلاً"

- "عشان ايه؟"

- "حصل مشاكل كدة و فريد مكانش متعاون"

- "مكانش متعاون؟ هممم، معجوش الكلام يعني؟ عادي يا رنا، كل شوية وشوية لازم حد يقع مننا. ماهي الشغلانة دي مش سهلة. اديله شوية وقت، دي حماسة شباب. لما يقعد على دكة الاحتياطي حبة كويسين هيكتشف ان مش قدامه حل تاني غير انه يتعاون"

خطأ شائع

كانت أول زيارة لكریم إلى لندن، و أعجب بها كثيراً قبل أن يراها. تخيلها رائعة بدون شك فقط من روعة مطارها. علم أنه جاء في مهمة رسمية و هي استكشاف الأجواء لمعرفة كيف يرسم خططه المستقبلية. لم يمنعه ذلك من أن يشعر بالسعادة لزيارته مدينة عريقة و كبيرة مثل لندن. شعر بالقليل من التعب نظراً لرحلة الطائرة التي اعتبرها طويلة مقارنةً بأي رحلة أخرى خاضها من قبل. تلفت متفحصاً الوافدين في المطار. لفت انتباهه الفتيات الجميلات ذوات الشعر الأصفر و العيون الزرقاء، فلم يتمالك نفسه صائحاً:

– "أيوه بقي، هو ده الصح"

– "لأ بقولك ايه، البياءه دي مش هنا" قال عامر، "عاوزك يا كريم تبقى مفتوح معايا كدة و مركز عشان الحاجة اللي أقولها لك مكرهاش تاني و متنسهاش أبداً، بلاش شغل التوهان بتاعك"

– "ايه ده ايه ده؟" رد كريم في امتعاض، "أنت منين أصلاً كونت عني فكرة زي دي، مين قالك ان أنا تايه؟"

– "يعني يا كريم بقالي أكثر من شهر باعملك أفلام أكشن و ماسكلتك موبايلات و بدلة و نظارات شمس و حركات، و في الآخر برضه لسه عاوز تشكك في قدرائي؟ أنا مش محتاج أسأل عليك عشان أعرفك"

اتجهوا معاً إلى المصعد مستقلين القطار الصغير إلى صالة الوصول الأخرى. التزم كل منهما الصمت طوال الطريق. انشغل كريم بمراقبة الناس منبهراً بأشكالهم، عاداتهم وتقاليدهم بينما أخذ عامر يرسم برنامج اليوم جيداً. لم يحب أن يترك شيئاً للظروف أو الصدف. آمن بوضع الخطط المحكمة المضادة للغباء كي تسير الأمور بالشكل المرغوب. على الجانب الآخر اكتفى كريم بالغناء الخافت محاولاً ألا يقلق بشأن أي شيء أو يفكر فيما قد يحدث. وصل القطار لمكانه، و تفاجأ كريم بالزحام الشديد مثلما يعهد في بلاده. تراحوا إلى أن وصلا للسلام المتحركة. وقف كريم على السلم و من خلفه عامر.

- "من أولها كدة عشان تبقى عرفت، متقفش على الشمال خالص" جذبه عامر في هدوء

- "ليه بقي، ايه الحكمة؟ أنت من الناس بتاعة خش برجلك اليمين و الجهل والحاجات دي؟ اخص. مش فاهم الناس بتجيب الحاجات دي مين" امتعض كريم

- "الناس هنا على طول مستعجلة، دقيقتها بفلوس. فالناحية الشمال دي بتبقى للناس اللي عاوزة تجري" رد عامر و قد تجاهل المحاضرة الأخلاقية ذات الأساس المنعدم

واصلا السير إلى بوابة المطار. وجدا سيارة في انتظارهما. نظر كريم في فضول إلى السيارات بالشارع. أراد التأكد بنفسه من وجود عجالات القيادة على الجانب الأيمن. ابتسم في بلاءة عندما رأى ذلك و ركب السيارة في انبهار. انطلقت السيارة في طريقها دون أن يتحدث عامر إلى السائق أو يوجهه. بات من الواضح أن تلك الزيارات مجرد روتين بالنسبة إليه. لم تكن أول مرة له مع شاب منعدم الخبرة و لديه الاستعداد للانبهار بأي شيء قروي ساذج، و لذلك قرر ألا يتحدث كي تسير الأمور بأكثر الطرق سلاسة و هدوء.

نزل عامر و كريم في تمام الساعة الرابعة من غرفتيهما بالفندق. مكثا في فندق فخم للغاية مما زاد من انبهار كريم. لم يعتد النزول في فنادق مكلفة كهذه لأنه دائما ما سافر مع أصدقائه و انتقي الفنادق الأكثر قيمة مع أقل سعر. تمتع الفندق بخدمة غرف عظيمة، و الغرفة نفسها أكثر من رائعة. بدأت الرحلة بجولة قصيرة في بارك لاين. ظلا سائرين على قدميهما إلى أن أمكنهما مشاهدة قوس النصر من بعيد. ابتسم كريم و نظر إلى السماء ذات الغيوم. اقتربا أكثر فوجدا تماثيل للحيوانات في وسط حديقة صغيرة جميلة.

- "ده يا سيدي ضريح للحيوانات اللي ماتت في الحروب" قال عامر دون أدنى تأثر

- "يااااا. حقيقي؟ الناس دي ما شاء الله بتقدر الروح فعلاً. حتى الحيوانات"
- "شوف أنت بقي، رغم ان فيه بلاد تانية مبتقدرش حياة البني آدم. لازم يحسوسوك انهم مرهفي الحس"

- "طب هتاخدلي صور عند قوس النصر ولا لأ؟" سأل كريم في سعادة طفولية
- "أنت معاك كاميرا أصلاً؟"

- "بلاش عقلية التسعينات دي يا حاج عامر، هتصورني بالموبايل. يلا يلا"
جذبه في حماس و سار عامر خلفه على مضض ليلتقط له بعض الصور عند البوابة الرخامية الكبيرة

التقط عامر بعض الصور لكريم بأوضاع مختلفة إلى أن اكتفى و عاد مرة أخرى ليستكمل المسيرة.

- "هتوديني فين بقي؟" سأل كريم

- "أنت ليه محسستي انك مراي و بفسحك؟ انهاردة هفرجك على لندن كلها من فوووووووق" قالها و أشار إلى السماء

- "مش هنروح أي استاد بتاع كورة؟" حك كريم يديه في حماسه و كأنه يتحدث عن وجبة الغذاء

- بص يا عم كريم. الدنيا هنا مش زي عندنا. مفيش أي جولات في الاستاد بتحصل في التوقيت ده خالص، هنا البركة في البكور. و مش في الاستادات بس. المزارات السياحية برضه بتقفل بدري. بكره هوديك الاستاد اللي أنت عاوزه"

- "أمال هنروح نتفصح ازاي انهاردة لما كل حاجة بتقفل؟" تسأل كريم في نصيحة

- "لأ عين لندن بتبقى شغالة بالليل عادي. بتبقى أزحم أصلاً، عشان المنظر يبقى وهمي"

- "عين لندن؟ دي عبارة عن ايه؟"

- "لما تشوف هتعرف" ابتسم عامر و قاد كريم إلى سلام تحت الأرض

- "هناخد المترو؟" تسأل كريم

- "لأ هنزل نطمن على الميتين. أكيد هناخد المترو يا كريم" رد عامر بلهجة سخيفة

اشترى عامر تذكرتين لمترو الأنفاق و راحا يسيران في الممرات و عبرا البوابة الإلكترونية لمخطة هايد بارك كورنر. سار في خطوات مدروسة عبر خط بيكاديللي و تبعه كريم دون نقاش. استقلا القطار فجلس كريم على الفور بينما ظل عامر واقفاً.

- "مش هتقعده؟" سأله كريم

- "أصل كلها محطتين و هنزل نغير ناخذ خط ديستريكت. أنت عامة اتعود متقعدهش على طول أما تركب عشان هنا لازم تراعي كبار السن و تراعي الدنيا زحمة ولا لأ و كذا حاجة تانية. فمتقعدهش إلا لو سكتك طويلة و تظمن إن الدنيا فاضية، و حتى ساعتها نقي كرسي بعيد عن الباب عشان محدش يزهقك، أبعد عن الكراسي اللي بتتفتح. خليك في الكنب عشان محدش يبقى ليه عندك حاجة"

نزلا عند محطة ساوث كرينجتون و استقلا خط ديستريكت المتجه إلى أب مينيستر. وصلا في النهاية إلى المحطة المنشودة و هي ويست مينيستر.

- "أنت حافظ بقى" قال كريم في إعجاب

- "المثرو ده أسهل حاجة في الدنيا، بكرة تحفظه أكثر مني. امسك الخريطة بس و هي كلها لعبة سلم و تعبان، هتبقى أستاذ و تتمشى في لندن دي كلها لوحدهك على رجلك. و مين عارف يمكن تلعب معاك و تجيب عربية و تبقى مش محتاج تاخذ مواصلات خالص، أو مش يمكن أصلاً يبقى ليك عربية خاصة هدية إمضاء للعقد؟" قالها عامر و ابتسم في خبث واضح

- "عربية؟ ده بجد" قال كريم في انبهار، "هيدوني عربية؟"

- "مش يمكن. الله أعلى و أعلم. السن القانوني هنا للسواقة ١٧ سنة" غمز عامر مستمراً في لعبة القط و الفأر

صعدا السلام سريعاً و بدأ ضوء الشمس التي لم تكن موجودة أصلاً يخف شيئاً فشيئاً. استمتع كريم بمنظر الشوارع و إن ضايقه الزحام الشديد في المنطقة. لم يطق الزحام أبداً و انزعج من أن وجد لندن بهذه الطريقة.

- "ايه الزحمة دي؟ أنا مش بحب كدة" نفخ كريم في غضب، و لاحظ الدخان المتصاعد من فمه

- "مبتحبش ايه بالظبط؟ دي سنة الحياة يابني. أنت كمان في منطقة سياحية يعني مفيش مفر من الزحمة. شايف البتاعة اللي عاملة زي ساقية الملاهي هناك دي" أشار عامر إلى مركبة دائرية كبيرة

- "أه شايفها، ما تيجي نركبها" لمعت عينا كريم

- "هي دي عين لندن" ابتسم عامر سعيداً بأن أعجبه

- "هي دي لندن بعينها؟" قالها كريم و ضحك

- "تصور حلوة" ضحك عامر نصف ضحكة، "بس حاول تقلل منها، أصل

فيه حاجات كدة تضحك مرة و متكرررش" رمقه عامر بنظرة نارية

- "هي ايه دي؟"

- "عين لندن"

- "لندن بعينها؟" قالها كريم و ابتسم في ظفر، عشق استخفاف الدم، ولمفاجأته ضحك عامر ثانيةً

- "تصور عجبتي أكثر تاني مرة. قلها تالت كدة عشان نروح بقى"
- "لأ خلاص بقت بايخة" رد كريم في سماجة. ضحك عامر و اتجهوا إلى الطابور الطويل أمام شباك التذاكر
أشار كريم إلى الطابور الطويل، و أمسك رأسه كأنها على وشك الانفجار، وقال:

- "بص، خديني على قد عقلي"
- "هو أنا بعمل غير كدة؟" نظر إليه عامر في برود
- "قولي ان الطابور ده مش طابور التذاكر بتاع الشئ اللي هنركبه ده، خلينا نفترض ان ده طابور محل ساندوتشات جامد أوي و صادف إنه موجود جنب طابور التذاكر"

- "ده مش طابور التذاكر اللي احنا هنجيبها متقلقش" رد عامر في ثقة
- "ايه ده بجد؟" سأل كريم في لهفة
- "مش أنت قلتلي أخذك على قد عقلك؟" أجابه في هدوء
- "حاج عامر، أنا زهقت من البلد دي و منك شخصياً، تعالى نروح"
- "كريم. أنت ليه لحد دلوقتي متخيل اني مش عامل حساب كل حاجة؟" رد عامر في انزعاج، "أنت لو فجأة حسيت ان بطنك واجعاك هبقى أنا عرفت وجبتلك الدوا قبل ما تحس بالوجع أصلاً. ممكن بقى تبطل لماضة؟ أنا اشتريت التذاكر من الأوتيل، احنا نازلين في الهيلتون، أنت لو عاوز تشتري عريية هيجيوها لك لحد هناك. عاوزك تركز معايا و تفتح. احنا هنعدي من فيلم التذاكر و هندخل من الدخول السريع، فيها طابور برضه. هنا بقى تتوقف الاحتياطات الأولية، و مضطرين نخط اللمة المصرية على الموضوع" جذبه من يده لنصف الطابور

أخذ عامر يراقب المصطفين، و استقرت عيناه على فتاة جميلة تقبل صديقها في اندماج و لهم. اتخذ قراره سريعاً و أشار إلى كريم ليتبعه. وقف أمام العاشقين الولهائين و تحدث إليهما بلغة لم يفهما كريم. نظر إليه من يقف خلفهما في شك، لكنه وجد عامر مندجاً معهما في الحديث فزال الشك عنه و ظل واقفاً دون اعتراض. نظر العاشقان إلى عامر في دهشة ثم أكملما ما بدأه من شوق و حنين. وقف كريم بجوار عامر في حيرة دون أن يفهم ما حدث.

- "أنت تعرف الناس دي منين؟" سأل كريم و قد ملأه الفضول

- "معرفهم منين يا كريم مانا لسة شايفهم قدامك أه. زيي زيك"

- "أمال كنت بتتكلم معاهم ازاي؟"

- "بسيطة يا سيدي، دائماً أما تلاقي الطابور زحمة أوي تدور على أي حد يتسم بالآتي: يكون مش مركز أوي في الطابور، مندمج في حاجة، و في نفس الوقت يكون ميعرفش يتكلم إنجليزي. عشان لو مندمج، و في حالة العصفورين دول بالذات، مش هيفرق معاه أصلاً مين دخل و مين خرج. ممكن تفتك الزيادة تقنعه انك كنت في الطابور و خرجت تحيب حاجة. و ميعرفش يتكلم إنجليزي عشان لو وقفت قدامه يقولكش بالإنجليزي حاجة تدل إنك جاي واخذ مكان مش مكانك. في نفس الوقت لما اللي حواليك يلاقوك بتتكلم لغة أجنبية هم مش فاهمينها و مندمج مع حد في الحوار برضه مش بيتكلم إنجليزي هيفتكر إنكم مع بعض فمش هيعترض انك أخذت مكانه في الطابور"

- "ياااه. ده علم بقى" قال كريم مأخوذاً، "و أنت كنت بتتكلم معاهم ايه

بقى؟"

- "أه ده علم الأوكا لالا. و اللغة برضه اسمها أوكا لالا. كل كلامها بيتكون

من أوكا لالا. ميعرفش تقول أي كلام يا كريم؟ أي هتيس مادام اللي قدامك

مش فاهمه هيفتكره لغة تانية، كأنه فارسي يا سيدي ولا عبري"

- "دانا ناقصني حاجات كتير أوي"

- "ولا يهملك يا سيدي، أنا موجود هنا عشان أكملك اللي ناقصك، يلا وصلنا أهه هنركب أخيراً" أشار عامر إلى الكبسولة الإلكترونية

ارتفعت الكبسولة بهما شيئاً فشيئاً، و أبدى كريم إعجابه بصوت عال وملحوظ. أصبح المنظر أقرب إلى الخيال من فرط روعته. مدينة لندن تتراقص من تحت قدميهما بأضوائها الجميلة الساطعة مع حلول الظلام و اختفاء قرص الشمس تدريجياً. شاهد كريم المباني الجميلة من حوله. أكثر ما أعجبه في لندن هو الطراز القديم للمباني و كأنه يعيش في عهد الملك هنري. قارنهما في خياله بالمباني العريقة الكامنة في وسط البلد و مصر الجديدة بالقاهرة. ذلك الطراز المعماري الفخم الذي ينم عن الأصالة و التاريخ الطويل للبلاد. شعر بالراحة النفسية و السعادة و بدأ يستمتع باللحظة. شاهد السيارات و هي تسير في انتظام و كأنها تعمل بجهاز تحكم عن بعد، السفن و المراكب و هي تتهاذى في نهر التايمز، الناس بحجمها الصغير و هي تركز و تلعب في الحديقة و كأنها صورة مصغرة بالحاسوب. تخيل كيف ستكون حياته لو قضاها في مكان كهذا حيث تكمن كل متع الحياة رهن إشارته؛ فقط على بعد رحلة مترو واحدة.

- "ايه المباني اللي هناك، اللي شبه القصر دي؟" أشار كريم إلى مجموعة من المباني المتجاورة باللون الذهبي

- "اللي شبه القصر؟" ابتسم عامر في سخرية، "هو أنت لما تشوف حيوان ودانه طويلة و ماشي لابس بردعة و بينهق. بتفترض انه حمار ولا حاجة شبه الحمار؟"

- "ايه اللي جاب سيرة الحمار؟" رفع كريم إصبعه لأعلى و كأنه يهدد عامر بكشف تاريخ عائلته

- "أصل هو قصر فعلاً، فمفهمتش سؤالك. ده يا سيدي قصر ويست منستر، أو معروف بشكل عام أكثر باسم مبنى البرلمان"

- "اللي هو مجلس الشعب يعني" رد كريم في تفهم

- "أحب أحبيك يا كريم، ذكائك زاد خلال الساعة اللي فاتت" ابتسم عامر

- "ايه حكايته يا سيدي المبني ده، و ايه علاقته بالبيج بن؟"
- "هممم. دي مشكلة. أنا ممكن أوديك السجن في اللي أنت قلته ده"
- "اطربني" قال كريم في ملل و قد توقع محاضرة جديدة
- "المبني ده يا سيدي صممه واحد اسمه سير تشارلز باري. كان الأول اتحرق و اتدمر في القرن الـ ١٩، و عملو مسابقة مين اللي يعيد إحياءه، و الراجل ده كسب. المبني ده متصمم بأسلوب اسمه القوطي المتعامد، مش مهم تفهم يعني ايه عشان أكيد هتعايني. زي مانت شايف كدة، فيه ٣ أبراج. أطول واحد اللي واخد الركن ده برج فيكتوريا، اللي أقصر شوية ده برج إليزابيث، و اللي في النص ده البرج الأوسط أو المركزي"
- "فين بقى البيج بن؟" تسأل كريم في إصرار
- "بص يا سيدي ده خطأ شائع"
- "البيج بن ابن حرام يعني ولا ايه؟"
- "لأ يا خفيف. التسمية نفسها خطأ شائع، بس عارف الحاجة من كتر ما بيتغلط فيها بتلزنق و بتبقى هي الأساس. من كتر ما الناس مصرة ان المبني اسمه بيج بن بقى فعلاً اسمه الشائع بيج بن"
- "ايه ده، يعني أنا لو أصريت ابي أسميه عواد هتلزنق؟ يعني ايه؟ أكيد فيه سبب معين ان الاسم ده لزق"
- البرج اللي أنت فاكر اسمه بيج بن ده هو برج إليزابيث، أو برج الساعة. ده تالت أكبر برج ساعة حر في العالم. بيج بن ده اسم أكبر جرس موجود جوة الساعة. هم ٥ أجراس، اللي أشرف على تركيب الجرس الأكبر اسمه سير بنجامين هول، و اسمه محفور على الجرس. فيه نظريات تانية عبيطة بس دي اللي أنا مقتنع بيها. الاسم الحركي، اللي هو بيج بن، اقترحه واحد من أعضاء البرلمان. شهرة الجرس الشديدة دي طبعت على الساعة، و طبعت على البرج فبقى اسمه بيج بن. بس كدة خلصت الحدوتة"

- "و من ساعتها الناس كلها بتقول بيح بن. شوف الجهل. و أنت بقى دارس هندسة معمارية و تاريخ إنجليزي و كل الكلام ده؟"

- "لا، بس برکز أوي. أهم حاجة إنك تركز. كل ما تبقى عندك فرصة تعرف معلومات لازم تركز. المعلومات هي القوة. كل ما تعرف أكثر كل ما تبقى مالك اللي حواليك. يعني دلوقتي لو كنت قتللك ان اسمه برج شفيقة، و أنا واثق من كلامي كنت هتعارضني؟ يعني مين قالك اني مش بقى عليك و ان البرج الطويل ده اسمه مثلاً برج بنجامين هول أو هنري تودور؟"

- "مفيش دليل فعلاً"

- "بالظبط، يبقى زود على المعلومات كمان الثقة بالنفس و في اللي أنت بتقوله. لو عاوز تقنع واحد إنجليزي إنه ميعرفش إنجليزي هتقنعه"

- "حاضر، بس مجاوبتش على سؤالي"

- "مش مهم جيت المعلومات منين. مجاش في بالك إني ممكن أكون قاري الكلمتين دول قبل ما أقابلك عشان أعمل عليك جامد و بفهم؟ مفكرتش إني ممكن أكون حضرت جولة سياحية في أي قصر من دول كام مرة و سمعت الكلمتين عملت فيها واحد تقفيل إنجليزي و عايش فيها بقالي ميت سنة؟ ممكن أبقي لسة عارف المعلومة زيكي مبقاليش ثواني، ممكن أبقي سمعتها من واحد جنبي. مش مهم يا كريم، المهم أنا استخدمتها ازاى و امتى و عملت بيها ايه. عرفت عاوز أوصلك ايه؟" بدا عامر جاداً للغاية فأوماً كريم إيجاباً، "مش أنا بعد الحدودة دي حسستك اني جامد و معلوماتي مبتخلصش؟ يعني لو قتللك أي حاجة بعديها كنت هتسمعها من غير ما تفكر حتى صح ولا غلط؟"

- "أيوة"

- "طب لعلمك بقى أنا معلوماتي عن الهندسة المعمارية صفر. معرفش إيه الأسلوب القوطي المتعامد ده. بس لما حسستك انك غبي، فكرت تسألني عليه حتى؟ كنت هتشتني لو سألتني. بس أنت مسألتش. فتفكر ليه؟" سألته عامر مبتسماً

- "عشان حسيتك عارف فمفكرتش أزنقك" رد كريم و قد ابتسم في استيعاب

- "أنا ممكن أكون سمعتها في وسط حاجة. مش فاكرك حتى سمعتها منين، جه في بالك تستفسر حتى؟"

- "أكيد لأ؟"

- "بالظبط. سؤال كمان، أنا ليه بصاركك بحاجة زي كدة؟"

- "عشان ارتحتلي؟" رد كريم في أمل، و قد شعر أن كسب رجل مثل عامر في صفه سيكون من حسن حظه

- "عشان أنا عارف ان معلومة زي دي مش هتأذي في حاجة لما أنت تعرفها. لكن هل أقولك مثلاً اني حبيت أكسر عين مراي فسلطت عليها واحد عشان تبقى هي اللي خانتني؟"

- "نعم؟" انتفض كريم من المفاجأة

- "المعلومات قوة يا كريم. و عشان كدة متدبش لحد معلومة مش محتاج يعرفها، أي معلومة ممكن الواحد يستخدمها ضدك متديهاوش مادام مش محتاج يعرفها. متحطش مستقبلك في ايد حد تاني. فهمت يا كريم؟"

- "أيوة. المعلومات، الثقة، التركيز. ماشي. طيب سؤال معلش مش قادر لازم أسأله"

- "مش شغلتنك تعرف موضوع مراي ده بجد ولا لأ؟" رد عامر في ثقة، "خلال ١٠ ثواني هتبص للكاميرا اللي فوق دي، هتاخذنا صورة. شوف أنت عاوز تبقى عامل ازاي لما الصورة تناخد، عاوز تفتكر نفسك في اللحظة دي ازاي"

نظر كريم إلى أعلى ليجد الكاميرا كما قال عامر. لم يعد لديه شك في أي شيء يقوله. اجتمع الناس من حولهما استعداداً للصورة التذكارية. اقتربت الكبسولة رويداً رويداً من الأرض بعد التقاط الصورة. بدأت عملية الإخلاء في سرعة مدروسة حيث يقفز الناس من الكبسولة قبل أن تمضي للأمام قليلاً و يركبها أناس

آخرون من الجهة الأخرى لترتفع ثانيةً دون توقف. ذهب عامر لإحضار الصورة التذكارية و عاد بعد قليل.

- "تعالى نطلع نتمشى على نهر التايمز شوية و بعدين نتغدى ولا حاجة. أنت مش جعان؟" سأل عامر

- "لما أنت جيت سيرة الأكل جعت" ابتسم كريم و تحمس معدته

قاده عامر إلى مترو الأنفاق دون أن يخبره باسم المطعم. أخرج كريم الصورة التي تم التقاطها في عين لندن ليتأملها. رأى في الصورة أناس مبتهجة، و رأى شاباً يجلس بجواره رجل، أحدهما حائراً ضالاً و الآخر مبتسماً في ثقة. بالتأكيد لم يكن هو المبتسم في ثقة.

في اليوم التالي ارتدى كريم زياً رياضياً خفيفاً و نزل من غرفته منطلقاً إلى الشارع مع عامر. سارا عدة خطوات إلى أن وصلا لأقرب محطة و استقلا المترو إلى محطة أوكسفورد سيركس. وصلا إلى مطعم واجهته حمراء، و عليه اسمه "جارفانكلز" بحروف ذهبية كبيرة و جلسا معاً لتناول الإفطار.

- "هتفطرني على حسابك؟" جلس كريم في سماجة.

- "هفطرك بس؟ ده أنا كمان هفسحك أحلى فسحة يا مان، الهاردة اليوم الرياضي بتاعنا. ده اليوم اللي فيه هتحسم أمورك يا باشا. هتفرج على الاستاد وتأخذ صورك و الذي منه" استمر عامر في حماسة بدت مصطنعة، لم يلتفت كريم لها فقد كان متحمساً بالفعل، "عاوز تروح فين الهاردة؟ أنت لابس فائلة تشيلسي ليه؟ على أي أساس؟" سألوه و هو يشير إلى ما يرتديه في ضيق

- "عشان بحبه. هكون لابسها ليه" أجاب كريم في بساطة

- "بص يا كريم. سمعت عن الحكمة اللي بتقولك مفيش حد بيعب أوي إلا لما يتجرح أوي؟"

- "ايه جو أسامة منير ده؟" سأله في سخرية

- "مفيش حاجة اسمها بحب تشيلسي، مين قالك انك المفروض تحب تشيلسي؟

النادي اللي بتحبه هو النادي اللي بتلعب فيه!"

- "بس أنا بحب توتنهام بحبه برضه. و مانشستر سيتي فيه لاعبية بحبها"

- "بجد؟ طب اسمع كويس يا كابتن مصر. بلاش كلمة بحب دي عشان مش

حلوة. أنا عارف ان عندنا في مصر تلاقي واحد بيتكلم من أسويط في البرامج

يقولك أنا بعشق نادي الأهلي و من كبير المشجعين مع إنه المفروض يشجع أسمنت

أسويط، و تلاقي رابطة للأهلي في السويس مع إنهم المفروض يشجعوا السويس.

أما الناس هنا عندها ولاء للمكان. النادي بتاعها اللي بيشحجوه و بيحبوه يبقى

هو النادي اللي ساكنين عنده. و مفيش حاجة اسمها تشيلسي و فولهام في نفس

الوقت. جمهور تشيلسي بيكره فولهام، و جمهور فولهام بيشتتم تشيلسي في النشيد

بتاعه. جمهور لندن كله بيكره مانشستر، بس لو تشيلسي بيلعب مانشستر

يونائتد مثلاً ممكن تلاقي جمهور فولهام فرحان فيه عادي. مفيش هنا جو أنا و ابن

عمي على الغرب بتاعنا. الكلام ده مش في إنجلترا بس، ده في أي حته. في إيطاليا

لاتسيو هو اللي خسر روما الدوري رغم أنهم جيران، و جمهور لاتسيو كان

فرحان أوي انه سحق روما. مش زي حواديت زمالك و إسماعيلي بيحبوا بعض

والأهلي فوق الجميع. سكان غرب لندن بيشحجوا تشيلسي أو ويست هام أو

فولهام أو كويتر بارك. سكان شمال لندن بيشحجوا أرسنال أو توتنهام على حسب

أنت أصلك منين و ساعتها مفيش حاجة اسمها جمهور بيحب النادي التاني. دول لو

يطولوا يحدفوه بالطوب. الولاء للمكان و النادي هنا أهم حاجة عندهم في الكورة.

كل ما كنتوا جيران أكثر كل ما تكرهوا بعض أكثر"

- "أنا و الغرب على ابن عمي؟"

- "بالظبط كدة أحبيك. هنجيبك حاجة تاني تلبسها في الطريق" صفق له

عامر في استحسان

- "بس في ماتشات الديربي دائماً اللعبة بتحسك إن النادين بيعوا بعض أوي. يعني سلامات و أحضان و غيره. تشيلسي و مانشستر تلاقيهم بيهزروا سوا و برضه برشلونة و ريال مدريد..."

- "لحظة بس قبل ما تكمل كلامك. هي الماتشات دي في نظرك ماتشات ديربي؟" تسأل عامر في انزعاج

- "أه ماتشات القمة يعني" رد كريم في حذر

- "لأ هنا نقف وقفة بقي" اتخذ عامر وضعية إلقاء المحاضرة، "هو يعني ايه ديربي أصلاً؟ سيك من سباق الخيل و كل ده، أنا بتكلم على مفهوم الديربي المحلي في الكورة"

- "ماتشات القمة مش كدة؟"

- "هممم. ده خطأ شائع"

- "برضه؟" انفجر كريم ضاحكاً

- "أمال ليه اسمه ديربي محلي؟ مش عاوزك تمشي ورا الذوق العام كدة يا كريم، عاوزك تبقى بتاع الحصريات. الديربي المحلي هو بين فرقتين في نفس المدينة. يعني ليفربول و مانشستر مش ديربي، ليفربول و إيفرتون ديربي، برشلونة و ريال مدريد أبعد ما يكون عن الديربي، برشلونة و إسبانيول ديربي، ميلان و يوفنتوس مش ديربي، يوفنتوس و تورينو ده ديربي. إلا بقى لو بلد معينة قررت إنها تعمل ديربي على مجال كبير، زي مثلاً ديربي جنوب إيطاليا نابولي و باليرمو أو ديربي نهر الجارون في فرنسا اللي بين تولوز و بوردو. بس دي كلها تحريفات من الديربي مش هو المعنى الرئيسي ليه. فمتقولش على برشلونة و ريال مدريد ديربي تاني"

- "أه ببقى اسمه كلاسيكو عارفها دي، المذيعين مش يقولوا غيرها"

- "هو أصلاً كلمة كلاسيكو معناها مواجهة كلاسيكية، أي كلام يعني. كانت بتتقال على ماتش الدوري بس، إغا وسائل الإعلام قررت تاكل عيش فبقت تقول على أي ماتش بينهم إل كلاسيكو عشان الناس تسخن. دي تاني أكبر نسبة

مشاهدة لمباراة أوروبية بعد نهائي دوري أبطال أوروبا. في فرنسا بيسموا برضه ماتش باريس سان جيرمان و مارسيليا لو كلاسيك. تقليد يعني"

- "طيب ده بالنسبة لحالي كمشجع. بالنسبة ليا كلاعب كورة بقى؟"

- "لاعب الكورة بقى ليه قصة تانية خالص. دي ليها عرف كدة أو اسطمبه،

أي نادي تروحه يبقى كان حلمك من الطفولة انك تلعب فيه. بمعنى انك لو بكرة

الصبح رحت لعبت في نادي إيفرتون يبقى كان حلمك من الطفولة انك تسافر

مدينة ليفربول و تلعب في إيفرتون، و أول ذكرى ليك في كرة القدم هي فوز

إيفرتون على أي فريق كبير في جوديسون بارك ملعب إيفرتون"

- "يا سلام، طب فرضاً اني جالي عرض تاني من مانشستر يونايتد و المفروض

أسيب إيفرتون، و أنا كنت قايل ان حلمي من الطفولة أَلعب في إيفرتون؟" سألته في

فضول، لم يحاول اختباره بقدر ما أراد أن يعرف فعلاً المخرج من هذا الموقف

- "ياه دي بسيطة أوي يا كريم. هتقول انك منذ انضممت إلى نادي إيفرتون

و أنت تكن كل الاحترام لنادي مانشستر يونايتد، و أن مدرب مانشستر يونايتد

كان دائماً بيهتم بيك و أنت صغير، و إنك أصلاً لعبت في أشبال مانشستر من

زمان و اتزرع جواك حب النادي من ساعتها، و ان لو كان فيه نادي تتخيل انك

هتسيب إيفرتون عشانه فهو مانشستر يونايتد. بس ساعتها بقى كل جمهور

إيفرتون هيعتبرك خاين، عشان مدينة ليفربول و مانشستر جيران و بينهم عداوة

كبيرة من أيام صراعهم على سيادة شمال الغرب في عهد الصناعة. فبالتالي أنت

سبت إيفرتون عشان جيرانهم. انما أنت ممكن تتصرف و تقول إنك رفضت تسيب

إيفرتون و تروح نادي ليفربول احتراماً لجمهور إيفرتون، و لقيت ان الذهاب

لمانشستر أرحم من الذهاب لنادي ليفربول العدو الأوحده. الصحافة بتحب

الحوارات أوي، اديهم حوارات"

- "طيب سؤال يا حاج عامر، هتوديتي ستامفورد بريدج ولا لا؟" سأل كريم

في تضرع

- "هوديك ستامفورد بريدج، حاضر. بس عاوزك تاخذ بالك من حاجة، مفيش عرض من تشيلسي فمش هتلعب في تشيلسي، فأخر مرة تقولي بحب تشيلسي هيكون و أنت بتتصور هناك فيه، اتفقنا؟"

أفنى كريم إفطاره و تناول العصير ثم قاما بعدها استعداداً لزيارة ستامفورد بريدج، ملعب نادي تشيلسي الإنجليزي. استقلا المترو و خرجا في محطة فولهام برودواي. تعجب كريم من ذلك إلى أن شرح له عامر أن هذا الملعب تم عرضه على فولهام في البداية قبل أن يرفضه، و يقبل به تشيلسي النادي الحديث نسبياً. أشار عامر إلى البوابة الزرقاء ليثبت له أنهما أمام استاد نادي تشيلسي الإنجليزي. لم يخبر كريم بعد أي نادي سيكون حلم طفولته أن يلعب به.

جلس عصام في مكتبه و التوتر يملأه. تجاهله عامر منذ سفره فقرّر أن يتصل بأحد زملائه ليسأل عنه.

- "يا عادل، متعرفش حاجة عن سي زفت عامر ده؟" صاح في غضب
- "هو سافر امبارح بس، و راجع بكرة. تلاقيه مشغول أو مش عارف يرد" عرف أن عامر لا يرد لأنه لا يرغب بذلك بالتأكيد. كان يقدر موقفه، فمنذ رحيل المدير القديم الأستاذ مصطفى أصبحت الأمور تدار بشكل طفولي بعض الشيء. نظراً لقلة خبرة عصام في العمل الإداري تجنب معظم وكلاء اللاعبين الاستماع لأوامره كاملة، حيث رأوا أنهم أكثر خبرة .

- "طيب يا عادل أما نشوف. بما أن الباشا مش بيرد، سيادتك هتطلع ساو باولو بكرة. الواد بتاع سانتوس ده يا يلعب و هو ساكت يا إما يترحل في أي حته، مش عاوزين سمعة شركتنا تبقى في الأرض، ازاي يبقى جاييبينهم لاعب بيعمل مشاكل؟"

- "احنا مالنا؟ مش هو خلاص مضى و اللي كان كان؟"

- "اسمع الكلام و خلاص يا عادل. بكره تروح ساو باولو، هخلي رنا
تحمزلك كل حاجة"

انتهت الجولة في ملعب ستامفورد بريدج بعد ساعة و خرج منها كريم مستمعاً
للغاية. اصطحبه عامر بعدها إلى مترو الأنفاق ثانيةً مستقلين القطار على خط
ديستريكت في طريقهما إلى محطة فيكتوريا. انتقلا بعدها من مترو الأنفاق إلى
القطار العلوي بنفس المحطة. التزم كريم الصمت لفترة محاولاً أن يفكر أي ناد
سيترافقه معه. بات من الواضح أنهما سيخرجان من مركز لندن مستقلين القطار.
قرر ألا يسأله عن الوجهة في البداية. لكن بعدما جلسا في انتظار القطار نفذ صبره
سريعاً.

- "هو احنا متجهين على فين كدة؟"

- "رايحين سيلهريست بارك، مقرك الجديد" أجاب عامر بابتسامة كبيرة

- "استنى استنى، هو الاستاد اسمه كدة؟" سأل كريم في خيبة أمل، "دانا عمري

ما سمعت عنه قبل كدة، أنت هتلعيني فين؟" صاح كريم متيقناً أن مشوار احترافه
قد لا يكون وريدياً كما توقع على الإطلاق

- "سيلهريست بارك يا سيدي ده مقر فريقك الجديد و الأول في عالم

الاحتراف. النسور"

- "النسور ايه؟ احنا هنهزر؟" رد كريم في استهجان. "النسور بتاعتنا؟ النسور

اللي كسينا بيه بطولة كوكاكولا؟"

- "أكيد لأ يا كريم، يا ربي عليك" نظر عامر لأعلى في ضيق، "هو أنت

فريقك كان اسمه كدة بجد؟ هاهها، و الله صدفة حلوة. مسخرة أنت و أصحابك.

ايه الاسم العقيم ده؟" استمر عامر بالضحك

- "أنا أصلاً الاسم مكانش عاجيني. يعني أنا خلصت من النسور المصرية،

جايلي أنت نسور إنجليزية، مين دول يا سيدي؟"

- "النسور دول يا سيدي اللي هم نادي كريستال بالاس" رد عامر في حسم
- "كريستال... كريستال عصفور مين؟" رد كريم في ذهول
- "كريستال بالاس يا كريم" كرر عامر ثانية، "من أحسن نوادي الدرجة الأولى، مش الممتاز طبعاً، اللي هو الدرجة تحت الممتاز"
- "تحت الممتاز؟" هتف كريم في شرود و عدم تصديق، "أنت بتتكلم بجذ؟"
- "أبوة يا كريم. بداية الاحتراف غالباً بتكون كدة، بس صدقني النادي ده هيفتحلك فرصة كبيرة. أي حد تلاقيه دلوقتي مستواه عالي كانت بدايته مع نادي زي اللي أنت هتروح. النادي ده خرج منه ناس ثقيلة كثير ممكن تكون أنت مش عارفهم. النادي ده عشان تبقى عارف من أكثر النوادي المستقرة مالياً وإدارياً. متعاقدين مع نايكي عشان الفانلات بتاعتهم، و الراعي بتاعهم مضى عقد تاني، يعني الناس دي هتقعد عشر سنين مع نفس الراعي بتاعهم جيه إيه سي، دي عمرها ما حصلت تقريباً في تاريخ الكورة. عشان تبقى عارف بقى اللعب اللي بيبدأ من فوق مش ييعمر، كله بيبدأ صغير و بعد كدة بيعلى على طول. متركبش دماغك و حط رجلك بس دلوقتي"

أشار عامر بيده معلناً وصول القطار المتجه إلى سيلهبرست بارك. قام كريم خلفه مستسلماً للتفكير. عرف أن لكلام عامر بعض الصحة، فكيف توقع أن يبدأ في ناد كبير مثل أرسنال أو تشيلسي أو مانشستر يونايتد؟ شعر بالخرج الشديد من أن يجزأ أحداً بذلك، فأين ستكون الأضواء و الشهرة لو احترف بناد لا يعرف عنه أحد في بلده شيئاً؟ اختلفت الأجواء في أوروبا تماماً عن ما اعتاد. هل أمكنه فعلاً أن يخوض تلك المغامرة وحده في هذه البلاد؟ لن يفقد الأمل و يتراجع لمجرد أن وضعته الظروف في ناد ذي مستوى لم يتوقعه. عليه تحدي الصعاب الأولى، لأنها بالتأكيد هي الأشد. كما قال عامر، مع الوقت سيكتسب الخبرة و الذكاء اللازمين ليتمكن من التعامل و العيش في هذه الأجواء باردة الطقس لكن ساخنة النفوس. أشعره عامر بأنه مقبل على عالم آخر؛ عالم جديد لم يعتده. عليه التماسك ليتخذ

القرار بدون التأثير بعوامل داخلية أو خارجية. لن يرفض فرصة العمر لأجل مخاوف شخصية سخيفة، و في نفس الوقت لن يقبلها خضوعاً لرغبة رجل أخبره بكل صراحة أن النقود هي محور اهتمامه.

عقل الكلام شيئاً فشيئاً. حتماً لن يبدأ مشواره في السماء، فعليه أن يضع قدميه على الأرض أولاً. سيتفقد العرض جيداً، و لو وجده مغرياً لن يكون من الذكاء أن يرفضه. أكد عامر على مدى استقرار النادي مادياً و إدارياً. الاستقرار المادي يعني المراتب الجيدة؛ المراتب الجيدة تعني حياة كريمة و ظهوره على خريطة الدوريات الأوروبية؛ ظهوره على الخريطة يعني مشاهدة الأندية الأخرى له وإعجابهم بمستواه، مما يعني بدوره تدرجه في المناصب إلى أن يصل لأقوى الأندية الأوروبية. كم سيصبح رائعاً بعد سنتين أو ثلاثة أن يصل لأحد أقوى الأندية و وقتها يكون قد اكتسب خبرة المباريات و اجتاز صعوبات الحياة الأولى. من الأفضل له أن يتخبط في ناد بسيط بدلاً من أن يتخبط بالنادي الكبيرة التي لا تتقبل الأخطاء في المباريات و ستخلص منه بأسرع وقت لو لم يتصرف باحترافية كافية. ربما احترافه بأحد الأندية المتواضعة حالياً هو نعمة لم يدركها.

مر الوقت سريعاً و أعلن التسجيل الداخلي الوصول لخطوة سيلهيرست. نظر كريم من النافذة ليجد الشوارع نظيفة جميلة و الأشجار ملونة، مما طمأنه أنه لازال بنفس المكان الرائع الذي حلم بالاحتراف به. تواجد فقط خارج لندن بشئ بسيط، لكن لازالت رائحة لندن و هواؤها يحومان من حوله. قام من مكانه ليتبع عامر إلى خارج القطار. سارا بعض الوقت إلى أن ظهر من بعيد بوابات الاستاد الرياضي لنادي كريستال بالاس. قاده عامر من البوابة الرئيسية و أظهر جواز سفره و بعض الأوراق إلى الموظف الخارجي، الذي سمح لهما بالدخول إلى المكان. قاده عامر في ممرات داخلية، إلى أن وصلا إلى أرض الملعب الخضراء. وقف عامر وأشار إلى المدرجات و السماء.

— "ده بقي يا سيدي سيلهيرست بارك" تحدث عامر في فخر، وكأنه من صممه

- "تصور الاستاد شيك أوي، مدرجات كبيرة و فيه شاشة كبيرة كمان" قال كريم في إعجاب

- "جيبى، أنت في لندن، مفيش استاد مش شيك، حتى لو حجمه صغير أو سعته صغيرة فبرضه هيكون شيك. أنت تعرف أن في أوروبا عامةً بيبقى التذاكر بتاعتك بأرقام؟ يعني مش محتاج تيجي قبل الماتش بعشر ساعات زي عندنا. الناس هنا بتيجي قبل ضربة البداية بربع ساعة عادي جداً"

- "يا راجل؟" ضحك كريم، "ايه الرفاهية دي؟ ييجوا يشوفوا عندنا"

- "المهم. نتكلم في الجلد. مش عاوزك تتكلم خالص في المقابلة، سيبني أنا أتصرف. بس عاوزك أما ترجع بلدك تذاكر كل حاجة عن النادي كويس. أحب أفكرك اننا ماشيين بكرة، و لازم تبقى واحد قوارك. مش كدة و بس، دانت لازم تبقى مضيت العقد" قال عامر في جدية

- "أمضي العقد؟ افرض بقى معجنيش؟" سأل كريم في حذر

- "أول حاجة، أنت هيبقى ليك بيت بتاعك، إيجاره هيتاخذ من راتبك الشهري بأحسن سعر عمرك ما تحلم بيه، و في فيكتوريا كمان وسط لندن عشان تنفسح، مش هنا في العزلة. هتركب القطر من هناك على الاستاد هنا أيام التدريب و الماتشات و بقية الأسبوع تعيش حياتك زي مانت عايز. هيبقى ليك عربية تركيها مش باسمك آه بس بتاعتك طول مانت بتلعب معهم"

- "بجد؟! بس فيه مشكلة. مصاريف الجامعة أجيبها منين؟" سأل كريم في ضيق حيث رأى أن هذه هي المشكلة المتبقية

- "مصاريف الجامعة؟ هو أنا قلتلك أنت هتاخذ كام في الأسبوع؟"

- "لأ مقلتلش، بس أكيد مش هدفع مصاريف الجامعة من جيبى برضه" أجابه في إصرار فناولوه عامر ورقة كبيرة

- "ده جزء من العقد، اقرا كدة الرقم" أشار عامر بإصبعه إلى البند المقصود.

اتسعت عينا كريم في انبهار

- "ده في الشهر؟" تساءل كريم و هو يلتقط أنفاسه بصعوبة
- "لأ. في الأسبوعووووووع بقولك" هتف عامر لينبهه
- "طيب معلىش سؤال ممكن يبان غي"
- "عادي متوقع"

- "هو ده بالجنيه الاسترليني مش كدة؟" تساءل كريم و قد سال لعبه
- "على حسب يا كريم...لو أنت عاوزه جنيه مصري بس معنديش مشكلة،
تبقى وفرت علينا، إنما لو أخذت حبوب ذكاء و ركزت، هتعرف انك المفروض
تضرب الرقم اللي قدامك ده في عشرة مثلاً عشان تعرف هو كام بالمصري" رد
عامر مبتسماً في يقين أنه على وشك الوقوع

- "في الأسبوع؟" ردد كريم في ذهول

- "ده غير مكافآت الفوز، و أفضل لاعب في الماتش، و لو عملتلك إعلان،
دا غير و غير و غير. أنت كمان أكلك و شربك معظم الوقت على حسابهم. يعني
حضرتك المبلغ ده هيتاخد منه فتفتوة مرة في الشهر إيجار للبيت، و بقيته تصرف
منه بقى على جامعتك لو عاوز و تشبرق نفسك بالباقي. يابني هو لو الكورة دي
مش بحر فلوس كان حد دخلها أصلاً؟ ما كان كله نام في بيته"

- "في الأسبوعووووع؟" أخذ كريم يردد في ذهول

- "لأ بقولك ايه، فوق. يلا هنروح نقابل الناس دلوقتي، عاوزك تبين لهم
الاهتمام و حسن النية. بكرة طيارتنا الساعة ٣ الظهر. لازم يا كريم تبقى خدت
قراك قبلها عشان الناس هنا جد أوي في الحاجات دي، مينفعش دلح"

- "في الأسبوعووووع"

- "كريميسيم، على بكرة تبقى واخد القرار" قالها عامر و جذبه من ذراعه.

كان كريم قد اتخذ القرار بالفعل.

إني راحلة

- "ممكن أفهم ايه اللي ودى عادل ساو باولو؟ ما حضرتك عارف إنه مبيعرفش يتعامل مع اللاعبة" اقتحم عامر مكتب عصام بمبنى الشركة
- "أنت مكتتش بترد على تليفونك ليه؟" سأل عصام في غيظ
- "حضرتك عارف كويس ان الوقت كان ضيق و الموضوع مكانش لطيف. الواد كان غلباوي"
- "و مضى في الآخر الحمد لله. لازمته ايه شغل الرجل الغامض اللي بتعمله؟ مشكلتك يا عامر انك عاوز تحسس نفسك و تحسسنا انك بتعمل اللي مبيتعملش. عارف فيه كام وكيل لاعبية عندنا؟ محدش شايف نفسه زيك"
- "أنا كان مطلوب مني حاجة و خلصتها من سكات. عادل ممكن ييوظ الدنيا، دانا جنبه ملاك. مش بعيد يرمي الواد في الشارع"
- "و أنت فارق معاك الواد أوي؟"
- "لأ طبعاً مش فارق، بس سمعة الشركة هتبقى عاملة ازاي؟"
- "فاكر نفسك ذكي أوي يا عامر؟ ماحنا عارفين كويس ان سمعة الشركة متفرقش معاك بصباح كفتة. أنت اللي فارق معاك ازاي حد يسحب السجادة من تحت رجلك"
- "مفيش حاجة اسمها فاكر نفسي ذكي، فيه واحد ذكي و واحد غبي" أجابه عامر في سماجة

- ماشي يا عم الذكي. قصدي ان أهم حاجة بالنسبة لك انك تبقى سلطان زمانك اللي خلص الصفقة. أنت متضايق عشان حسيت ان فيه شغل اتاخذ منك رغم انك كنت عاوز تعمل انك الوحيد اللي هتعرف تعمله، و ان السجادة اتسحبت من تحتك"

- "أنا مش فاهم سر إصرار حضرتك على السجاد بصراحة. بس لو ده هيريح حضرتك، أوعدك اني مش هحط سجاد في المكتب تاني. مادام عادل شايل المسئولية أنا سعيد و راضي. آدي الورق بتاع كريم. ممكن نقفل الحسابات بس يا رب محدش يدعيس و رانا" ضحك عامر في افتعال و رفع كفه ليصافح عصام الذي لم يلتفت إليه

خرج عامر من المكتب مبتسماً. لم يهتم على الإطلاق بسفر عادل أو غيره، بالعكس، فقد أسعده أنه هرب من ذلك المشوار المل. أصبح بإمكانه أخذ أجازة لمدة يومين يرتاح فيهما. قام بتلك المسرحية الصغيرة فقط ليجعل عصام يظن أنه نجح في إغضابه أو الانتصار عليه من أجل إشباع غروره. فكلمها شعر عصام أنه الأكثر ذكاءً و أنه القائد و الأمر الناهي كلما تحولت الشركة إلى مكان أفضل بالنسبة لعامر. لم يستطع عصام فرض سيطرته أبداً عليه. و لذلك كلما أتت الفرصة لعامر بأن يلقي له بعظمة صغيرة يشغل بها وقته، فعلها بكل سرور.

مر على رنا ليحدها جالسة على مكتبها في تركيز و اهتمام شديدين. لطالما بذلت مجهوداً زائداً في العمل من فرط ما يحاط به من غموض و تغييرات مفاجئة. لم تستطع أبداً التأقلم و حاول عامر دائماً مساعدتها. منذ رآها أول مرة لم يتودد إليها من باب الشهامة، بل اعتقاداً منه أنها سهلة المنال. اكتشف بعدها أن قلة ذكاء المرأة في الحياة العامة لا يعني بالضرورة قلة الذكاء في...العلاقات العامة كما أحب أن يسميها.

- "روني، ازيك الهاردة يا قطعة؟" باغتها عامر

- "مستر عامر، لو سمحت بلاش الكلام ده. عيب ميصحش" ارتبكت رنا

- "يا بنتي انتي تطولي يبقى اسمك روي، انتي عارفة الراجل ده بيعمل ايه مع مانشستر؟ مبيطلش أجوان. أقولك على حاجة، أنا بتفاهل بالاسم ده جداً" قال عامر في مرج، "المهم. أنا هاخذ أجازة يومين الأسبوع الجاي. يا ريت تبلفي مسيو عصام"

- "حاضر يا مستر عامر. الأسبوع الجاي؟"

- "أيوه بالظبط. عاوزك تشوفي ينفع ولا لأ، يعني هيناسبني ولا لأ" ضغط عامر على كلامه

- "أه طبعاً هشوف يا مستر عامر، لو منفعتش هبلغ حضرتك"

- "بس حاولي انه ينفع" أجابها مبتسماً

اكتظ الصحفيون في الملعب الأولمبي بروما بعد انقضاء المباراة النهائية لدوري أبطال أوروبا بين فريقى برشلونة و مانشستر يونايتد. كان قد تم بالفعل توزيع الميداليات الذهبية و تسليم الكأس لنادي برشلونة الكاتالوني، على أن يقابل بعدها رئيس الاتحاد الأوروبي لكرة القدم الصحفيين لتلقي الأسئلة السخيفة و محاولة الرد عليها بطريقة تنس الطاولة. كلما تلقى سؤالاً سخيفاً يحاول رده بأسرع شكل ممكن كي لا يظهر عليه التردد، لأنه مع زيادة قوة الرد تقل احتمالات إلقاء سؤال أكثر سخافة من الصحفي القادم. بحث الصحفيون كالعادة عن أفضل الوسائل للنقد الذي أعدوه بناءً لتحسين ظروف اللعبة، بينما اعتبره رئيس الاتحاد هجوماً سافراً غير مبرر.

- "كانت مباراة جميلة فعلاً. بس فيه بعض التساؤلات من ناحية قرار طرد مدافع مانشستر في نهاية الشوط الأول. ناس كتير شايفة انه كان قرار غير سليم" بدأ أحد الصحفيين

- "أحب أوضح نقطة مهمة جداً. احنا تعبنا أوي و بذلنا مجهود كبير في اننا نخط إشارة على فائدة كل لعب كورة و حكم، مكتوب عليها كلمة مهمة

أوي...فاكر الكلمة دي؟" تحدث رئيس الاتحاد و كأنه مدرس يشرح لزملائه
فضل الأم على ابنها

- "الاحترام؟" رد الصحافي في سخرية ممزوجة بخيبة الأمل

- "أبوة...الاحترام" رد رئيس الاتحاد مؤيداً، "دي الحملة اللي عملناها و كله لازم يلتزم بيها. الاحترام. لازم نحترم قرارات الحكام في الملعب. حاسين إننا مش صح؟ مش مشكلة، بس أهم حاجة الاحترام"

دوت صيحات الاستهجان في المكان. بات من الواضح أن لعبة تنس الطاولة ستستمر برد أعنف من الصحافيين. تنحنح رئيس الاتحاد و شرب بعض الماء استعداداً للجولة الثانية.

- "مش شايف إن الهدف الثاني لفريق برشلونة فيه شك انه تسلسل؟" تساءل صحافي آخر

- "فيه شك؟ أنت نفسك بتقول فيه شك. الحكم بشر عادي زينا و عليه مسئولية انه ياخذ قرار في الملعب. ليه متخيلين ان الحكم إله من السما. دانا جايلكوا طقم سويسري محصلش يا جماعة"

- "هوضح لحضرتك أكثر. التسلسل مفيهوش شك. هو أكيد، ياردة كاملة فرق، و كمان حكم الراية لازم يكون شافها. كلنا كبشر شفاها، محدش فينا احتاج يبقى في السما. و لو اتكلمنا على السما، إحنا عندنا فعلاً كاميرا من فوق بتورينا كل حاجة من أعلى نقطة بس مش بنستخدمها"

- "هقولك كلمة واحدة...الاحترام" أصر رئيس الاتحاد

- "لو بنستخدم الإعادات التليفزيونية من الكاميرا بتاعة السما أو غيرها مش هيبقى فيه مجال للخطأ" عقب صحافي آخر

- "يعني انتوا شافين الحل اننا نيجي في كل كورة نقف نتفرج على الإعادة. طب ايه لازمة الحكم في الملعب؟ أقولكوا على فكرة. أنا هخليه يقعد يتفرج معايا من المقصورة و نخلي القرارات كلها بتصويت الجمهور. مينفعش يا جماعة. لازم

يكون فيه سلطة في الملعب. لازم يكون فيه حد بياخذ القرارات و يبقى القرار ليه وحده... الاحترام" كررها رئيس الاتحاد مرة أخرى و كأنه يتعلم اللغة

- "طيب أنا هسأل سؤال مالوش علاقة بالتحكيم" رفع أحد الصحفيين يده

- "الاحترام" أجابه رئيس الاتحاد في شرود

- "نعم؟ هو أنا لسة سألت؟" تعجب الصحفي

- "هه؟ أه معلى اتفضل" عاد رئيس الاتحاد لوعيه و أشار إليه بالسؤال

- "فيه كلام كتير عن مشوار الفريقين للمباراة النهائية. زي ما يكون كان

طريقهم مفروش بالورد عشان تضمن اهتم يوصلوا للنهائي. مش قصدي تحكيم"

أكد له الصحفي، "أنا بتكلم عن أنماط معينة. دلوقتي فريق مانشستر مواجهش في

مشواره أي فرقة قوية، الفرق القوية كلها خلصت على بعض، و على الناحية

التانية برشلونة لعب مع فرق كبيرة في الاسم بس كلنا عارفين ان مستواها السنة

دي في الأرض. يعني نقدر نقول ان الطريق كان مفتوح ليهم اهتم يوصلوا للنهائي"

- "خليني أرد عليك واحدة واحدة. ايه علاقتنا احنا بمشوار الفريقين؟ هو أنا

اللي بحدد الماتشات؟ أmaal احنا ليه بنعمل حدث كبير و بنجيب صحفيين و نجيب

كور ازاز، و بنجيب ناس تفتح الكور؟ بنعمل قرعة عشان ايه، مش عشان

نوريكم ان كل حاجة بتمشي بسلاسة و نزاهة كاملة؟ أنت بنفسك كنت موجود

في القرعة. أنا فاكرك"

- "لا، مكنتش موجود" رد الصحفي في تعجب

- "تعبير مجازي يا أخي" حاول رئيس الاتحاد إنقاذ موقفه، "قصدي انك شفتها

بعينك في التليفزيون. كل حاجة بتبقى بالصدفة البحتة، احنا بنسحب الأسماء و لو

جه ماتش قوي أو ضعيف ده بيبقى قسمة و نصيب، ترتيب من السماء" رفع يديه

كأنه يدعو للتوحيد

- "سهل أوي ان القرعة دي تبقى مسرحية. على سبيل المثال، انتوا بتاخدوا

بالكوا أوي في دور ال١٦ انكوا متسحبوش فرقتين من نفس المجموعة مع بعض،

وان فرقتين من نفس البلد برضه ميلاعبوش بعض. طب لو القرعة عبارة عن كور ازاز بترمي و بيتسحب منها، بتقسموا الأوعية اللي تسحبوا منها ازاي؟" باغته الصحافي

- " مبدئياً كلامك فيه تلميحات أنا مش فاهمها بس خليني أحاول أرد عليك. نفترض ان القرعة زي مانت بتقول؛ بدل ما هي قضاء و قدر بتبقى ماشية زي ماحنا عاوزين. سؤالي بقى، هو ليه ده هيبقى زي ما احنا عاوزين؟ مصلحتي ايه اني أوصل فرقة إنجليزية و أسبانية النهائي؟"

- "الاستفادة ان مباراة النهائي تبقى قوية بدل ما يبقى فيه احتمال انها تبقى بين فرقتين زي بورتو و موناكو زي ما حصل قبل كدة. بالتالي نسبة المشاهدة تزيد أكثر والإعلانات وراها و الفلوس و كل الحاجات المادية بتاعتكوا" أجابه الصحافي - "بورتو و موناكو مش فرقتين كويسين؟ لا يا راجل مالكش حق. و بعدين لو فرضنا اني عاوز أخليلكوا ماتش النهائي ماتش جامد، دانا كدة أستاهل بوسة مش تبقى زعلان مني هاهاهاها" ضحكك رئيس الاتحاد، و لم يضحك غيره. فاعتدل في ارتباك و التزم الصمت.

- "أنا عارف ان حضرتك تعبت من الهجوم، بس للأسف فيه نقطة أخيرة لازم أسأل عليها. كل مباريات برشلونة في البطولة لازم الفريق اللي قدامه ياخذ طرد أول ما برشلونة يبقى في خطر. مش حاجة مريبة شوية؟"

- "هو الفرق اللي قدام برشلونة كلها أخذت طرد في الماتشات اللي قبل كدة فعلاً؟ محدش قالي كدة قبل الماتش. غريبة أوي" تساءل رئيس الاتحاد في حيرة - "نعم؟"

- "هه؟ قصدي ان أكيد دي صدفة يا جماعة. احنا هنحاسب الفرقة على أخطاء الخصم؟ الخصم يتطرد منه لاعب، نقوم نحاسب الفرقة الثانية؟" رفع بقية الصحافيين أيديهم، فأشار رئيس الاتحاد إلى صحافية شابة، بدت له أكثر ألفة.

- "مش عارفة بجد أقول لحضرتك ايه. تنظيم هايل للبطولة و النسخة دي أفضل من النسخة اللي فاتت و كل سنة البطولة بتبقى أقوى من اللي قبلها. نشكر حضرتك جداً على كل اللي بتقدمه لكرة القدم. يا ريت تقولنا ازاى بتقدر تقدم المستوى المتميز ده كل سنة؟" سألت الصحافية بابتسامة كبيرة بينما علت صيحات الاستكثار في القاعة

- "سؤال جميل. مقدرش أنسب الفضل ليا لوحدي الحقيقة. ده مجهود جماعي بنقوم بيه كلنا. سواء الإداريين في اتحاد الكورة، الحكام، رؤساء اتحاد الكورة، اللاعبين. أنا مبتعش لوحدي، بس بينا و بيكوا هتكون البطولة دي على أفضل شكل ممكن. للأسف يا جماعة المؤتمر خلص. أحب أهني الفريق الفايز، و أتمنى التوفيق المرة الجاية للفريق الخسران. تصبحوا على خير" أهى المؤتمر متجاهلاً صيحات الصحافيين

انطلق بعدها في الممرات في صحبة بعض من رجاله. بدا الغضب الشديد على ملاعبه. حاول مساعدته قديته قليلاً إلى حين الخروج من الملعب الأولمبي. توجهوا جميعاً إلى ساحة انتظار السيارات.

- "الزفة دي اتأخرت ليه؟" صاح رئيس الاتحاد، "بعد ما اتفرمت أسئلة جاية الهانم على مهلهما؟ ايه المهزلة دي، احنا بنجيب ناس و ندفعلهم فلوس و نعملهم منظر عشان يتأخروا علينا و ميعملوش اللي عليهم؟" - "معلش يا فندم. الطريق كان زحمة أوي عشان الماتش، و هي جت متأخرة" أجابه المساعد مبرراً

- "يعني كل الصحافيين جم في طيارة هليكوبتر؟ ما هو زيهما زيهما" - "أصلها يا فندم....احم...كانت في فيا ديل كورسو بتشتري حاجات لأهلها"

- "نعم؟ ايه اللي موديهما فيا ديل كورسو، ناقص تقولي بقى راحت تعمل جولة في الفاتيكان و تتصور مع الحرس السويسري"

- "لا ماهي راحت امبارح يا فندم" رد المساعد في ارتباك

- "كمان راحت امبارح؟ يعني الهانم جاية تنفسح على حسانا عشان خمس دقائق تعمل فيها منظر و كمان جاية متأخرة؟ بقولك ايه. البنت دي خلاص متشتغلش معانا تاني. شوفلها أي صرفة. و بعدين ايه حكاية الطرد بتاع كل ماتش ده؟ ازاي مفيش كلب أخذ باله؟ عاوزين منظرونا يبقى ايه؟ ما تركزوا داننوا قرفتونا. خدلي معاد مع رئيس اتحاد الكورة الأسباني ده كمان خليني أشوف برشلونة بتاعه اللي كل الناس زعلانة منه ده ايه حكايته. خليه يفكرني هو ليه واخذ البطولات كلها كابوت كدة" انفجر رئيس الاتحاد الأوروبي غاضباً و ركب سيارته

- "حاضر يا فندم. أمرك"

- "اطلع يا زفت خليني ألحق الطائرة" أشار للسائق و انطلقت السيارة مسرعة في طريقها إلى مطار فيومتشينو

قاد عامر السيارة عبر شوارع القرية الصغيرة في العين السخنة إلى أن وصل إلى ساحة الانتظار المخصصة. نزل من السيارة و أخذ بعدها الحقيبة الصغيرة من المقعد الخلفي و توجه إلى الشاليه. نظر حوله ليجد القرية شبه خالية. لم يكن توقيتاً مألوفاً لرواد القرية لقضاء عطلاتهم. لطالما اختار أوقاتاً كهذه للاستجمام، و للتأكد من حصوله على خصوصيته. لم يتردد على هذا المكان بكثرة حتى لا يتعرفه الناس جيداً. كانت فقط ثالث مرة يزوره خلال خمس سنوات. ساعدته ذاكرته القوية على حفظ الطريق جيداً. أخرج المفتاح من جيبه و أدخله في الباب ليجده غير موصد. ابتسم في سعادة و دخل باحثاً بعينه عن آثار وجود دخيل في الشاليه.

- "بتدور على حد غيري؟" فاجأه صوت أنثوي مألوف لم يستطع مقاومته

- "يا سلام؟ جيتي يعني. أنا قلت هلاقي شريف قاعد في الشاليه بتاعه" رد في سعادة غامرة

- "فكرت ألف مرة من سخافتك، بس قلت حرام أنت برضه زي ابننا"

- "و أهون عليك برضه يا روبي؟"

- "قلتلك ميت مرة مش بحب الاسم البايخ ده" قالت رنا في ضيق، "يخرب بيت الكورة اللي لحست محك"

- "يا حبيبي ده مالوش دعوة بالكورة. أنا باستخدامه من قبل ما روبي أصلاً يظهر على الخريطة. المهم قوليلي، عرفتي تاخدي الأجازة ازاي؟"

- "أكيد محدتش أجازة. هضطر أخذ أجازة مرضية، هعيا فجأة. طبعاً مش هأخذ أجازة معاك في نفس الوقت. عاوز منظرنا يبقى عامل ازاي؟"

اهتز عصام بمقعده و هو يشرب الشاي و يقرأ الأخبار على شبكة الإنترنت. قرر فتح موقعه المفضل المتابعة آخر الأخبار الرياضية للاطمئنان على سير الأمور. لفت انتباهه مقطع فيديو فضغط عليه لمشاهده على الفور.

"بات من الواضح أن فريق سانتوس في طريقه الآن إلى المباراة نصف النهائية لكأس البرازيل، حيث فاز على خصمه و غريمه اللدود ساو باولو في مباراة الإياب مساء أمس بـ ١ هدفين لصفر. لمع آخر الوافدين إلى فريق سانتوس وهو اللاعب المصري الشهير بـ "فيجو الجديد" في المباراة، و أحرز هدف الحسم و رصاصة الرحمة لفريق سانتوس. نرجو أن يعني ذلك تغير حظه حيث لم يكن يشركه المدرب في التشكيلة الأساسية منذ وصوله إلى النادي، و ربما كانت تلك طريقته للرد عليه و إقناعه بأنه يستحق مكاناً في ال ١١ لاعب البادئين للمباراة"

ظل عصام مبتسماً طوال المقطع. فما سمعه لم يعن سوى شئ واحد؛ أن عادل قام بعمله على أكمل وجه.

تم رفض طلب كريم للمنحة و حان وقت المواجهة الحاسمة مع والديه. استعد نفسياً و بدنياً للكفاح بشأن مسألة سفره. اتجه إلى باب غرفة والديه. توقف لحظات متردداً بخصوص الخطوة التي سيقدم عليها.

- "بابا، ماما. أنا خلاص جيتلكم بالخبر اليقين" قال كريم لوالديه في هدوء حذر

- "قول يا حبيبي بلاش الوش المصفر ده بتشائمن" قالت والدته

- "المفاجأة بقى، تخيل أنت يا بابا اني ماخدتش المنحة" قال كريم ببساطة وكأنه يخبرهما أنه لن يتناول العشاء

- "أفهم من كدة ان مفيش سفر؟" سأل والده في شك

- "لأ فيه سفر عادي، ايه العلاقة؟ أنا مضيت العقد" تظاهر كريم بالغباء

- "معلش يا حبيبي تاني من الأول عشان الواحد من كتر الشغل مبيقاش مركز. أنت قلت ايه؟" سألت والدته

- "مخدتش المنحة" أجاب كريم و هو ينتظر العاصفة

- "أنت أهملت يا كريم!!" صاحت في جنون

- "أهدي بس يا ماما. فيه حاجة بسيطة خالص. دلوقتي أنا مرتبي كويس أوي

هناك، و هم صارفين عليا أكل و شرب و مسكن. يعني من الآخر هيبقى عندي فلوس كتير أوي أصرف منها على التعليم و في نفس الوقت أحوش منها و أصرف على نفسي"

- "طب تقدر تقولي لو فلوسك خلصت هتعمل ايه. مش هتاخذ مننا حاجة

خالص؟" سأله والدته في تحدي

- "أنتي ليه بتقفليها في وشي؟ بتشائمن و الله من طريقتكم دي"

- "ايه المشكلة لما كنت تفسخ العقد و خلاص؟" سأل والده

- "هممم. سؤال وجيه و حلو" قال كريم في تردد

- "نحب نعرف الإجابة" أجابت والدته

- "أه الإجابة. تمام. أصل تخيلوا يا جماعة اتصلت بعامر و سألته قاللي مينفعش"

- "عامر مين و مينفعش ليه؟" سأل والده

- "عامر ده مدير أعمالي، أنا و هو كدة، أصحاب لازم" أشار كريم بإصبعيه،
"قاللي الصراحة كدة يعني... أنا اتفاجئت بيبي و بينكوا....ان...اسكتوا، مش طلع فيه شرط جزائي"

- "طلع فيه شرط جزائي؟ و حضرتك مقرئتش العقد كويس قبل ما تمضي؟"
صاح والده في انفعال

- "الصراحة يا بابا مجاش في بالي أقرأه. كان طويل أوي فحسيت انه مش لازم. قرئت بس الحاجات اللي تلزمني في العقد" قال في براءة
- "ايه اللي بيلزم البني آدم في العقد أكثر من الشرط الجزائي؟ طلع كام الشرط الجزائي بتاعك ده؟" هتفت والدته

- "مش هتصدقني، عشان تعرفي بس قيمة ابنك. تصوري طلع ب ٤ ملل...استر..." تلعنم كريم على أمل ألا يسمعا الرقم
- "كام يابني؟" أصرت والدته

- "٤ مليون" قالها كريم بسرعة و أخفى وجهه بيديه
- "٤ مليون جنيه؟ أنت اتجننت يابني" صاح والده في هستيريا
- "لا طبعاً يا بابا ٤ مليون جنيه ايه هاهها. ٤ مليون استرليني" قالها كريم
وركض بعيداً عن مرمى قبضة والده

- "هو فيه حد بيمضي عقد قبل ما يبقى ضامن ظروفه؟ أنت عاوز تودينا كلنا في داهية؟" صاحت والدته في الفحار

- "بقولك ايه يا كريم. لم حاجتك يابني و روح بات عند حد من أصحابك"
صاح والده

- "ايه لازمته يا بابا الكلام ده ما تصلي على النبي"

- "اطلع بره البيت دلوقتي يا كريم بدل ما أخلص عليك. و أنا اللي عمال أقول ده واد كبير، و بياخد قراراته و يعمل اللي عليه. طب ايه رأيك بقى مفيش سفر و مفيش زفت"

- "ليه بس؟ مينفعش، أنا لازم أسافر خلاص. إني راحلة!" هتف كريم في عناد
- "مش هتسافر يا كريم" صاح والده في غضب
- "يوووووه" صاح كريم في جنون فصفعه والده على وجهه و سقط كريم من قوة الضربة

فاق كريم من أحلام اليقظة، و وضع يده على خده كأن الصفعة أصابته في الواقع. أخذ يفكر قليلاً. كان لا يزال واقفاً أمام باب غرفة والديه. استجمع قواه وطرق الباب.

- "ادخل يا كريم" دوى صوت والدته

- "ازيكوا يا جماعة عاملين ايه؟ أنا جاي بس أقولكم على آخر الأخبار"

- "خير يابني؟" سألت والدته

- "أه خير طبعاً إن شاء الله. باركولي يا جماعة، أنا خدت المنحة. إني راحلة خلاص. نحضر الشنط بقى؟"

فقرة الساحر

اختلف الجو في لندن قليلاً منذ تركها كريم من أشهر. لم يعد قارص البرودة مثل ذي قبل، ففي إبريل كانت درجة الحرارة الصغرى تصل إلى ٥ درجات مئوية، بينما في يوليو يكون متوسط درجة الحرارة العظمى ٢٣ درجة مئوية والصغرى ما بين ١٣ و ١٤. علم ذلك جيداً لأنه للمرة الأولى قام بأبحاثه المستفيضة قبل الإقدام على شيء هام. تعلم من أخطائه السابقة بعد اتخاذ قرارات غير محسوبة أنه لن يتخذ أدنى خطوة بدون دراسة مستفيضة و مفصلة للظروف. من حسن حظه أن تقع جامعته بجوار إدجووير رود، و الذي عرف أن اسمه الدارج هو شارع العرب، نظراً لانتشار و سيطرة العرب الشديدة عليه، و انتشار المطاعم الجلال. شعر بالفخر الشديد لاتخاذ تلك الاحتياطات. انطلق في طريقه من المطار إلى بيته في باكينجهام بالاس رود حيث تم تخصيص شقة له هناك. علم الأخبار السعيدة بأن سيسكن معه شخص آخر، مما يعني انخفاض الإيجار عليه.

- "هو ده ٤٩ باكينجهام بالاس رود" جاء صوت سائق سيارة الأجرة ليقطع

جبل أفكاره

- "أه شكراً ليك. أجرتك كام؟"

- "٤٠ جنيه أسترليني" رد السائق في أدب

- "أه طبعاً اتفضل" أعطاه كريم ورقة — ٥ جنيهات استرليني، "خلي

الباقى عشانك"

- " مفيش باقي كدة، هو لسة ناقص ٣٥ جنيه" قال السائق في أدب يحسد عليه

- "٣٥ جنيه ازاي؟ هو الحساب ٤٠ جنيه؟ يا نهار أزرق" تساءل كريم في دهشة

- "العداد قدام حضرتك أهه. ٤٠ جنيه استرليني، أنا جايب حضرتك من المطار"

- "طب حيث كدة ممكن بقى تزلي الشنط؟" قال كريم في ضيق، مستعملاً ثقافة المصريين و هي أن يحلل القرش الذي سيدفعه

نزل السائق بكل بساطة، و أنزل حقائب كريم على الأرض ثم قاده إلى بوابة مكتب الاستقبال. أعطاه كريم النقود دون سنت زائد، ثم شكره و دخل ليأخذ مفتاح الشقة. أعطى موظف الاستقبال بياناته ثم قاده العامل إلى الشقة. رحل العامل دون أن ينتظر أي نقود من كريم مما أثار تعجبه، لكنه ابتسم في سعادة قائلاً بصوت خافت "والله وفرت". طرق الباب في هدوء. لم يأت رد فقرر أن يقتحم المكان. اكتشف بعدها سر عدم فتح الباب له حيث فوجئ بمشهد مصارعة بين فتى ضخم الجنة و فتاة حن كريم أما إنجليزية ببشرها البيضاء و شعرها الأشقر. ألقى كريم حقائبه أرضاً في هلع و كأنه رأى خيانة زوجته بعينه. انكمش في مكانه ووضع يده على وجهه صائحاً في هستيريا "عينيبي! عينيبي!".

انقض الفتى من المفاجأة و قام من على الأرض مفزوعاً فازداد هلع كريم وصاح قائلاً "حبي ربنا يهدك، حبي". أصابت الفتاة نوبة من الرعب بينما راح الفتى يصيح في لهجة عربية "حراميسي" و انقض على كريم دون أن يفكر بأن يخفي أي من عوراته و اختلط الحابل بالنابل.

- "أنت مين؟" صاح كريم.

- "أنا خالد أبو رامي. أنت اللي مين؟" أجابه الشاب و هو يستر جسده العاري.

ركض كريم خارج الغرفة وراح يصرخ كالجنون.

ذهب كريم إلى رئيس النادي ليبلغه عن الواقعة و طلب استبدال زميله في الغرفة على الفور. استجابوا له و جاءوه بأكثر اللاعبين خبرة ليرافقه و هو خوان حارس المرمى الأرجنتيني. انتهى كريم من إفراغ حقائبه و رص حاجياته في أماكنها. كانت الشقة واسعة إلى حد كبير و تكفي لأكثر من فردين، مما أشعره بالراحة. قام بتغير ملابسه و جلس على الأريكة يشاهد التلفاز. لم يجد الوقت ليتعرف على خوان عند وصوله. في البداية طرق الباب كثيراً خوفاً من فتحه ليتجنب ما حدث له في صباح اليوم، و بعد طرقات كثيرة مدوية فتح له و هو لا يرتدي سوى منشفة الاستحمام. عرف كريم وقتها أنه سيمر الكثير من الوقت حتى يجد شخصاً بملابسه خلف أي باب مغلق. خلد خوان بعدها للنوم قليلاً بينما تعرف كريم على المكان و حاول التأقلم.

- "بتفرج على إيه؟" باغته صوت خوان من خلفه
- "إيه؟ لأ عادي بقلب في التلفزيون" أجابه كريم
- "متريخش أوي عشان آخر الأسبوع هيعملولنا اختبارات بدنية في السريع عشان يشوفوا أداءنا. اجتماع بداية الموسم هيكون بعديها بيومين"
- "و ده بنعمل فيه إيه؟" سألته كريم
- "بنشوف فيه الدنيا هتمشي ازاي الموسم ده. شد حيلك بقى"
- "أيوه أيوة صح، مش تقول يا راجل؟ و ماله، نشوف الدنيا هتمشي ازاي ومنشوفش ليه" تظاهر كريم بالفهم

- "خمن كدة أنت أخذت رقم كام" قال مدير نادي كريستال بالاس
- "مش عارف. ١٠؟" سألته كريم
- "لأ غلط" أجابه مبتسماً

- "طب ٩١؟" سأل كريم في نفاذ صبر

- "برضه غلط"

- "حضرتك واخذ بالك ان الأرقام كثير، مش كدة؟ هنقعد لبكرة"

- "ما علينا" تنحج رئيس النادي في حرج، "المؤتمر الصحفي بتاع وصولك قرب. عارف هتقول ايه؟"

- "لا، أصل الحاجات دي وليدة اللحظة" رد كريم في براءة

- "وليدة اللحظة؟" تساءل الرئيس في خيبة أمل، "أنت محدش قعد معاك يفهمك هتقول ايه في الموقف ده؟"

- "قعد معايا بمعنى ايه؟ لأ محدش"

- "مش مشكلة. احنا لسة في الأول، كلها يومين و كل حاجة هتبقى تمام.

هنقعد دلوقتي مع ألان، مدير المواهب عندنا في النادي"

- "مدير المواهب؟ لقب جديد. عجبي" ضحك كريم بينما لم يفهم رئيس

النادي ما يجده مضحكاً و أشار لرجل متوسط العمر، شعره بني تتخلله بعض الشعرات البيضاء، و أزرق العينين. صافح كريم في حرارة و بابتسامة رحبة.

- "أنا ألان جونز. مدير المواهب في النادي"

- "أهلاً بحضرتك. اتشرفت بيك"

- "عمرك وقفت في مؤتمر صحفي قبل كدة؟" سأل مبتسماً

- "لأ طبعاً. أنا لسة معرفش حاجة خالص عن القصة دي. بس متخافش

هتلاقيني معاك على الخط"

- "ولا عمرك اتفرجت في التلفزيون قبل كدة على مؤتمر صحفي للعيب

جديد لسة واصل؟"

- " شفت كثير أوي، بس ايه الحكمة يعني؟"

- "عاوزينك تبقى فاهم الكلمتين اللي هتقولهم. تبقى محضر. عاوزينك تقول

حاجة من الحاجات اللي زي دي. نقيلك خمس أو ست جمل من الكتيب ده

وهتلاقي الدنيا ماشية تمام" ناوله كتيباً اسمه "أفضل خمسين جملة للاعبين الجدد".
تفحصه كريم في تعجب.

- "أنا سعيد بالتحدي الجديد اللي هقابله في النادي" أخذ كريم يقرأ بصوت عال، "اللعب في النادي ده هو حلمي منذ الطفولة. آن الألوان اني أستمتع بلعب الكورة فعلاً و متقاش بالنسبة لي شغل بس. أنا جالي عروض كثير من نوادي منافسة بس اخترت آجي النادي ده بالذات لأنني أحترمه جداً عن غيره. ايه الكلام ده؟" سأل كريم في تعجب

- "دي إرشادات عشان تساعدك في المؤتمر" أجابه آلان في براءة

- "هو أي واحد بيعجي هنا بياخد الكتيب ده؟ بيذاكره؟"

- "أه طبعاً لازم تحفظ منه عشان تبقى واثق من نفسك في المؤتمر"

- "طب هيضايقك لو غصب عني قلت جملة من برة؟" سأل كريم في تعجب

- "لأ خالص، مادام نفس السياق و المعنى. أنت بتفكر تقول حاجة من برة

الكلام ده؟" نظر إليه في تهديد

- "هو فيه حاجة تتقال بعد كدة؟ طبعاً هو ده اللي في دماغني" رد كريم في

خوف

- "تمام. أصلاً الكلام مش هتقوله بالنص، مش عاوزين بيان انك حافظ يا

كاكا خليك ناصح"

- "هاهاها، طبعاً طبعاً" ضحك كريم في ارتباك، "بعد إذنك بقي عشان ورايا

مذاكرة"

- "ماشي يا بطل. قدامك نص ساعة قبل المؤتمر. هتلتحق تخلص؟"

- "ياااه. أنا عمري ما بذاكر إلا ليلة الامتحان"

- "بقولك يا كاكا. عاوز أشرحك كام حاجة في الشغل بتاعنا"

- "متقلقش. أنا فاهم كل حاجة تمام" أجابه في ثقة

- "فاهم فعلاً؟ بجد؟ فاهم ايه؟" سأل آلان في دهشة

- "احنا بنقى فرقتين. كل فرقة فيها ١١ واحد و بتحاول نجيب جون في الثانية. عداني العيب كدة؟"

- "أه، هاهها، دمك خفيف يا كاكا. نتكلم لما نتقابل" ضحك ألان و ترك كريم لدهشته

لم يستوعب كريم المحادثة التي دارت بينه و بين ألان على الإطلاق، لكن قرر أن ينظر في الكتيب لأجل مجاملة الرجل على الأقل. "دمي خفيف إزاي يعني؟" همس كريم لنفسه، "ايه الناس دي، هما يا مجانين يا عريانين؟"

استرخى خوان في المقعد الكبير مشاهدًا التلفاز بهدوء. اعتاد أن يرتاح ليلة التدريب كي لا يستيقظ مرهقاً في اليوم التالي، خاصةً أن صباح الغد سيشهد أول يوم تدريب منذ نهاية الراحة السلبية التي تسبق الموسم الجديد.

- "أنا نازل يا خوان. تيجي معايا؟" مر كريم بجواره في طريقه إلى باب الشقة
- "ايه اللي أنت لابسه ده؟" أشار خوان إلى ملابس كريم. ارتدي فانلة صيفية و سروال جيتز و شبشب حمام على ما يبدو، "أنت اتجننت يابني؟ أنت فاكر نفسك في روما؟ هتموت من التلج"

- "ليه يا خوان؟ دانا مصري يابني. المصري بيحتاج يومين عشان يسيطر على المكان. أنا سيطرت خلاص و أخذت على الجو. مش لسة هقععد ألبس و الكلام الفاضي ده. احنا لها يا معلم" في اليوم التالي سيتمنى لو استمع لنصيحة خوان.

بدأت الاختبارات البدنية لأعضاء فريق كريستال بالاس الإنجليزي في صباح اليوم التالي. سار المدرب يتابع أداء كل لاعب عن قرب ليقارن بين مستواه الحالي و مستواه قبل الراحة السلبية.

- "جري ايه يا جماعة فيه ايه؟ ايه يا خالد اللي أنت بتنبيله ده؟" نظر إلى خالد في الشتمزاز الذي أخذ يلهث و هو يريح ساعديه على الأرض
- "بريح بس يا كوتش. بقالي شوية مجريتش، متقلقش هظبط مستوايا تاني على طول"

- "تظبط مستواك ايه يا خالد؟ مانت لو تبطل الزفت اللي بتعمله ده كان زمانك دلوقتي وحش"

- "محصلش يا كوتش. هو الواد الجديد اللي طلع السمعة دي عليا. أنا مش مواظب خالص على الحكاية دي" قال خالد في براءة مصطنعة
- "عليا أنا الكلام ده يا خالد؟ اظبط يلا"

أخرج المدرب كشف أسماء اللاعبين ليستمر في التقييم. وجد أن الكل حاضراً للتقييم البدني عدا كريم رافت. خرج مسرعاً ليراجع الأمور مع مدير المواهب. تعجب كثيراً ألا يأتي لاعب جديد لأول حصة تدريبية، و فكر أنه ربما صانع للمشاكل؛ خاصة بعد المشكلة التي أحدثها مع خالد.

- "فيه لعب مجاش الهاردة يا مستر ألان. كريم رافت، الولد الجديد" قالها وهو يدخل مكتب مدير المواهب

- "كاكا؟" تساءل ألان في دهشة، "ازاي مجاش؟ كان لازم ييجي، دانا عاوز أقعد معاه. تعالى نسأل خوان، هو زميله في الشقة"

سارا معاً إلى أن وصلا لغرف الملابس. بحث ألان عن خوان إلى أن وجده يمارس بعض تمارين البطن مع مدرب حراس المرمى.

- "ايه يا خوان أنت جيت لوحدك الهاردة؟" سأل في قلق
- "أيوه يا مستر ألان. للأسف. كاكا عيان و مقدرش ييجي" قال خوان في حزن

- "عيان؟ ايه الدلع ده؟" صاح في استهجان، "فيه حد يعنى أول يوم؟"

- "يا ريته بيتدلح كان زماي جيته من قفاه. هو بس مقدرش درجة الحرارة كويس، و اتأخر فمعرفش يروح. جالي تليفون من المستشفى، جابوه على البيت عندنا. جاله التهاب شعبي جامد و مش حاطط منطق"

- "التهاب شعبي جامد؟ ممم. أنا اتفانلت بالموسم من أوله" قال ألان في خيبة أمل، "اتصرف يا خوان. الواد ده ييجي بكرة بالليل. عندنا أول ماتش الأسبوع الجاي. لازم ييجي اجتماع بداية الموسم. هنقعد نفهمه امتي؟ ده التهاب شعبي يعني" قال ألان

- "حاضر يا مستر ألان. هحاول أجيبه معايا بكرة"

- "مش تحاول....تجيبه" قال ألان في حسم

أخذ كريم يمشي في إيدجوير رود هائماً. انتشر الظلام الدامس مع اشتداد حدة الهواء المثلج. ركض يمينا و يساراً بحثاً عن مأوى من البرد القارص فلم يجد. صرخ بأعلى صوته طلباً للنجدة. استمر بالعدو إلى أن وصل لمخطة المترو ليجدها مغلقة. لم يجد أي مكان مفتوح يحتسب به، أو سيارة في الشوارع لإنقاذه. تجمدت أوصاله من البرد و سقط أرضاً. نظر إلى السماء ليرى النجوم منيرة الظلام. صرخ بأعلى صوت "أنا هوووووووووت هنا!!!!!!!"

- "كاكا! كاكا! فوق يا كاكا! فوق" سمع كريم صوتاً مألوفاً و استفاق من

هلاوسه

- "هه؟ مين؟ مين بيتكلم؟ أنا فين؟" راح كريم يهتف و هو يخرف

- "بتقول ايه يا كاكا مش فاهم؟ اتكلم إنجليزي عشان أفهمك" قال خوان

- "الحقوووونيسي" أخذ كريم يهلوس ثانية

- "إنجليزي يا كاكا! إنجليزي!" أمسك خوان بذراعيه بقوة ليفيقه. تأوه كريم

من الألم

- "أنت مين؟" تحدث كريم أخيراً بالإنجليزية. ساعده الألم على الاستيعاب

- "أنا خوان يا كاكا. أنت في السرير بتاعك. أنت كويس خلاص متخافش"
حاول خوان أن يطمئنه و يهدئ من روعه

فتح كريم عينيه و نظر حوله ليجد نفسه في غرفته. ناوله خوان كوباً من الماء وحبوب الأدوية. تجرع كريم المضادات الحيوية في محاولة للقضاء على السخونة الشديدة و التهاب الحلق.

- "معلش أنا عارف انك تعبان بس لازم تيجي معايا دلوقتي. عندنا اجتماع مهم"

- "اجتماع مهم؟ اجتماع فين؟"

قام كريم كجثة دبت فيها الروح. أحضر له خوان سروالاً و قميصاً ارتداهما دون وعي، ثم وضع عليه سترة ضخمة من الفرو، و معطفاً ثقيلاً، و أضاف للملابسه وشاحاً قطنياً و قفازاً لتدفئته بأكبر قدر ممكن. ساعده بعدها على النهوض و أسنده على كتفه.

- "ايه ده؟ أنا لبست امتي؟" استمر كريم بالخرافات
- "يلا يا كاكا تعالى معايا بس. ملكش دعوة" قاده خوان إلى باب الشقة ونزلا إلى الشارع

- "واخديني و رايح على فيسيين، واخديني و رايح على فيسيين" تجاهله خوان حيث لم يفهم الهلوس التي يتفوه بها

ركبا السيارة معاً و قاد خوان في سرعة. استفاق كريم قليلاً و بدأ يعود لوعيه. تمنى خوان لو تجاهل تعليمات ألان بإحضاره إلى الاجتماع.

وقف رئيس الاتحاد الإنجليزي على أرض ملعب ويمبلي الضخم في منطقة برينت بلندن. تصل سعة الاستاد عادةً إلى ٩٠,٠٠٠، لكن هذا اليوم تم استغلال كل المساحات لاستيعاب الحشود الكبيرة الحاضرة للاجتماع. تأكد رئيس الاتحاد من امتلاء جميع المدرجات و حضور كل الفرق المشاركة في دوري الدرجة الأولى

للاتحاد الإنجليزي. لحق كريم و خوان بداية الاجتماع بصعوبة، و جلسا في مقعديهما المخصصين.

- "أهلاً بكم يا جماعة في اجتماع بداية الموسم بتاعنا. شكراً لحضوركم الماردة، و أحب أحييكم مقدماً على الموسم الجديد" شرح على الشاشة الكبيرة مقلباً شرائح العرض بنفسه، "عندنا نقط كثير نغطيها الماردة. تعالوا نستعرض مع بعض السيناريو المحتمل للموسم"

- "هو الراحل ده يقول ايه؟ سيناريو ايه؟" سأل كريم في دهشة و هز رأسه بقوة

- "هيشرح السيناريو يا كاكّا عشان نعرف الدوري هيمشي إزاي. إيه مالك؟" تحدث خوان في ضيق و كأنه يسمع محاضرة روتينية

- "سيناريو؟ هيهيهيه . ماشي و ماله" ضحك كريم في غباء

- "طيب يا جماعة" استمر رئيس الاتحاد الإنجليزي في الحديث، "تعالوا نراجع الموسم اللي فات. الناس اتكلمت عنه، و عن قد ايه النقط كانت قريبة من بعض في الآخر. مادام الناس عجبته فكرة المنافسة القريبة من بعض، احنا قررنا نعملها تاني السنة دي. فكرة انه لحد آخر ماتش المنافسة محدمة و مش معروف مين هيكسب الدوري بتعلي نسبة المشاهدة بشكل كبير. السؤال طبعاً اللي كله بيسأله، مين هيكسب الدوري السنة دي؟ عارف انها لحظة جامدة أوي بالنسبة ليكوا. في الحقيقة فيه اقتراحات كثيرة أوي ان الدوري السنة دي يروح لنيوكاسل يونائتد، آن الأوان للفرقة دي ترجع الممتاز تاني. لسة مش أكيد، بس محدش يزل، لسة ممكن تكونوا من أول ست مراكز. عاوز كله يبقى في الملعب بروح انه كسبان. الفرقة اللي هتكون في المركز الأخير هي برنلي. كلنا عارفين ان مفيش سيناريو ثابت و ممكن يتغير من أسبوع لأسبوع، بس دي الخطة الرئيسية اللي احنا حطيناها عامةً للموسم"

- "أنت اديتني دوا ايه يا خوان؟ أنا دماغي بتلف. الراجل ده بيقول ايه" هز كريم رأسه ثانيةً في قوة
- "اسمع السيناريو عشان الدوري هبدأ الأسبوع الجاي. بقالنا كتير مش بيدونا الدوري، متقولش انك توقعت هتيجي تاخده معانا"
- "هاهاها. مش تقولوا يا جماعة ان عندكم فقره الساحر هاهاها. هو ده الساحر بتاعكم؟" ضحك كريم في بلاهة
- "لأ. ده رئيس الاتحاد الإنجليزي"
- "و هو بيسافر بالزمن ولا ايه؟ الراجل ده شاف الدوري قبل كدة؟ هاهاها" استمر كريم بالضحك
- "ايه ده. أوبابا، استنى. كاكأ، أنت معندكش فكرة عن أي حاجة خالص؟"
- "فكرة عن ايه؟ لأ محدش قاللي على فقره الساحر. بس عاجباني الفكرة، الترفيه كويس"
- "محدش حكاالك أي حاجة؟ مشكلة دي. بص يا كاكأ، أنا مش عاوز أصدملك. مكنتش عاوز أقولك ان مفيش بابا نويل"
- "بابا نويل ايه يا عم؟ أنا ماليش في الحاجات دي. فاجئتني أنت كدة؟ مفيش بابا نويل؟ يااااه. مين هيلبس أحمر و يري دقنه السنة دي؟" ضحك كريم في نفس البلاهة
- "كاكأ. السيناريو ده محطوط عشان نمشي عليه. بالظبط زي الأفلام والمسلسلات. كل الحاجات دي بتبقى معروفة مقدماً"
- "أفلام و مسلسلات؟ أنت شفتني راكن الفيل بتاعي برة؟ أنا مجتتش بفيل على فكرة، ده مش بتاعي. أنا كنت بتفرج عليه بس"
- "يعني ايه؟ فيل ايه؟" تساءل خوان
- "يعني شايفني هندي يا خوان؟ ايه علاقة الأفلام و المسلسلات بالموضوع؟ يبقى ليها فريق إعداد و إخراج. المسلسلات و الأفلام تمثيل"

- "أوكيه. طب أنت مين قالك ان الكورة مختلفة عن الموضوع ده؟" أخذ
خوان نفساً عميقاً و استطرد، " الكورة زي الأفلام و المسلسلات بالظبط.. تمثيل "

هلاوس مرضية

- "ادخل و اقفل الباب وراك" أشار رئيس الاتحاد الأوروبي لرئيس الاتحاد الأسباني بالدخول و رمقه بنظرة نارية ليرعبه
- "أوامرك يا فندم. حضرتك طلبت مقابلي على انفراد ليه؟" أجابه و جلس في ارتباك

- "سؤال كويس. أنا أحب اللي يسألني. ممكن أفهم أنت ازاي ضحكت علينا و كسبت بطولة الأمم الأوروبية بعدما برشلونة كسب بطولة دوري أبطال أوروبا؟ بلدك عمالة تكسب في بطولات و تعمل في أرقام قياسية و أنا عمال أجاب في أسئلة. حياتي كلها بقت عبارة عن امتحان شفوي. دانا لو رئيس جمهورية مش هيبقى مطلوب مني كل ده" سأل رئيس الاتحاد الأوروبي في غضب
- "حضرتك عارف مثابرة و جهد المنتخب الأسباني المرصع بالنجوم. بعدين يا أستاذنا لو مش أنت اللي هتشيل المهم ده، آمال مين هيقدر عليه؟" أجاب رئيس الاتحاد الأسباني بابتسامة واسعة

- "بطل تلزيق يابني أنت. اتفضل اشرحلي خطة الموسم الجديد للدوري الأسباني. أصل أنت و البيه الثاني رئيس الاتحاد الإنجليزي عندكم نقص شديد في الإبداع. و الصراحة، أنا بفكر أغيرلكم الطقم بتاعكوا كله"
- "ليه يس؟"

- "أنا حر يا أخي. أنا صاحب سلطة و بحب أقهر الناس، فيه مشكلة؟"
- "أنا حابب أفهم ايه اعتراض حضرتك على السيناريوهات بتاعتنا؟"

- "مشكلتك أنت و هو انكوا بتحطوا نفس السيناريو كل سنة. طب سؤال مهم، و حبيب أعرف إجابته منك، من حقى كمواطن يعني. صدقني مش هزعل مهما كانت الإجابة. أنا بسألك بس، مفيش أي لوم. مين كسب الدوري السنة اللي فاتت؟" سألته في ضيق

- "برشلونة يا فندم"

- "سؤال جديد و مختلف. مين بقى اللي هياخده السنة دي؟"

- "احم. برشلونة"

- "أوبالالال. تموت أنت في التغيير. يابني أنت عندك إعاقة ذهنية؟ أنت كدة بتقللي نسبة المشاهدة يا فالخ. ايه يخلي الناس تتابع دوري محسوم من أول كام ماتش؟ عارف الفرق السنة اللي فاتت بين برشلونة و ريال مدريد كام نقطة؟" صاح في غضب

- "أكيد عارف يا فندم، كان... حاول التذكر

- "تسع نقط. تسع نقط بالظبط. عارف الفرق بين الثاني و الثالث كان كام اتنين و عشرين نقطة. أنت فاهم ده معناه ايه؟"

- "ان برشلونة و مدريد أقوىاء جداً؟"

- "لأ معناه اهتم بيلعبوا في دوري لوحدهم، و بقية الفرق بتلعب في دوري تاني"

- "ماهو كل ما يقل عدد الفرق اللي بتاخذ اللقب، قيمته بتزيد. لما يلزم و أي حد ياخده بيفقد الرقي بتاعه و يتزل في الأرض. فاهمني؟"

- "الكلام ده تضحك بيه على مجلس الإدارة، تضحك بيه على عيال عندك في حوارى مدريد، مش تضحك بيه عليا أنا. اشمعنى كاس أمم أوروبا كنت مقتنع أوي ان ظهور فرقة جديدة زي أسبانيا و انها تاخذ اللقب دي حاجة جامدة؟"

- "أبوة يا أستاذنا. أسبانيا آخر مرة أخذت كأس الأمم الأوروبية كان سنة ١٩٦٤. فرقة أسبانيا اليومين دول ثقيلة و تستاهل تعمل أرقام قياسية. فكرة العودة بعد أعوام طويلة لعرش أوروبا، و عرش العالم دي معناها..."

- "عرش العالم؟ أنت كمان عاوز تاخذ كأس العالم؟" صاح رئيس الاتحاد الأوروبي في استنكار

- "احم. أنا رميت كلام لرئيس الفيفا ايني حابب أسبانيا تبقى عروس الكرة اليومين دول عشان قوة المنتخب...."

- "عروس الكرة؟ يعني هي تبقى عروس الكرة الأوروبية و عروس الكرة الدولية؟ ليه؟ هتتجوز كل الرجالة اللي ربنا يقدرها عليها؟ طب خد مني أنا الخبر ده حصري. دوري أبطال أوروبا. فاكده؟ اللي أنت خدته المرة اللي فاتت وكاتالونيا عاشت أيام من النصر مع الجيل الجديد بقيادة مارادونا الجديد ميسي. انساه السنة دي خالص. احنا خلاص حددنا الفرقة اللي هتاخده. و المرة دي مش هتضحك عليا بأي سيناريو عقيم من بتوعك. الجو بتاع حرام ان الجيل الفذ ده مياخدش أبطال أوروبا مش هيتفع تاني، أهو خده. ملكش حجة السنة دي"

- "احم. طب و مين هياخده؟ نوع بقى السنة دي مش كدة؟ نقول ريال مدريد"

- "قلتلك انسى السنة دي أسبانيا تشمه. السنة دي الوضع مختلف، الناس عمالة تشتكي و طفحت من الأسبان" نظر إلى السماء يتخيل السيناريو في تشوق، "فرقة بقاها ٤٥ سنة محدتش أبطال أوروبا. آخر مرة أخذتها كان في عهدها الذهبي لأبو رئيس النادي. رئيس النادي الحالي بيعحاول تكرار إنجاز أبوه، و معاه أكثر مدرب مثير للجدل في تاريخ الكرة الحديثة. المدرب ده ابتدى يتقرف من الدوري الإيطالي و يقول انه عاوز يمشي. السؤال هيكون، هل هيتمكن رئيس النادي من تكرار المجد بعد ٤٥ سنة، خاصة مع وجود المدرب ده"

- "مين الفرقة دي؟"

- "إنتر ميلان. خلي إيطاليا تشم نفسها. مش كفاية لبسنا فيها فضيحة تزوير النتائج عشان نشئت الناس"

- "الكلام ده من سنين. ما هم خدوا كاس عالم عشان يتعوضوا عن الذل ده. مش كفاية؟"

- "أهو غصب و اقتدار. القصة عجبتني، كنت مع رئيس الاتحاد الإيطالي امبارح و أقنعني"

- "واضح اني لازم أعلي قدراتي الإقناعية. أنا حاسه سيناريو عادي الصراحة. ما تاخذ مني أنا السيناريو ده" قال في خبث

- "اتفصل سمعني يا سيدي. بس انجز، مش فاضيلك. عندي معاد مع البيه صاحبك"

- "النادي الملكي. عقدة دور الـ ١٦ المستمرة بقالها سنين. السنة دي تحتطم العقدة و ريال مدريد يتفوق على كل المنافسين و النقاد بأنه يفوز بالأميرة الشقراء و يرفع الكأس عالياً مرفراً في سماء مدريد. ياه مش ممكن دماغى متكلفة"

- "مش هيحصل. مش داخل دماغى"

- "بلاش ده. خد غيره. برشلونة، الفائز العام الماضي. هل سيكون أول فريق يفوز بالكأس مرتين متتاليتين منذ نسختها الجديدة؟"

- "انسى. نرجع للدوري بتاعك. بص يابني، مين اللي ياخذ الدوري دي بتاعتك انت. بس مش لازم نفس الفرقين يبقوا هم هم. فتح مخك شوية بلاش غباوة. ادي للناس سبب يتفرجوا على الدوري. أنت بتدي دعم جامد أوي لريال مدريد و برشلونة و الفرق التانية لأ. كل الناس عارفة كدة، و كل الناس حاسة ان فيه مؤامرة. الماتش الوحيد اللي عليه إقبال هو الكلاسيكو. ضيعت طعم الدوري. الفرقين بتوعك يمشوا يمسخوا كل اللي في طريقهم، ده برشلونة بيخلص الماتش في أول ربع ساعة.. أنا نفسي مش بتفرج. عارف مين هياخد الدوري الإنجليزي السنة دي؟"

- "مانشستر يونايتد؟"

- "أنت قعدت مع رئيس الاتحاد الإنجليزي؟" سألته في شك

- "لأ. خمنت كدة"

- "خمنت. شفت بقى ان الحاجة لما تكون متوقعة بتتخمن بسهولة؟ تحب الناس

تقول أنا عارف الدوري ده، شفته قبل كدة؟"

- "لأ طبعاً محبش"

- "مش عاوزين الناس تزهق و نسبة المشاهدة تقل. هنصرف عليكم مين؟ يلا

اتفضل شوف شغللك"

دردش عامر على الإنترنت مع رنا عن طريق تويتر. لطالما أحب أن يخرجها برسائله المسقة ليرى رد فعلها المشمئز فيضحك. بينما مارس هوايته المريضة دخل عليه عادل زميله حاملاً في يده حاسوبه الصغير.

- "شفت الخبر بتاع رئيس الاتحاد الأوروبي؟" قالها عادل و هو بالكاد يلتقط

أنفاسه

- "ايه يا سيدي، عمل ايه الباشا؟" سأل عامر في ملل

- "اسمع يا معلم: قال الأمين العام للاتحاد الأوروبي لكرة القدم أن هناك أدلة

حول احتمالية التلاعب في نتائج ٠.٧% من أكثر من تسعة آلاف مباراة تقام

سنويا في أوروبا. لا يعني هذا أن جميع المباريات متلاعب في نتائجها ولكن هناك

شكوك يجب التحقيق فيها. وإزاء هذا الأمر، دافع الأمين العام عن القرار المتخذ

من قبل اللجنة التنفيذية لدعم اعتبار الغش في الرياضة كجريمة في التشريعات

الجنائية الوطنية. ايه الكلام الكبير ده يا عم؟" قال عادل و ابتسم في تعجب

- "و رئيس الاتحاد الأوروبي شايف ايه؟" سأل عامر

- "كان في استطاعتنا القول أن صحة كرة القدم سليمة ولكنها ليست هكذا،

فهذا مثل السرطان يجب القضاء عليه قبل أن ينتشر"

- "مثل السرطان يجب القضاء عليه قبل أن ينتشر" ردد عامر الجملة في صوت درامي ساخر، "يا قلبي. بعد الشر عليك يا ضنايا من السرطان. الراجل ده داهية مش ممكن"

- "ازاي يطلع كلام زي كدة؟ أدلة ايه دي اللي بيتكلموا عليها؟"

- "يا بني الناس دي ثقيلة، مالهاش كبير. لما يكون الناس كلها بتشكك في المنظومة بتاعتك، أحسن طريقة تبعد بيها الشكوك انك تلبسها في غيرك. تطلع تندد و تعترض و تقول أنا همسك كل الأصابع الخفية اللي بتعمل الحاجات الوحشة دي. التلاعب في النتائج ده سرطان لازم نقضي عليه. كل ده عشان يبعد الشبهة عن السر الحقيقي. اللي يعرف يمشي منظومة زي دي يبقى أكيد برنس. رئيس الفيفا جنبه ولا حاجة، هو أقدم منه بس مفيش وجه مقارنة. أنت فاكور فرنسا أخذت كاس العالم ليه سنة ١٩٩٨ و هي كانت بتلاعب أقوى منتخب موجود ساعتها؟ الراجل ده صاحب الرقم القياسي في الفوز بأحسن لاعب في العالم. خليه يهيص لوحده و يطير، و خلينا احنا بنمضي اللاعبة و ناخذ فلوس"

- "على رأيك يا عامر. فريد ده لما رحله عمل نفسه عصفورة في السماء، وأول ما فكرته هو هيخسر كام لو ملعبش، و وريته عرض الإعلان اللي جاله، قعد يريل لحد ما غرقلي البدلة" قال عادل ضاحكاً

- "اللي عنده مبدأ ميلعبش بفلوس، من الآخر كدة. اللي بيلعب عشان الملايين يبقى ياخدها و هو ساكت من غير محاضرات أخلاقية. خلينا كلنا ناكل ساندوتشات برجر و احنا رايقين. برضه الواد كريم أول ما سمع المرتب بتاعه كان هيجيله سكتة قلبية. تفكر ده واحد يعترض أصلاً هم بيعملوا ايه؟ أول ما يشوف الفلوس هيبقى معندوش مانع بيع شرفه شخصياً عشانها. ولا هيفرق معاه. هي العيال اللي معندهاش مبدأ هي فاكهة الكورة" قالها عامر و انفجر ضاحكاً

"أنا بحلم. أنا بحلم. أنا بحلم. أنا بحلم" ردد كريم و هو يهتز في فراشه بغرفته. تركه خوان منذ ليلة اجتماع بداية الموسم ليستفيق من صدمة الخبر الذي زفه له. لم يستوعب ما دار أمامه في استاد ويمبلي الضخم الممتلئ عن آخره باللاعبين، المديرين الفنيين، الحكام و الإداريين. هل فقد عقله؟ أخبره الطبيب بنجاته من الإصابة بشلل في وجهه لو كان استمر نصف ساعة أخرى في البرد القارس. حمد الله على نجاته و قرر أن يعتني بصحته جيداً دون استهتار. تبقى يومان على المباراة الافتتاحية للدوري و لم يعرف بعد ما عليه أن يفعل. تعب خوان من محاولة التحدث معه نظراً للهلاوس المرضية التي تصيبه.

- "صباح الخير يا كريم. " فاجأته لهجة عربية مألوفة في غرفته
- "أنت خالد العريان. أنا عارفك. ابعده عني. ابعده عني!" صاح كريم في رعب
- "اهدا بس يا كريم و فوق" قال خالد بنبرة جادة، "خليك شاطر عشان متدمرش مستقبلك بايدك. مفيش حد بيستحمل واحد زيك كل ده. عمرك شفت فريق يبجيب لعب و قعد يتدلّع زيك و سكتوا عليه؟ احكي لي اللي حصل. هم حبوا بيعتولك واحد يتكلم لغتك عشان تبقى براحتك، و عشان تبطل هلوسة"
- "طيب يا خالد. يرضيك الكلام اللي قاهولي خوان يوم الاجتماع. ان الكورة... تمثيل" تردد كريم و كأنه لا يقوى على قولها
- "الكورة ايه؟ الكورة تمثيل؟" صاح خالد في دهشة كبيرة، و كأن كريم أخبره بأن يوم القيامة غداً، "ايه يابني اهلّس اللي بتقوله ده؟ أنت جبت الكلام ده منين؟ أنت سخن يا حبيبي؟"
- "يعني الكلام ده مش صح؟" هتف كريم في لهفة
- "ثانية واحدة. أنت كان عندك شك و لو واحد في المية... بلاش واحد في المية، كان عندك شك ٧٠. في المية ان الكلام ده ممكن يكون صح؟" سأله في استنكار، "أنت دماغك دي هتوديك في داهية. دي كلها هلاوس مرضية"
- "يعني الكورة مش تمثيل؟"

- "تمثيل ايه يابني؟ بقولك دي هلاوس مرضية"
- "و لما قالوا ان نيوكاسل هيكسب الدوري دي كانت برضه هلاوس مرضية؟"
- "أيوة مضبوط. فيه حد بيبقى عارف مين هياخد الدوري قبل ما يبدأ؟ إلا بقي لو بتلعب فيفا"
- "و لما قال ان كاس إنجلترا هياخده السنة دي فرقة من الدوري الممتاز برضه هلاوس مرضية؟"
- "أنت عارف فيه كام فرقة في كاس إنجلترا؟ مستحيل حد يتوقع مين ياخده. دي أقدم بطولة في العالم"
- "ربنا يطمئنك يا خالد. دانا كنت هروح فيها" زفر كريم في ارتياح
- "اسمع بقي الجلد يا بتاع التمثيل أنت. هم بعتوني ليك عشان أفكرك بدورك التكتيكي في الماتش و أعرفك الخطوة ماشية ازاي. عارف هنلاعب مين أول ماتش مش كدة؟"
- "هنلاعب بلاكبول في أرضنا. مضبوط؟"
- "مانت مذاكر أهه. هایل أوي. الفرقه دي هتقع درجة تانية فلازم ندوس عليها جامد عشان نكسب بنتيجة كبيرة"
- "هتقع درجة تانية يعني ايه؟ أنت تعرف مين؟"
- "أنا قلت هتقع درجة تانية؟ أنا قلت هنوقعها درجة تانية. ما تركز يا كريم أنت لسة مفقئتش ولا ايه؟ هنلعب على الهجوم من أول دقيقة. أنت عليك تضرب مصيدة التسلل. كمان المدرب بتاعنا واثق فيك و مكلفك تلعب ضربات الجزاء. إياك تضعيها عشان ميزعلش منك"
- "أنا مش فاكرا امتي آخر مرة ضيعت ضربة جزاء. تقدر تقول كدة من ٢٠ سنة"
- "٢٠ سنة؟ أنت عندك كام سنة يا كريم؟"

- "هتم ١٨ سنة أهه"

- "هاهاها. فهمتك يا شقي. أموت أنا في الثقة بالنفس. إلا صحيح هو عيد ميلادك يوم الماتش؟"

- "شفت؟ أول ماتش يوم عيد ميلادي. حاجة رومانسية أوي" أجاب كريم في حجل

- "ماشي يا عم الرومانسي. كدة خلصت الخطه، نتكلم بقى في التكتيك بتاع الماتش؟"

استعد رئيس الاتحاد الأوروبي خلف ستار منتدى جريمالدي بالإمارة الفرنسية موناكو لقرعة دوري أبطال أوروبا. تنفس بهدوء ليحضر انفعالاته أمام الصحفيين و النقاد عند سحب الكرات الزجاجية. وقع على رئيس الاتحاد الأوروبي عبء تنظيم مجموعات متكافئة إلى حد ما، و في الوقت نفسه عدم التخلص من كل الفرق الكبيرة مبكراً. تحرى جيداً وضع فرقتين قويتين على الأكثر في كل مجموعة، حيث تصعد فرقتان فقط من كل مجموعة للدور التالي.

- "جهزتلي يابني الكور اللي المفروض أسحبها؟ و علمتلي كل واحدة فيهم بعلامة؟" سأل مساعده في صوت خافت
- "أيوة متقلقش يا فندم. هتبقي قرعة لطيفة خالص"

اطمأن لذلك و شق طريقه في الكواليس ليدخل إلى منصة مسرح جريمالدي في استقبال الحاضرين. جلس الكل في ترقب كالمعتاد حيث تمتعت دائماً قرعة دوري الأبطال بالإنارة و التشويق نظراً لحجم البطولة. ابتسم و أشار للجمهور في برود محاولاً إخفاء توتره. أصبح أشبه بالفريسة التي عليها البدء بالهجوم كي تباغت المعتدي. أخذ مكانه خلف الميكروفون و افتتح فعاليات القرعة. استمرت القرعة لساعة كاملة. بعدها باغته أحد الصحفيين بسؤال.

- "هتعملوا ايه في تزوير نتائج المباريات اللي اتكلمتوا عنه من كام يوم؟"

- "زي ما قلت. ده مرض في كرة القدم. ده سرطان" قالها بصوت درامي مفتعل، "لازم نتخلص منه و نقضي عليه للأبد.. للأبد" راح يرددوها ليضفي طابعاً درامياً و كأنه صدى صوت

أففى جلته و أسرع إلى الخارج و لم يتلق أسئلة أخرى. ركب سيارته و قرر الاتصال برئيس الفيفا، و انتظر إلى أن تحول مدير مكتبه المكالمة.

- "خير يا ليندا فيه ايه؟" رد رئيس الفيفا و هو يلهث

- "آسفة يا فندم اني عطلتك. رئيس الاتحاد الأوروبي عاوز حضرتك ضروري جداً جداً"

- "يعني انتي مقوماني من على الإكس بوكس عشان تقولي كدة؟ ما علينا، اديهوني"

انتظر دقيقة حتى جاءه صوت رئيس الاتحاد الأوروبي.

- "بتتهج ليه يا إكسلانس؟ رياضة ايه اللي بتلعبها في المكتب؟ عليا أنا الحركات دي؟ بتعمل ايه؟"

- "هاهاها. لأ متخليش دماغك تروح بعيد. دي أنشطة رياضية" ضحك رئيس الفيفا

- "هفوتمالك المرة دي. فيه كام نقطة لازم نتناقش فيها. أهمها. مين هياخذ الكرة الذهبية للفيفا السنة دي؟"

- "هيكون مين يا سيدي؟ هو فيه غيره. أكيد ميسي. طلعلني لعب تاني الناس تعرفه أو تسمع عنه. أنت عارف حد تاني؟"

- "أه طبعاً. فيه رونالدو"

- "ما هو يا ميسي يا رونالدو"

- "بس أنا عندي مشكلة. كدة هتخلي ميسي يعديني في الفوز بالكورة الذهبية كذا مرة ورا بعض. ما تسقط منه مرة كدة نديها لرونالدو ولا حاجة. ده حتى الواحد مستحملش يقضيها شوكلاتة، لازم يحدق"

- "أنت كل اللي فارق معاك انه ميعديكش؟ خلي التاريخ يتجدد شوية. أنت عاوز الناس تقول على النتيجة متفبركة؟"

- "لأ العفو طبعاً. لا عاش ولا كان اللي يقول كدة. بس برضه حنة عيل زي ميسي هيبقى أحسن مني؟ ايه لازمته؟ رונالدو برضه لعب كويس و الناس هتقتنع انه كسب"

- "مبدئياً كدة أنت عارف ان فيه قائمة لازم غملاها. نقيلي كدة حاجة وعشرين اسم ارميهم في القائمة القصيرة، عشان لما تصفص يتبقا لنا في الآخر ميسي و رונالدو و أي واحد تالت. أقولك حاجة؟ حطلي المنتخب الأسباني كله وكل لاعبة الدوري الأسباني؛ كام لعب من مدريد على برشلونة و أتلتيكو. كلهم باللاعبة اللي الناس تسمع عنها، أي حاجة تظبط الدنيا. متناساش صحيح الواد بيكيه"

- "بيكيه؟ دي نكتة أكيد، صح؟ هو بيكيه يعمل أي حاجة مفيدة في الكورة؟"

- "لأ. بس متجوز شاكيرا و بقى رمز اجتماعي. لازم يبقى لنا واجهة مشرفة"

- "فيه نقطة معرفش أخذت بالك منها قبل كدة ولا لأ. مش احنا خليناها الكرة الذهبية للفيفا؟ يعني اللعب اللي بيكسب يبقى المفروض أحسن لاعب في العالم، و أي لعب من أي دوري في العالم ممكن يدخل. كلامي صح؟"

- "أبوة طبعاً. الكرة الذهبية للفيفا"

- "طب على أي أساس مفيش لعب من برة أوروبا يشم ريحة ترشيح حتى؟ ده كل اللاعبة من دوريات أوروبية. مفيش حد من نادي برازيلي أو أرجنتيني أو

من برة قارة أوروبا خالص بيتقال اسمه. الناس بتشتكي ان لاعبية في بلاد ثانية أحق. ده مش هيقفل من مصداقية الجائزة؟"

- "مصداقية الجائزة؟ هي الناس فاهمة حاجة؟ أهم هيطبلوا ورا ميسي وخلاص. مينفعش أغير رأيي، دي فلوس ناس. أنت عارف كمان ان ميسي كان عنده نقص في هرمون النمو..."

- "و مكانش معاه فلوس يدفع العلاج. أيوة عارف و حافظ. و كافح و وصل في الآخر. قصة هائلة، بس دي تحليه يكسب سنة أو اتنين، مش زبطة كدة. فيه لاعبية كتير أوي محدش يسمع عنها و مبتاخذش فرصتها"
- "احنا مش حقوق الإنسان. مالناش دعوة. فيه أي حاجة ثانية ولا أرجع أكمل رياضة؟"

أغلق رئيس الفيفا الخط، و عاد لاستكمال اللعب. "شوط يا راجل. يا سلام عليا. محترف"

عاد فليتشير المدير الفني لفريق كريستال بالاس إلى مكتبه بعد انتهاء حواراه مع قناة سكاي سبورتس ثم استدعى خبراء التأهيل البدني، المدرب المساعد، مدرب حراس المرمى و أيضاً أخصائي التأهيل النفسي. سألهم عن مدى استعداد كل لاعب بالتفصيل. جاءت الإجابات حاسمة واضحة بالنسبة لكل اللاعبين عدا كريم، حيث لم يحضر التدريبات، و بات اشتراكه في مباراة الغد أشبه بالمغامرة في الظروف العادية.

- "ماله كريم ده يا كوتش مارك؟" وجه سؤاله إلى المدرب المساعد
- "كريم كان عيان، فمحضرش الاختبارات البدنية و التدريبات اللي فاتت. الأخصائي النفسي مقعدش معاه برضه"
- "و عادي انه يلعب ماتش بكرة؟"

- "عادي جداً. اللي فهمته من مستر ألان انه معندوش أي فكرة عن طبيعة اللعبة. اللي بيشفوفه في التلفزيون بس هو اللي يعرفه"
- "ازاي أصلاً حضر اجتماع بداية الموسم من غير ما يبقى عنده فكرة؟ المهم عملنا ايه عشان نشيل عنه الصدمة؟"
- "بعتنا خالد يتفاهم معاه عشان عربي زيه و يفهم دماغه. هو قال انه كان مهلوس شوية، نتمنى ده ميكونش أثر على فهمه"
- "احنا متمسكين بيه ليه كدة أصلاً؟"
- "موهبة جديدة. كمان عشان نزود جمهورنا في أفريقيا و الوطن العربي. الموضوع ده موضة. اللاعبة اللي لوها مختلف عننا من أفريقيا و أمريكا الجنوبية والمكسيك و غيرها بتعمل شعبية عند الشعوب دي"
- "هسألك السؤال يا كوتش و أنت اللي هتحسم الموضوع ده. الولد ده يلعب ماتش بكرة ولا نستنى أما نشوف حكايته؟"
- "بصراحة احنا وعدنا الاتحاد انه هيلعب. خصوصاً ان فكرة عيد ميلاده هتعمل جو في الملعب. أكبر قصتين للماتش هو تدريبك لبلاكبول السنة اللي فاتت، و ان أجدد الوافدين للفريق هيكون عيد ميلاده يومها. مديعين الكورة بيتشدوا أوي للحاجات الهبله"
- "فعلاً. مش بعيد يسيبوا الماتش و يركزوا في النقطة دي. و هو مبسوط بقى ان مكتوبله يعك في عيد ميلاده؟"
- "دي أوامر. أكيد مش هيعترض. متقلقش خالص"
- "أنا مش قلقان. أنت اللي قلقان، عارف ليه؟ عشان أنت المسئول قدامي لو حصل حاجة. فين كريم دلوقتي؟"
- "كاكا؟ بيتمرن برة مع زميله"
- "دخلهولي على الأخصائي النفسي على طول. يلا متضيعش وقت"

أخذ كريم يستعرض مهاراته الكروية على زملائه بالفريق في غرور شديد. دخل مع كل منهم في سباق فردي ليثبت تفوقه البدني و سرعته الجنونية. لم يعجب معظمهم بإهاناته حتى لو علموا أنه مجرد مزاح. تمادى كريم في المزاح متهماً زميلاً آخر بأنه أشبه بالسلفاة، بل وصل إلى أن استنكر انتماء أحدهم إلى ملعب كرة قدم. فرض سيطرته سريعاً على أرض الملعب و وحد الصفوف ضده من فرط سخافته غير المقصودة. لم يفهم سر انزعاج أحدهم عندما صفعه على قفاه قائلاً "ما تسترجل ياض كدة". رغم ذلك، سعد خوان لرؤيته في مزاج جيد و ذهب للاطمئنان على حاله.

- "ايه الأخبار الفاردة يا كاكأ؟ أحسن؟ أنا قلت أسبيلك الشقة يومين لحد ما تفك"

- "معلش مترعلش مني لو كنت ضايقتك" أجاب كريم في حجل

- "لأ خالص. أنت فاتك كل التحضيرات للماتش. مش مشكلة تتعوض الماتش الجاي. كنت خايف عليك من الواد خالد ده، بس هو ظبطلك كل حاجة مش كدة؟ شرحلك دورك ايه بكرة؟"

- "أيوة ظبطلي كل حاجة. دانت هتحس اني معاكوا في الفرقة بقالي عشر سنين مثلاً"

- "مش عاوزك تغلط بكرة خالص، مش من أول ماتش. عاوزك تثبت نفسك. هو مش هيكون عيد الميلاد اللي أنت عاوزه بس بالليل هنعوضك و نحتفل بيك"

- "هو فيه عيد ميلاد أحلى من كدة؟ دانا هولعها بكرة"

- "تولع ايه بالظبط؟ أنت متأكد...."

- "كاكا!" ناداه المدرب مارك من بعيد مقاطعاً خوان فتركه كريم و ركض مسرعاً

اصطحبه المدرب مارك إلى مكتب الأخصائي النفسي. وقف كريم أمام الباب في تردد عندما قرأ اللافتة و شعر بالقلق.

- "حضرتك واخديني على فين؟"

- "ده الأخصائي النفسي بتاعنا"

- "مستشفى المجانين يعني. انتوا خلاص خليتوني مجنون؟"

- "لا مجنون ولا حاجة يا كاكا. ده إجراء بناخده مع كل اللاعبة الجديدة"

أجابه في هدوء

- "كل اللاعبة الجديدة برضه، و لا كل اللاعبة المهلوسة؟ هو أنا عشان

عييت يومين هتوديني السرايا الصفرا؟"

- "السرايا الصفرا؟ بطل الكلام الغامض بتاعك ده يا كاكا و خلي الدنيا

تمشي بهدوء" قالها و دفعه إلى باب الغرفة

دخل إلى غرفة الأخصائي النفسي في هدوء و ثقة حتى لا يتهمة بأي عرض من أعراض الجنون. جلس في برود دون أن يتحدث أو ينتظر الإذن بالجلوس. نظر إلى الأخصائي بابتسامة واسعة، إلى أن تذكر أنه ليس عند طبيب الأسنان، فأغلق فمه و اعتدل في جلسته حتى لا يظهر كالمختل عقلياً.

- "ازيك يا كريم. اسمك كريم مش كدة؟" سألته الأخصائي

- "أيوة مضبوط يا دكتور. كريم رأفت"

- "بلاش دكتور دي. أنا الأخصائي بتاعكم. قولي يا جون"

- "نفترض اني مش عاوز أقولك يا جون، ليه تجبرني على حاجة زي كدة؟"

- "أجبرك؟" تساءل جون في دهشة، "لأ براحتك خالص يا كريم. ولا تحب

أقولك يا كاكا؟"

- "أنا مش فاهم ايه الصعوبة في الموضوع، ناديني زي ما أنت عاوز، و أنا

أناديك زي مانا عاوز" اتخذ كريم طابع رجال الأعمال

- "واضح ان مزاجك متعكر أوي النهاردة. أنا مقدر ظروفيك؛ نادي جديد، وناس مش متعود عليها. أكيد عندك إحساس ان كل اللي حواليك أعداء وإن مفيش حد منهم واخذ صفك. بس صدقني يا كريم، أنا واخذ صفك"

- "واخذ صفني في ايه؟ هو كل الدكاترة النفسيين حافظين نفس الكلام يقولوه؟ أنا علاقتي بزمائلي لغاية دلوقتي كويسة"

- "كل الدكاترة النفسيين؟ أفهم من كلامك ان ليك تاريخ مع الدكاترة النفسيين؟" سأله في خبث

- "حضرتك كدة بتعملي إعداد نفسي؟ كدة حاسس انك قايم بشغلك؟ إحساسي اني عاوز أولع في نفسي، ده من أهداف المقابلة دي؟"

- "تولع في نفسك؟ عمرك كان عندك ميول انتحارية؟"

- "دكتور جون...."

- "بلاش تقولي..."

- "دكتور جون! بتضايقك دكتور جون؟ تحب أسجلها لك على شريط كاسيت و أشغلها لك طول النهار؟" قام كريم من مكانه

- "شريط كاسيت؟ تقدر تقول على نفسك شخصية قديمة شوية و عايشة في الماضي؟"

- "تقدر تسكت؟ أنت أكيد مش حقيقي، إنسان جرافيك، حتى مناخيرك مش مضبوطة. أنت أكيد مش خلقة ربنا. شكلك كائن فضائي"

- "كائن فضائي. ممم، خيالك واسع يا كريم. يمكن خيالك الواسع ده اللي بيخلق عندك هلاوس"

- "هلاوس؟ أنت عاوز تطلعني مجنون و خلاص عشان تحلل لقمتمك؟ خلاص أنا هريحك. أنا عندي تخلف عقلي من الدرجة الثالثة، و باخد أدوية أعراضها الجانبية جنون العظمة و انفصام الشخصية. الصبح بلعب كورة و بالليل بانشر غسيل الناس في ليستر سكوير. حلو كدة؟"

- "كريم. الثبات الانفعالي عندك منخفض جداً. ازاي هستحمل ضغط الماتشات لو مش عارف تستحمل كلامي البسيط ده"
- "يعني ايه يا دكتور؟" سأل كريم في قلق
- "يعني عشان استفزيتك شوية كنت هتقلع اللي في رجلك و تضربني بيه. ما بالك بقى في وسط الماتش"
- "تصور معاك حق" هتف كريم مدركاً الفخ الذي أوقعه به الأخصائي النفسي "أنت لازم تساعدني يا دكتور. افرض الحكم حسب عليا حاجة واستفزي، أقوم أقطعله هدومه و أمشيه عريان في الملعب؟ مش معقول. أنا مستقبلي في خطر"
- "متقلقش يا كريم. أنا هساعدك. خليك معايا بس و أنا هاخذ بالي منك"
- "ابدأ معايا تاني هتلاقي الوضع مختلف"
- "ماشى يا سيدي. نبدأ تاني" ابتسم في هدوء، "حاسس بإيه يا كاكأ من ساعة ما جيت لندن؟"
- "حاسس اني عايش في حلم. بس متقلقش، حلم واخذ بالي انه حلم، مش هلوسة" قال كريم مبتسماً
- "طيب. سؤال مهم أوي و مستني منك إجابة واحدة. ايه درجة استعدادك للموسم الجديد؟"
- "مستعد على الآخر. أنا جيت هنا عشان أكسب الدوري"
- "هاها. لأ متسرحش بخيالك أوي كدة. واخذ بالك ان بكرة عيد ميلادك؟"
- "بكرة عيد ميلادي؟ تصدق في نفس الوقت من ١٢ شهر فاتني عيد ميلادي، عشان حضرتك مكنتش موجود عشان تفكرني"
- "كاكا. احنا قلنا ايه؟ هنقضيه استظراف؟"
- "هاهاها. جرى ايه يا دكتور؟ ما تخلي عندك ثبات انفعالي"

عيد ميلاد سعيد

- "تبدأ أحداث الشوط الثاني من المباراة المرتقبة بين فريقي كريستال بالاس و بلاكبول، معاكم مارتن تايلر و ألان سميث من سكاي سبورتس. مفيش أي تغييرات من المديرين الفنيين. يمكن عشان المباراة متكافئة نوعاً ما فمحدث حاسس ان فيه حاجة ممكن تتغير"

- "فعلاً يا تايلر، المديرين لسة بيختبروا المباراة، و لحد دلوقتي كل لعيب قايم باللي عليه. جونز ماسك نص الملعب كويس، كاكا قايم بواجب هجومي جبار. على الناحية الثانية فليتشر عامل قلق لدفاع كريستال بالاس. لسة المباراة فيها"

- "ويلفريد زاها بييجري بالكورة، بيراوغ و يفوت. عرقلة واضحة، و ضربة جزاء لفريق كريستال بالاس"

- "بعد خمس دقائق من الشوط الثاني! واضح إن كريستال بالاس هيبقى صاحب الكلمة الأولى"

- "خطوة جريئة أوي من رون فليتشر انه يخلي كاكا يشوط ضربة الجزاء. هل ده قرار سليم يا ألان؟"

- "يا صابت يا خابت. لو جت تبقى أجمل هدية لعيد ميلاده"

- "هنشوف مع بعض. كاكا داخل يشوط ضربة الجزاء. و جوووول لفريق كريستال بالاس"

- "استنى يا تايلر، واضح ان الحكم هيعيدها تاني"

- "هيعيدها ليه؟ ايه اللي حصل؟ نشوف قرار الحكم مع بعض"

- "الحكم يقول ان كريم عمل تمويه بجسمه للحارس، و بالتالي لازم الكورة تتعاد"

- "غريبة أوي يا ألان. الولد موقفش خالص و هو داخل يشوط. كورة مشكوك فيها شوية"

- "كاكا هيشوط تاني. زميله رايح يكلمه. أكيد بيرفع معنوياته و يشجعه"

- "كاكا داخل يشوط تاني، و جووورول تاني مش ممكن على الأعصاب. المرة دي في الزاوية الشمال"

- "الهدف فعلاً تم احتسابه، و الحكم شكله متضايق جداً. أكيد عشان فريق كريستال بالاس خالف القواعد. الإعادة مشكوك فيها شوية. لكن مش هتفرق. كاكا بييجيب لنفسه أحسن هدية لعيد ميلاده"

- "المباراة هتشتعل.. و مش معقول. هدف التعادل على طول لفريق بلاكيول. شوطة من بعيد لفليتشر بتفلت من ايد الحارس و تدخل. ١ - ١ والمباراة نار. جمهور كريستال بالاس هيتجنن"

- "رد فعل غريب أوي من الحارس. هو كان بيعمل ايه في التدريبات. حاجة تضحك"

- "عرقلة جامدة أوي، و كاكا على الأرض. بيحاول يقوم من غير ما يفقد الكورة، الحكم يقول مفيش فاول. كاكا بيهتف للحكم معترض. الحكم يصفر يوقف اللعب. و إنذار لكاكا"

- "حاسه قرار قاسي شوية. دي حاسة البداية، و العرقلة قوية. بس مش مشكلة هو لسة جايب هدف و لازم أعصابه تبقى هادية"

- "تلت ساعة على نهاية المباراة، النتيجة لسة ١ - ١. شوطة حلوة تاني من كاكا لكن تضيع. هجمة مرتدة لبلاكيول، كاكا دينامو مش ممكن، رجع يخطفها ويعمل هجمة سريعة لكريستال بالاس، بيريحها لجونز، و جونز يشوط بعييد أوي. مش معقول"

- "مباراة سريعة و تخطف الأنفاس"

- "كاكا ابتدئ يتوتر. كذا كورة عدت و مش عارف يتمركز صح عشان يستلم الكورة من زميله، أكيد لأنهم مش متعودين على وجوده"

- "أنا حاسس جونز متفاهم أكثر مع بقية الزملاء. في رأيي المدير الفني لازم يعمل تغيير. كفاية كدة على كاكا"

- "مش دي الفكرة يا ألان، هي مسألة عدم انسجام. أنا شايفه لعب هایل و كان بادئ بداية قوية"

- "إجمالاً هو عامل مباراة كبيرة، و يستاهل تقييم كويس و استحسان الزملاء"

- "كاكا خطف الكورة من فيليبس. انطلاقة صاروخية، مش ممكن، سرعته بالكورة مش طبيعية. يقرب لمنطقة الجراء، دفعة قوية من برودفوت. الحكم بيصفر. دي أكيد ضربة جزاء تانية، و تستاهل كارت أحمر. الحكم يطلع كارت أصفر بس، واضح انه هيتهاون شوية مع برودفوت. ايه ده؟ لحظة واحدة. الحكم مطلع كارت أحمر، ده إنذار تاني و طرد لكاكا. كاكا بيتخانق مع الحكم هيتجنن. الحكم واخده على جنب بيشرحله سبب الطرد. حكام اليومين دول بيتعاملوا مع اللعيبه على أنهم طلبة في مدرسة. كاكا مش مصدق اللي بيحصل، الحكم اداله إنذار تمثيل. الفاوّل واضح جداً و مفيش أي تمثيل. قرار ظالم أوي"

- "أنا منبهير يا تايلر. مش لاقى حاجة أقولها. كاكا بدأ الماتش كويس و كان واضح انه هيبقى عيد ميلاد سعيد. إنما دلوقتي أكيد عيد ميلاد مش هيحاول يفتكره قريب"

- "كاكا خارج و حاطط وشه في الأرض، بس نوعاً ما متماسك. الجمهور بيصفر في غضب. ليهم حق. اللعب مستمر و الضغط بدأ لفريق بلاكبول. هجمة خطيرة و جووووول. ياه على الكورة و غرابتها. بلاكبول يتقدم في سيلهيرست بارك بهدفين مقابل هدف"

- "فليتشر واقف على الخط متعصب جداً. أكيد مكانتش دي طموحاته لما يواجه فرقته القديمة"

- "مفيش وقت بدل ضايع. الحكم هيصفر في أي لحظة دلوقتي"
- "بداية قوية و جدلية لدوري الدرجة الأولى الإنجليزي. يصفر الحكم بانتهاء المباراة. أنا حاسس ان القرارات التحكيمية لعبت دور كبير في النتيجة. بس دي حاجة متوقعة، مش أول مرة مباراة تنتهي بالشكل المريب ده. على العموم، حظ موفق لكريستال بالاس، و للاعبه الجديد كاكا بعد عيد ميلاده السن، و لمدربه فليتشر"

اندفع فليتشر في الممرات بعد دخول اللاعبين لغرف خلع الملابس. لم تأتة فرصة التحدث إليهم حيث توجب عليه الظهور بالمؤتمر الصحفي عقب المباراة. تكتل الصحفيون في انتظار خطابه بعد المباراة. حاول التقاط أنفاسه و التزام الهدوء.

- "أنا محبط. مش ده اللي كنت مستتية من لعبتي في أول ماتش. فعلاً محبط. احنا جينا الماتش ده و في دماغنا الفوز بأي ثمن. لكن واضح ان فيه لعبية محصلتش ثمن الفانالات اللي هي لابساها" حاول أن يتماسك ثانية بعد أن فقد أعصابه
- "أفهم من كدة ان حضرتك بتحمل حد معين نتيجة الخسارة؟" سأل أحد الصحفيين

- "أكيد طبعاً. فيه لعب انهاردة مكانش قد المسؤولية و كلف زمايله كثير"
- "قصداً على خوان؟ بس هو حارس كبير و ياما شال الفريق. أكيد ده يشفعله غلطة انهاردة"

- "خوان؟ مين اتكلم عنه؟ خوان فضله على الفرقة معروف، و مش أنا اللي هاجي أحاسبه. أنا بتكلم عن كاكا. انهاردة كان غير مسئول بالمرة. مش بس اتعادله ضربة جزاء مرتين، و مش بس افتقد التفاهم مع زمايله و لعب بفردية

شديدة، لأ و كمان انطرد و حط زمايله تحت ضغط كبير انهم يلعبوا ناقصين.
بالتالي بدل ما يحاولوا يكسبوا اضطروا يتكتلوا دفاعياً في آخر المباراة "

ترك المؤتمر و سار في خطوات سريعة باحثاً عن مارك. وجد مدرب حراس المرمى في الممر. أشار إليه بإصبعه و اقترب منه ليهمس في أذنه.

- "هاتلي الزفت مارك و تعالى على طول و هاتلي معاه نجم الساعة كريم رأفت. كاكا الجيل القادم، و معاه جون"

- "دقايق و يبقوا عندك"

- "و البطل اللي تولى المواضيع بكل عقل و هدوء، و اللي انطوع عشان يشد كاكا من محنته. خالد أبو رامي. متجيليش من غيره"

"أنا.... أنا كريم رأفت... كاكا العرب. حنة حكم يقف يديني محاضرة في وسط الماتش. ليه؟ فاكرو نفسه فيثاغورس؟ ده لو أبويا بيعحكم الماتش مكانش هيتكلم معايا كدة" صاح كريم في هستيريا عند بوابة سيلهيرست بارك. جذبه الحراس إلى داخل الملعب بعيداً عن أعين المارة و الخارجين من الاستاد. أثارت الضوضاء انتباه الجميع. نظر مدير المواهب ألان من النافذة ليجد كريم في مباراة من المصارعة الحرة. رفع سماعة الهاتف بسرعة و اتصل بفليتشر لينبئه إلى الفوضى القائمة. تولى طاقم الحراسة عملية حمل كريم إلى مكتب فليتشر.

- "أنتوا فاكروني هسكت على اللي حصل ده؟ أنا مش هسكت" صاح كريم في جنون، "دي مؤامرة عليا. انتوا عشان لقيتوني واد لاعيب، و هعلم عليكو وطلعت منظر كل اللاعبة وحش، قلتوا ده خطر و لازم نوقفه" صاح بأسلوب سوفى

- "كاكا! صحتك في خطر. كدة مش كويس عشانك" قال دكتور جون في

هدوء

- "بقولك ايه، مش ناقصاك خالص دلوقتي. لو قتلتي ثبات انفعالي هانفعل عليك من هنا لبكرة الصبح"

- "ثبات انفعالي ايه يا جون؟ أنا باعتلك الولد و بقولك عاوزه يمزجني ويستعد للماتش، تقعد تعمله الاختبارات بتاعة السنافر؟ ثبات انفعالي ايه؟ هو ده وقته؟" صاح فليتش بنبرة حادة، وافقه كريم

- "أنا امبارح اتأكدت بنفسى انه جاهز، و سألته مليون مرة أنت مستعد للماتش قاللي أيوة" قال جون في تأثر

- "معقولة؟ سألته و قالك مستعد؟ خلاص كدة أنت تمام، أنا ظلمتك. احنا منستاهلكش يا جون. احنا آسفين يا جون" صاح به في نبرة لاذعة، "بس برضه العيب مش عليك" قالها و رمق مارك بنظرة حادة

- "دي غلطتي أنا ازاي؟" تساءل مارك في براءة

- "لحظة واحدة. انتوا ليه بتعاملوا كأني مش واقف في وسطيكوا؟" قال كريم في ضيق

- مارك! أنا مش سألتك امبارح الولد ده يلعب الماتش و قتلتي أه؟" سأل فليتش

- "أيوة مضبوط"

- "طب أروح أجيب كيس شيبسي على كدة؟" قال كريم و هو في طريقه لباب الغرفة

- "استنى يا كاكا! دورك مجاش" أوقفه فليتش بنبرة صارمة، "لما هو مضبوط. اديني سبب واحد يخليه ميمشيش على السيناريو المخطوط"

- "سيناريو مخطوط؟ انتوا عاوزين تجننوني؟" أمسك كريم برأسه

- "خالدا! أنت مش رححت لكريم امبارح و شرحتله كل حاجة؟" سأل فليتش

- "حصل يا مستر فليتش. فهمته يعمل ايه" أجاب خالد في براءة، "فهمته اننا هنخسر في آخر ربع ساعة. و انه لما يجيله ضربة جزاء المفروض يشوطها بعيسيد أوي" أثير بیده و كأنه يشرح مشهد من فيلم كارتوني

- "أبوة بالطبط....ايه؟! نعم يا كتكوت!" صاح كريم في استهجان، "أنت مش قتلتي اوعى تضيعها! حسستني ان مستقبل إنجلترا كلها مبني على ضربة الجزاء. و بعدين لحظة واحدة...أنت عرفت مين ان فيه ضربة جزاء؟ نخسر في آخر ربع ساعة؟ أنا رجعت أهلوس تاني؟"

- "عاوز تفهمني ان خالد مقالكش السيناريو مطبوط؟" سأل فليتش في دهشة
- "سيناريو ايه؟" هتف كريم، "ما تقول حاجة يا كوتش مارك. أنا مش كنت معاكوا امبارح؟ حد قالي ان فيه سيناريو؟ ده خالد جه يقولي الكورة رياضة و منافسة شريفة و مستحيل حد يعرف مين اللي هيكسب. هي الكورة تمثيل مجد ولا ايه؟!!"

- "مستحيل حد يعرف مين اللي هيكسب؟" صاح فليتش في استنكار شديد، و كان معرفة الفائز مسبقاً أمر طبيعي تتوارثه الأجيال منذ قديم الأزل، "مين قالك كدة؟ أنت كلعب كورة بالنسبة لي موهبة أدائية. بتأدي دورك، أقولك هات جون نجيب، أقولك ضيع و أنت منفرد تضيع، أقولك اتخانق مع الحكم تتخانق، اتشقلب في وسط الملعب و اعمل فيها ميكى ماوس تعمل كدة"
- "طب ايه الفرق بيني و بين قطعة الشطرنج؟"

- "أقوله لعب كورة يقولي شطرنج. كوتش مارك، اتصرف معاه"
- "على فكرة يا مستر فليتش" تدخل خالد، " أنا شرحته كل حاجة بس واضح انه كان مهلوس أو ضارب حاجة"

- "بقولك ايه يا مارك" قال فليتش في حسم، "الواد خالد هنقلبه في يناير. عاوز بكرة كل الجرايد تتكلم عن انه مش مبسوط عندنا في النادي و عاوز يطفش. خليه يروح تشارلتون، العدو الأول للنادي، عشان كل جمهور كريستال

بالاس يقرف منه. بلغ الممثل الإبداعي بتاعه السيناريو ده و خليه يوصله لرئيس الاتحاد. عندك اعتراض يا خالد؟"

- "لأ يا أبداً مستر فليتشير. هو أنا مش مرتاح في النادي ليه؟" سأل خالد
- "ممم. متضايق ان فيه لعب جديد عربي زيك جه أخذ مكانك، و ركلك على دكة الاحتياطي"

- "أه طبعاً سيناريو خطير" قال مارك في ارتباك و جذب خالد من ذراعه ليجبره على السكوت

- "بالنسبة لكাকা، عاوزه على بكرة يبقى فاهم كل حاجة. خليه يقعد مع ألان يعرفه على الممثل الإبداعي بتاعه و الفريق بتاع الكتابة و يوضحله بالظبط سلسلة القيادة ماشية ازاي"

- "هو الكورة تمثيل بجد ولا ايه؟" هس كريم في صوت خافت
- "أنا مش فاكّر آخر مرة سمعت السؤال ده بصراحة" ابتسم مارك
- "أنا عاوز عامر. هاتولي عامر" صرخ كالأطفال
- "أنت مش محتاج عامر في حاجة يا كাকা" أجابه مارك
- "بقولكم هاتولي عامر. مش هتكلم مع حد ولا أقعد مع حد إلا لما تحبوني عامر" صاح كريم و توجه إلى الباب
- "كাকা" ناداه فليتشير فاستدار كريم ناظراً إليه. "هنجيلك اللي أنت عاوزه. عيد ميلاد سعيد"

عاد خوان إلى الشقة للإقامة مع كريم. لم يتحدث إليه أو يحاول الاحتكاك به إتقاءً لشربه حيث أصبح جنونه مرضاً يخاف منه الجميع. جلس كريم في غرفته وحده يداوي جراح المباراة. لم يتخيل أن حلمه باحتراف كرة القدم سيتحطم على صخرة من الأوهام. تمنى بالفعل لو ألها مجرد هلاوس مرضية مثلما نجح خالد في إقناعه، لكن الحقيقة أصبحت أقوى من مجرد تكهنات. لعب المباراة بنفسه و شاهد

سلوك زملائه المريب في الملعب. ليس من حقه إثبات نفسه، بل تنفيذ الأوامر. عليه اتباع سيناريو مكتوب و تحقيق رؤية معينة في ذهن الكبار. وجد مكاملة لم يرد عليها من فهمي، فقام و فتح الحاسوب على مضض ليتحدث إليه على سكايب. هاجمه فهمي معاتباً في سخرية

- "مش قلتلك قبل كدة متقاش محدث؟ عامل لنفسك صفحة للمعجيين على الفيس بوك يا تافه؟"

- "ايه المشكلة؟ مش نجم و لعب كورة؟ لازم أتواصل مع جمهوري. عندي كمان صفحة على تويتر. عاجبك؟ ناقصة استظرافك أنت كمان أصلها!" قال كريم في سخافة

- "كدة يا كريم؟ و أنا اللي متصل بيك مخصوص عشان أقولك كل سنة وأنت طيب"

- "و أنت طيب يا برنس" ابتسم كريم في خجل، "واحشني يا زبالة. مش كنت تقولها لي الصبح عشان البركة بدل البهدلة اللي حصلتلي؟"
- "أنا قلبت الإنترنت عشان أشوف الماتش. و يا ريتني ما شفت" أجابه فهمي في أسى

- "تصور هنا يا فهمي الماتشات بتيجي في التليفزيون عادي من غير اشتراك" ضحك كريم في انبهار مصطنع، "و كمان لو مكتوب مثلاً في الجورنال ان الماتش ده هيبجي الساعة كذا على القناة كذا، تفتح القناة دي في الوقت ده تلاقي الماتش شغال فعلاً، مش أغنية لأم كلثوم"

- "الفرجة بقى يا معلم، هي الناس دي حكمت العالم من شوية"
- "حكمت العالم عشان كدة؟ دانت غلبان. بلا خيبة. المهم أخبار العيال ايه؟ مفيش حد فيهم قاللي كل سنة و أنت طيب"

- "ايه ده بجد؟" قال فهمي في دهشة، "ولا واحد؟ أنت الغلطان برضه يا كريم. معرفتش تربى"

- "مش كدة برضه؟ لو شفت واحد فيهم... هشرب بق مية كبير و أتف في وشه. أنا مش هسيب المهزلة دي تستمر، أنا هقلع الشبشب اللي في رجلي و أنزل على دماغ كل واحد فيهم و أخليه يقول كريم عمي و عم اللي خلفوني"

- "و ايه كمان؟" جاره فهمي في خبث

- "استنى يا فهمي يا واطي. أنا عارف الحركات دي. اطلع يا كلب منك ليه

شايفكم" صاح كريم ضاحكاً

- "تصور احنا غلطانين اننا عبرناك" صاح حازم في انزعاج مفتعل

- "الواطي واطي يا حازم و لو جبته كرسى. دانا هربان من الجيش مخصوص

يا زباله عشان أشوفك" ضحك حمزة

- "وحشتوني يا عيال يا واطية. هتغنولي ايه؟ أنا عاوز أبو الفصاد. محتاجه

أوي" قال كريم في تأثر

- "كريم حبيبي. أبو الفصاد خلاص ساب الحقل للفلاح من زمان، من ساعة

ما اعتمد على التكنولوجيا" قال حمزة بنبرة درامية

- "يلا يا قالش منك ليه غنولي أبو الفصاد"

ضحك الشباب في مرح و أخذوا يغنون له أبو الفصاد بأعلى صوت مما أعاد

لكريم مزاجه الجيد إلى حد كبير. على الأقل لم يشعر بالوحدة الشديدة يوم عيد

ميلاده. استمروا في تبادل المزحات و استعادة الذكريات القديمة، و قاموا بمواساته

للبداية غير الموفقة في مشواره الكروي. انتبه كريم فجأة إلى غياب محمد.

- "محمد فين؟ فيه حاجة ولا ايه؟" سألهم كريم في ريبة

- "هيكون فيه حاجة ليه. أكيد مفيش حاجة. فيه حاجة يا حمزة؟" سأل فهمي

في براءة

- "لا طبعاً مفيش" أجاب حمزة

- "حمزة! فيه حاجة؟" سأل كريم

- "بصراحة فيه" أجابه حمزة في سذاجة

- "و المعفن ده هيصرف عليها منين، هو لسة اشتغل؟ جاله عقود احتراف زي اللي جاتلي؟ لأ طبعاً"
- "مانت عارف باباه هيشيله"
- "باباه؟ عم شريف أفضل محلل رياضي في تاريخ الكورة؟ قول كلام أصدقه"
- "لأ، ما هو ربنا تاب عليه و طلع رخصة تدريب. هيشغل في تدريب النوادي"
- "طبعاً. عشان كدة معندوش وقت يربي ابنه. كتكم القرف. بوظتولي اليوم أكثر ما هو بايظ" أنهى كريم المحادثة.

- ذهب عامر إلى مكتب رنا ليعطيها التعليمات بالتجهيز لسفره. علم بأنه في يوم ما، ستحدث كارثة بسبب علاقته المريبة بها. تجاهل ذلك الخاطر لنلا يعكر مزاجه. طرق على سطح مكتبها فنظرت إلى أعلى في نفاد صبر.
- "روني. أنا طالع لندن بكرة. احجزيلي تذكرة رايح بس لحد ما أعرف أخره المشوار ده ايه. الأوتيل انتي عارفة أنا بزل فين"
- "فجأة كدة؟" سألت رنا في دهشة
- "الغزالة بتاعة مسيو عصام عاوزه كدة. احجزيلي درجة رجال الأعمال، احنا مش دافعين حاجة من جيبنا. ولا أقولك، خليفهم تذكرتين. أصل احتمال واحد صاحبي يطلع معايا"
- "ماظنش ان صاحب حضرتك هيعرف يطلع يا مستر عامر. عنده شغل تقريباً"
- "جرى ايه يا عامر" قاطع عصام لحظة المراهقة، "أنت على طول واقف هنا؟ تحب أنقل مكتبك هنا و أحطلك كرسي؟" شعر عامر بتقلب في معدته من الاشتزاز. قرر التماسك كي لا يسعد عصام باستفرازه

- "مش قتللك ميت مرة يا رنا تقومي من على مكتبي، ايه اللي مقعدك هنا؟"
قال عامر في استخفاف فضحكت رنا في ارتباك، بينما نظر إليه عصام في ريبة.
تركهما عامر و عاد إلى مكتبه.

طرق خوان باب غرفة كريم عدة مرات ففتح له ثم أدار ظهره و عاد إلى الفراش. ارتبك خوان، لكن تبعه و جلس بجواره. لم ينطق كريم بكلمة مما زاد من توتر خوان، و فكر أنه ربما أخطأ بالجيء إلى الغرفة. حك كريم رأسه في ملل و تناءب في محاولة لطرده بأدب.

- "أنا آسف" قال خوان في ارتباك

- "آسف على ايه يا خوان؟ آسف انك سبت واحد زي خالد يقرطسني؟ ولا آسف اني كنت بلعب لوحدي طول الماتش من غير ما أبقى فاهم اللي بيحصل؟ ولا آسف انك سبت جون مالوش معنى يدخل فينا و في الآخر فليتشتر يقول اني سبب الخسارة رغم اني مطرود ظلم؟ سمعتي في لندن باظت. أنا بقيت اللعيب اللي اتطرد عشان أهيل. عارف لو كنت عملت فاوول قتلت فيه واحد؟ كانت تبقى مقبولة، على الأقل الناس تقول عليا جزار معنديش قلب. عارف لو كنت لمست الكورة بأيدي؟ الناس تقول عليا خبيث و مكار. عارف لو كنت شتمت حد؟ كان زمان الناس بتقول عليا مش متربي. انما إنذار تمثيل؟ مين اللي حكم عليا بكدة؟ أنا آخذ طرد عشان أهيل؟"

- "دي كانت الطريقة الوحيدة عشان تتطرد بيها غضب عنك"

- "يا سلام؟ طب و هم عملوا التغييرات في الكورة ليه؟ كان يغيرني و خلاص أبقى طلعت بكرامتي"

- "أبوة كلامك معقول بس...الفكرة انه عقاب"

- "كل ده عشان جبت جون؟ أظن و أتبهدل؟ و بعدين هو التعادل ليه جه في ساعتها؟ مكانوش قادرين يستنوا؟"

- "سيناريو الماتش ده كان مبني على ان مستر فليتشر حافظ فريق بلاكبول و هيسيطر طول الماتش بقوة، بس سوء الحظ هو اللي هيخسره. فلو جاب جون في أول الشوط التاني ايه اللي هيخلي الفرقة الثانية تكمل في الدفاع و هي خسرانة؟ ساعتها كان لازم هيفتحوا في الهجوم. إنما لما بيقوا متعادلين و تحت ضغط هيدافعوا طول الماتش و في الآخر يخطفوا جون. و ده سبب اثم اتعادلوا في ساعتها عشان السيناريو يكمل. ضربة الجزاء دي كمان كانت هتثبت انك... لسة عندك رهبة البداية"

- "يعني في كل الحالات كان هيحملني مسئولية الخسارة؟"

- "تقريباً، بس مكنتش هتطرد. كنت هبتقى ضيعة ضربة جزاء بس، عادي بتحصل. و مكانش هيحملك المسئولية بالحقده اللي هو حملها لك بيه ده. كان هيقول انك لسة محتاج تدخل جو المباريات. تعالى نزل بس شوية أعوضك عن امبارح. أنا عازمك على سينما"

- "سينما ليه؟ عندي أفلام كتير هنا نتفرج عليها. عندي فيلم دوري أبطال أوروبا بين مانشستر و برشلونة على الكمبيوتر، و ممكن نفتح التلفزيون نلاقي الفيلم اللي كنا بنمثل فيه الهاردة الصبح"

- "مش هتستفيد أي حاجة من اللي أنت بتعمله ده. قوم معايا غير هدومك وتعالى نتفصح"

- "بس لو هتوديني سينما يبقى توديني أي ماكس"

- "لازم أي ماكس؟" تسأل خوان في ضيق

- "أيوة أي ماكس. من زمان و أنا نفسي أعرف ايه الاختراع في الأي

ماكس، أصلي محروم منه. هتدخل عليا يا خوان؟" قال في إصرار

- "مش كل السينمات فيها أي ماكس، كدة هنضطر نروح أوديون اللي عند

نورث جرينتش. بعيد، بس عشان خاطرك هوديك. أهم حاجة تكون مبسوط عادي. أنا مش متضايق خالص على فكرة"

- "و أنا مالي؟ حتى لو متضايق ميهمنيش. كله في سبيل الأي ماكس" أجاب كريم في برود

وصلا إلى ويست منستر ثم قاما بالتغيير إلى خط جوبيلي في طريقهما إلى نورث جرينتش.

- "عارف ايه الكوميدي في الموضوع يا خوان؟ ان الملعب كله اتلخم أول مانا جيت جون. لو الموضوع ماشي بالتمثيل، محدش فكر ازاي ممكن يعني أجيب جون؟ كان ممكن بعد تاني مرة حد غيري يشوط ضربة الجزاء"

- "هاهاها. نظرية. أصلهم مش متعودين أوي حد يخالف السيناريو لوحده. تقريباً مبتحصلش خالص. ممكن فرقة كاملة تحاول تخالف السيناريو من نفسها على الهوا كدة. لكن لعب واحد يخالف؟ جديدة"

- "احنا دائماً المصريين سباقين كدة" ضحك كريم، "و لما فرقة بتخالف القوانين بيعملوا فيها ايه؟"

- "بسيطة خالص. بيخسروها بالعافية. التحكميم بيقلب عليها قلبه سودا. كل القرارات بتبقى ضدهم لحد ما يخسروا. أجوان صحيحة تتلغي، ضربات جزاء متتحسبش، يتحسب للفرق الثانية ضربات جزاء من الهوا. تلاقي الحكم طرد له اتنين ثلاثة. حاجات زي دي"

- "بس الأخطاء التحكمية دي في كل ماتش. عاوز تفهمني ان كل ماتشين ثلاثة فيه فرقة بتحاول تخرج عن النظام؟ ده حتى يبقى نظام فاشل"

- "لأ، استنى هفهمك. تعالى نزل هنا في بيرموندزي عشان نشترى تذاكر. هنطلع برة المنطقة"

نزلا معاً لشراء تذاكر المترو إلى نورث جرينتش، نظراً لتأخر الوقت لم يكن أمامهما سوى شرائها من الماكينة الإلكترونية. انبهر كريم عندما وجدها تخرج الباقي كاملاً و لا تبتلعه و ضحك خوان كثيراً لذلك. دخلا عبر البوابة الإلكترونية مرة أخرى مستقلين القطار مستمتعين بجوه الشبه خال.

- "أنت فاهم الموضوع غلط خالص. أنا قلتلك الفرقة اللي بتخرج عن طوعهم التحكيم بيقلب عليها، بس دي المرات اللي بتشوف فيها التحكيم منحاز بشكل واضح و مبالغ فيه. إنما الأخطاء التحكيمية في اللعبة ليها دور تاني خالص. حط نفسك مكاهم. تحليل ماتش بين مانشستر و أرسنال و النتيجة ٢ - ٢، وعاوزين مانشستر يكسب من غير ما تهتز صورة أرسنال أو يبان انه أضعف منه، خصوصاً لو افترضنا ان أرسنال لسة بينافس على الدوري. هتعمل ايه؟"

- "مانشستر يجب جون في آخر دقيقة مثلاً"

- "ممكن. بس مش ساعتها هتقول المباراة متكافئة، إنما الهاردة كان يوم مانشستر و انه كان الأفضل بفتقوتة و صاحب النفس الأطول؟ لكن لو مانشستر جاب جون تسلل، أو أرسنال جاب جون صحيح و ماتحشيش، هتقول ايه؟"

- "أه. ساعتها هيبان ان الفرقين كانوا متكافئين بس الحكم خدّم مانشستر"

- "لما يكون فيه ماتش بين فرقتين، و محتاجين واحدة فيهم تخسر عشان يخدموا السيناريو الأكبر بيخلوها تخسر بشكل مربب و مثير للجدل عشان متتهزش صورتها. كدة الجمهور يبقى عارف انها مكاتش تستاهل تخسر. النتيجة النهائية واحدة طبعاً لأنها خسرت و خلاص. ظلم بقى أو مش ظلم متفرقش معنا في حاجة، كدة كدة الفرقة اللي عاوزينها تكسب أخذت التلات نقط بتوعها"

- "و الأجوان اللي في اللحظات الأخيرة بتبقى طبعاً عشان الإثارة؟"

- "أكيد. حفاظاً على نسب المشاهدة. لو الماتشات خلصانة من نصها، مين

هيقعد يكملها؟"

- "بس فيه دوريات بتبقى عادية، و ماتشاتها مفيهاش كم الإثارة دي. الدوري

الإيطالي مثلاً بيتحسم بدري بدري"

- "دي بترجع لرؤساء الاتحادات. فيه ناس بتمشي جنب الحيط، بسيناريوهات

عادية خالص، و بتعتمد على لعب فنيات الكورة، مش في الإهمار المثير بتاع اللحظات الأخيرة و أفلام الأكشن اللي بتحبس الأنفاس. فيه تانيين ميحوش

سيناريوهات واحدة بواحدة، اللي معناها ان الفرقتين لما يلاعبوا بعض دي تكسب مرة و دي مرة عشان بيان أهم متكافئين. فيه مذاهب تانية تحب موازين القوى واضحة. مثلاً في الدوري الألماني بيوريك ان بايرن ميونيخ هو أقوى فريق، وهيلعب أي فريق و يكسبه؛ كل فرقة معروف هي أقوى من مين. ناس تانية زي الدوري الفرنسي، تحب العملية تكون عايمة و كل ماتش تلاقي حد غير الثاني بيكسب، و متبقاش فاهم ازاى دول خسرو الأسبوع ده و اكتسحوا الأسبوع اللي وراه، و لحد آخر أسبوع تلاقي عشرة بينافسوا"

- "و احنا عندنا في الإنجليزي أهني سيناريو؟"

- "عندنا كام فرقة متحدين أول الموسم في المنافسة. غالباً بيكسبوا بقية الفرق الا لو هم عاوزين فرقة عادية توقع حد فيهم. ساعتها عشان الناس تشوف ان مثلاً مش نيوكاسل هو اللي كسب نورويش، انما نورويش وقع في ماتش تاني. فتحس ان الدوري ماتحشمش عشان الفرقة دي أقوى من دي، لكن بمخدمات الآخرين؛ بيسيب الموضوع لخيالك يعني. عشان تبقى عارف ان الفرقة دي أخذت الدوري بفضل فرقة تانية، و في نفس الوقت معرفتش الفرقة دي لو مكنتش ساعدتم كانوا هياخدوه ولا لأ. نوع من التشويق"

- "أنا دخت على فكرة. الموضوع طلع أكبر منّا بكثير"

- "طبعاً يا كاكأ. أنت فاكرو ليه محدش بيحاول يعمل حاجة زي اللي أنت عملتها؟ عشان مفيش أمل انه يوصل حاجة لوحده"

- "لو الملعب كله وقف قدامه أكيد مش هيعرف يعمل حاجة. ممكن يخطف جون، بس من غير زمايله عمره ما هيعرف يحافظ على النتيجة زي ما حصل معايا. على كدة بقى الكلام ده في أوروبا بس؟"

- "لأ. الكورة كدة في العالم كله. ازاى تخيلت ان منظومة كبيرة زي دي هتبقى في أوروبا بس؟"

- "على أساس ان كدة الموضوع أسهل؟ بالعكس ده كدة معقد أكثر" ضحك كريم

- "عدد مهول من الناس بيسهر عشان المنظومة تمشي بشكل سليم. بس عارف يا كاكأ... الحركة اللي أنت عملتها امبارح دي ضحككتني... حسيت بإثارة غريبة، و كان نفسي انك تعمل فرق في الماتش"

- "واضح. عشان كدة سبت الجون يدخل يا ابن ال...". صفعه كريم على قفاه و راحا يضحكان معاً. قرر كريم تأجيل مشاكله و لو لليلة واحدة على الأقل.

منظومة كرة القدم

انتظر كريم وصول عامر إلى لندن في صباح اليوم التالي. لم يحضر أي من التدريبات أو يستمع لأي نصائح بخصوص النظام الدارج في اللعبة حيث أصر أن يتحدث مع عامر أولاً. بدأ صبر الإداريين بالنادي ينفد، و شعروا أنهم ربما أخطأوا بعقد صفقة مع فتى مراهق. طمأنهم ألان بأنها مسألة وقت حتى يتعود على الأجواء. انتقلت ثقة ألان إلى فليتشير المدير الفني لأنه أيقن أن ما أعده الكل سلوكاً غير احترافي من كريم هو مجرد سوء تفاهم تسبب به خالد أبو رامي. عندما سأل رئيس النادي عن تطورات الأوضاع طمأنه بأن كل شيء على ما يرام. لكن للأسف، طاردهم الأخبار السيئة.

- "المقلب اللي حصل في الماتش ده مش هيفوتلنا للأسف" قال رئيس النادي في إحباط

- "ليه؟ ماحنا شرحناهم الموقف و عرفوا انها غلطة مش أكثر" قال فليتشير في

ضيق

- "للأسف يا رون، ده ميشفعلناش خالص. بالعكس، لما عرفوا الهبل اللي عملناه و اننا نزلنا لعيب في الماتش من غير ما يبقى عارف السيناريو اللي يمشي عليه قفشوا أكثر. خفت أقولهم اننا بعتناله خالد يتكلم معاه ليفتكرونا هواة مبفهمش نمشي شغلنا ازاى. هتخلي منظرها أوحش"

- "و هيعاقبونا ازاى؟ ايه الخطة؟" سأل مارك

- "احنا في موقف زي الزفت" قال في تأثير
- "هنقع درجة تانية؟" سأل مارك في رعب
- "مش أوي كدة. تاني أوحش حاجة ممكن تحصل لنا"
- "إخلال بقواعد اللعب النظيف و ندفع غرامة؟" سأل فليتشر
- "لأ. هيقفوا عننا الدعم، و نغرق في الديون...ساعتها هيحطونا تحت حكم محكمة، و هتنقص نقط"
- "مش معقول. كل ده عشان ايه؟!!!" صاح فليتشر في استهجان، "عشان ماتش و خسرنه أصلاً في الآخر؟"
- "طب و كاكا هيلعب عادي؟" سأل مارك
- "كاكا؟ طبعاً طبعاً. هيلعب عادي خالص مفيش أي مشكلة. مادام عاملين حسابكم عليه لحد ماتش تشارلتون يبقى تمام. إنما بعد كدة. دي حاجة برة ايدنا"
- قال رئيس النادي بنبرة مربية

لم يشعر عامر بالحنين إلى لندن، لكنه اضطر للعودة بفضل شغب كريم. انتظره الإداريون بالنادي للتحدث بشأن الكارثة الجديدة المتمثلة في فتى بالثامنة عشرة من عمره.

- "اتفضل يا مستر عامر" أشار له رئيس النادي بالجلوس، بينما اكتفى بقية الإداريين بالمشاهدة
- "كنت حابب أجيلكم في ظروف أحسن" قال عامر و كأنه في عزاء بمسجد الشرطة. جلس فardاً ساقيه إلى الأمام كأنه في فراش منزله
- "كلنا كنا نتمنى ده" وافقه رئيس النادي، "بس كاكا حطنا في وضع سخيف"

- "هو كاكّا كدة دائماً سخن. يحب التحديات، و يحب يمشي عكس الاتجاه، أصل في مصر الحاجات دي ميناخذش عليها مخالقات. الأفلام و الحاجات دي مسحت مخه، اعذروه بقى. هو عمل ايه يا ترى؟" سأل عامر متظاهراً بالسذاجة
- "كاكا خالف السيناريو يا مستر عامر"
- "خالف السيناريو؟! انتفض عامر في مقعده في أداء يستحق عليه الأوسكار. "هو فيه حد بيخالف السيناريو يا جماعة؟ أنا مش فاكر امتى آخر مرة سمعت حاجة زي كدة"
- "المشكلة مش معنا احنا يا مستر عامر. احنا عاقبناه خلاص هو و زميله"
- "زميله؟ هو كان ليه شريك في الجريمة؟" اعتدل عامر في جلسته كمحقق في فيلم بوليسي
- "كاكا مخالفش السيناريو بمزاجه. خالفه عشان مكانش عارف ان فيه سيناريو أصلاً"
- "مكانش عارف ان فيه سيناريو ازاى؟ دي ألف باء كورة. كورة قدم يعني سيناريو و تمثيل على طول من غير ما حد يقول"
- "للأسف، قلة خبرته لعبت ضده. و ده ساعد زميل ليه عنده ميول انتقامية انه يعمل فيه مقلب"
- "ميول انتقامية؟ يا جماعة أنا مندهش. أنا حاسس ان فاتني فيلم أكشن جامد. عمله ايه كاكّا عشان يبقى عاوز ينتقم منه؟"
- "قفشه في وضع محل بالآداب" أجاب رئيس النادي في آلية و قد بدأ يمل من طيلة الحديث
- "وضع محل بالآداب؟ الموضوع كبير بقى! ده كاكّا مبرحش. احترسوا يا مجرمين، سوبر كاكّا لكم بالمرصاد. هاهما. عين العدالة التي لا تنام. حلو الولد ده"
- "لعب كورة هایل كمان" أكد له رئيس النادي

- "أنا برضه لسة مندهش. عمال أدور... بمحاول أحط ايدي على المشكلة، مش لاقيةها. فين المشكلة بالضبط؟" سأل عامر في براءة

- "مفيش مشكلة خالص. كاكاه هو اللي عنده مشكلة. واضح انه لسة مش عارف يتأقلم مع الوضع"

- "مش عارف يتأقلم؟ لأ نخليه يتأقلم طبعاً. كاكاه ده زي ابننا. أنا عن نفسي بعتره ابني اللي مخلفتوش؛ مش عشان حاجة بس مكانش عندي وقت، هاهاه. متشغلوش بالكوا خالص. كاكاه يتأقلم على الوضع كويس و هيجي يقولكوا أنا عاوز المشهد اللي أبوس فيه البطلة"

- "مستر عامر... أنا حاسس انك واخذ الموضوع هزار شوية"

- "لأ مش هزار خالص" اعتدل عامر في جلسته و ظهرت الجدية على وجهه
"كاكاه يعرف ان مالوش غير حاجة من اتنين. يا يتعاون، يا يقعد على الدكة. والدكة أصلها بتوجع، حتى لو حطتلها مخدة برضه هتفضل توجع. المهم قولي" اقترب عامر برأسه، "أكيد الموضوع مش هيعدي كدة، ولا أنا كلامي غلط؟"

- "كلامك صح طبعاً. بس مينفعش تقوله" ابتسم رئيس النادي في توتر

- "أقوله؟ هاهاه. لأ طبعاً. أنا عارف رئيس الاتحاد بيحب المفاجآت. قولي... هيعملوا فيه الحركة اللي عملوها في اللي خان زميله مع صاحبتة، ولا اللي عملوها مع الباشا اللي اتقفش في قضية دعارة مع قاصر، ولا اللي عملوها مع اللي قال انه يشجع الفريق المنافس ليه في الدوري؟"

- "الأولاني" أجابه رئيس النادي في دهشة

- "أنا برضه قلت كدة. بس نصيحة مني ليك..." قام عامر من مكانه استعداداً للرحيل، "الواد ده لعيب. استغله أحسن"

- "عامر. أنت مش حاسس ان فيه حاجة خطيرة جداً كنت مخيبها عليها؟" وقف كريم عند الباب واضحاً يده حول وسطه

- "كريم، حبيبي. أنت عشت دور الزوجة المصدومة كدة ليه؟"
- "عامر. الكورة تمثيل مش كدة؟" سأل كريم في لهجة حادة
- "الكورة تمثيل؟ ازاي يعني؟" تظاهر عامر بالغباء
- "يعني مش حقيقية. أي كلام. مزيفة" صاح كريم في غضب
- "مش الناس لسة بتعرق و بتجري ورا حاجة مدورة و بتشوط في شبكة؟ يبقى تمثيل ازاي بقى؟" سأل عامر في استخفاف
- "أنت ليه بتلف و تدور عليا؟ قول و خلاص ان كل اللي بيحصل في ملاعب الكورة ده فخفخينا حضانة"
- "عيب يا كريم. أنت كفنان ترفيهي مينفعش تنفخه من اللي بتعمله أنت وزمايلك على مسرح الكورة" قال عامر في ضيق مفتعل
- "فنان ترفيهي؟ يطلع ايه ده؟" سأل كريم في دهشة
- "أنت فنان ترفيهي. معندكش فكرة؟"
- "محدث قاللي الحقيقة. مدير أعمالى مقاليش. الشخص اللي مضاني العقد مدانيش فكرة"
- "أنت قريت المسمى الوظيفي بتاعك في العقد ولا حسيت انها مش مشكلة كبيرة؟"
- "المسمى الوظيفي بتاعي؟ أكيد لعب كورة"
- "غلط" أشار عامر بإصبعه. "أكبر غلط يا كريم. أنت مش لعب كورة. أنت فنان ترفيهي، مجرد مؤدي قدام الجمهور"
- "مؤدي ترفيهي؟ لا يمكن طبعاً. أنت بتهزر؟!"
- "أنا جالي خبر أسافر لندن خلال يومين، و جيت كل المسافة دي و سايب مسئولياتي عشان أهزر معاك؟ ده حتى يبقى عيب على البدلة اللي أنا لابسهها. هديك درس للمستقبل. الإنسان لما بيمسك عقد، لازم يركز على أربع حاجات

قبل ما يقرر يمضي. مرتبه، مسماه الوظيفي، أجازاته، شروط إنهاء العقد. أتحدأك لو عارف حاجة فيهم"

- "عارف مرتبي" صاح كريم متحذلقاً

- "عارف مرتبك. جميل... يس عارف ان من حقهم يرموك في الشارع ويدوك بقية حسابك و يدمروا حلمك اللي قعدت كتير أوي عشان توصله؟ مش قتللك تركز قبل كدة يا كريم؟ قتللك المعلومات دي أهم حاجة"

- "و أنا أعرف مين ان أنت اللي هتديني على قفايا؟"

- "كلامي كان واضح يا كريم. أنا طلبت منك تركز، مقلتلکش فين و مع مين. أي حد يا كريم، حتى لو كان أنا. قولي يا كريم... هو احنا أصحاب؟" سألته في سخافة

- "أصحاب؟ و أنا أصحاب أشكال زيك ليه؟" أجابه في غضب

- "هايل. يعني أنت متفق معايا اننا مش أصحاب. سؤال تاني، لما احنا مش أصحاب، بتعامل معايا ليه على اننا أصحاب؟ على أي أساس بتتق في واحد زيي وتمضي معاه عقد من غير ما تقراه كويس؟ افرض كنت مشغلك حاوي في سيرك؟"

- "مش فارقة كتير مانت مشغلني قرد. ده الراجل عاوزني أعمله ميكي ماوس في الملعب"

- "لأ يا كريم، هي فارقة. فارقة انك كنت مستعد تشتغل أي حاجة بالمبلغ ده مش كدة؟"

- "هه؟ مين قال كدة؟ أنا كنت عاوز أبقى لعب كورة"

- "خلاص يا كريم. هاجي تاني و أقولك مفيش حد بيعمل حاجة لله و الوطن. لما تلاقي حد بيساعدك من غير سبب، إعرف ان وراه حاجة مستخية. أنا يا سيدي ضحكت عليك و خليتك تمضي عقد فنان ترفيهي و أنت فاكر نفسك

لعيب كورة. عادي جداً، مش نهاية الدنيا. فكر بقى ازاى تستغل الوضع ده بأكبر شكل ممكن

- "وضع ايه يا عامر هو امتحان أحياء؟ بقولك الكورة تمثييل" صاح كريم في استنكار

- "طبعاً الكورة تمثيل يا كريم" أجاب عامر في حدة مفاجئة، "أنت كنت فاكرها ايه؟ اتفرج على كل ماتش فات و ركز في كل حاجة مش هتلاقي أي تفسير للمهازل اللي بتحصل في ملاعب الكورة دي غير لو انها تمثيل. ابدأ من الدوري بتاعك و أنت طالع لأوروبا. لو لقيت ماتش مفهوش علامة استفهام يبقى أنا راجل ماليش لازمة. يعني ايه فرقة تكسب دوري عشر سنين ورا بعض؟ يعني ايه فرقة تبقى خسرانة خمسة و تمانين دقيقة و تيجي في آخر خمس دقائق تجيب ثلاث أجوان و تكسب الماتش... قال ايه، روح و عزيمة! يعني ايه فرقة تجيب جون تسلل واضح عشرة متر و الحكم يقولك هدف صحيح، و ساعتها العيب مش عليه، العيب على اتحاد الكورة اللي مش عاجز يطبق أي تكنولوجيا أو حتى يكلف نفسه يص على الإعادة التليفزيونية عشان يتأكد هو هيظلم فريق و يخرج من بطولة تعب فيها و دفع ملايين الدولارات عشان ينافس فيها ولا لأ! يعني ايه كورة تعدي خط المرمى، و بكل بساطة و استفزاز و هدوء الحكم يقولك الكورة معدتش الخط و يلغي جون لفرقة كانت محتاجاه؟ يعني ايه لعيب يجيب كورة بايده و الحكم يبقى قاعد في حضنه و يقولك مش لمسة يد، و بناقص الفرقة اللي تقعد تصوتله و تشتكيه؟ اشرحلي أنت يعني ايه لعيب يزل دم من عينيه و الحكم يقوله أنت بتمثل، و كمان يديله إنذار تمثيل، مش مهم يبقى إنذار تاني فيتطرد، يتوقفله ماتش ولا اتنين ولا ثلاثة؟ فيه حاجة اسمها فريق يبقى كسبان ٤ - صفر في ماتش ذهاب و ييجي في ماتش العودة يخسر ٣ - صفر، ليه؟ نزلوا بفرقة تانية؟ فرقة مستواها في بطولة الدوري زي الزفت، لكن تيجي في بطولة أوروبا تلعب ولا كأنا البرازيل، عروستي! يعني ايه يبقى فيه لعبة في جميع أنحاء العالم بتطحن نفسها

و بتقديم أحلى كورة سواء في دوري برازيلي ولا برتغالي ولا إيطالي ولا ألماني، و في الآخر تلاقي نفس اللعبة اللي الناس عارفها هي اللي بتترشح أحسن لاعب في العالم، عشان دي مجرد تجارة مينفعش لعب مش مشهور يكسب فيها! ليه؟ عشان الرعاية الرسميين اللي بيدفعوا الفلوس عاوزين كدة! يعني ايه منتخب ياخذ بطولة كاملة و هو كسبان كل ماتشاته بالخط؟ يعني ايه فيه فرقة تبقى واحدة على قفاها طول الدوري و تيجي على الماتشات المصرية فجأة تلاقيها بتلعب ولا كأنها بطل العالم و تغلس على الفرق اللي بتنافس على الدوري؟ يعني ايه الأخطاء جزء من اللعبة و ملهاش لازمة نحاول نعالجها؟ يعني ايه يبقى الماتش في أول ربع ساعة وتقول لنفسك أنا هقوم أدخل الحمام و أتغدى لحد ما الأكشن بيتدي لأنك عارف انه مش هيحصل أي حاجة مهمة في الأول ولا كأنه ماتش مصارعة حرة؟ يعني ايه مفيش رجعة في قرار الحكم، هو الحكم ده المهدي المنتظر؟ ليه الغلطات بتبقى باينة عيني عينك و يرفضوا إعادة الماتش؟ تقدر تفهمني كل الملحوظات اللي المدرب بيقلوها للحكم الرابع طول الماتش دي بيتعمل بيها ايه؟ يبقى الراجل محروق دمه و قاعد بيشتكي من كل الأخطاء التحكيمية و في الآخر الاتحاد ياخذ الملحوظات دي يعمل بيها قراطيس لب و صواريخ ورق. تحب أسمعلك سيناريو كل ماتش في الدوري الإنجليزي؟ الفرقة صاحبة الأرض بتبقى ماسكة كورة وبتهاجم و مقطعة اللي قدامها، حتى لو خسرانة كدة كدة هتحويل الهزيمة إلى فوز. لو بتلاعب بقى فرقة قوية من اللي بينافسوا يبقى العكس؛ هتبقى كسبانة و في الآخر الفرقة الكبيرة هي اللي هتحويل الهزيمة إلى فوز. لازم نستنى آخر خمس دقائق عشان نعرف ايه اللي هيحصل، و الماتشات الكبيرة نصها بتخلص جدل تحكيمي. الدوري الأسباني؟ في الأول كام فرقة بتنافس بس بعديها بشوية كله بيعترم نفسه و تلقائياً برشلونة و ريال مدريد بيقوا أول الجدول بقدره قادر، برشلونة يقعد يقتل في الفرق و يدمرهم، و الناحية الثانية مدريد يستنى الشوط الثاني و يجيله كام جون كدة من الدقيقة ٧٠ و أنت طالع. الدوري الهولندي؟ في آخر عشر

سنين يا أياكس يا أيندهوفن، و سنة واحدة بس رموا عصمة لألكمار على سبيل التنوع، خبائة بقى! الدوري الإيطالي كله فضايح رخيصة عشان التسالي. كل شوية تلاقي نقط محصومة من فرقة، ليه؟ عشان فيه تلاعب بالنتائج. طب ايه الإجراء المتبع عشان نعاقب الناس دي؟ نزلناهم درجة ثانية. طب ما هم هيطلعوا درجة أولى تاني! ايه الإجراء اللي أحدثوه عشان ميكرووش الغلطة دي؟ مفيش! وإلا كمان لما مدرب يتطرد عشان سوء السلوك و تلاقيه قاعد في المدرجات ماسك التليفون و بيدي تعليماته من المدرجات، مسخرة! تقدر تقولي ايه تفسير كل ده؟" انتهى عامر من خطابه و وقف ليلتقط أنفاسه

- "احم. عشان الكورة تمثيل؟" رد كريم في صوت خافت

- "عشان الكورة تمثيل. برافو عليك. كل حاجة بتحصل قدامك بيقوا متفقين عليها. كل الأفلام العربي و التصريحات و الخناقات و المشاكل بتبقى مكتوبة في سيناريو بيقدوا يذاكروه. مفيش فتفوتة بتتم من غير ما يبقى فيه واحد كبير قاعد يميلهاهم. أنت فاكرك الحكام بيلبسوا سماعات و ميكروفونات ليه؟ عشان يجيلهم التعليمات و يطبقوها في الملعب"

- "الموضوع ده ماشي ازاي؟ أنا مش فاهم" صاح كريم في استنكار

- "بيبدأ من تحت لفوق. كل لعب ليه ممثل إبداعى، الممثل الإبداعى ده بيبليغ كل اللي بيتفق معاه عليه لكبير الإبداعيين بالفريق. قبل كل ماتش كبير الإبداعيين للفرقة بيقدد مع بتاع الفرقة الثانية يتفقوا على السيناريو. سلسلة القيادة بتمشي بالشكل ده؛ كبير الإبداعيين للفريق بيبليغ لرئيس الاتحاد بتاع البلد، رئيس الاتحاد لكل بلد بيبليغ لرئيس الاتحاد بتاع المنطقة سواء أمريكا الجنوبية، أفريقيا، أوروبا، أوقيانوسيا و هكذا. كل دول بقى بيبليغوا لرئيس الفيفا"

- "طب ازاي الموضوع ماشي من غير ما حد يعرفه؟"

- "مفيش حد معرفش يا كريم. كل واحد بيشارك في العرض ده بيبقى عارف. أي واحد شاط كورة أو مسك صفارة قبل كدة بيبقى عارف، الحكام،

المدرين، و كمان الخللين الرياضيين. عشان معظم الناس دي بتبقى لعبية كورة قبل كدة"

- "و المذيعين كمان بيقوا عارفين؟"

- "لو كانوا لعبية كورة قدام بس. غير كدة مش هيكون عندهم فكرة"

- "و الصحافة؟"

- "لأ الصحافة مش عارفة. و دي أحلى حاجة في الموضوع. أمال هتلعب مين؟ هترمي لمن أخبار تافهة يتشعلق فيها؟ لما تحب تنشر إشاعات عن انتقالات صيفية ولا فضايح هتعتمد على مين؟ أكيد على واحد فاكتر نفسه بيعمل سبق صحفي. خليهام ياكلوا عيش"

- "مكانتش هتبقى أسهل لو الصحافة مشتركة معاهم؟"

- "أمال مين هيتفرج؟ بقولك لما تحب تنشر إشاعات بتروح للصحافة. دول أول ناس هيفضحوا الموضوع"

- "ازاي أصلاً الموضوع ده مستخفي يا عامر؟ احنا في عصر الإنترنت"

- "عصر الإنترنت؟ بتجيب الكلام القديم ده منين؟ هسألك سؤال، أنت بتبقى عارف الأسرار العسكرية بتاعة بلدك؟"

- "الأسرار العسكرية ايه؟ أنت عاوز توديني في داهية؟" نظر كريم حوله في

قلق

- "الأسرار العسكرية عمرك ما بتعرفها. قليل أوي ما بتتسرب، و لا هي الناس فتحت الراديو صباحية ٦ أكتوبر لقت النشرة بتقول يا جماعة احنا رايجين الجيم و بعديها بنصاية هنحارب؟"

- "بس ده سنة ١٩٧٣ يا عامر. متجنننش"

- "مفيش فرق يا كريم. أنت لما بتفتح تويتر بتلاقي أي خبر حد مش عاوزه

يتسرب؟"

- "الإنترنت فيه كل حاجة. مهما الواحد حاول يجي الحاجة بتتسرب، لو فيه حد عاوزها تتسرب هتتسرب. و ده بيحصل فعلاً"

- "بالظبط. حاجات حد عاوزها تتسرب! دائماً أما فيه حاجة بتتسرب بيبقى فيه شخص عاوزها تتسرب. مش مهم يكون صاحب الشأن، بس شخص ما في كوكب الأرض بيبقى عاوزها تتسرب. طيب فكر كدة، لو حاجة مفيش حد عاوزها تتسرب؛ لو سر عارفه مليون واحد بس محدش منهم عاوز يكشفه...يبقى مين اللي هيكشفه في رأيك؟"

- "مفيش حد"

- "بالظبط. السر اللي مفيش مصلحة لحد انه يكشفه، مش هيكشفه"

- "ليه بقى محدش عاوز يكشفه؟ مش غريبة شوية؟ ده مفيش شركة بتعرف تشغل عشر موظفين على بعض و تخليهم مبسوطين. عاوز تفهمني ان شركة كبيرة أوي شغال فيها ملايين الموظفين عارفة تبسطهم كلهم؟ ليه مين اللي ماسكها؟ غاندي؟"

- "أي حد بيعمل حاجة بيعملها ليه؟ عشان الفلوس. أنت لو بتشتغل قاعدة تواليت و بتاخذ قدامها فلوس قد كدة، هتقول لأ؟"

- "أنت بتنسى عامل الكرامة"

- "الكرامة دي لو بنتكلم على آلاف الدولارات. إنما مجرد ما تعدي المليون مفيش حاجة اسمها كرامة. كله بيتنسي، بيترمي في الحوض، مش في الزبالة عشان تعرف تجيبه تاني، لأ في الحوض يا كريم. لو عاوز تجيبه تاني لازم تروح الصرف الصحي، يبقى تشتغل قاعدة تواليت أرحم مش كدة؟"

- "أنت بتجيب القرف ده منين؟" صاح كريم في اشمزاز

- "لو اديتك مليون جنيه في الشهر عشان تسمع القرف ده، هتسمعه" ابتسم

عامر في ثقة

- "طيب، واحد زبي مثلاً... هيلعب كورة و يشتغل قرد بصديري و يتشقلب في الملعب و يغني ظلموه. بعد ما خلصت لعب كورة و مش هأخذ فلوس تاني، أروح أكشف السر و أعمل اسم و منظر لنفسي...ليه لأ؟"

- "برضه غلطان يا كريم. أنت فاكر لما بتخلص كورة الفلوس بتقف؟ تبقى عبيط، أمال ازاي هيسكتوا الناس دي كلها؟ الكورة مش بتقف يا كريم. هتخلص لعب كورة، هتبقى عاوز تبقى مدير فني، مدرب، حكم، محلل رياضي تطلع تقول أي كلام و تاخذ عليه فلوس برضه. الفلوس مش بتقف. هيقولك مكان تروحه. و هتفضل تاخذ فلوس برضه"

- "أنت بتفترض ان كل الناس دخلت في الموضوع باقتناع و انهم حطوا رجليهم و الفلوس عامياهم فعلاً. ايه يمنع واحد زبي جه يدخل و لقي الموضوع مش عاجبه انه يقولهم طظ فيكوا و يروح يوديههم في داهية؟"

- "هاهاها. أنت عرفت خالد أبو رامي ده هيتعاقب ازاي؟"

- "لأ. هيتعاقب ازاي؟"

- "خالد هيروح نادي تاني غصب عنه و هيقول انه ماشي بمزاجه عشان زهق. و عشان يزودوا الإهانة كمان هيقول انه زهق لأن اللعب اللي جه جديد، حضرتك يعني، مقعده على دكة الاحتياطي. تفتكر ليه خالد هيعمل كدة؟"

- "عشان بيسمع الكلام؟" سأل كريم في غباء

- "أبوة صح. بيسمع الكلام، بس ليه سمع الكلام؟ ماهو ممكن يبقى سمعه ثقيل و يقولهم لأ. فكر كدة ليه خالد هيسمع الكلام؟"

- "استنى. أكيد ماسكين عليه زلة" هتف كريم و كأنه اكتشف قانون الطفو

- "أكيد ماسكين عليه زلة" وافقه عامر

- "بس خالد ده سهل، أكيد ماسكين عليه شريط آداب و هو عريان" ضحك

كريم

- "كدة تتحسد يا كريم. أنت ممكن تشتغل معاهم. المهم، مفيش حد يفكر يلمس كورة الا أما الناس دي بتدرسه كويس، و بيبقى عليه ملف بدني و نفسي، و عارفين عنه كل حاجة. كل ده لحد ما يمسكوا عليه زلة. مش شرط تكون متشابهة عند كله. ممكن حاجة تبقى مش فارقة معاك و تفرق مع غيرك. يعني خالد مثلاً ايه اللي مخوفه؟ ان أهله يقيموا عليه الحد. انما هو ولا يفرق معاه يطلع عريان قدام الشاشة"

- "تلاقيه بس خايف الناس تشوف الإمكانيات بتاعته عاملة ازاى. أصله مش قد كدة"

- "هايل يا كريم. واضح ان عندك قوة ملاحظة" ضحك عامر

- "لأ مش أوي. محدتش بالي كويس" احمر وجهه خجلاً، ثم انتبه فجأة "لحظة واحدة. هم ماسكين عليا زلة؟"

- "ممكن يبقوا ماسكين عليك زلة، مين عارف؟"

- "بس أنا نضيف يا عم. مستحيل يمسكوا عليا حاجة. أنا راجل سليم وماشي جنب الحيط"

- "ممكن تبقى راجل ثقيل و مأمّن نفسك و تقول طظ. بس دي مخاطرة هتخاف تاخدها، مش كدة؟ الناس دي دائماً بتتصرف و بتطلعلك حاجة تمسكها عليك. دول بيلعبوا في المليارات يا كريم، و عدد من الأصفار لأرقام متعرفش أصلاً انما موجودة في الأرقام بتاعة ربنا. أنت اللي عليك بس حاجتين؛ اوعى تنق في حد أبداً، مهما حسيته محل ثقة، و دائماً تفكر في السبب ورا الحاجة. ليه الشخص ده بيعمل كدة؟ تاني حاجة و دي بقى أظنها سهلة، متلعبش بدليك كدة ولا كدة عشان متمسكش عليك"

- "حاضر هحاول" قالها في خيلاء و كأنه رامبو يصعب عليه الابتعاد عن المخاطر

- "و بعدين استنى يا ضايح. أنت عليك شرط جزائي ٤ مليون استرليني. دول ممكن يسجنوك بيهم. هتروح السجن؟"

- "لأ مانا خبيث بقى. هخلص العقد بتاعي و أروح أفضحهم برضه. نياهاهاها" ضحك كريم في فخر بذكاء المحقق كونان

- "هتستنى ثلاث سنين. فكرة جامدة محدش فكر فيها قبليك طبعاً. ابن النيل برضه دائماً سابق بخطوة. ماشي يا سيدي، استنى الثلاث سنين. بس قدامك حاجة من الاتنين. انك تستنى الثلاث سنين قبل ما تروح تفضحهم، اللي هي فكرة هائلة محدش فكر فيها قبليك، و تقضيها بحدلة و دكة احتياطي، أو... تقعدهم و أنت عايش ملك و تاخذ فلوس متلثة "

- "استنى كدة أما أتعدل. فلوس متلثة؟" قال كريم في لهفة

- "أبوة. عيش يا سيدي الثلاث سنين بتوع العقد اللي ماسكينك من دراعك عشانه. مين عارف، مش يمكن يجيلك فرص أحسن و تروح نادي تاني لما يلاقوك ولد مطيع بتسمع الكلام و بتمشي ورا السيناريو؟"

- "مش عارف، مش مقتنع. سبني أفكر" هز كريم كتفيه في عناد

- "أسيك تفكر. حقك برضه مفيش مشكلة. أدبك خمس دقائق؟"

- "خمس دقائق يا عامر؟ هي مسابقة في تليفزيون؟ طب و أفهم من كدة ان الحكومات عارفة؟"

- "هاهاها. حلوة يا كريم. خليني أحكيلك حدوتة. أنا راجل قديم و أموت في الكتب، مش الكتب التعبانة بتاعة اليومين دول اللي بييجيوا فيها ولد و بنت ويلزقولهم قصة، أو جرائم القتل الرخيصة. لأ، الكلاسيكيات اللي بتعمل دماغ، حاجات الناس الثقيلة"

- "ده شئ هائل. أنا فخور بيك. هتحكي القصة ولا أقوم أنا؟"

- "فيه رواية ظهرت سنة ١٩٩٣ اسمها "البطل الأمريكي". عملت ضجة جامدة عشان كانت بتدور حول نظرية مؤامرة كبيرة أوي؛ رئيس جمهورية أمريكا

كان عاوز يكسب تعاطف شعبه عشان ينتخبوه دورة تانية رغم انه مبوظ الدنيا على الآخر و معملش حاجة عدلة. راح اتصرف ازاى؟ بدل ما يعمل مجهود في الإصلاح والحاجات العبيطة دي، قرر يعمل حرب"

- "يعمل حرب؟ على أساس انها صينية بسبوسة؟"

- "الرواية دي بعد كام سنة اتحولت فيلم اسمه "واج ذا دوج"، يعني هنز الكلب لامواخدة. الفيلم ده جايلك الرئيس الأمريكي اتمسك في فضيحة، والانتخابات قربت و عاوز أي طريقة عشان الناس تنتخبه فترة تانية. جاب مخرج سينمائي من هوليوود بختصره حرب وهمية على ألبانيا، و جاب مجرم يخليه كأنه بطل حرب، و عملوا مؤثرات صوتية و مشاهد مرئية و فيلم كبير عشان يقنعوا الناس ان فيه حرب مجد. و جابوا صور للناس الفقيرة في ألبانيا. كل ده عشان الرئيس بيان قدامهم بمنظر البطل. و كله بحرب أي كلام... تمثيل"

- "حرب تمثيل؟ أنت عاوز تجنني؟ و ايه الفكرة في الرواية و الفيلم؟"

- "الإشارة ان حرب الخليج دي كانت لنفس السبب... تمثيل"

- "حرب الخليج تمثيل؟ أنت بتخرف يا عامر!"

- "فيه نظريات بتقول ان السبب الوحيد لحرب الخليج هو عشان الناس تحس ان الرئيس الموجود ده راجل محصلش و مش هيتكرر في التاريخ و بالتالي تحبه و تنتخبه لفترة تانية "

- "بس هي حصلت فعلاً يا عامر، ما كل الناس شافت. يادي الخيبة و يادي

العار أخ بيضرب أخوه بالنار. معروفة دي!"

- "الغرض من الحرب مختلف تماماً. مكانش عشان يحموا شعب غلبان من الاعتداء. الكاتب الفرنسي جون بودريار كتب مقالات قال فيها ان المقصود بالتمثيل هنا هو فكرة مصطلح الحرب نفسه. الرئيس أقنع الشعب ان الجنود نزلت الأرض برجليها، و حاربت و شقيت و قتلت و فيهم اللي مات و اتبهدل. إنما الحرب دي خلصت طيارات. هول المعارك ده كله من وحي خيال المؤلف.

العراقيين هم اللي اتطحنوا، إنما الأمريكان رجعوا سالمين غائبين. مكانتش حرب، ده كأنه اعتداء حصل في استراحة غدا موظفين و رجعوا يكملوا شغل تاني"

- "ياااه. حتى الحرب تمثيل؟ ناقص تقولي برنامج آراب أيدول تمثيل"

- "هاهاهاها. لأ دي كلنا عارفينها مش محتاجين حد كبير يشرحها لنا"

- "معلش لو مفيهاش غباء. برضه مقلتلش، الحكومات عارفة؟"

- "أنا لما بحكيك حكاية يا كريم، بحكيها لك عشان تتسلى؟" سأل عامر في

ضيق

- "بتكسب ثواب، ابتسامتك في وجه أخيك صدقة"

- "احنا دلوقتي في عهد السلام، و حط تحتها ميت خط عشان الواحد بمقاش

متأكد. بس قولي، لو أنا عاوز أهلي عقول الناس و ألبسهم السلطانية. أعمل حرب

أسهل ولا....؟"

- "أفرجهم على كورة" صاح كريم في انبهار

- "كريم. أنت مبقيتش سهل. كدة هخاف منك" ضحك عامر

- "الحكومات عارفة" ردد كريم في ذهول

- "الحكومات واقفة متمزجة و بتاكل فشار"

- "أنت من الصبح عمال تقولي "الناس دي"، مين الناس دي؟"

- "الناس الثقيلة يا كريم. أصحاب المصالح اللي محدش يقدر يقربلهم. كام

واحد بيبقى معاه مليارات؟ الناس اللي بتحرك المنظومة الكبيرة دي. احنا غلاية

وسطيهم. احنا ولا حاجة. أنا شخصياً ولا حاجة. تخيل بقى!"

- "أهم سؤال في القصة دي يا عامر... هو ازاى الكورة وصلت لكدة؟ يعني

كانت الناس نائمة و صحيت تاني يوم لقيتها بقت تمثيل؟"

- "عاوز تعرف الموضوع بدأ ازاى يعني؟ دي قصة طويلة يا كريم. أنت مل"

- "معلش يا سيدي استحملني. احنا أهل برضه"

- "الموضوع الأول بدأ في الخفيف، بين الفرق و بعضها. كانت الفرق اللي علاقتها كويسة بتفوت الماتشات لبعض في حالة أنهم مش خسرانين حاجة من الماتش، يعني لا هضيعوا على أنفسهم البطولة ولا هيهبطوا درجة ثانية"

- "معندهمش حاجة بيكوا عليها يعني"

- "بالظبط كدة. بعديها اتطور شوية، بقت شوية فرق تفوت الماتشات لفرق ثانية مادام برضه مش هياثر عليها في حاجة، بس المرة دي مش نابع من العلاقات، ده اتباعاً مبدأً أجبني تجديني؛ يعني لو مزنوق في الماتش ده ممكن أفوتهولك بمقابل مادي و أنا كدة كدة مش خسران حاجة"

- "استغلال يعني"

- "مش استغلال يا كريم. هو الواحد يطول يشتري المجد بالفلوس؟ لو الفريق الغني يقدر يشتري أي كاس بفلوسه، هيكون ساعتها اسمه استغلال؟ ده هيدفع وفوق الفلوس بوسة كمان"

- "معاك حق. كله دائماً بيقول الفلوس لا تصنع المجد"

- "أكيد اللي قال الجملة دي واحد فقير يا كريم، فكان بيهون على نفسه. الموضوع بعديها انتشر بشكل محلي بين الفرق و بعضها. بس اختلف شوية. العملية قلبت مزادات سرية. الفرق الثقيلة اللي بتنافس على الدوري بقت تشق طريقها، و الفرق اللي حوالها تفوت ماتشها للي يدفع أكثر. فيه فرق كانت بتغش و تاخذ من ده و ده و تفوت ليهم هم الاتنين و بالتالي يغلسوا لأنهم مأثروش على مجرى الدوري"

- "و محدش كان بيكسب بمجهوده؟ افرض الفرقة مش عاوزة تدفع"

- "تخيل نفسك في آخر ماتش في الدوري، و محتاج تكسب بأي قن، و أنت معاكش أكثر من الفلوس. هيفرق معاك ترمي قرشين و تضمن الماتش مية في المية؟ مكافآت الفوز هتعوذك ميت مرة عن الفلوس اللي دفعته. تخيل كمان لو أنت

محتاج تكسب بفارق أهداف كبير عشان تكسر التعادل في النقط بينك و بين فرقة تانية، مش حاسس انها حاجة صعب تنجزها لوحك شوية؟"

- "بالنسبة لفارق الأهداف دي نقطة مهمة أوي فعلاً. و بعد كدة؟"

- "الموضوع مشي في الخبائة بين الأندية و بعضها، و وصل كمان على الصعيد القاري، يعني بطولة زي دوري أبطال أوروبا كان بدأ يحصل فيها نفس السيناريوهات لأن فيه فرق عارفة انها لو اتشقلبت عمرها ما هتوصل لحاجة، فتقلب رزقها أحسن، و فرق تانية بتبقى مزنوقة في قرشين و عندها السنة دي الفلوس أهم من البطولة، لأنها كسبتها مثلاً السنة اللي فاتت أو الفوز مش من أهدافها السنة دي، كل واحد و ظروفه. لحد ما المؤامرة دي كشفها عضو من اللجنة التنفيذية للاتحاد الأوروبي"

- "جانب عاليها واطيها طبعاً"

- "هاهاها. قالك! بالعكس، ده استغل الموضوع في انه يمشي الدنيا بشكل أشيك شوية، بس برضه في الخفيف. لما كان ماسك عليهم زلة، عرف واحدة واحدة يتحكم فيهم و يمشي القصة على مزاجه. ساعد في الحكاية دي كمان المراهنات على الماتشات. لما بقى ليه سلطة التحكم في الماتشات ابتدى يجامل ناس أصحابه كثير و يكسبهم فلوس متلثة عشان قالمهم يراهنوا على مين. فبقى ليه جمایل عند ناس كثير"

- "و محدش شك فيه؟"

- "مادام الراحل ده بيجيلي فلوس قد كدة، هدور وراه ليه؟ ما أكسب على قفاه من غير ما أوسخ ايدي أو أفهم هو بيعمل ايه"

- "الجهل نعمة يا صديقي"

- "بالظبط. فضل الموضوع ماشي كويس، لحد ما غلط جامد و اتزنق في قرشين. فاضطر يراهن على كذا ماتش ورا بعض؛ ماتشات مستحيل تخلص بالنتيجة اللي راهن عليها و ملايين غيره راهنوا على عكسها. ماتشات خلصت

بالشكل اللي هو عاوزه في لحظاتها الأخيرة. حاجات كانت شبه معجزات. و لم هو القرشين من وراها. مع الوقت ابتدى الإداريين في الفرق اللي هو متحكم فيها يلاقوا مدخل للمفاوضة. وصلوا لأدلة بسيطة تشير لأنه راهن على ماتشات هو اللي طابحها. رغم ان الأدلة مكانتش كفاية، بس العيار اللي ميصييش يدوش. فبالثالي جاب ورا شوية، و اضطر يسمع منهم. بس برضه ده ميمنعش ان اللي هو ماسكه عليهم يوديهم في ستين داهية. فقالوا مادام فيه مصلحة مشتركة، يبقى مفيش فائدة لحد انه يفضح الثاني و اتفقوا سواء، و كله بحسابه. عدت فترة والعضو ده كبر و اترقى و بقى رئيس الاتحاد الأوروبي

- "منصبه بقى ليه سلطة أكثر"

- "بس حساس أكثر برضه، و لما تبقى في منصب أعلى من السهل انك تهدد. فضل الباشا مستمر في صفقاته مع الفرق، و قرر ساعتها انه يفتش ورا كل الدوريات. طبعاً بكل سهولة لقي ان المرض منتشر زي الطاعون. و ده سهل عليه انه يمشي الدنيا ودي بينهم و بين بعض. بدأ يتحكم تحكم تام في الماتشات والنتائج. لحد ما فيه فرقتين تلاثة معجهمش الوضع وقرروا يلبسوه مع الكبير"

- "ضميرهم صحي يعني؟"

- "مش ضميرهم صحي قد ما حسوا ان الطريقة اللي الدنيا ماشية بيها مش في صالحهم. حسوا ان فلوسهم و سلطتهم كانت هتجيلهم البطولات اللي عاوزينها أكثر من ان فيه راس كبيرة تبقى ممشية الموضوع، فكانوا عاوزين يطيروه و يستنوا شوية أما الدوشة تروح و يبتدوا يشتغلوا تاني من أول و جديد على نضافة"

- "على وساخة قصدك. و الكبير ده طبعاً هو رئيس الفيفا"

- "راحت الناس دي لرئيس الفيفا تقوله على الملعب. رئيس الفيفا قفش وسخن و اتجنن. استدعى رئيس الاتحاد الأوروبي على طول و وقف قدامه و شمر

هدومه و قاله... كدة يا صاحبي يبقى فيه سبوبة حلوة و متقوليش؟ داحنا حبايب
من زمان"

- "أه يا أقحوبان المزرعة"

- "أقحوبان المزرعة؟ ده حاجة زي أبو قردان يعني؟"

- "لأ متشغلش بالك. كانوا أصحاب فعلاً؟"

- "صدق أو لا تصدق. حبايب و أصحاب، مش قدام الكاميرات بس. كانوا
يلعبوا جولف سوا، بس هم الاتنين فاشلين في الجولف. قرر يداري عليه طبعاً،
بس اتبع مبدأ فيها لاخفيها، و الموضوع ازداد شياكة. رئيس الفيفا طمع في انه
يمشي المنظومة بشكل أكبر. بدل ما كان بيضطر يلجأ للحكام عشان يمشي الماتش
زي ما هو عاوز، وقعت في ايده فرصة انه يخلي الفرق تسمع الكلام من غير
دوشة، و رئيس الفيفا ده وراه محافل دولية. ايه أحسن طريقة يوصل بيها لكدة؟"

- "يفتش طبعاً ورا كل الدوريات"

- "راح فتش، و وجد ما لذ و طاب. ذهب ياقوت مرجان. ابتدى يسيطر
تماماً على موازين القوى. الناس ابتدت تبقى في ايده عرايس، يحركها زي ما هو
عاوز. و قرر ان الموضوع يبقى قانوني و منظم"

- "و على المستوى الدولي؟"

- "لما يبقى في ايدك كل البلاد هيكون صعب عليك انك تمشيهم بمزاجك؟
زمان المواضيع كانت ماشية بالسياسة. البلد دي بتاخذ معونة من دي فأحسنلها
تسييلها الماتش، البلد دي حليفة للبلد دي فمينفعش تكسيها. لو البلد دي
مسابتش البلد دي تكسب مش هتقف معاها في الأزمات. انما دلوقتي بقى قدامه
حاجة أشيك و أبسط مليون مرة من السياسة؛ التجارة"

- "و من ساعتها بقت كل البطولات تمشي بشكل منظم؟"

- "أي حاجة في الدنيا بتبدأ صح و بنضافة، أول ما بتعلق مع الناس، بيبدأ
الشخص يخاف على الحاجة دي أوي، و يبقى عاوز يتشعلق فيها و يمسيها على

مزاجه طول عمره. فالتطور الطبيعي لأي حاجة ألها تقلب تجارة، مهما كانت نية الشخص سليمة. بمجرد ما تبقى موضة، لازم في الآخر تقلب تجارة. ده لو واحد عمل فيلم عدل بغرض انه يقدم رسالة و نجح أوي، بيقدع يعمل جزء تاني و تالت عشان يجيب من وراه فلوس. و طبعاً، مفيش تجارة تمشي من غير نظام. كل البطولات لازم تبقى منظمة عشان ياكلوا عيش بشياكة"

- "و ازاى الموضوع ده بيمشي؟ أكيد رئيس الفيفا مبيحضرش كل حاجة ويحسبها بنفسه"

- "في الأول كان بيعب يشتغل بايده. في البطولات الدولية كان بيعجي قبل كل ماتش و يقعد المنتخبين قدامه، يديهم فكرة عامة عن الماتش هيمشي ازاى، ومين هيكسب مين فين و امتى. بعديها لقي نفسه مش فاضي، وراه خروجات، وراه فلوس يطرعها، مينفعش يقضي يومه كله في الحواديت، فقرر يلجأ للتفويض ويخلي الموضوع أشيك و أشيك. خلى الماتش من أوله لآخره مكتوب و ليه سيناريو كل اللاعبة لازم تمشي عليه. عين فريق من الكتاب، و المخرجين عشان يخرجوا الماتشات بالشكل المطلوب. بقى كل شيخ مسئول عن القرية بتاعته لتوفير الوقت و توجيه الطاقات. استخدم التحكيم بالشكل الأمثل؛ تسيير المباريات بشكل أكثر منطقية. لما تيجي الغلطة في الحكم مش مشكلة، هو هيحمله من الرأي العام. والفرق اللي بتلعب عمرها ما هتتعرض على أي ظلم تحكيمي، ما هم معاه في اللعبة"

- "ايه مصلحة الفرق الصغيرة في ألها تسمع الكلام؟ لما الموضوع بقى مقنن وماشي بأسلوب معين، و المجد القديم بتاع المزايدات راح؟"

- "الفرق دي عمرها ما كانت تحلم ألها تاخد حاجة، دلوقتي بيرموههم عضمة كل شوية، كاس محلي هنا، بطولة سوبر هناك، حاجات من دي"

- "عشان كدة كتير تلاقي فرق صغيرة مالهاش اسم بتكسب فرق كبيرة"

- "أهو حاجة يطلعوا بيها من المعمة. مش هيقوا خسرانين طول الوقت"

- "الموضوع كبير أوي يا عامر. طب و أنا دوري ايه؟"

- "أنت عروسة يا كريم. فنان ترفيهي. مؤدي"

- "و المفروض أسكت؟"

- "ماهو كله سكت. عندك مثلاً فريد. بقى هدف الدوري البرازيلي"

- "يا راجل؟ دا شاكلة باس النجيلة عشان يوصل. بس احنا مش كدة

بنضحك على الناس؟ بنخليهم يندمجوا و يرتبطوا عاطفياً بماتشات الكورة لما هي في الآخر تمثيلية رخيصة؟"

- "الناس تموت في التمثيل يا كريم. أنت بتهرج؟ أصلاً لو فكرت فيها، الحاجة

الوحيدة اللي مخيلة الناس تتابع الكورة بتشويق هي السيناريوهات و العوامل

الفنية. ميتشوفش الفيديوها اللي القنوات بتجيبها قبل كل ماتش يقعدوا يحكموا

فيها تواريخ مواجهات الفرقين و كل نادي عنده ايه يخسره؟ لو الماتش ده مالوش

قصة ايه اللي يخليك تنفرج عليه أصلاً؟ قدامك ماتش بين البطيخ و الفراولة،

فرقتين كبار طبعاً، بس مش هتبقى حاسس بتشويق و إثارة أكثر لما تعرف ان فريق

البطيخ ده مخسرش على أرضه بقاله سنتين، و في نفس الوقت فريق الفراولة ده

معدوش بديل للفوز؟ هتحمس ان الماتش ليه بعد و جو تانيين خالص. ايه رأيك

كمان لو فيه لعب في آخر لقاء للفرقتين اتخانق مع لعب تاني، هتبقى الناس قاعدة

بتفكر هو هيسلم عليه الماتش ده ولا لأ. أوبا ده مسلمش عليه، أه الواطي. تخيل

لو مدرب فريق البطيخ قال ان فريق الفراولة ده معدوش تاريخ، و مستحيل

يكسبنا الماتش ده، راح مدرب الفراولة قال انه خلال عشر سنين بالظبط هيبقى في

مستوى أعلى منه، و الماتش ده لو مكسبوش هيسبب تدريب الفريق. زود الإثارة،

لو لعب من فريق البطيخ كان يلعب في فريق الفراولة الموسم اللي فات، كله

هيبقى مركز يا ترى هيبقى هو سبب خسارتهم الماردة ولا لأ. طب لو جاب جون

هيفرح ولا هيحترم مشاعر الجمهور. اللعب ده عيد ميلاده الماردة، اللعب ده

كل ما يلعب قدام الفرقة دي لازم يجيب جون. الفرقة دي هي عقدة الفريق ده

من عشر سنين رغم انها بتخسر من كل الفرق الثانية، و غيره و غيره. الحاجات دي هي اللي بتزود الإثارة و التشويق للماتش، بدل ما يبقى مجرد ماتش عادي. كل ما يبقى فيه حاجات في خطر أكثر، و حاجات على كفة الميزان، كل ما الناس تتحمس للماتش. يعني لو ده أول ماتش تخسره في الموسم هتبقى حاجة مثيرة أكثر من مجرد ماتش عادي خسرتة و السلام. كل ما يبقى فيه حواريت أكثر كل ما الناس تبقى مشدودة للماتشات أكثر، و بالتالي نسبة المشاهدة تزيد. الحوارات هي أساس المشاهدة. لو الماتشات مفيهاش حوارات محدش هيرتبط عاطفياً بالماتش زي ما بتقول. و أرجع أقولك برضه يا كريم، كله ماشي مع التيار"

- "افرض أنا مش عارف أعمل كدة"

- "مش عارف ازاى؟ مش عيب عليك لما فيجو المصري يبقى منيهم من المغرب في ساو باولو و أنت قاعد هنا عمال تعيط زي العيال؟ هتعمل ايه؟ هترجع لأهلك تقولهم رح ألعب كورة، قاموا لعبوا هم بيا و ادوني على قفايا؟ تفكر ساعتها أبوك هياخدك في حضنه؟"

- "لأ، هو ممكن ياخدني تحت السرير و البقية ترفضها الرقابة"

- "أكيد الرقابة ليها حق، لأن ساعتها هيبقى أيامك سودا. إنما فكر فيها من الناحية دي... هتسمع الكلام و تستمتع بالكورة على الأقل الفترة اللي قدامك؛ سنة اتنين تلاتة. خد فلوس يا عم و ابقى مليونير. ارجع لأهلك وريهم انك بقيت أسطورة زمانك و ممكن تصرف عليهم كمان. احترف في أحسن نادي و وري العالم قد ايه مصر فخورة بيك. هتبقى أحسن مليون مرة من فيجو المصري والبرتغالي و الصيني كمان. و يوم لما تحب تبطل كورة ابقى مدرب مبيعملش حاجة غير انه بيرص اللعبة و يمشي ورا كلام الناس الكبيرة، أو محلل رياضي يطلع يقول حاجة و يحصل عكسها تماماً، و برضه تاخد فلوس بالعبط. تتجوز بنت حلوة من أي حنة أنت عاوزها. تركب عربيات أحدث موديل و تعيش بدل مانت راكن عربيتك في الجراج و عمرك ما استعملتها. معذور طبعاً ماهو البترين غالي هنا. بس

لما الفلوس تجري في ايدك مش هيفرق معاك بترين و هتبقى بيع الشوارع. عاوز يا سيدي بعد كدة تحاول تكشفهم بفتاكتك اللي موردتش على حد و حاسس ان الملايين مش عاجباك ابقي اعمل اللي أنت عاوزه. كلامي صح؟"

- "كلام ايه؟ كنت بتقول حاجة؟ أنا آخر حاجة سمعتها كانت مليونير"

- "هو ده الكلام اللي أنا عاوزه يا كريم. أحبك و أنت عارف مصلحتك فين"

- "يعني عشان أبقي زي ما أنت بتقول، المفروض أعمل ايه؟ أنا ايه؟"

- "أنت؟ أنت ترس في مكنة كبيرة مش بتعمل حاجة غير انها بتزل فلوس. طول ما الترس ده شغال كويس، المكنة هتزل فلوس أكثر، بس لو الترس ده عطل، هو اللي خسران، لأن المكنة هتهمله و تفضل برضه شغالة و تزل فلوس. هو العمر فيه كام فرصة زي دي؟ عيش أيامك و انطلق. شوف هتفرق معاك ازاى و أنت رايح الجامعة بعريبتك و كمان لعب كورة. الناس هناك هتعاملك كأنك الملك هنري. و البنات هيعاملوك كأهم جوارى عندك"

- "هارون الرشيد"

- "ليه الناس كلها مصرة أي حاجة ليها علاقة بالجوارى يبقى هارون الرشيد؟ ما الملك هنري كان مقضيها ميت مرة أكثر من هارون الرشيد و عنده جوارى بالعياط. سايين كل تاريخه و باصين للراجل في الجوارى بتاعته؟"

- "سيبي أحلم يا عامر. أنت مالك يا أخي"

- "خلاص يا عم. أنا هقعد معاك في لندن أسبوع كمان ولا حاجة أريحلي شوية، قال يعني بشتغل. لو حد سألني هفهمهم ايني محتاس معاك. لو حصل و حد سألك عليا يبقى أنا بشتغل معاك، ماشي؟"

- "ماشي يا فاسد يا متقاعس" قال كريم مازحاً

- "لو احتجتني أنت عارف رقمي الإنجليزي، كلمني على طول مش هتاخر عليك. بس يستحسن متكلمنيش. مش ناقص صداغ"

- "ربنا يكرم أصلك يا ذوق" أجاب كريم مبتسماً، "استنى يا عامر. أنت ليه عمرك ما فكرت تفضحهم؟ ماسكين عليك حاجة برضه؟"
- "مش محتاجين يمسكوا عليا حاجة. مانت عارفي، بحب الفلوس"
- "الفلوس" ابتسم كريم، "الفلوس حلوة برضة"
- "أنت هتقولي؟ أهلاً بيك في منظومة كرة القدم" ابتسم عامر متجهاً للباب

حكّت رنا أنفها في ملل مقاومة النوم على مكتبها. منذ رحيل عامر أصبح لديها المزيد من الوقت لإنهاء أعمالها. بالنسبة لها ذلك سلاح ذو حدين، لأنه عند إنهاء العمل مبكراً يزداد وقت الفراغ. عملها كموظفة استقبال تركها فريسة لنظرات المارين أمام مكتبها، لذلك دائماً ما حاولت أن تتظاهر بالانشغال. استمر صراعاها مع النوم إلى أن سمعت وقع أقدام ثقيلة فاعتدلت في جلستها. ظهر عصام أمامها بشعره الأبيض و ابتسامته الصفراء.

- "بتشتغلي في ايه يا رنا؟ وراكي حاجة مهمة الهاردة؟"
- "براجع ملفات الموظفين"
- "بتراجعي فيها ايه؟" سأها في سخافة
- "فيه حاجة يا مستر عصام؟" امتعضت رنا بعدما أيقنت ما يحاول عصام فعله
- "أصلي محتاج مساعدة منك على انفراد. عاوز منك حاجة بيني و بينك. تعالي ورايا على مكنتي"

قامت من مكانها في حذر و تبعته إلى المكتب. صوّرها تفكيرها كل السيناريوهات السيئة التي يمكن أن تحدث بعد قليل. لم تنطق بكلمة إلى أن أغلق الباب خلفهما. أشار للمقعد فأطاعته في خوف.

- "تشرّب حاجة؟ هقوم أجييلك حاجة تشرّبها" قامت من مكانها

- "رنا. متخافيش. مش اللي في دماغك خالص. اهدي عشان نتكلم" أشار إليها بالجلوس ثانيةً

- "حاضر يا فندم. اتفضل"

- "عامر. عاوزك تجيبلي حكايته من أولها لآخرها"

- "حاضر يا فندم. هقوم أجيب لحضرتك الملف بتاعه" قامت مسرعة وتوجهت للباب

- "رنا. مش عاوز استهبال. قصدي تجيبي قراره"

- "و دي أعملها ازاي مش فاهمة؟" جلست ثانيةً في توتر

- "المكتب كله واخذ باله انه رايح جاي عليك. يعني بكل بساطة ممكن توصلي للي انتي عاوزاه"

- "اللي أنا عاوزاه، ولا اللي حضرتك عاوزاه؟ مين قال اني ممكن أعمل كدة؟ لا يمكن أبداً! هو أنا عشان موظفة استقبال أبقى رخيصة؟ لا يا مستر عصام" قامت من مكانها في عصبية، "ازاي جت لحضرتك الجراة؟ هو ده الشغل اللي بتقول عليه؟"

- "هتقعدي تمثلي عليا كتير؟ انتي فاكرة قبل ما أجيبك تشتغلي هنا مسألنش عليك؟"

- "و ايه المشكلة؟ أكيد لقيت كل خير" أجابت في ثقة

- "كل خير فعلاً. أنتي هتقوليلي؟" أجاب في سخرية

- "قصد حضرتك ايه بالظبط؟" ارتبكت رنا

- "أنا عارف كويس انك مشيتي بعد فضيحة كبيرة لواحدة صاحبتك في شركتك القديمة، هل دي صدفة؟"

- "مش فاهمة ايه علاقتي بفضايح زمايلي"

- "واحدة صاحبك اكتشفت خيانة جوزها ليها و جت تحكيك. مفيش يومين و فضيحتها بقت بجلاجل في الشركة و الناس كلها عرفت من مصدر مجهول. مين المصدر المجهول ده يا رنا؟"

- "مصدر مجهول. ده اللي قالوه. أنا هعرف منين؟"

- "مين غيرك كان يعرف الحكاية دي؟"

- "هي كانت بتحب ترغي، و أنا مش ذنبى انها فضحت نفسها. ايه التحقيق ده؟"

- "فضحت نفسها؟ ماشي يا رنا. و بعد كدة حصل ايه؟"

- "بعد كدة...طلع عليها كلام. أنا ماليش دعوة بيه برضه" أجابت في ترقب

- "تقدري تشرحيلي انتي تعرفي عامر منين؟ كله عارف ان هو اللي جابك المكتب"

- "عامر... قريب واحدة صاحبتى. حاول يساعدني بعد ما سبت الشغل التاني" ردت في ارتباك

- "طيب يا رنا. انتي شايقة ان كل القلق و الغموض اللي حوالين الماضي بتاعك ماهمش أي أساس من الصحة، و انك في الأول و الآخر مواطنة بسيطة بتجري ورا أكل عيشها. صح؟"

- "لأ الحمد لله أنا مرتاحة مادياً. أنا بشتغل عشان مباحش قعدة البيت"

- "طب لما عامر ده معرفة، و قريب واحدة صاحبتك. ليه لما قتلتك تجيبي قراره دماغك راحت بعيد و حسستيني اني بقولك حاجة عيب؟ مانتي ممكن تسألني صاحبتك"

- "أصلي... فهمت يعني..."

- "دماغك وحشة يا رنا. على العموم متشكر جداً لوقتك" قال عابساً و كأنه طفل فقد لعبته

- "حضرتك عاوز مني حاجة تانية؟"

- "لأ مش هطلب منك حاجة تاني، انتي مش بتساعديني. اتفضلي شوفي شغلك"

لم يكف كريم عن التفكير فيما عرف؛ كرة القدم هي منظومة كبيرة يديرها الكبار، و الطريقة الوحيدة للتأقلم هي الخضوع التام. لا بدليل عن الانضمام لتلك المنظومة للحفاظ على مستقبله. لن يكون بإمكانه تسديد الشرط الجزائي على أي حال، و لا مانع من أن يستمتع بلعب الكرة قليلاً و الاستفادة مادياً مثلما يفعل غيره من الوحوش. النقود التي سيأخذها لا تساوي واحداً على مليون مما يحصل عليه الكبار. شعر بأنه وقع في فخ لا يمكن الهروب منه. لم يعرف إن أراد الهروب منه بالفعل. من يريد أن يهرب من الشهرة و الثراء؟ بالتأكيد ليس شخصاً عاقلاً من يفكر في هذا. توجه إلى مكتب ألان ليبدأ معه الجولة الإرشادية للعمل كفتان ترفيهي. استقبله ألان في حفاوة و وعده بأنه سيحب العمل كثيراً و سيتأقلم بأسرع شكل ممكن.

- "قبل ما أعرفك على الناس اللي شغالة معنا، خليني أحكيك الأول الدنيا بتمشي ازاي. أنت هنا عبارة عن مؤدي. بتعرف ايه المطلوب منك تعمله في الماتش و تنفذه بكل سلاسة و هدوء. النقطة دي واضحة؟" سأل ألان في هدوء
- "وضحت الماتش اللي فات، مش محتاج تأكيد عليها" ابتسم كريم، و انتقلت ابتسامته لألان.

سارا معاً إلى أن وصلا إلى باب عليه لافتة تقول "الإدارة الإبداعية". ابتسم كريم في تعجب و تبعه إلى الداخل. وجد مجموعة من الأفراد جالسين خلف مكابهم المكدسة بالأوراق و الرسومات. حياهم ألان مبتسماً.

- "دول الممثلين الإبداعيين. كل لعب كورة فيكوا ليه ممثل إبداعي. الممثل الإبداعي بيفضل معاك طول الموسم. اعتبره باباك بالظبط. أي فكرة تيجي في بالك

لشخصيتك، أي شكوى عاوز تقدمها بتلجأ ليه على طول. ده صوتك قدام المسئولين، نائب عنك. هتقعد معاه بعد ما تخلص الجولة بتاعتنا. الممثلين الإبداعيين بيقعدوا سوا و يقدموا الأفكار لكبير الإبداعيين. كبير الإبداعيين ليه مكتب لوحده، بس هو مشغول دلوقتي للأسف. كبير الإبداعيين بيبقى معاه كل الأفكار و يناقشها مع رئيس الاتحاد. رئيس الاتحاد بيبقى ليه سلطة النتائج بشكل عام و المجرى الرئيسي للماتشات. اللي يقنعه أكثر بيسمع منه. تفاصيل الماتشات نفسها و النتائج هتحصل ازاى قليل ما يتدخل فيها. بيسببها لكبار الإبداعيين مع بعض. قبل كل ماتش، كبار الإبداعيين بيقعدوا سوا يحددوا الماتش هيمشي ازاى بناءً على النتيجة اللي المفروض يوصلوا ليها. بعد ما يتفقوا على كل التفاصيل بالظبط، كل كبير إبداعيين بيرجع للفريق بتاعه و يشرحله الماتش هيمشي ازاى. دور كل لعب طول الـ ٩٠ دقيقة بيبقى أوضح لما اللعب بيقعد تاني مع الممثل الإبداعي بتاعه عشان يحفظه. يعني العملية بتمشي من تحت لفوق، و بعددين من فوق لتحت تاني"

- "و احنا بقى كلعية.... قصدي كفتانين ترفيهين... مبنقعدش و السيناريو بيتطبخ؟"

- "هتقعدوا تعملوا ايه؟ كل أفكاركم تبقى وصلت من غير ما تيجوا بنفسكوا"

استمرت الجولة إلى أن وصلا إلى الغرفة الإعلامية حيث تقام المؤتمرات الصحفية قبل و بعد المباراة. لم يدخلوا هذا المكتب بل المجاور و المكتوب عليه "غرفة التحكم". عقد كريم حاجبيه في حيرة.

- "ده يا كاكأ قلب الحدث. كل الأكشن بيحصل هنا. الغلطة هنا مينفعش تصلح"

- "غرفة التحكم؟ التحكم في الماتش يعني؟"

- "مظبوط. فيه أودة زي دي في كل استاد، بيقعد فيها المايسترو. المايسترو ده هو اللي بيمشي الماتش حسب السيناريو اللي قدامه. لو المايسترو قال للعبة

أي حاجة هينفذوها. دوره كمان انه لما يحصل أي حاجة مش متوقعة يتصرف بالطريقة اللي هو شايفها مناسبة. لأن ساعتها مبيقاش فيه أي مرجع تاني إلا لو رئيس الاتحاد شخصياً اتدخل. بيحاول قدر الإمكان انه يحافظ على السيناريو"

- "ده اللي جابلي الطرد؟"

. - "ده اللي جابلك الطرد" ابتسم ألان، "المايسترو قدامه شاشات بكل الكاميرات. يبقى فعلاً شايف كل حطة في الملعب. السماعات و الميكروفونات اللي بيلبسها الحكام هي طريقة التواصل. المايسترو بيديهم أي تعليمات زيادة، والحكام بيوصلوها للملعب. مش شرط الحكم يقولها للشخص اللي مطلوب منه الحاجة، ممكن لأي حد في الفريق و هو بيأصيحها لزميله. لما يكون فيه حاجة مهمة أوي لازم تتقال في ساعتها، الحكم غالباً ما بيحسب فاول عبيط عشان يوقف اللعب. و حركة انه ياخذ اللعبة على جنب يرغي معاهم دي بتبقى مجرد طريقة انه يوصل تعليمات مفصلة. عمرك سألت نفسك الحكم بيوقف يرغي ليه ساعتين ثلاثة مع لعب عمل فاول؟"

- "امحاضرة إياها دي. مانا خدت واحدة زيتها"

- "و اللعب بيستمر على الأساس ده. طبعاً فيه حاجات كتير بتحصل صدفة، كور ممكن تضيع أو تيجي في العارضة، لعبة ممكن تتصاب بجذ و غيره. كل ده بيوزد من واقعية الماتش. المهم السيناريو ميتأثرش. النتيجة النهائية ثابتة. و كله عن طريق المايسترو"

- "قلبه قاسي أوي المايسترو"

- "مينفعش يكون غير كدة، و إلا هيجيله كل واحد و التاني يحاول يأثر عليه"

- "فين المايسترو طيب؟ سايب مكتبه ليه؟"

- "مش بيجي غير أيام الماتشات بس. مالوش دور غير كدة"

- "يا خسارة. كان نفسي أشكره على اللي عمله معايا"

- "كلنا هنا محترفين يا كاكا. محدش بيزعل من حد، مفيش حاجة شخصية. كلنا بنشتغل عشان نوصل للي احنا عاوزينه"
- "اللي احنا عاوزينه؟ مش احنا بقى. اللي هم عاوزينه"
- "منحبش الروح السلبية دي يا كاكا. متشرهاش بين زميلك"
- "مش قصدي. بالعكس، أنا متحمس جداً"
- "هايل أوي. التدريبات في وقتها عادي، و كل حاجة بتمشي زي مانت عارف. أنت قدام الناس كلعب كورة محتاج تبقى منضبط و سلوكياتك كويسة. اللعبة اللي عليها فضايح بتعمل مشاكل و بتشه من صورة اللعبة"
- "مش هو الموضوع ماشي كدة؟ بالفضايح؟"
- "كاكا. تاني هقولك بلاش تنشر الروح دي بين زميلك. عندك أي أسئلة تانية؟"
- "لأ. بقعد مع الممثل الإبداعي، بيوصل صوتي. بقعد معايا تاني يحكي لي هعمل ايه في الماتش. المايسترو بيمشي الماتش"
- "مظبوط يا كاكا. جه الوقت انك تقعد مع الممثل الإبداعي بتاعك. أنت كدة كدة موقوف ثلاث ماتشات. ده هيديك فرصة كبيرة تأقلم"
- "ثلاث ماتشات ليه؟"
- "قرار تأديبي من الاتحاد للقضاء على ظاهرة التمثيل في الملاعب"
- "هاهاهاها. للقضاء على التمثيل. حلوة... ملعوبة. على كدة كلنا نتوقف بقي. هاهاهاها"
- "كاكا..."
- "مش هنشر الروح دي لزميلي" قال كريم في خضوع
- "هايل أوي. شكراً يا كاكا. أهلاً بيك في منظومة كرة القدم"

- "شكله عارف يا عامر! شكله عارف اللي بيتا!" صاحت رنا في ذعر

- "أنتي مكلماني و معطلاي عن شغلي عشان كدة؟" أجابها عامر في برود
- "ده سألني على سارة! عارف ده معناه ايه؟!"
- "رنا، أنا ورايا شغل. نتكلم أما أرجع مصر" تفهم عامر سر ارتباكها؛ فتسرب أسرار كهذه للمنظومة يعد خطراً على سمعتها و مستقبلها المهني، بينما بالنسبة له مجرد فضيحة سيتم تجاوزها بكل هدوء
- لم يشغل باله و همّ ياكمال عمله. اتصل بأحد الأرقام و انتظر الرد.
- "ألو. مين معايا" أجابه صوت مسن
- "مستر ويليامز؟ مع حضرتك عامر الشربيني. كنت عاوز أقابل حضرتك بكرة عشان صفقة مهمة. موهبة شابة ممتازة جاهزة لأنها تيجي لحضرتك في يناير. مش محتاج غير اننا نتقابل سوا و نتفق على تفاصيل الانتقال"
- "طب و ليه أنت اللي بتكلمني مش حد من الاتحاد؟"
- "عشان الاتحاد نفسه لسة ميعرفش الصفقة"
- "أهني موهبة دي؟"
- "كريم رأفت، بس ممكن حضرتك تعرفه أكثر باسم كاكا"

- "أهلاً بيك. حضرتك الممثل الإبداعي بتاعي؟" سأل كريم و هو يدخل مكتب الأخصائي النفسي
- "أيوه يا كاكا. أنا جايسون آدامز، الممثل الإبداعي بتاعك. اتفضل ريح على السرير"
- "ليه جو العلاج النفسي ده؟ احنا بنعمل ايه في مكتب جون؟" سأل كريم في شك
- "مش علاج نفسي ولا حاجة. أنا بحب آخذ مكتب دكتور جون و أنا بعمل المقابلة الأولانية مع الشخص اللي بمثله. يقولوا نومة السرير دي بتساعد على تدفق الأفكار أكثر للدماغ"

- "حقيقي؟ استنى كدة أما أجرب" ففز كريم على الفراش و أخذ يتقلب، "أه تدفق فعلاً. فيه أفكار كثيرة تدفقت. بس معظمها ليها علاقة بالنوم. ده خطر على صحي؟"

- "دوري يا كاكا ايني أساعدك بس. ملهاش لازمة تبقى بايخ معايا. أنا و أنت واحد. احنا أصحاب. أنا في صفك"

- "أنا سمعت الكلام ده فين قبل كدة؟ ده صفي لم أوي. بعدين قالولي ان أنت بابا، مش صاحبي"

- "مش هنختلف كثير. يلا بينا نبدأ. عاوزك تكلمني عن طفولتك"

- "طفولتي؟ يااااه. أنت رجعت ورا أوي. مش فاكرك"

- "مش فاكرك حاجة من طفولتك؟ معقولة؟ مفيش أي ذكريات كدة أو كدة؟"

- "بقول لحضرتك مش فاكرك. ايه علاقة ده بالكورة؟"

- "أي حاجة في حياتك ممكن تفيدنا في وضع سيناريوهات ليك. التأثير بالنشأة ده ممكن يبقى من الحاجات اللي رسمت شخصيتك و خلقت الإنسان اللي أنت وصلته دلوقتي. بالتالي الناس لما تسمع عنك الحاجات دي هتحبك أكثر و تقرب منك أكثر"

- "الناس هنا اللي مبيجيش جون بتمرط بكرامته الأرض. مالهمش دعوة لا بنشأة و لا شخصية"

- "مين قالك كدة؟ ده علم يا كاكا. آمال ليه في أي برنامج منافسات أو تحدي رياضي بتلاقيهم مركزين أوي على الحكايات اللي ورا الأشخاص؟ عشان الناس تتعاطف معها و تشجعها. ممكن يبقى فيه واحد مش بيلعب كويس بس تتعاطف معاه عشان حارب مرض وحش. و العكس، ممكن يبقى واحد لعب أوي و حاسس انك مش بتحبه عشان عاش حياة حلوة و مواجهش أي مشاكل"

- "ايه الحقده؟ و أنا المفروض أجيب حواديت من الهوا عشان الناس تقرب مني و تحبني؟ مش فاكرك، أععمل ايه؟"

- "خلاص نبعد عن الطفولة. شكلها مكانتش ذكريات حلوة"
 - "ليه بتقول كدة؟ هو أنا عشان مش فاكر تبقى ذكريات وحشة؟"
 - "عقل الإنسان غالباً بيحجب الذكريات الميرة، خصوصاً الصدمات اللي في حياته"
 - "أنا الصدمة الوحيدة اللي خدتها كانت من على المرجيحة، و لسة فاكرها"
 - "ما علينا يا كاكا. نغير الموضوع. تعالى نتكلم على اهتماماتك"
 - "حضرتك و دكتور جون أصحاب أوي فعلاً؟"
 - "أه. كنا زمايل مع بعض في الكلية"
 - "أفهم من كدة ان حضرتك دكتور نفساني برضه؟"
 - "لأ مش دكتور نفساني. أنا ما استمريتش في الطب، بس خلفيتي عن علم النفس كبيرة. أنا بحب الكتابة من صغري و كنت حابب أشتغل في مسلسل تليفزيوني. فلما جاتلي فرصة زي دي اقتنصتها على طول"
 - "هو حضرتك اللي جي تحكي طفولتك؟ مش المفروض أنا اللي بتكلم؟"
 - "بدليك مثال يا كاكا عشان تفهم الحاجات دي تأثيرها ايه. مش حسيت اننا قربنا شوية لما عرفت عني كدة؟"
 - " لأ محسيتش حاجة خالص" ابتعد عنه كريم في ارتياب، "عاوز تعرف اهتماماتي؟ هممم. بحب الكورة، الأفلام، موسيقى الروك العالية أوي، و بحب كمان الزهات الليلية على الشاطئ و الكلاب. كدة حلوا؟" قال كريم في سخرية
 - "ياااه. بتحب الزهات الليلية على الشاطئ؟ دي حاجة رومانسية أوي"
 - "حضرتك بتتكلم بجد؟ حقيقي؟" تعجب كريم أن جايسون لم ينتبه للسخرية
- في كلامه
- "أه طبعاً. الرومانسية في لعب الكورة مهمة. أنت عارف أن كاكا، اللي هو ريكاردو يعني، برضه رومانسي و يقال انه بيحب مراته و عياله أوي، و كل البنات هتموت عليه بس هو مخلص ليها؟"

- "ليه النميمة؟ دي أسرار ناس" صفعه كريم على وجهه في مزاح، ثم انتبه من الصوت العالي أنه ربما ضربه بقوة فتحنج في حرج
- "بتحب الأفلام؟ ايه فيلمك المفضل؟" تجاهل جايسون المزحة باحترافية
- "مفيهاش كلام. تويلايت النسخة الأي ماكس"
- "رومانسي رومانسي يعني" دون جايسون الملحوظات باهتمام
- "حضرتك خبرة في الطب النفسي؟ متأكد؟" سأل كريم في دهشة
- "أه طبعاً. نكمل يا كريم. فيه حاجة في حياتك حاسس انها ممكن تخدم شخصيتك قدام الجمهور؟"
- "علاقاتي النسائية متعددة"
- "بس ده يخالف الطبيعة الرومانسية"
- "لا يا مستر جايسون، خالص. كلها كانت علاقات مؤثرة أوي في حياتي، وكل واحدة منهم سابت فيا علامة. كل مرة كنت بفتكر ان هي دي اللي بدور عليها" مسح كريم دموعاً وهمية
- "هايل يا كاك، هايل" نظر إليه كريم غير مصدق، "ايه كمان ممكن يخدمنا؟"
- "بجب دائماً أساعد أصحابي. محدش فيهم يقدر ياخذ قرار من غير ما يستشيرني. و طول عمري مشترك في أنشطة كبيرة و في جمعيات ميزانيتها عالية. كل دقيقة من وقتي تبقى بملارين، مينفعش أضيع ثانية. استنى كدة، فيه مليون جنبه راحوا دلوقتي. استنى" نظر كريم إلى ساعته ثانية، "فيه مليون تانيين راحوا. يا مستر جايسون أرجوك فلوس الناس بتروح"
- "يعني شخصية قيادية، هايل أوي. بالنسبة للموسيقى، مين مطربك المفضل؟"
- "الرجل اللي صوته مسرع ده. اللي الناس كلها بتحبه ده من غير سبب. بيغني لحبيته يقولها مع السلامة باين و مش هشوفك تاني، و بعدين بيخونها في الأغنية اللي وراها على طول... لما شاف واحدة وسط الناس و على طول قالها انتي حلوة أوي"

- "أه. قصدك جايمس بلانت؟"
- "أيوة. هو ده. أحبه أوي"
- "أمال فين موسيقى الروك؟"
- "أيوة ما هو... أه، أنا بحب موسيقى الروك عشان الطاقة و الصوت العالي اللي بيديني دفعة. لكن لما أحس بالضعف و اني عاوز أكون لوحدي بسمع جايمس جرانت"
- "جايمس بلانت قصدك"
- "أيوة يعني، جيمي حبيبي"
- "يعني أنت ليك شخصيتين، شخصية رومانسية مرهفة الحس، لكن لما الموقف بيتطلب منك قوة بتتحول لكنتلة من الطاقة مش بتقف إلا لما تحقق هدفها. كل ده ممتاز أوي"
- "لو ده اللي حضرتك فهمته من كلامي، يبقى أه"
- "مين مثلك الأعلى؟"
- "و دي فيها كلام؟ ستيف جوبز طبعاً"
- "ايه السبب؟"
- "ولا حاجة. أصله من ساعة ما مات بقت موضة ان الناس تتمسح فيه، فحسيت انه لازم يكون مثلي الأعلى"
- "بس ده مش سبب يا كاكا"
- "ستيف جوبز لمس حياتي من غير ما يحس. مش عارف من غيره كان ممكن يحصلي ايه. حياتي مكانش هيبقى ليها معنى. لولاه مكانتش شركة آبل خدت كل الفلوس دي من الناس عشان تديهم أجهزة زيتها زي غيرها بس عليها رسمه تفاحة متاكلة"
- "يعني عاوز تلمس حياة الناس و تسبب علامة يفتكروك بيها. قولي يا كاكا. فيه في دماغك شخصية معينة عاوز تقدمها؟"

- "أنا نفسي في شخصية جديدة عليا، مقدمتهاش قبل كدة. عاوز أفاجي جهوري"
- "قدمتها قبل كدة فين؟ مش ده أول موسم ليك؟"
- "أه صح. قصدي شخصية مختلفة عن أول ماتش ليا. عاوز أختلف، أبقى مثلاً قاتل محترف"
- "قاتل محترف؟ أنت بتقول ايه يا كاكأ؟"
- "أبقى قاتل قدام الجون، أهر الناس بمهاراتي في اللعبة"
- "أه. عاوز تبقى لعب من اللي بياخدوا الكورة ميهزروش، زي رونالدو. ده متناسب مع الشخصية الثانية المفعمة بالطاقة في الأزمات"
- "دي حقيقة. أنا كدة"
- "هايل يا كاكأ، هايل" استمر بالتدوين. "فيه حاجة تانية عاوز تضيفها؟"
- "بصراحة مفيش حاجة تانية في بالي، بس أول ما أحس ان عندي خواطر هقولها لحضرتك على طول"
- "ممتاز يا كاكأ. أنا سعيد أوي بالقعدة دي"
- "فعلاً؟" سأل في تعجب، "كدة أخذت اللي حضرتك عاوزه؟ راضي بالكلام ده؟"
- "هي دي شخصيتك يا كاكأ. أنت بتألف عليا مثلاً؟"
- "لأ طبعاً مستحيل. بقول لحضرتك دقيقتي بملايين. هقعد أضيع وقت في كلام فارغ؟"
- "طيب يا كاكأ، تحب تسمع رأيي؟ أنت طبعاً مرهف الحس و بتحب تبقى جميل مع الناس..."
- "أنا كدة فعلاً"
- "بس الفكرة ان ده متعارض مع الشخصية اللي ظهرت بيها أول ماتش"
- "أول ماتش؟ شخصية ايه بالظبط؟"

- "العنف في الأداء، و الخناق مع الحكم. غير الطرد اللي أخذته. صعب أوي نبيع للناس فكرة انك رومانسي مرهف الحس"
- "لدرجة دي؟ أنا كنت عامل ازاي؟"
- "فيه ناس كدة مهما تلعب و تعرق يفضل شكلها شيك زي ديفيد بيكهام، كاكا، توتي. إنما بصراحة يا كاكا، أنت اللي بان عليك في وسط الماتش كان حاجة مختلفة شوية"
- "بيان عليا ايه؟" سأل في فضول ممزوج بالحذر خوفاً من سماع النقد
- "بيان كدة انك عنيف و لسانك طويل. بيان انك ممكن تبقى خبيث شوية وبتاخذ الناس في الكلام. ممكن برضه بيان انك شره في الأكل. سلوكيات كلها عنيفة و متطرفة، مش الرومانسية الشديدة اللي أنت بتقولها"
- "بس ده لا يعبر عن شخصيني إطلاقاً" صاح كريم في استنكار مصطنع، "أنت حسيت كل ده من حاجة و سبعين دقيقة لعبتها؟"
- "ده من واقع خبرتي. كلامك أنا مقدره و كل اهتماماتك أنا حاسسها. بس أنا شايف اننا نمشي الموضوع على طريقي. تبقى شخصية عنيفة ميتسيش حقها، فيك غريزة السفاح؛ لما تمسك الكورة تبقى خطر على الخصم و عليك جدل كثير مع الحكام. نوعية الولد الشقي اللي رغم شقاوته بيخلص كل الكلام و الناس ممكن تحبه غصب عنها. الجمهور ممكن يحب ده فيك خصوصاً ان سنك صغير. ايه رأيك؟"
- "اللي تشوفه يا مستر جايسون. مع اني كنت أحب التمثيل المشرف لبلدي، متنساش اني بتمثل مصر"
- "معلش يا كاكا. عشان خاطري أنا. ده برضه هيبقى تمثيل مشرف"
- "خلاص يا مستر جايسون. مفيش مشكلة" قام كريم في طريقه لمغادرة الغرفة
- "كاكا. استنى" ناداه جايسون قبل رحيله

- "خير يا مستر جايسون؟ فيه أي معلومات حيوية تانية محتاجها؟ ممكن أتكلم عن ممثلي المفضل، الأماكن المفضلة لخروجاتي، وجيتي المفضلة... أه و كمان ممكن أدليك تغطية حصرية لآخر عيد ميلاد عملته"
- "أنت متخيل يا كاكا اني مصدق أي حاجة من الكلام الأهل اللي بقالك ساعة بتقوله ده؟" نظر جايسون إليه في خبث
- "ايه ده؟ كنت بتضحك عليا" هتف كريم في دهشة
- "أبوة طبعاً. ايه الشخصية المتخلفة الضايعة دي، و ايه اللي جابها في الكورة أصلاً؟ دانت كذاب أوي" راح يضحك بشدة
- "هاهاها. تصور عجبتي. أنا حبيتك" قالها كريم و ضحك بأعلى صوت،
"وأنا اللي فاكرك ساذج و مبتفهمش"
- "معتبر دي مجاملة"
- "أه طبعاً. مانت عارفي مرهف الحس" قال كريم حالماً
- "شكلنا هننسط أوي في الشغل سوا يا كاكا" ابتسم جايسون

لاعب السبعين دقيقة

استمر كريم بالتدريبات مع زملائه على الرغم من عدم مشاركته في المباريات. لم يفقد روحه المرحية خاصةً أنه بدأ يتأقلم على الأجواء و تعود على زملائه بالفريق إلى حد كبير. لم ينس نصيحة عامر بأن يتقي شر من حوله و ألا يثق بأحد. لطالما أيضاً حذرته الكثيرون من الارتباط الشديد بالغرباء في البلاد الأجنبية، لأنه مجتمع كل شخص فيه يحرص على مصلحته فقط، و ليس من الحكمة أن يتخيل سوى ذلك. استمرت حياته بشكل روتيني؛ ما بين تدريبات مع الزملاء، حصصه بالجامعة، الخروج ليلاً في حالة عدم وجود تدريب في اليوم التالي، و المزارات السياحية في أيام الإجازة. تعرف على لندن بشكل أفضل و سرعان ما تمكن من الشوارع و الطرق و أصبح خبيراً لا يستهان به. لم يعد يستخدم الخريطة بنفس المعدل السابق لأنه اعتمد على نفسه أكثر. بدأ يختار محطات عشوائية لمترو الأنفاق ليترى بها و يتجول بشوارعها في رحلات استكشافية. استخدم سيارته مرتين أو ثلاثة لكنه لم يستمتع كثيراً بالقيادة نظراً للقواعد الصارمة التي لم يستطع مواكبتها. مع اقتراب مشاركته في المباراة القادمة أوشكت إجازته القصيرة على الانتهاء، وبات عليه الاستعداد جيداً.

- "عين الصقر؟ هو ده اسمها؟" تسأل رئيس الاتحاد الأوروبي في استنكار
- "أيوه عين الصقر. متضايق ليه كدة؟" سأله رئيس الفيفا في دهشة. حرص
على أن يجتمعاً معاً في مكتبه للتحدث بشأن التكنولوجيا الجديدة التي وعد مصدر

من الاتحاد باستخدامها في كأس العالم للأندية، و التي ستفيد في تقليل الأخطاء في المباريات.

- "مش حاسس الاسم مبتذل شوية؟ تحسها عملية مكافحة إرهاب"
- "هو فيه أحلى من كدة؟ الشعوب بتموت في مكافحة الإرهاب. آمال أنت فاكّر المسلسلات اللي زي ٢٤ بتنجح ليه؟ عشان الناس تحب تحس بالأمان. الكلام الكبير ده بيحمسهم"

- "ثانية واحدة. الاسم ده مش غريب عليا. مش ده بطل كارتون بتاع مارفل تقريباً؟"

- "كارتون؟ معرفش، أنا مش متابع. ولادي اللي بيشوفوا الحاجات دي. واضح انك مركز"

- "هنسمي تكنولوجيا تمناها ٥٠ مليون يورو على اسم كارتون؟ هل ده طبعي؟"

- "ليه بتعاند في أي حاجة و خلاص؟ عاوزينه يبقى اسم معبر و في نفس الوقت سهل. عين الصقر، عشان الصقر معروف بجدة البصر" وضح له رئيس القيفا في ذكاء يُحسد عليه

- "حقيقي؟ مانا فاهم ليه اسمها عين الصقر. و الثانية اسمها ايه؟ حكم الجون؟"

- "أبوة عشان كأنها حكم يعرف الكورة جون...."

- "و غلاوتك عندي فاهم. أنا بس معترض على الفكرة. المبلغ كبير أوي على فايدته"

- "أنا متفق معاك. أنا رفدت الشخص اللي اتطوع و قال اننا هنستخدم

التكنولوجيا دي. هم فاكريتها تنس ولا ايه؟"

- "بس كلامك قدام الناس بيأيد التفكير في استخدامها كاس العالم الجاي

كمان"

- "ماحنا ممكن نقول اننا بنستعملها و منستعملهاش" قال في خبث

- "عين الصقر عبارة عن رسم يباين يشرح مسار الكورة و حركتها مبني على كاميرات منتشرة في كل حطة في الملعب. تفتكر حد هيصدق ان التكنولوجيا بتحصل فعلاً من غير ما يبان قدامه دليل على الشاشات؟"

- "هي دي الفكرة فعلاً؟ ايه لازمتهأ أصلاً؟ ما الأوقع اننا نشوف الإعادة التليفزيونية العادية من غير وجع دماغ"

- "أنت مش فاهم التكنولوجيا أصلاً ماشية ازاي؟" سأله في انفعال

- "و أنا مالي، هو أنا اللي قلت عليها؟ أنا عارف جاتلنا منين؟" هز كتفيه في

براءة

- "طب و فاهم حكم الجون دي عبارة عن ايه؟"

- "قول كدة. هتلاقيني عارف" تظاهر بالفهم

- "حكم الجون دي مبنية على مبدأ الاستقراء الكهرومغناطيسي. بيبقى فيه

أقطاب...."

- "بس متكملش. اذا كان مفهمتش اللي كلامها سهل، هفهم اللي فيها

فيزيا؟"

- "طب سؤال. لما أنت مش فاهم التكنولوجيا عبارة عن ايه، مين اللي هيطلع

يشرحها للجمهور؟ أنا برضه؟" صاح في انفعال

- "أنا فاهم حاجة عشان أشرحها؟ متعملش فيها زعلان كدة. ايه الجديد

يعني؟"

- "خليني أفهم معاك واحدة واحدة. يعني عاوزني أقعد أدرس تكنولوجيا مش

أنا اللي مقترحها و مش مقتنع بفايدتها لسيانويوهاتنا؛ تكنولوجيا سعادتك شخصياً

مش فاهمها، و تقريباً أنا كمان مش فاهمها كويس، و أطلع بعد كدة للناس

أحسسهم اني فاهم و أقولهم أي كلام عشان يقتنعوا ان هم فاهمين، و أرد على

أسئلتهم الذكية بشكل غير منطقي بالمرة، و أجي أقولهم ان النظام ده برضه

هيكون خاضع لسلطة الحكم و انه ممكن الحاجة تبقى باينة قدامه عيني عينك و

برضه ميعترفش بيه، و عاوزني أعمل كدة كمان و الكاميرات بتصورني؟ يعني مثلاً لو كلام جرايد أقول ماشي عشان ممكن بعديها أنفي ابي قلته و أدعي انها اشاعات، لو مؤتمر صحفي مش متصور نقول معلش أهو ممكن أحسس الناس ان ذاكرتهم ضعيفة. إنما حوار متصور؟ تيجي الناس بعديها تشغلي الفيديو و أنا واقف زي المتخلفين مش عارف أرد عليهم؟ عاوزني أعمل كدة؟"

- "بمحترم فيك تفانيك في العمل" أجابه موافقاً دون أي شعور بالذنب

- "طيب فيه أي سيناريوهات محتملة ازاى هنستعمل التكنولوجيا دي في كاس العالم للأندية؟"

- "غالباً مفيش كورة هتحتاج اننا نبص عليها بالتكنولوجيا. هنخلي الكاس يعدي من غير أي مشاكل"

- "ايه؟ هندفع ٥٠ مليون يورو عشان نمعملش حاجة بيه؟ داحنا لازم كل ماتش يبقى عندنا على الأقل مشكلتين ثلاثة عشان نحس انها تستاهل. مش ممكن أبداً"

- "هي الكور اللي عليها جدل دي أصلاً بتتظبط بسهولة؟ مانت عارف انها بتيجي بالخط. معلش اسمع الكلام المرة دي، و عشان خاطرك يا سيدي...." توقف للحظة ليثير تشويقه، "هفكر في موضوع ميسي و الكرة الذهبية ده"

- "بجد؟" صاح في لهفة، "لأ لو كدة خلاص، دانا هطلع أقولهم شعر في التكنولوجيا دي، دي عين الصقر مش أي عين"

- "عاوزين الناس تحس انها واخدة حقها عشان تستمتع. احنا بنعمل كل ده عشان مين؟" قال في تأثر

- "عشان الناس تنبسط و تستمتع. احنا بنتعب أوي عشائهم" أيده في تأثر مماثل، لم يستبعد أن يبادلا عناقاً أخوياً من تدفق المشاعر، "تعالى نطلع نقابل بقية الناس عشان نتكلم على سيناريو كاس العالم للأندية"

- "فكرني كدة صحيح مين صاحب فكرة البطولة المتخلقة اللي مفيهاش غير ست فرق، و بنتلكك عشان نخط أي فرقة سابعة و السلام" حك رئيس الفيفا رأسه

- "هاهاها. دمك خفيف أوي. ماهي فكرتك" أجابه رئيس الاتحاد الأوروبي
- "فكرتي أنا؟ أيوة صح. معلش بقى السن أنت عارف. المهم عاوزك تاخذ بالك من حاجة مهمة أوي. تصفيات كاس العالم هتبدأ قريب، و مش عاوز نضيع وقتنا و مجهودنا في كلام فاضي. لا ميسي ولا بيبسي. كاس العالم للأندية ده مالوش لازمة، مش بطولة أصلاً. مجرد سبوبة. عاوزين ناخذ بالننا من تنظيم البطولة الكبيرة بقى، البطولة الأكثر أهمية. كاس العالم الجاي ده لازم يبقى محصلش. ومتقلقش مش هينخرج عن أوروبا. أنا بفكر أسبانيا تكسبه"

- "أسبانيا لأ. عاملة مشاكل مع الناس على طول، و معظمهم معترضين على سيطرهم على الكورة. فحابب أخفف الضغط"

- "بس ازاى الجيل الفذ ده مياخدش كاس عالم؟"

- "الكلام ده مش بتاعك" قال الرئيس الأوروبي في ترقب، "أنت اتكلمت مع رئيس الاتحاد الأسباني، مش كدة؟" سأل في ضيق

- "قعدنا دردشنا مع بعضينا كدة. ايه مشكلتك مع أسبانيا مش فاهم. بتدقق في حاجات غريبة" رفع حاجبيه في دهشة

توالت خسائر كريستال بالاس و بدأ معظم اللاعبين بالفريق يلقون باللوم على كريم لأجل ذلك العقاب. بعد أن عاش أفضل ثلاثة أسابيع له تقريباً في لندن لأنه لم يلتفت للأجواء السلبية، حان الوقت كي يعود للأحداث الدرامية. اقترب موعد السفر إلى مدينة برايتون آند هوف لأجل المباراة القادة، و بدأ يستعد نفسياً لما سيواجه من مصاعب. اجتمع اللاعبون للاستماع إلى السيناريو من كبير الإبداعيين الذي وقف أمام السبورة و في يده عصا كما لو أنه مدرس ثانوي.

- "يا جماعة. كاكّا هو السبب في المشكلة اللي احنا فيها" قال كبير الإبداعيين، "بس ده مش معناه اننا نلومه. بالعكس، المفروض نطيطب عليه. مش كفاية الجرايد و اللي كتبه عنه: لاعب السبعين دقيقة يعود أخيراً للملاعب، فكم دقيقة سيلعب المباراة القادمة؟ لقب وحش أوي الصراحة، بس عجب رئيس الاتحاد جداً و حب يثبته عليه. خن كدة يا كاكّا هتلعب كام دقيقة الماتش الجاي؟" قال كبير الإبداعيين في سعادة غير مبررة

- "تسعين دقيقة عادي زي بقية مخلوقات ربنا؟" سأل كريم في حذر

- "لأ غلط. حاجة و سبعين دقيقة برضه. مش مصدق ان اللقب ده هيلزق فيك الفترة الجاية. هاهاهاهّا. تخيل لما الصحافة هي اللي تحكم عليك و تحطلك السيناريو. حاجة كوميدية أوي. أنت مش فاهم رئيس الاتحاد منبهر ازاى بالفكرة دي. كل أما تزل هيقى الجمهور متشوق و هيسأل نفسه، هو كاكّا هيلعب أكثر من حاجة و سبعين دقيقة ولا لأ؟ هل سيتغلب لاعب السبعين دقيقة على التاريخ والأقدار و يوصل لثمانين دقيقة مثلاً ولا حاجة؟ هاهاهّا"

- "حقيقي؟ هي دي فكرتكم عن السيناريو الكويس؟ ده تمثيل عيني عينك. كل ماتش حاجة و سبعين دقيقة؟ صدفة دي؟"

- "يعني لما مانشستر يونايتد بيبقى خسران تمانين دقيقة و الناس تستناه يكسب في آخر عشر دقائق حد بيقول تمثيل؟ كله بيقول دي صدفة"

- "بس بتبقى على الأقل صدفة مبررة. ممكن نقول ان مانشستر أطول نفس في الدوري، و ان الفرق بتبقى عاملة مجهود اول تمانين دقيقة فبتقع في الآخر، إنما أنا ليه مبعديش حاجة و سبعين دقيقة؟ راكبي عفريت؟" سأل في انفعال

- "اهدا يا كاكّا. مش عاوزين الروح دي"

- "ايه مشكلة النادي ده مع الأرواح؟ طب ايه الروح اللي تناسب السبعين دقيقة بتوعى؟" انفعل كريم مرة أخرى

- "هي دي بالظبط يا كاكا. أنت كدة بتتقمص الشخصية بتاعتك بالظبط"
قال جايسون، "انا اتفقت معاك قبل كدة يا كاكا على العنف، نسيت ولا ايه؟
سلوكك بتاع الولد الشقي هيسمحلك تحيب أهداف بس هيجيبلك طرد الماتش
الجاي في الدقيقة ثمانية و سبعين"

- "هيجي ازاى الطرد المرة دي؟" سأل كريم في حذر
- "بسيطة خالص يا جماعة. احنا المرة دي اخترنا طرد ميجيبش لككا إيقاف
إلا ماتش واحد. فبرضه هيبقى طرد مش مباشر. و بكدة هيفوت ماتش الكاس
بتاع نص الأسبوع و على الأسبوع اللي وراه يلحق ماتش الدوري عادي" قال
كبير الإبداعيين

- "طب دي تيجي يا جماعة؟ تقعدوا تختارولي طرد من غير ما تاخدوا رأيي؟
محدث ليه سألني عن طردي المفضل؟" سأل كريم باستخفاف
- "هيعجبك أوي الطرد ده يا كاكا. الإنذار الأولاني هيجي لما تقلع الفانلة
من السعادة بعد الجون اللي هتسكت بيه النقاد"
- "هيعجبني؟ أقلع الفانلة بأمانة ايه؟ من عضلاي اللي هتفرتك؟ ما علينا أنا
روحي حلوة. الإنذار الثاني؟"

- "الإنذار الثاني هتعرض على قرار الحكم"
- "لأ. ده عملته قبل كدة. مش عاوز أكرر نفسي قدام جمهوري. خليك تقيل
بقي، نشوف حاجة ثانية. ممكن فاول تكتيكي. مانا شخصيتي خبيثة بقي. الفاول
التكتيكي مش بيعتبروا الغرض منه الأذى، و بالتالي هاخذ إنذار تاني و أتطرد معزز
مكرم، و أخرج من الملعب أصقف للجمهور. ايه رأيكوا في السيناريو التاريخي
ده؟"

- "تصدق عجبني" صفق له كبير الإبداعيين في استحسان، "أنت ليك مستقبل
يا كاكا في الإبداع بعد ما تخلص لعب. أيوة كدة، اعتنق الشخصية و حط
سيناريوهات منطقية بناءً عليها. خليك مبدع"

- "حاضر. أوعذك هيبقى شغلي الشاغل إني أنواع في حالات الطرد اللي بتجيلي. هعمل كتاب "تسعة و تسعين طريقة للحصول على طرد في مباراة و كلها من واقع الحياة". ده هيبقى حنة كتاب. هيكسر الدنيا و النعمة" شرد كريم بخياله - "و أنا مش هتزل خالص؟" سأل خالد

- "لأ يا خالد. أنت هتقعد احتياطي الماتش ده، و المثل بتاعك هيحفظك تصرىحاتك بعد الماتش. مستر فليتش هيبجي بعد الماتش يقول انك سعيد في النادي و علاقته بيك أكثر من ممتازة. هيعمل برضه دعم لكاكا و يقول انه لعب كويس، و انه لا يتحمل وحده نتيجة الخسارة. حد عنده أي سؤال معين عن الماتش؟ أنا كدة قلتلكم النقط الأساسية. هعدي ورقة لكل واحد مكتوب عليها دوره بالظبط في التسعين دقيقة. المثل الإبداعي هيناقشها معاكم. مفيش أسئلة؟ هایل. لو مش فاهمين أي حاجة الممثلين بتوعكوا هيشرحوها لكم. هنسافر بعد بكرة عشان نستعد للماتش هناك و نتدرب. كله يحضر هدومه اللي محتاجها بس، محدش ياخذ حاجات كتير ملهاش لازمة. كل طرد و أنت سعيد يا كاكا"

أعلن رئيس الفيفا عن بدء المراحل النهائية لتصفيات كأس العالم في مارس المقبل، و وعد الجمهور بالكثير من المفاجآت و القرارات الجديدة التي ستجعله من أفضل الكنوس في التاريخ. أخبر الحاضرين بعدها أن رئيس الاتحاد الأوروبي سيتولى توضيح بعض النقاط و الإجابة على الأسئلة، بينما سيعود هو لاستكمال أعماله. عندما يقول أعماله فهو يقصد دورة الإكس بوكس مع زملائه. قرر رئيس الاتحاد الأوروبي إقناع الناس بعدم جدوى التكنولوجيا التي كلفه رئيس الفيفا بشرحها.

- "رئيس الفيفا اقترح تكنولوجيا جديدة عشان يضمن ان مفيش...أي أخطاء غير مقصودة تضايق الناس و تعكن عليهم في البطولة. بس قبل ما أشرحلكم التكنولوجيا دي، عاوز أقول رأيي بصراحة. التكنولوجيا دي هتكلفنا ٥٠ مليون يورو ففتح كلام من غير أي حاجة. ليه محتاجين تكنولوجيا مكلفة بالشكل ده ومش

هنتكملها غير خمس أو ست مرات في السنة بس؟ خطوا في بالكم برضه ان الأخطاء جزء من اللعبة. ليه منسيش الموضوع يمشي زي ما يمشي و نسيب الماتشات للأقدار؟ ليه ندفع ملايين في حاجة هتبوظ علينا المتعة؟ معقولة لعبة مفيهاش عفوية؟ دي حتى ميقاش ليها طعم؟"

- "يمكن عشان لعبة عليها مليارات و مش المفروض يبقى فيها معدل خطأ أصلاً؟ ما فيه دولة زي قطر عاوزة تطبقها في ملاعبها اقليمية. اشعنى هم يعملوا كدة؟" سأل أحد الصحفيين

- "دي ناس معاها فلوس احنا مالنا بقى، هاهاها"

- "و حضرتك معاكش مليارات بتتحكم فيها؟"

- "أنا؟ مجاوبش أسئلة شخصية بصراحة. أنا حاسس بالإهانة" قال في

امتعاض

- "قصدي اتحاد الكورة معاهوش؟ لو كدة ممكن نخط صندوق دلوقتي و نجمع

تبرعات، مفيش أي مشكلة"

- "لفتة ظريفة منك، طيب نبدأ بيك"

تحرك رئيس الاتحاد الأوروبي في عناد اندهش له الجميع. أخذ بكل هدوء أحد الأوعية الزجاجية و سار في خطوات ثابتة نازلاً على درجات المنصة و وقف أمام الصحفي.

- "مش هتقدم تبرع لصالح التكنولوجيا؟" سأل في حزم

- "تبرع ايه بالظبط؟ حضرتك بتتكلم بمجد؟"

- "أه طبعاً بتكلم بمجد، مش أنت كنت بتتكلم بمجد؟"

- "أنا؟ أه يعني كان اقتراح" أجاب في ارتباك

- "طيب خلاص. مادام أنت قلت كلمة، خليك قد كلمتك مترجعش فيها.

قدم حاجة لاتحاد الكورة اللي يقدملك كورة جميلة و بيمتلك و بيسهر على راحتك. حظ ايدك في جيبك و اغدق علينا من ثرائك الفاحش. ولا أنت رجعت

في كلامك؟ أنا عارف الظروف صعبة أوي اليومين دول، و أنت أكيد يا حرام طول النهار و الليل عمال تشتغل عشان تجيب أكل عيشك. الصحافة مهنة مش سهلة برضه، أنا عارف. خصوصاً لما طولة اللسان تبقى عامل أساسي فيها مش كدة؟ ادفع يلا حاجة عشان نطبقلك التكنولوجيا" نظر إليه في صرامة.

ارتبك الصحافي و ابتلع ريقه. وضع يده في جيبه ثم ألقى بورقة مالية في الوعاء.

"عشرة يورو؟ يااااه. للدرجة دي الموضوع بالنسبة لك رخيص؟" قال في استنكار مفتعل، "و أنا اللي قلت هترميلنا شيك بمليون يورو ولا حاجة. بس أنا مقدر طبعاً، أصل الكلام سهل أوي، إنما الواحد لما يجي يدفع الموضوع بيوجع شوية. عموماً، أنا هسب الوعاء ده على جنب. كل واحد يمليه للي جنبه و يحط فيه اللي يقدر عليه. أنا عجباي الفكرة دي أوي يا جماعة. بعض كدة هنطبقلكم كل التكنولوجيا اللي أنتوا عاوزينها مقابل انكم تشتركوا معنا. تعالوا نرفع شعار، ندفع معاً و نحقق معاً. ايه رأيكوا؟ جه الوقت اللي كلنا نساهم فيه مع بعض، أنا عن نفسي هدف من جيب مليون يورو عشان أساهم في تحسين الأحوال. الدور والباقي عليكم أنتوا" أنهى كلامه و صعد مرة أخرى آخذاً الوعاء معه. وضعه بعيداً دون أن يستعمله كما ادعى. اعتدل ثانية خلف الميكروفون، "طيب يا جماعة. أنا بس حبيت أوريكم مثال ان الكلام أسهل بكثير من الأفعال. متخافوش مش هأخذ منكم فلوس. نتكلم عن التكنولوجيا اللي قدامنا. عين الصقر، و حكم الجون. أنا شايف اننا نوقف المزيد من الحكام على خط المرمى و خلاص. هيبقى ليهم رؤية أوضح و من غير أي تكاليف خرافية. احنا برضه هنعمل اللي علينا ونجربها في كأس العالم للأندية، لو حسينا انها كويسة و مفيدة هنجربها تاني في كأس العالم. أنا مش بتكلم باسم الفيفا ولا حاجة، أنا قصدي هنجربها مع بعض كجمهور عاشق و محب للكرة. أنا مجرد صديق لرئيس الفيفا و بساعده بأكبر قدر ممكن. أدي أهو شيك بمليون جنيه عشان أ دعم بيه القضية. دي كل حاجة

عن التكنولوجيا بتاعتنا. أتمنى اني أكون جاوبت كل أسئلتكم. تصبحوا على خير"
تركهم في ذهولهم و خرج من المكان.

"دانا لو المسيح الدجال مش هتبتهم كدة. هاهها" قال لنفسه و هو في طريقه
للسيارة.

بدأت محاضرة مادة "التعويضات و الفوائد" في قاعة المحاضرات لطلاب إدارة
الأعمال بالجامعة. تحدث دكتور كينزورث لطلابه عن أهمية هذا النظام لأي منظمة
تسعى للحفاظ على موظفيها.

"التعويضات و الفوائد يا أولاد هي الأساس عشان الموظفين يبقوا مرتاحين في
شغلهم. بتأثر بشكل كبير على الأداء بتاعهم، و على نفسياتهم. من غيرها هتواجه
المنظمات صعوبة نوعاً ما في تحقيق أهدافها الاستراتيجية. مش كدة و بس، انما من
غيرها كمان هبقى صعب عليها انما تحافظ على الموظفين بتوعها في مناصبهم،
وسهل أوي على أي مكان تاني انه يجذبهم. و خنوا بقوا ممكن يجذبهم ازاى؟ بنظام
تعويضات و فوائد أحسن من اللي هم واخدينه في المنظمة بتاعتهم دلوقتي. شفتوا
بقي" ابتسم في ذكاء كأنما كشف لهم خبايا منظمة المافيا، أخذ نفس عميقاً ثم
استطرد "مين فيكوا يقدر يدبني فكرة عن أنواع التعويضات و الفوائد؟ بلاش دي
عشان صعبة شوية. طب ادوني بشكل عشوائي أي حاجة انتوا شايفينها تدرج
تحت بند التعويضات و الفوائد في أي شركة أو منظمة" نظر إلى الطلاب في انتظار
الرد. انتبه لأحد الطلاب و قد غلبه النعاس. أشار لمن بجواره ليوقفه. انتفض الفتى
من مكانه و أزاح شعره من على عينيه، و نظر إلى دكتور كينزورث في خجل.

- "هو المحاضرة بتاعتي ملة كدة؟" سأل في تأثر واضح

- "محاضرة حضرتك؟ لأ جميلة طبعاً يا دكتور، الظاهر من كتر حلاوتها أنا

حطيت راسي عشان أتمزج" رد الفتى في ارتباك

- "أنت اسمك ايه؟" سأله في ضيق

- "اسمي مارتن. آسف جداً يا دكتور، أنا كنت سامع على فكرة" احمر وجهه خجلاً

- "طب جابوب على سؤالي"

- "سؤال المحاضرة. أيوة صح، حضرتك عاوزني أرد على سؤال المحاضرة"

أخذ يتلفت في ارتباك منتظراً مساعدة ممن حوله، لكن للأسف لم يفكر أحد في مساعدته. تمتع الكل بثقافة الاعتماد على النفس و تحمل العواقب. باستثناء شخص واحد حاول أن يخبره بالسؤال، لم يكن هذا الشخص سوى المصري الشهم ابن البلد كريم رافت.

- "أنت بتعمل ايه؟ طب اللي جنبه يجاوب" صاح دكتور كيتوروث في ضيق عندما انتبه لمحاولة الفتى الاستعانة بكريم

- "اسمي كاكا يا دكتور"

- "كاكا؟ اسم ايه ده؟ أنت فاكر نفسك لعب كورة"

- "ماهو أنا لعب كورة فعلاً. أنا كاكا اللي في دماغ حضرتك" قال كريم مبتسماً

- "أنت كاكا بتاع البرازيل؟ أنا برضه بقول لونك ميديش على أوروبا. أنت جي المحاضرة تمزق؟" سأل دكتور كيتوروث في ضيق

- "لا يا دكتور أنا فعلاً لعب كورة، و اسمي كاكا. بس بلعب في كريستال بالاس"

- "استنى.... أنا بشبه عليك فعلاً... أنت لاعب السبعين دقيقة! أيوة افتكرتك.

أنت اللي لعب ماتش واحد و بعدين اتطرد"

- "طب نتكلم في المحاضرة يا دكتور؟ مش جاين نضيع وقت" أهمل كريم الحادثة تجنباً للحرج

- "ماشي. قولّي أمثلة للتعويضات و الفوائد"

- "الفلووروس" لمعت عيناه و راح يحك إصبعيه ببعضهما موحياً بالأوراق النقدية

- "يا سلام؟ هي إجابة صح فعلاً بس دي أبسط حاجة تيجي في دماغ الواحد. عاوزك تفكر بشكل أحسن. ادي لزمايلك من خبراتك كلعيب كورة. عندك تجربة تتكلم عليها" رفع يده لأعلى مشجعاً كريم على توسيع آفاقه، ارتبك كريم و نظر لأعلى باحثاً عم يقصده

- "أنا أكيد طبعاً عندي تجربة يا دكتور. بس مش متأكد أوي انها هتكون مفيدة لزمايلي" تلفت حوله في شك

- "أي تجربة هتكون مفيدة يا كاكأ. أنت كلعيب كورة، ازاي بيحافظوا على وجودك كموظف شغال عندهم؟"

- "ازاي بيحافظوا على وجودنا؟ سؤال وجيه" تردد كريم

- "أبوة. عمالين نتكلم على التعويضات و الفوائد، و ان الاحتفاظ بالموظفين موضوع صعب أوي و مكلف أوي. ازاي جوة عالم كبير في حجم كرة القدم لعبية الكورة بتفضل مستقرة في نادي لمدة موسم كامل. ازاي أنت مستقر لحد دلوقتي؟"

- "طب خيلنا نتكلم على نظرية جديدة يا دكتور. سيبك من التعويضات والفوائد و كل الكلام ده. فيه طريقة أحسن مليون مرة عشان المنظمات تضمن بقاء الموظفين عندهم. نظرية سهلة خالص بتقول... اللي هيسيبك، امسك عليه زلة" قال كريم ببساطة

- "نظرية ايه؟" تسأل دكتور كيتزورث في دهشة، بدأ الطلاب ينتبهون أكثر للمحاضرة

- "اللي هيسيبك امسك عليه زلة" كررها مرة أخرى في ثقة، "ليه المنظمات تقعد تدلع في الموظفين و تديهم كل اللي هم عاوزينه عشان ينسطوا و تديهم دافع للبقاء؟ ما كل ده في الآخر حل مؤقت، كله زائل. أول ما يلاقوا حاجة تديهم أحسن على طول هيهربوا و ينسوا الجماليل. ليه تدي فرصة لحد يستغلك

ويستفيد منك مادام السعادة دي مقترنة بالمادة؟ لأ، أنت تجبره انه يبقى مخلص ليك على طول. تمسكه من ذراعه اللي بيوجعه. تشوف هو وراه ايه، و تمسك عليه زلة. بمجرد ما تمسك عليه زلة هتلاقيه تحت رجلك بيحاول يخدمك. و لو طوب الأرض كله حاول يقلبه عليك، هيضطر انه يفضل مخلص ليك عشان السر اللي تعرفه عنه" صاح بعض الطلبة مؤيدين لنظرية كريم

- "نظريتك مش بس غير أخلاقية، دي بتقضي كمان على فكرة التعويضات و الفوائد بشكل تام. أنت بتدي الرخصة للمنظمات انهم يتحكموا تماماً في الموظفين و يشغلهم نظام سخرة. مياخدوش أي مميزات ولا فوايد. بيشغلوا بس عشان خافين من العقاب. و بعدين خيلنا نفترض اني صاحب عمل و فعلاً عاوز أتبع الطريقة الغربية بتاعتك دي. هعمل ايه في موظف مش ممسوك عليه حاجة؟"

- "ما هي دي الثغرة الموجودة في النظرية. بس حتى لو عارف انك معملتش حاجة، فيه مخاطرة انك تكون عملت بس مش واخذ بالك. أو انهم يلبسوك في حاجة عشان يضمنوا ولاءك. و ده اللي أنا مش قادر أوصله"

- "أنت ناوي تطلع النظرية دي بجد لعالم إدارة الموارد البشرية ولا ايه؟ بتحاول تدرس كل جوانبها؟" سألته في تعجب

- "حاجة زي كدة يا دكتور. من مصلحتي اني أدرسها و أوصل للحل"

- "بعيداً عن النظرية دي، ممكن نتكلم بجد؟ عاوز حاجة تخدم الموظفين فعلاً

وتخليهم عاوزين يقعدوا مش لوي ذراع"

- "في الحالة دي متعديش. عندك المرتب، مكافآت الفوز، عربية، إقامة، تأمين

صحي، نسبة من جوايز البطولات، تأمين اجتماعي، أجازات مرضية و عارضة و سنوية مدفوعة الأجر، و غيره كثير. نظرياً تقدر تقول ان الناس دي بتعمل كل اللي يقدرها عليه"

- "شفت بقي يا كاكأ؟ بيدولك كل ده عشان تبقى راضي و مستمر معاهم.

مش أحسن من نظريتك مليون مرة؟"

- "طب تعالى نظور النظرية" استمر كريم في إصرار و كأنه يفكر بصوت عال،
"ايه أحسن طريقة عشان تضمن ان محدش يسبيك، و في نفس الوقت تستفيد منه
أكبر استفادة، و تفيده؟ النظرية الثلاثية اللي بتحقق ده هي نظرية اديله، خد منه،
و هوشه"

- "نظرية ايه يا كاكا؟" نظر إليه دكتور كيتورث ثم رفع عينيه لأعلى خوفاً
من النظرية. بدأ كل طلاب المحاضرة يستمعون بما يدور بين كريم و الدكتور. أخذ
بعض الطلبة الجتهدين بتدوين الملحوظات لضمان الاستفادة التامة

- "نظرية اديله، خد منه و هوشه. مبنية على انك تديله فلوس بالعبط، ومزايا
و تعويضات و فوايد زي ما الكتاب يقول و أكثر، و بالتالي تاخد منه كل اللي
تقدر عليه، و تمشيه على مزاجك. بس في نفس الوقت تحرص منه. متديلوش كل
ده و هو عنده الاحتمالية انه يهرب منك. فتستخدم الزلة عشان قهوشه بيه. يبقى
هو مستمتع و مش يفكر أصلاً يسبيك، بس تخلي الاختيار موجود عندك لو فكر
يلعب بديله، عشان لو في وسط الاندماج و الاستمتاع دماغه لعبت كدة ولا
كدة، يفكر ان هو مزنوق و مش عارف يهرب. هي دي النظرية مكتملة
الجوانب. خصوصاً لو عليه شرط جزائي كبير، فساعتها هيفكر ألف مرة"

- "بس اللي أعرفه يا كاكا ان عندكوا انتوا بالذات مسألة الشرط الجزائي
دي مقدور عليها. لو جه نادي تاني عاوزك هيدفعلك الشرط الجزائي ده
وتروحلهم معزز مكرم من غير أي مشكلة"

- "دي حقيقة. بس مين هيدي الإذن للنادي ده انه يعوزك؟ إلا لو كبير
الإبداعيين بتاعه حس انك كويس و هتخدم سيناريوهات فالتالي يبقى عاوز
يضمك ليه" فكر كريم بصوت عال وسط دهشة الجميع

- "كبير إبداعيين و سيناريوهات؟ أنت مش لعب كورة يا كاكا؟" سألته في
دهشة

- "متشغّلش بالك يا دكتور. استمر في الشرح. خلي الناس تستفيد" جلس كريم، جاءت بعض صيحات الاستهجان و خيبة الأمل لانتهاؤ نظريات إدارة الموارد البشرية المتطورة.

- "فيه يا جماعة أربع أنواع لنظم التعويضات و الفوائد في مكان العمل...."
استمر دكتور كيژورث بالشرح



هتاف عنصري

انتفض عصام في مكانه إثر اقتحام عامر لمكتبه و أخذ يعبث سريعاً على حاسوبه. تفحصه عامر في شك محاولاً التوصل إلى ما كان يفعله. جلس على المقعد المواجه للمكتب بينما ظل عصام محديقاً به.

- "الحقيقة يا مسيو عصام، أنا مندهش. جيت المكتب الفاردة بعد رحلتي القصيرة للإسكندرية عشان أشوف موهبة هناك. كنت عاوز ملف ولا اتنين أبص عليهم. رحيت للمكتب بره أطلبهم، لقيت بنت جديدة شغالة عندنا" قال عامر في ترقب

- "قصداً على رنا؟ مانا مشيتها خلاص. حسيته مش مركزة في الشغل فقلت فيه بنات كتير أولى أهم يشتغلوا هنا مكانها"

- "على أي أساس؟ رنا بتفحت نفسها شغل. من ساعة ما جت هنا و هي عمالة تتشقلب عشان تمشي المكتب بشكل منظم. دي عمرها ما قامت من على مكتبها غير عشان تدخل الحمام" قال عامر في هدوء متجنباً إبداء أي انفعالات
- "مركز أنت مع الحمام! مكانتش مطبوعة الكام أسبوع اللي فاتوا. أنت نفسك كنت بتتجنب تقف معاها" قال في خبث

- "أنا ورايا شغل قد كدة يا مسيو عصام، و اليومين دول معنديش وقت أقعد مع حد. يعني حضرتك مشيتها بدون سبب؟"

- "قلتلك السبب يا عامر. ولا هي قالتلك حاجة تانية؟" استمر بحبث يفتقر

للذكاء

- "و هي هتقولي حاجة تانية ليه؟ ايه علاقتها بيا؟ أنا بطلب منها حاجة و هي بتعملهاالي. لو فيه بينا صداقة فهي حاجة نابعة من الزمالة، أنا كنت شايف ان حضرتك ممكن تكون ظلمتها شوية. يمكن عندها ظروف احنا مش عارفينها"

- "أنا أظلم؟ لأ يا عامر. الكلام ده مش معقول أبداً. احنا عمرنا ما ظلمنا حد. طول شغلنا بنحرص على اننا منعملش حاجة غلط. بنراعي ضميرنا جداً وبنساعد كل المحتاجين. احنا مينفعش نظلم يا عامر. عارف ليه؟"

- "ليه يا مسيو عصام؟" سألته متوقفاً إجابة سخيفة

- "عشان احنا شغالين مع ربنا" أجاب في اقتناع و تأثر، "مينفعش نضر أو نيجي على حد. قبل ما ناخد أي قرار لازم كمان نصلي استخارة. حياتنا مفيهاش مجال للي بتقوله ده. هي رنا لو جت و اشتكتلي من أي مشاكل عندها ولا طلبت أجازة كنت هقوها لأ؟ لو جت اتكلمت معايا و وضحت لي أي نقطة غاية عني كنت هعترض؟ اللي يخلص في شغله، أحبه، و اللي يقصر أقف جنبه، لحد ما أتأكد انه مش عاوز. ساعتها بالتخلي عنه" أنهى عصام محاضرة الأكاذيب. حدّق به عامر غير مصدق

- "بتكلم بجد يا مسيو عصام؟ واضح ان حضرتك نسيت اللي بتعمله هنا أصلاً. ما كلنا بنشتغل مع ربنا؛ بنشتغل شياطين. احنا الابتلاء في حياة البني آدم يا مسيو عصام. احنا اللي بنخلق للناس وهم و نخليهم يمشوا وراه من غير ما نحدّهم ممكن يبقى وراه ايه. من الآخر احنا اللي أقنعنا آدم يخرج من الجنة و فهمناه ان الأرض دي حاجة جامدة جداً. فعلى الأقل لما تكون رفدت رنا لأسباب شخصية، متستخفش بعقلي و تقولي كلام ميدخلش الدماغ" نظر إليه في استمزاز

- "الظاهر ان أنت اللي نسيت أولوياتك يا عامر، بس أنا مش هالومك. كل راجل فينا بيفتكر نفسه ذكي أوي، و بيبقى طايح في الدنيا و محدش عارف يوقفه. لحد ما تيجي واحدة مالهش لازمة تضحك عليه و تلعب بدماعه. ساعتها بيستغنى عن أهم حاجة عنده... محه"

- "تاني هقولك مفيش حاجة اسمها واحد فاكِر نفسه ذكي. الذكي مبيستغناش عن محه " قال عامر في سماجة

- "أنت شغال هنا عشان تعمل فلوس. متجيش تشتت نفسك بواحدة مالهاش لازمة. حكاياتك معاها خليها برة الشغل"

- "حكايات ايه يا مسيو عصام؟ مش فاهم حضرتك بتحاول توصل لايه"

- "كنت فاكِرني مش هعرف اللي ورا البت دي؟ أنا لاحظت انها واكله دماغك و مضيعالك وقتك. ده خلاني أعمل تحريات عنها. البت دي أحسنلك تفضل بعيد عنها يا عامر. مش كويسة"

- "مش عارف ان ده قذف محصنات؟ واحد زيك قريب من ربنا متفوتوش الحكاية دي" أجاب عامر في برود

- "أنت هتقولني؟ مانا عارف. و عارف حاجات تانية ممكن قهملك. أنت مش برضه قريب صاحبته...أو بمعنى أصح...كنت جوز صاحبته؟! باغته عصام

- "جوز صاحبته؟ هاهاها. لأ مش فاهم حضرتك بتجيب السيناريوهات دي مين. الكورة أثرت على دماغك"

- "إحساسك كان ايه لما سارة مراتك عرفت انك خنتها مع أعز صاحباتها، راحت ردتلك القلم قلمين....و خانتك هي كمان! هاهاهاها. زوجين لايقين على بعض أوي"

- "واحد خان مراته، راحت مراته خاتنه؟ جديدة دي يا مسيو عصام. تستحق الدراسة" احتقن وجه عامر، لكنه ظل متماسكاً كي لا يظهر على ملامحه

- "بس سألت نفسك هي خانتك فعلاً ولا لأ؟ ليه اتبعت نفس الأسلوب الرخيص و اترمت في حضن راجل تاني بدل ما تطلب الطلاق؟ حط في اعتبارك ان رنا فضحتها من غير أي أساس، يعني بكل بساطة اتقام باطل. إنما الزوج المجروح ميفكرش! ضغطت عليها و هددتها لحد ما أجبرتها تخلع! راحت قالت لنفسها، ليه الفضايح، ما نخلع بالراحة أحسن"

- "نخلع بالراحة أحسن... ينفع شعار لجزمة جلد جديدة. أنا ليه ماشتغلتش في الاعلانات" استمر عامر بالاستخفاف

- "رنا اللي شاغلاك دي هي السبب في ان سارة هربت و سابت شغلها وحياتها و اختفت عن الأنظار. بس تعالى نفكر رنا كانت مصلحتها ايه في حاجة زي دي؟ بتتقذك من الشعور بالذنب مثلاً فلبست سارة في قمة باطلة؟"
- "أنا القصة عجبتني يا مسيو عصام. تعالى نغطي كل جوانبها عشان لو حينا نقلبها فيلم الجمهور ميقولش انه مش محبوبك. حضرتك دلوقتي بتقترح سيناريو فيه واحد خان مراته. مراته قفشته، و اتمسكت بيه! عشيقته ضحكت عليه و فهمته ان مراته خاتته، فهو أما صدق و قرر يفضحها عشان يضغط عليها و يخليها تخلعه؟"

- "ايه ده يا عامر؟ برافو. أنت كنت قاعد معاها ولا ايه؟" سأل عصام ساخراً
- "طب و مطلقهاش ليه و ربح دماغه؟"
- "مش يمكن عشان الرجل خاف على منظره، و أما صدق يمسك عليها حاجة يسكتها بيها بدل ما تفضحه؟" أجاب عصام

- "يعني هو لعب بديله، و هي سكتله، عامل فيها صاحب مبدأ و فضحها؟
و كمان مش عاوز يدفع مؤخر؟ ده يبقى راجل واطي" ضحك عامر
- "شوف أنت بقي. السؤال الجديد. ازاى أجبرها تخلعه من غير دليل؟"

- "في الحالة دي مش هيجتاخ دليل. الفضيحة لوحدها هتخوفها عشان هي ست، ولا ايه؟ كدة السيناريو منطقي أكثر. احنا في الدقيقة الكام؟ ٨٥، صح؟
الماتش قرب يخلص يا مسيو عصام، مين هيجيب الجون عشان الثلاث نقط؟"
- "الجون جاي أهه يا عامر... طب لما خلاص هي اتفضحت فعلاً. فيه واحدة هتفضح، من غير ما على الأقل تحاول تثبت براءتها؟ مش هقولك يا سيدي قدام الناس، قدام جوزها على الأقل؟ لما هو معاهوش دليل غير كلام عشيقته، صدقها ليه على طول؟"

- "عرفت التفاصيل دي منين؟ حضرتك جوزها؟" سأل عامر في دهشة

- "اللي خلاني. عرفت القصة دي كلها يا عامر، مش هعرف التفاصيل الهبلية دي؟ خيالي واسع يا أخي"

- "واسع فعلاً يا مسيو عصام. يمكن..." عقد عامر حاجبيه، "قدام جوزها على الأقل" ردد في شرود

- "الحكم خلاص صفر. بموت في الأجوان اللي في آخر دقيقة، بتجيب شلل للمشاهد، سواء اللي يشجع الفرقة الكسبانة أو الخسرانة. معرفش مين اللي يحط السيناريوهات الهائلة دي. أكيد واحد خياله واسع زي"

- "سيناريو جميل يا مسيو عصام. أحبيك، ليك مستقبل في اتحاد الكرة المصري. خلي الشرقية للدخان ياخذ الدوري"

- "متشكر يا عامر. أنا هنسى الكلام اللي مالوش لازمة اللي أنت قلته. أنا عارف ضغط الشغل. عاوزك تركز في الأيام الجاية، و انسى ست رنا دي خالص"

- "مفهوم يا مسيو عصام، مفهوم" أجابه عامر دون تركيز

استيقظ كريم في اليوم التالي عقب مباراة فريقه مع تشارلتون أثلتيك في كسل شديد. دائماً ما شعر بتقلص في جميع عضلاته بعد مباريات الكرة الحماسية، خاصة عندما يتظاهر بالعنف لإمتاع الجماهير المحبة للمعارك الضارية. توجه للحمام كي يغتسل. نظر في المرأة إلى جسده و تتم قائلًا: "قال أفلع الفائلة قال. مش فاهم بيحبوا الحاجات دي منين. ناس مريضة" ضحك ثم غسل وجهه و هو يغني بصوت خافت. لم يكره الحياة تماماً، فلم يعد لديه ما يخسره. يعيش حياة جيدة، يتمتع بالثراء، ينتبه لدروسه في الجامعة و يحظى بالانتباه أيضاً. لن يحق له الانغماس في أي دراما حالياً إلى حين إشعار آخر. تذكر مباراة الأمس و الأجواء الحماسية المشتعلة و هتافات الجماهير، فنظر إلى نفسه بالمرأة و فكر أنه ربما يؤدي رسالة بالفعل و يتمتع الناس. إنه فنان ترفيهي، يعمل للترفيه عن الناس. قام ليجد خوان يشرب اللبن الدافئ متابعاً الأخبار. باغته بصفعة على قفاه.

- "بتجيب الهزار ده متين؟ أنت فيك دماغ تهرز؟ ايه اللي في التلفزيون ده؟
أنت ناقص، ولا احنا كمان ناقصين مشاكل أكثر من كدة" قال خوان في انفعال
- "ايه يابني؟" بدأ كريم يشعر بالقلق

- "ما تقعد تسمع. أنت معندكش ودان؟" صاح في عنف، عقد كريم حاجبيه
و جلس بجواره متذكراً والده الذي لطالما يهينه بتلك الطريقة. سلط تركيزه على
التلفاز، و اتسعت عيناه في رعب.

- "لعب من عندنا يعمل كدة؟ مش معقول" قال فليتشر باستنكار شديد أمام
الصحافة. "و كاكا كمان؟ لأ مصدقش أبداً"

- "لعب تشارلتون اشتكى، و قال انه مش بس رماله اللفظ، ده كمان عمله
إشارة بايديه يوصفه بالقرد" أجاب الصحافي في انزعاج

- "كاكا؟ مش كفاية اتهامه بتوجيه هتاف عنصري لأحد لاعبي الخصم، كمان
بتقولي عمل إشارة بايديه كأنه قرد؟ مش مصدق. دي مش إشارة لانه قرد خالص.
ده تقريباً كان هيفقد توازنه فحاول يستخدم ايديه عشان ميقعش"

- "لعب تشارلتون مش هيتنازل عن البلاغ، و فيه بعض الزملاء هيشهدوا
معاه على كدة. للأسف موقفه ضعيف"

- "ازاي هيوجه هتاف عنصري للعب افريقي؟ اذا كان هو أصلاً من أفريقيا.
دول أبناء قارة واحدة. فيه ابن قارة يشتم أخوه؟"

- "ملاعب الكورة مليانة هتافات زي دي. يعني لما لعب أوروبي يشتم زميل
أوروبي لونه غامق، ده مش بيخليهم أبناء قارة واحدة؟"

- "بس يبقى الأصل مختلف. لو كان اللعيب فرنسي أو إنجليزي أو حتى من
مالطا، بيكون أصله أفريقي في الآخر. إنما لو الاتنين أصلهم أفارقة، مستحيل يتهمه
بأنه قرد. كاكا مش أبيض لدرجة انه يفتكر نفسه قوقازي رفيع المستوى"

- "هو محتاج يمثل قدام لجنة من الاتحاد الإنجليزي عشان يبرر موقفه و يحاول يدافع عن نفسه. متهمألنا الفيديو اللي ضده هيبقى دليل إدانة قوي. إلا لو زمايله شهدوا بالعكس. سلوك كاكا من بداية الموسم مش مستقر، عامل مشاكل كثير مع الحكام، و مع خصومه. ده حتى الصحافة لقبته بلاعب السبعين دقيقة عشان مقعدش في ماتش أكثر من سبعين دقيقة"

- "في كل الأحوال احنا كإدارة للنادي، و كزملاء لكاكا هندعمه بكل حاجة عندنا. لازم نقف جنبه عشان بقى واحد مننا. مينفعش نتخلي عن جندي في وسط الحرب" نظر إلى الكاميرا لإضفاء طابع درامي و استطرد "كاكا. كلنا معاك. متخافش أنت مش لوحذك"

انتفض كريم مكانه و أغلق التلفاز بسرعة كأنه يحاول مسح ما رأى من التاريخ. ظل خوان شارداً دون أن يجد ما يقول.

- "ايه الفيديو ده؟" سأل كريم في تبلد إثر الصدمة

- "ده فيديو ليك.... و أنت بتعمل كأنك قرد عشان تتريق على الخصم"

أجاب خوان في خوف

- "مانا عارف الزفت الفيديو فيه ايه. مش ده سؤالي. أنا عاوز أعرف مين الساحر اللي عمل الفيديو ده؟ لو بيل جايتس شخصياً قعد عشان يعمله فوتوشوب مش هيعرف"

- "احم. الفوتوشوب بتاع شركة أدوبي، فأظن قصدك جيشك و وورنوك.

مش وقته، أنا آسف" ارتبك خوان

- "لأ وقته يا خوان. اديني حصة عن تاريخ الشركة كمان. مين اللي عمل

الفيديو ده !!! أنا عملت قرد؟ امقي؟"

- "القرد ده بيدعم نظرية انك.... هتاف عنصري"

- "هتاف عنصري؟ أنا؟ دانا مصري يا خوان. هبقى عنصري ضد مين؟ احنا

في مصر معندناش ألوان. هجيب الفكر العنصري مين؟"

- "بص يا كاكأ، أنا مش متأكد. بس واضح أنهم بيدوك آخر جرعة من العقاب"

- "آخر جرعة؟ عقاب ايه؟ دول مسحوا باسمي الأرض. أنا بقيت قدام الناس واد معفن، طول الماتش عمال أتناق و أعمل مشاكل، بزل أجيب جون واحد وأتطرد، و كمان عنصري. يا ريتني عنصري عشان مثلاً عنيا زرقا و شعري أصفر و أبيض بياض التلج، لأ عنصري عشان أهبل. عنصري حباً في العنصرية؛ حافظ مش فاهم. واحد أهبل شكله ميتقلعش من الرجلين بيعمل عنصري على الناس"

- "سمعة الفريق بقت في الأرض" خفض خوان نظره في خيبة أمل

- "طب تفتكر ممكن نعمل ايه عشان سمعة الفريق تبقى أحسن؟" نظر إليه شذراً

- "مش عارف يا كاكأ. مش عارف"

- "أنت صدقت؟ أنا مالي و مال سمعة الفريق؟ أهم حاجة سمعتي. أنا مش عنصري. أنا معملتش حاجة. دول أكلوني الأونطة. أنا مش أهبل يا خوان عشان يعملوا فيا كدة. ايه حكاية اللجنة دي كمان؟ هجيب محامي؟"

- "ولا حاجة. دي جلسة استماع عشان تطلع برضه قلت هتاف عنصري في الآخر. مش هتفرق. تمثيلية نهايتها معروفة. في معظم الوقت بتدفع غرامة وتتوقفك كام ماتش" أشار بيده و كأنه أمر يحدث أسبوعياً

- "ايه المشكلة يعني؟" رد كريم في انفعال، "هدفع غرامة و أتوقفلي كام ماتش. و فيها ايه؟ مانا بقيت ملطشة الإنجليز. كل ما حد يحب يدخل الحمام لازم يعدي يمسح رجله فيا الأول. طب الإيقاف و متعود عليه، بقى بالنسبة لي رحلة مدرسة، انما الغرامة دي هجيبها منين؟"

- "لأ ده سيناريو يا كاكأ. مش بتدفع بجد ولا حاجة. مجرد طريقة لتشويه صورتك بس"

- "مش فاهم. حتى الحاكم و الغرامات تمثيل؟ ايه عالم سمسم اللي احنا عايشين فيه ده؟"

- "خلاص ادفع يا كاكأ. هقولك ايه؟" صاح خوان في ضيق
- "طب ايه لازمة العقاب؟ مانا مش هعرف أدفع ٤ مليون بتوع الشرط الجزائي، الغرامة دي اللي هتوجعني؟ ايه الغباء ده؟"
- "متقولش كدة يا كاكأ. الحاجات دي دائماً بتوصلهم" نظر خوان حوله في قلق

- "هتوصلهم من فين؟ أنت اللي هتقول؟"
- "احم. مش شرط. احنا ملزمين نبلغ عن أي سلوكيات سلبية، بس أنا مش هعمل كدة معاك" ارتبك خوان
- "جت عليك يا خوان؟ ما تدوس على المشاية بتاعة الأرض. امسح رجلك فيا يلا" قفز كريم و فرد نفسه على الأرض متمادياً في التعبير المجازي. "يلا يا خوان حط رجلك. دوس على راسي"
- "بتعمل ايه يا كاكأ؟" نظر خوان في ذهول إلى كريم الطريح أرضاً، "قوم وبطل هبل. الغرامة دي هتضاف على الشرط الجزائي عشان لو أي فريق عاوز يشتريك يدفعها"

- "فريق مين اللي هيعوزي؟" قفز كريم واقفاً مرة أخرى، "أنا بقيت بضاعة مرمية في السوق محدش عاوز يشتريها"

- "ايه المبالغة دي؟ أنت عارف كام واحد اتبهدل و اتلمع بعديها في لمح البصر؟ أسهل حاجة انك تبهدل الجزمة و بعدين تلمعها بالورنيش"
- "ياااه. رفعت معنوياتي يا خوان. يا سلام، أنا جزمة بتلمع. أيوة هو ده مقامي" نظر كريم إليه في استنزاز

- "مش قصدي. أول ما يطلعلك سيناريو حلو أو أي نادي يشوف انك هتنتفعه هتلاقي نفسك رجعت بقوة"

- "هفف قدام محكمة؟ ده بابا هيفرح بيا اوي. من زمان نفسه يشوفني و أنا واقف أتبهدل"

- "مقلقش يا كاكا. مفيش بهدلة ولا حاجة. هتقعد في الجلسة تقول اللي هيحفظهولك و هتعتدي"

- "طب مش يكملوا جيلهم و يدونا ورش تمثيل و كتابة سيناريو عشان أحطها في السي في بتاعي. أهى حاجة تعلي من سعري في السوق"

- "مقلقش يا كاكا. كلنا هتعتدي الأزمة دي سوا"

- "نعدي سوا؟ لأ عدي لوحذك. أنا داخل أنا"

- "هتنام دلوقتي؟" سأل في دهشة

- "أه. أصل في موطني الأصلي بننام الصبح و نصحى تاني يوم الصبح. عندك اعتراض؟ دي تبقى عنصرية" عاد لغرفته في غضب

أوشكت جلسة الاستماع للتحقيق في الجريمة الشنعاء التي ارتكبتها، أو لم يرتكبتها، كريم في حق كل مواطن معادي للعنصرية على البدء. حضرها أعضاء الهيئة التنظيمية من اتحاد الكرة الإنجليزي بوجود السكرتير العام. في الجهة المقابلة جلس كريم مكانه استعداداً للجلسة المسرحية. حفظ دوره جيداً و تدرب عليه لإمتاع الجمهور. لم يفهم سر إصرارهم على إنكاره الجريمة رغم وجود دليل إدانة واضح في وجهة نظر الرأي العام متمثلاً في مقطع الفيديو. لم تعجبه فكرة السعي لإثبات براءته بينما هو في الواقع يؤدي عرضاً ترفيهياً، لكن فيم سيختلف ذلك عم يقوم به؟ في البداية شعر بالأسف لأجل الصحافة المهتمة بالواقعة، لكن سرعان ما أيقن أنهم ربما أكثر المستمتعين بذلك عندما لمح السعادة الطاغية في عيونهم. بدأ ممثل عن الهيئة يطرح القضية.

"السادة الحضور. قدامنا قضية رغم بساطتها لكنها مهينة لأي حد عاوز يعيش حياة من الحرية و المساواة. مشكلة بتكرر كثير في ملاعب الكورة و بنحاول

بأقصى جهدنا نوقفها. ظاهرة العنصرية. ليه تمين حد مختلف عنك في الشكل أو اللون؟ ليه تحس ان فيه عرق مميز عن عرق، أو أن سلالتك أحسن من سلالة ثانية؟ ليه منقاش كلنا بنحب بعض و نحترم الاختلافات اللي بينا؟ ليه دائماً شايفين ان اللي احنا فيه هو الصح؟ مش مطلوب مننا نحب كل الناس، بس على الأقل نقدر وجهة نظرهم و ظروفهم" اندمج في الحوار بينما ابتسم كريم و هو لا يصدق ما يحدث أمامه؛ أصبحت المبالغة أحد أمراض العصر. عرف أن الكاميرات ستترجم ابتسامته لشيء آخر أكثر استفزازاً، لكنه استسلم للأمر الواقع. استمر الرجل يقفز و يشير بيديه و كأنه عارض ترفيحي. و يا لسخرية القدر، كان كذلك بالفعل.

- "أنا مندهش ان المدعو كريم رأفت قرر يمثل نفسه في الجلسة دي. ممكن يكون ده نابع من انه عارف غلطه، و شايف ان الموضوع مش محتاج انه يقاومه، أو ممكن يكون واثق من نفسه لدرجة انه حاسس انه مش محتاج محامي"

- "مستفدناش أي حاجة من عرض الاحتمالين. أكيد يا كدة يا كدة. نرجو عدم الإطالة الغير ضرورية" عاتبه السكرتير العام للاتحاد الإنجليزي في ملل. بدا أنه يريد إنهاء تلك المسرحية بأسرع وقت

- "متأسف" ارتبك ممثل الهيئة، و قرر إنهاء مهزلة برنامج الأسرة و الطفل التي بدأها، "أنا شايف ان كريم رأفت يستحق عقوبة رادعة عشان ميكوررش فعلته المشينة دي، سواء في ملعب كرة قدم أو برة. لازم نقضي على سلوكه العنصري تماماً و نستأصله من جذوره" أشار بيده في عنف و كأنه يقدم برنامج لتوعية الفلاح عن تطهير الأرض من الأعشاب الضارة

- "متشكرين جداً. كريم رأفت، هل قمت بتوجيه هتاف عنصري لخصمك؟"

قال السكرتير العام

- "أحب أضيف لحضراتكم ان مفيش حد من زمايله اتطوع انه يقدم أي شهادة في القضية. ده معناه انهم عارفين ضعف موقفه و مش عاوزين يوسخوا ايديهم" أضاف ممثل الهيئة في إصرار

- "يا ريت نترك عالم الافتراضات، و نبص للوقائع اللي قدامنا" قال السكرتير العام في هدوء، "اتفضل يا كريم"

- "أقول ايه؟" ارتبك كريم. فعمله كفنان ترفيهي بملاعب الكرة و هو يركض لتنفيذ الأوامر يختلف تماماً عن هذه الجلسة. شعر بأنه ممثل مسرحي بدون أي مجال للتلعثم أو الأخطاء

- "عاوز تقول ايه دفاعاً عن نفسك؟"

- "أنا أنكر تماماً التهم الموجهة ليا" أجابه متظاهراً بالثقة

- "تنكر التهم الموجهة إليك. تحب تقول حاجة ثانية ولا ده بس اللي عندك؟" سأله السكرتير في دهشة

- "طبعاً عندي كلام تاني أقوله" اعتدل محاولاً تذكر ما حفظه بالأمس، "أنا من ساعة ما جيت لندن حسيت اني في مكان مختلف شوية عن اللي أنا اتولدت فيه. أنا عندي ١٨ سنة و عمري في حياتي ما تخيلت اني هروح أقعد في مكان بعيد عن أهلي و كمان أبقي محتاج أخذ بالي من نفسي، و أحجي نفسي من كل المخاطر اللي بتحوم حواليا. عارف ان الاستقلال بالذات في السن ده شئ عادي بالنسبة لمجتمعات كثير خصوصاً لما الشباب بيروحوا للجامعات بعيدة عنهم. لكن أنا جاي من مجتمع الأسرة فيه جزء كبير من حياة الشخص، و بيفضل مرتبط بيهم لحد ما يتجوز، و يمكن بعد كدة. مش الغربة بس هي مشكلتي، لكن أسلوب الحياة المستقل اللي عايشه كمان مآثر عليا لحد كبير. خيلنا نبص برضه لاختلاف اللغة، و اختلاف الأشخاص. الجو كمان هنا تلج. من الآخر أنا واحد اترمي في مجتمع يختلف عنه بشكل تام. كل اللي يحاول أعمله من أول ما جيت اني أتأقلم مع الناس، اني أعيش. كل لما أبدأ أعيش يومين كويسين، أتفاجئ بحاجات تخلي الأمل اللي جوايا يتطفي. من ساعة ما الموسم بدأ و مفيش حاجة بتمشي على مزاجي. أنا جايب أجوان قد ما اتطردت بالظبط. عارف ان ده ميخدمش قضيتي؛ بس في رأيكوا، ليه واحد بيحاول يكسب حب الناس و يقرب منهم هيعمل سلوك بخلي

كل اللي حواليه ينفروا منه؟ كلام ممثل الهيئة يقول فيه سلالة أحسن من سلالة؛ حاجات بصراحة جديدة عليا. بصولي طيب. أنا شكلي ميجيش عنصرية أصلاً. أنا مش عايش هنا و مستقر عشان أحسن اني أحسن من حد ولا أعلى من حد. أنا لما بمشي في الشارع الناس كلها بتبقى عارفة اني غريب عن المكان. أنا جيت هنا عشان أحقق حلمي و ألعب كورة و بس. آخر حاجة تخيلتها ان حد يتهمني في قضية عنصرية. هتاف عنصري؟ أنا أصلاً مش فاهم الشتائم العنصرية اللي ممكن تتقال. أنا أصلي أفريقي، هبقى عنصري ضد واحد من أصل أفريقي؟ دانا حتى أبقي عنصري مبفهمش. كنت دورتلي على واحد أبيض أعمل معاه كدة لو أنا عنصري. حد يبقى عنصري ضد أخوه من نفس السلالة؟. أنا بمحاول أكسب الناس هنا، مش أعاديهم"

أنهى كريم خطابه، فمال أحد أعضاء الهيئة على أذن السكرتير استجابةً لإشارته

- "هو جاب الكلام ده منين؟ مين اللي محفظهوله؟" سأل السكرتير
- "معرفش يا فندم. أنا حاسه خطاب عاطفي، مفيهوش أي غرور. دي مشكلة"

- "ممثل الهيئة. فيه حاجة تانية عاوزين نضيفها؟" اعتدل السكرتير لتلا يلفت

الأنظار

- "أه طبعاً. أنا مندهش ان ده كريم رافت اللي بنشوفه في الملاعب. واضح انه بيحاول استعطف الحاضرين عشان ياخدوا صفه. كريم طبيعته عنيف و انتقامي زي ما لاحظنا في مبارياته الثلاثة. اللعيب ده مفعم بالطاقات السلبية. و ده مش كلامي، لأن الدليل قدام حضراتكم. مقطع الفيديو ده يبين الشتيمة على شفافيف كريم، و كمان إشارة القرد بايديه، غير شهادات اللاعبين" أجاب ممثل الهيئة في ارتباك

- "كريم رافت؟" سأل السكرتير متحفزاً بعد شعوره أن كريم إما يخرج عن النص، أو لم يتدرب جيداً على السيناريو

- "اللي حضراتكم شايفينه في الفيديو ده رد فعل طبيعي جداً. هو جه بقولي في وسط الماتش أنت بتشتمني و تقولي كذا كذا. رد فعلي كان الدهشة، فسألته أنا بقولك كذا كذا؟ الكاميرا أخذت المنظر ده على شفايفي من غير ما تفهم السياق. السياق كان الاستنكار، مش اني بوجهله الكلام ده. أنا أصلاً مش فاهم الشتيمة يعني ايه لحد دلوقتي. الإشارة اللي على الشاشة مكانش قصدي بيها حاجة. أنا معرفش ان معناها قرد، ده اختلاف ثقافات. عندنا في مصر الحركة بتفك بيها عضلاتنا، ملهاش أي معنى عندنا. و بعدين طول تاريخ مشاهدتي لملاعب كرة القدم، شفت شتايم مشينة قد كدة تخلّي الواحد يبص في الأرض. و كل الشتايم دي بتمر مرور الكرام، و السياسة بتلعب دور كبير في ده. انما الشتايم العنصرية بس اللي بتضايقكوا؟ الشتيمة العادية حاجة مش مشينة، صح؟ لو أنت شايف ان فيه سلالة أقل منك تتعاقب، لكن لو واحد زيه زيك و شتمك شتيمة وحشة دي حاجة ماتستحقش العقاب، أصحاب و حبايب؟ أنا ملعبتش غير ثلاث ماتشات، و مش كاملين حتى. لكن كل ماتش من دول سمعت كمية شتايم عنصرية و غير عنصرية، مش فارقة. أهو برضه في الآخر هتاف مهين. لو واحد قال للتاني يا غبي، ده مش معناه انه شايف نفسه أعلى منه؟ أنا اتعرضت لمضايقات غير طبيعية مش في ملاعب الكورة بس، و برة كمان. دانا أما دخلت متحف فيكتوريا آند ألبرت ولمست حاجة من المعروضات غصب عني، موظف الأمن اللي واقف جه بقولي عيني عينك أنت أكيد جاي من الشرق الأوسط. دي مش عنصرية؟ لو أنا في بلدي كنت اتصرفت معاه بالطريقة بتاعتنا. لكن هنا، أنا معرفش حقوقتي. لو أعرف اني ممكن أرفع عليه قضية و يقف قدامي زي دلوقتي، كان زمامي خليته يكره اليوم اللي لبس فيه الطاقية بتاعته و مسك لاسلكي. بس دلوقتي أنا عرفت. أنا مش مهتم حتى تحكموا عليا ازاى، لأنني في الأول و في الآخر عارف عملت و معملتش ايه. أتوقف كام ماتش؟ أدفع غرامة؟ مش مشكلة، برضه عارف عملت ايه كويس و ساعتها هعرف اني مظلوم. مفيش لعب كورة مستقبله بيضيع عشان

اتظلم. أهم حاجة ابني عرفت لو سمعت هتاف عنصري أو شفت بصة وحشة من حد سواء في ملعب أو غيره؛ لو لقيت أي تمييز في المعاملة في أي مكان أروحه، ساعتها بكل بساطة هطلع الموبايل و أصوره و أرفع قضية. الجلسة دي عرفني حقوقي. معنديش حاجة تانية أقولها. أرجو انكوا تحكموا بالشكل اللي شايفينه عادل لردع ظاهرة العنصرية" سكت كريم، لكن أضحي لسكوته صوتاً مسموعاً

استمر الصمت للحظات معدودة لكنها مرت كالدهر على الحاضرين. لم يجرؤ أحد على التحدث أو إبداء أي تعليق أو رأي. كأنها لحظة مقدسة أو حداد على ميت. دوى الصمت في الغرفة حتى كاد يصم الآذان. فجأة استفاق السكرتير العام.

- "شكراً يا كريم على إضافتك للجلسة" قال بصوت متقطع، "مثل الهيئة يجب يضيف حاجة؟"

- "معنديش أي حاجة أضيفها" قال في ارتباك واضح

تشاور السكرتير العام سريعاً مع أعضاء الهيئة للوصول إلى قرار بشأن القضية. انتظر الحاضرون النتيجة في ترقب. جلس كريم مبتسماً، فقد كان لديه رفاهية معرفة النتيجة مسبقاً.

- "أرجو الانتباه" قال السكرتير في ثبات. "كل الأدلة اللي قدامنا و اللي احنا سمعناه بتشير لنتيجة واحدة" سكت قليلاً مستجمعاً أفكاره. "كريم رأفت مذنب بالهتاف عنصري. محكوم عليه بالإيقاف لأربع مباريات، و غرامة قدرها ٢٠٠ ألف جنيه استرليني. شكراً لاهتمامكم و حضوركم. رُفعت الجلسة"

- "يجي العدل. تسقط العنصرية" صاح الصف الأمامي من الحاضرين، بينما تبادل بقية الحاضرين النظرات في دهشة مع بعض همسات الاستنكار. بات من الواضح أي حكم أرادوا الاستماع إليه.

- "قريت الأخبار على الانترنت؟" صاح عامر ضاحكاً و هو يتحدث لعادل في مكتبه. "ايه اللي يحصل هناك بالظبط؟ الناس دي عاوزة ايه؟ عاوزاه يبقى محبوب ولا مكروه؟"

- "المفروض مكروه يا عامر. مش بيعاقبوه؟" أجاب عادل في دهشة

- "المفروض. بس أنا لو بحاول أخلي حد مكروه، ليه هسيبه يقول كلام زي اللي قاله ده؟ ازاى أصلاً أحكم ضده بعديه؟ مين اللي بيكتب السيناريوهات دي يا عم؟ الواد ده حطهم في موقف يخليهم مينفعش يضطهدوه في أي حاجة عشان لو ده حصل هيطلعهم بطلعة العنصرية"

- "ممكّن يخلوه يلعب ماتشات زي الزفت يا عامر. مش محتاجين اضطهاد علني"

- "قبل ما تخط أي سيناريو يا عادل اسأل نفسك؛ الفلوس فين؟ الفلوس في ان الواد ده يبقى ظاهرة و يقلب نصير الغلابة زي روبن هود، ولا انهم يحاولوا يشوهوا في صورته زيادة؟ الجمهور هيبقى عاوز يحبه يا عادل. مشفتش ردود الأفعال؟ كل الناس شايفة ان الجلسة اللي بتتهمه بالعنصرية تجاهلت كل الكلام اللي قاله و اتصرفت ضده بعنصرية. كمان عمل ضجة جامدة لما قال ان هو نفسه بيتعرض للعنصرية في الملاعب و لعب كارت انه مكانش يعرف حقوقه. عارف الحاجات دي ممكن تحرك الناس ازاى؟ الواد ده لو لعب كورة بقاله عشر سنين مش هيعرف يقول الكلام ده لوحده. ده بيتصرف ولا أحسن ممثّل إبداعي. اللي حطله السيناريو ده يا إما أهبل يا إما أهبل"

- "يا إما هو خرج عن النص. ما هو عملها قبل كدة" اقترح عادل

- "خرج عن النص؟ ابن الجنية. ازاى جاتله الجرأة؟ قبل كدة مكانش عارف. بس دلوقتي لو عملها يبقى عارف. و هم ميقدروش يخسروه عشان الفلوس اللي هتيجي من وراه. حتى لو الناس محبتوش، فهي كرهته. برضه شخصيته بقت كبيرة؛

واحد مكروه في عالم الكورة و مثير للجدل. الواد ده بقى نجم غضب عنهم سواء محبوب أو مكروه"

- "مش فاهم يا عامر. بس القصة دي متفرقش معنا أوي، صح؟"
- "تفرق طبعاً. كدة بقى معروف في الصحافة الكروية بإنجلترا. موضوع الهتاف العنصري ده حطه على الخريطة. الناس دي شهرته من غير ما تقصد. دانا هعمل عليه حفلة في انتقالات يناير. مقولكش على كمية السيناريوهات اللي هتترومي عليه. موضوع الهتاف العنصري ده شكله فرقع في وشهم. النكتة قلبت عليهم. كل كبار الإبداعيين هيقدموا طلبات لضمه و كله هيحطله سيناريوهات. كريستال بالاس مش هيعرف يحتفظ بيه عشان هو في وضع وحش، و لو الاتحاد موافق على انتقاله هيبقى القرار في الآخر لكريم. الواد ده مش سهل خالص على فكرة. ده بيعمل نفسه غلبان علينا، و كل أما أسيه يومين في لندن ألاقه قلب الدنيا. بس برضه الظروف بتخدمه"

- "متدبلوش أكثر من حجمه" قال عادل ضاحكاً
- "مش أنا اللي مديله الحجم. هم لما قرروا يعاقبوه على الملء ادوله حجمه. المهم يا عادل، أنت مش ليك واحد صاحبك فاشل درس علم الجريمة في هارفرد وجه هنا افتكر نفسه لسة عايش في أمريكا و فتح مكتب تحقيق خاص؟"

- "على فكرة هو بيعمل شغل مش بطل. قفشله كام قضية خيانة على اختلاس؛ بيقَلب رزقه يعني. بس أنت عاوزة ليه؟"
- "عاوز حد أبعته كام مشوار. هات النمرة و خلاص يا عم أنت هتعملي جلسة استماع؟ وانا شغل كثير"

- "ماشى يا سيدي هبعتهالك على التلفون"
- "أهم حاجة الفترة الحماية نظبط صفقات حلوة عشان فيه تصفيات كاس عالم و اللعبة بيبقى عندها واجب وطني. محتاجين لعبة تروح تثبت نفسها عشان تظهر في المنتخب، و يبقى اسمنا احنا اللي مكتشفينها. واخد بالك أنت؟"
- "قال يعني هيسبونا نوصل" قال عادل باستخفاف، "سلام بقى عندي"

مقابلات

قام من مكانه بينما أخذ عامر يهتز في مقعده بسعادة. "يا بن اللعبة يا كريم" صاح في نشوة، "دي هتلعب معنا لعب"

بعد جلسة الاستماع و تصدره عناوين الصحف الكروية، جلس كريم شارداً في المظلة بانتظار وصول القطار ليعود لبيته. أيقن أخيراً بأن كل شيء يسير وفق خطة محددة ولا يوجد ما يفعله ليغير من قدره. نظر حوله ليجد فتى و فتاة من سنه يتبادلان القبلات أمام الخط الأصفر الذي لا يجب تجاوزه حتى لا يصبح المرء في خطر السقوط على القضبان. لم يجب تلك المخاطر، و حكماً من ضحكتهما المستيرية، ليسا من النوع الذي سيتبع إرشادات الأمان. اقترب منهما و تظاهر أنه يتجول في المكان. فجأة، دوى صوت القطار عالياً و انتفض الفتى و الفتاة و سقطا معاً على القضبان. خفق قلب كريم في قوة و توقف الزمن للحظة. اقترب القطار في سرعة و حاول القائد أن يكبح جماحه. قفز الفتى من مكانه محاولاً الصعود لأعلى الرصيف. نجح في ذلك ثم مد يده كي يجذب الفتاة عالياً لكنه كاد يفقد توازنه فترك يدها لتسقط مرة أخرى مع دوي صرخات الرعب في المظلة. وقفت على قدميها مرة أخرى، و فجأة قفز كريم لأسفل في جراحة جنونية و دفعها معه للأمام ليستقرا على القضيب المجاور فمر القطار من خلفهما. أمسكت الفتاة بكاحلها و صرخت في ألم بينما اصطدمت رأس كريم بالرصيف المجاور من قوة الدفعة. بدأت الصورة تهتز أمامه لكنه تحامل على نفسه و وقف ليساعد الفتاة على النهوض، و جذبها بعض الواقفين على الرصيف المجاور. شعر كريم بالدماء تسيل من رأسه، و بذل جهداً بدا له مضاعفاً ليتسلق الرصيف هو الآخر. ساعده الناس على ذلك و استقر على الأرض ناظراً لأعلى. أظلمت الشاشة أمامه بينما استمع لتصفيق الجمهور.

- "صحته عاملة ازاي دلوقتي؟"

- "كويس خالص مفهوش حاجة. الصدمة بس كانت قوية شوية على دماغه. كان فيه اشتباه لارتجاج عشان فقد وعيه، بس عملنا كل الفحوصات اللازمة واثأكدنا ان كله تمام. حتى مكانش فيه أي قي"

- "يعني البطل بتاعنا هيقوم بالسلامة؟"

- "أه طبعاً متقلقش خالص. هيرجع للملاعب الكورة في أسرع وقت"

تقلب كريم في فراشه و هو يستمع للحديث الدائر بين الصوتين الغامضين. لم يميز أي مما يقولان، أو إن كان هذا حلم أم لا. لجأ لذاكرته فتذكر جلسة الاستماع، جلوسه في محطة القطار. لم يراوده أي خواطر أخرى فافترض أنه بيته.

- "اعملني شاي يا خوان" صاح في كسل

- "ايه ده؟ البطل بتاعنا قام؟ ايه الأخبار الهائلة دي؟" صاح أحد الصوتين الذين سمعهما منذ دقائق. انتفض كريم ليعود إلى وعيه وفتح عينيه ليجد نفسه راقداً على فراش مريح. نظر حوله ليجد ما حن بالتأكيد أنها غرفة بمستشفى؛ لم يمنعه ذلك من طرح السؤال الغبي

- "أنا فين؟"

- "أنت في مستشفى جوردون يا كريم. حصلك حادثة بسيطة. بس أنت دلوقتي زي الفل. قولي اسمك بالكامل" ابتسم رجل في معطف أبيض، وحن كريم بالتأكيد أنه الطبيب. لكن مرة أخرى، لم يمنعه ذلك من طرح السؤال الأكثر غباءً

- "كريم رأفت. حضرتك مين؟"

- "أنا دكتور وولف، المتابع لحالتك" نظر كريم للرجل الآخر و شعر أن من حقه طرح سؤالاً منطقياً هذه المرة.

- "مين حضرتك؟"

- "أنا تشارلز كيث، بس بحب أقول تشارلز ألكسندر. زي مانت عارف تشارلز آند كيث دي سلسلة محلات و الناس مبتشبعش تريقة" ابتسم الرجل في هدوء

- "المشكلة دي عندكم برضه؟ دي أزمة عالمية بقى"

- "هاهاها. أنت عارف الناس دمه خفيف. أخبارك ايه يا بطل؟"

- "أنا تمام خالص. بس عندي سؤال، بعيداً عن الاسم، هو حضرتك مين برضه؟ اتقابلنا في حنة قبل كدة؟"

- "لأ متقابلناش. بس أكيد هنتقابل بعد كدة من هنا و رايح. أنا كبير الإبداعيين بتاع فريق فولهام الإنجليزي. تعرفه؟"

- "أكيد طبعاً. أنا مش قاعد في المستشفى بقالي كتير خالص على فكرة" ضحك كريم في ارتباك

- "طب ايه انطباعك عن النادي؟" سأله في ترقب

- "على حسب. أصل أنا دائماً أكثر نادي بحبه هو النادي اللي بلعب فيه. هم محفظهالي كدة" قال كريم في حذر

- "هاهاها. مالك قلقك كدة؟ ممكن تسيينا لوحدا يا دكتور" نظر تشارلز إلى الطبيب طالباً الخصوصية فخرج من الغرفة دون اعتراض

- "لأ مقلقتش ولا حاجة" أجابه كريم، "بس حضرتك عارف اللي فيها. ومادام جيتلي هنا تبقى أكيد عارف أنا بالذات وضعي في الدنيا دي عامل ازاي. مش ناقص غلطات ولا عاوز آخذ على قفايا تاني"

- "أنا شغلتي راجل إبداعي، بتاع سيناريوهات. و شكلك قاعد في جحر بقالك كتير و مش مركز مع ردود فعل الصحافة لأنك لو فاكر حكاية الهتاف العنصري دي ضرتك تبقى غلطان. ده من بعد الجلسة مفيش كبير إبداعيين في إنجلترا ملقاش فيك فرصة هائلة و إضافة ممتازة لفريقه. على الأقل خمستاشر طلب اتقدموا بسيناريوهات تحصك لإقناع الاتحاد انك تنضم ليهم. مش كدة و بس، افتح الإنترنت و لا بص على النشرة الهاردة عشان تشوف انك بقيت بطل قومي في فيكتوريا لأنك أنقذت فتاة من موت محقق"

- "فتاة من موت محقق؟ أنا؟ أمي؟" أخذ يفكر إلى أن تذكر ما حدث بالأمس.
"تصدق كنت نسيت. هي البنت حصلها ايه؟"

- "هيكون حصلها ايه يا بطل؟ طبعاً سليمة و صحتها تمام. و كله بفضل التضحية اللي قمت بيها. الشخص اللي كانوا لسة متهمينه بالعنصرية أنقذ بنت بريطانية بيضاء، مختلفة عنه في اللون و الجنس و الدين. أنت لو مأجر البنت دي عشان تنقذها مكانش الموضوع هيمشي بالحلاوة دي. لو بتحط سيناريوهاتك بايديك مكانش هيجي في بالك الفكرة العبقريّة دي. أنا دائماً بقول، أحلى السيناريوهات اللي بتيجي بالصدفة"

- "مش مستوعب أوي. أنا بطل؟ ازاي؟ الناس عاوزة ايه من واحد موقوف؟"

- "أنت أكيد بتهرج. مش شايف انك بقيت نجم تليفزيوني؟ مش شايف الفلوس اللي نزلت عليك و هتزل على الفرقة اللي هتبقى فيها؟ أنت دلوقتي مطلوب في برنامج جراهام نورتن، و برنامج ألان كار، و كذا برنامج تليفزيوني عشان تحكي تجربتك البطولية و تحديك للعنصرية في ملاعب الكرة. هتدخل للمنظومة فلوس من برة؛ فلوس تليفزيون و دعاية. بعد ما كان هم اللي متهمينك بالعنصرية، بقيت أنت بطل المساواة، و الكل اتخذ منك مثال لمحاربة العنصرية. السيناريو قلب على اللي كان حطه عشان يعاقبك. بيني و بينك، عمري ما بثق في القرارات اللي جاية من الناس اللي فوق عشان مش يبقوا جوة المواضيع. مفيش حد بيعاقب حد بانه يسلط عليه الأضواء زي ما عملوا، لأن أي دعاية سواء وحشة أو حلوة بتلقت الأنظار. زود على ده واقعة إنقاذ الفتاة من المترو. ده عمل بطولي بجد مش تمثيل. في عالم الخيال اللي احنا منغمسين فيه ده، الواحد لما ييشوف حاجة حقيقية تحصل قدامه، بيعحسن ان فيه ابتسامة بلهاء على وشه"

- "أنا بقيت نجم؟ و ده هياثر ازاي على مستقبل الكروي؟" سأل في ذهول

- "عالم الكورة ده زيه زي أي فيلم أو مسلسل؛ مبني على الأشخاص. كل ما يزيد ارتباط الجمهور بالشخصية اللي قدامهم على الشاشة، كل ما يجوه أكثر. لما

الاتحاد قرر يشوه صورتك و يخليك مكروه، بقيت محبوب غصب عنهم. بغض النظر أنت خرجت عن النص ولا هو ده السيناريو اللي كان مكتوبلك مش فارقة. لأنك عملت مجهود عشان ترسم صورتك قدام الناس و تخليهم يحبك. مش ذنبك ان الموضوع علق مع الناس. كمان أنت عملت حاجة بطولية فعلاً؛ أنقذت حد من الموت. أكيد مش التزاماً بشخصيتك جوة الملاعب هتسيب الناس تموت عشان أنت مكروه و مضطر تعمل تصرفات شريرة. مش فيلم أجيني هو؛ دي حياة واقعية. حياة أنت بقيت فيها بطل، و نصير للمساواة، و نجم تليفزيوني، و هبتقى كمان نجم فريق فولهام الإنجليزي" ابتسم في سعادة

- "هبقى نجم فريق فولهام؟ هلعب في الدوري الممتاز؟" سأله في لهفة
- "هتلعب في الدوري الممتاز بس؟ بقولك هبتقى نجم فريق فولهام. فولهام السنة دي هيكون في أول سبع مراكز. يعني هتقوده لحجز مقعده في الدوري الأوروبي السنة الجاية"

- "هقود فريق فولهام للدوري الأوروبي؟ معرفش ليه أنا حاسس انه اختبار من رئيس النادي بتاعي و بيشوفني هقول ايه. أنا بعشق نادي كريستال بالاس. حلم طفولتي ايني أحضر مباراة في سيلهبرست بارك. مدير أعمالي حفظني كدة" لم يتخل كريم عن حذره

- "عامر؟ ده بيتحایل على النادي بتاعنا من فترة اننا نحضرلك سيناريو كويس و نطلب ضمك في يناير"

- "عامر؟ فعلاً؟ على أي أساس؟"
- "كان عنده معلومات انك هتتعاقب بقصة الهتاف العنصري من فترة، وعلى الأساس ده حس ان مستقبلك في كريستال بالاس ضلمة. قرر يشوفلك عرض عندنا. أصله يعرف رئيس النادي بتاعنا كويس. كانوا بيسهرُوا سوا. مانت عارف الحاجات دي بتمشي ازاى. كل واحد بيشيل عند الثاني جهيل انه ميفضحش شقاوته" ضحك تشارلز

- "عامر كان عارف حكاية الهتاف العنصري؟ ازاى مقاليش؟" صاح في

غضب

- "مش المفروض يقولك لأنه مش من حقه. أنا عارف انها حاجة بايخة، بس صدقني مكانش ينفع. المهم ان لينا الأسقية عشان طلبناك من الاتحاد أول ناس، قبل ما نجمك يعلا. أنا معايا العقد دلوقتي. تحب تمضي معنا ولا لأ؟"

- "مين قالك اني مش متمسك بالنادي العريق كريستال بالاس؟" سأل كريم

في تحدي

- "أكيد طموحك انك تلعب في الدوري الممتاز. و أنت مش هتلعب فيه وتعمل نتايج وحشة، يقولك هتبقى نجم الفريق. عاوز ايه أكثر من كدة؟ مفيش نادي أكبر مننا هيجيك و يخليك النجم بتاعه. احنا أحسن فرصة ليك. من مصلحتك انك تخلع من المركب بتاعة كريستال بالاس عشان هم متعاقبين السنة دي خلاص، و بسببك. هيفضلوا يضايقوك و هتعرض لحاجات ملهاش لازمة. ما همش أي سلطة يحتفظوا بيك لو حد مستعد يدفع تمك و أقنع الاتحاد ان السيناريو بتاعه أقوى ليك و للأرباح. الاتحاد درس سيناريوهات كتير و معندوش اعتراض. أنت اللي هتتحكم. مدير أعمالك شايف ان ده أحسن مكان ليك، و بعد اللي حصلك الأيام اللي فاتت أنا كمان شايف كدة"

- "بص يا تشارلز. الحياة هنا علمتني اني أقتنص الفرص. مش هكذب عليك و أقولك مش همضي لأني غالباً همضي. بس عاوز آخذ فكرة عن مرتبي. أنت عارف الفلوس هي اللي بتكلم"

- "من الناحية دي اطمئن خالص. مدير أعمالك مش سهل. أنت فاكر انه مجابش آخرنا بعد الشهرة الضخمة اللي بقيت فيها؟ كفاية بس أقولك انك هتبقى أعلى لعب أجراً في فوهمام. ده طبعاً عشان قيمتك زادت بشكل هستيري. الشرط الجزائي بتاعك بقى أي كلام و أهيل مقابل اللي أنت هتدخله لأي نادي. الغرامة اللي عليك هتدفعها لك و احنا مبسوطين و بنقول كمان. هنحط احنا شرط جزائي

عالي عشان لما تولع معاك أكثر و أكثر محدش يفكر ياخذك غير الأندية الكبيرة اللي معاها فلوس. الثقال أوي. عليه القوم. مانشستر يونايتد، مانشستر سيتي، تشيلسي، ريال مدريد، برشلونه، ميلان، يوفنتوس و غيرهم. الناس اللي مبتهرجش في السيناريوهات بتاعتها"

- "أنت معاك العقد دلوقتي ازاي؟ مش سوق الانتقالات في يناير؟"

- "ماحنا هنمضي دلوقتي بتاريخ يناير عشان نضمن حقنا. عقدك مش هيبدا قبل يناير. تكون قضيت أجازة الكريسماس مع الحبايب و ترجع فايق، و الإيقاف بتاعك ينتهي"

- "يعني مش المفروض أقول اني مضيت؟"

- "لأ طبعاً. مينفعش الصحافة تعرف. لازم نسويها على نار هادية. خليك حديث سوق الانتقالات في يناير. أنت نفسك هتلاقي تصريحات على لسانك مقتلهاش. كل واحد هيرمي القرشين بتوعه، و كله هيجري وراك. في الآخر، و في دراما مبتحصلش إلا في كورة القدم... هتعلن عن انضمامك لفولهام قبل ما نافذة الانتقالات تتقفل بتمن دقائق" ابتسم ابتسامة خبير

- "تمن دقائق؟ اسمعني؟"

- "رقم جديد. هتعلن انضمامك لفولهام الإنجليزي قبل النافذة بتمن دقائق. أظن لو مانشستر يونايتد قعد ثلاث ماتشات يجيب أجوان في آخر خمس دقائق، ولا ميسي فضل يجيب هاتريك لمدة أسبوعين، مش هيبقى فيه دراما برضه أكثر من كدة"

- "كل ده موافق عليه. بس أنا عاوز جايسون المثل الإبداعي بتاعي"

- "يا سلام، بس كدة؟ لو طلبت رئيس الاتحاد شخصياً يقعد معاك هيجي."

أنت خلاص وصلت. فيه أي أسئلة تانية قبل ما غصي؟"

- "الناس لما تشوفك خارج من هنا مش هتعرف اني مضيت مع فولهام؟ مش

أنت وجه مألوف؟"

- "وجه مألوف؟ لأ طبعاً. هو أنا مين أصلاً؟"
- "كبير الإبداعيين بتاع فولهام" رد كريم في دهشة
- "يعني ايه كبير إبداعيين؟ فيه حاجة اسمها كدة" ابتسم تشارلز و ناوله العقد
- "لأ طبعاً مفيش" ابتسم كريم متفهماً
- "أهلاً بيك في كريفين كوتيدج"

صراع السيادة

اقتربت المراحل النهائية لتصفيات كأس العالم لكرة القدم من البدء، و أصبح واجباً على رئيس كل اتحاد أن يختار الفرق التي ستأهل من منطقته. أراد رئيس الفيفا استقبال الطلبات الأولية من كل رئيس اتحاد ليأخذ أفكارهم بخصوص السيناريوهات. لم يختلف الوضع كثيراً عن المعتاد حيث علم الكل فرص انتصار قارته. لم يمنع ذلك من تجهيز المطلوب و عرض أفضل السيناريوهات. أدار رئيس الفيفا الاجتماع بنفس الطريقة التي اعتادها دائماً؛ يهتف قائلاً اسم الاتحاد فيقوم رئيسه بعرض الأفكار.

- عاوزين البطولة دي تبقى على مستوى مذهل، حاجة تشرف. عاوزين كل اللي يتفرج عليها يقول فعلاً دي بطولة كورة حقيقية، زي ما الكتاب بيقول" بدأ رئيس الفيفا الجلسة

- "كأنها بجد يعني مش تمثيل؟" سأل رئيس الاتحاد الآسيوي في حذر
- "أنت قلت ايه؟" سأل رئيس الفيفا في انفعال، "بجد مش تمثيل؟ أنت ازاي تقول كدة؟ من امتى بنهزر في الحاجات دي؟ الشغل مفيهوش تهريج"
- "هو ميقصدهش يا فندم" قال رئيس الاتحاد الأوروبي محاولاً تهدئة الموقف
- "آخر مرة أسمع حاجة زي دي. ما علينا. يلا نبدا. أوقيانوسيا؟" هداً رئيس الفيفا قليلاً

- "نيوزيلنده يا فندم"
- "ايه حكايك مع نيوزيلنده؟ أنت مش طلعتلي أوكلاند سيتي في كأس العالم للأندية؟"

- "ذاكرتك هائلة يا فندم. بس فيه حاجة مهمة حضرتك مش واخذ بالك منها. هي أقيانوسيا على بعضها كام فرقة؟ هنجيب مين؟ فيجي؟ ساموا؟ مفيش أي احتمالات منطقية تانية غير نيوزيلنده حالياً" أجاب في تأثر
- "معاك حق. خلاص هتوصل السنة دي. اطربني بالسيناريو بتاعك"
- "فيه أمل نعتدي من دور المجموعات؟" سأل في حذر
- "دور المجموعات. عاوز الصراحة؟ موعداكش"
- "خلاص معنديش حاجة أقولها" أجاب في خيبة أمل
- "ليه الروح دي؟ مش عاوز تشاؤم و سلبية. ليه متحاولش تقنعني، مش يمكن تقولي سيناريو محصلش و من كتر ما عجبني تحصل المعجزة و تعدي من الدور الأول؟"
- "فعلاً؟ حضرتك لسة قايل مفيش أمل"
- أبوة مفيش أمل. بس بحب أشوف الناس و هي بتحاول. بحب الروح الكويسة. مش مهم خلاص، عشان نوفر وقتي و وقتك. أنت كدة اتصرفت صح. بلاش كلام في حاجات ملهاش نصيب"
- "و أنا يا فندم؟" سأل رئيس الاتحاد الآسيوي
- "للأسف عندك أربع فرق، فغالباً لازم فرقة من عندك على الأقل هتعتدي لدور ال ١٦. عاوزك تسمعي ايه اللي في دماغك"
- "أنا كنت محضر خمس فرق، مش أربعة. كنت طمعان..."
- "بلاش أنانية. عاوز الراجل بتاع أوقيانوسيا يلم ورقه و يروح؟ مانت عارف ان وصول بلد خامسة من عندك هيجي على حسابه. يقعد من غير شغل؟"
- "لأ طبعاً يا فندم. بس قطر و البحرين و السعودية و الإمارات مش مصدقين ان مفيش فرقة فيهم هتوصل. الناس دول بيدفعوا كتير عشان يبنوا الفرق بتاعتهم، و بيعملوا مجهودات جامدة و بيلتزموا بالسيناريوهات. كنت عاوز أكافي واحدة فيهم"

- "عاوز دولة عربية توصل؟ مش مشكلة خالص. حطها مكان فرقة تانية من الأربعة بتوعك"

- "مش هينفع. الفرق اللي اخترها فرصتها أكبر في الصعود. حضرتك هتسبب دولة عربية تعدي من الدور الأول؟"

- "غالباً لأ. بس الحضور مهم برضه. فيها ايه أما تحاول و تعمل اللي عليك؟"

- "بس ساعتها هيبقى فيه مشكلة" قاطعهما رئيس الاتحاد الأفريقي

- "خير؟ ايه اللي هيجيب مشاكل؟" سأل رئيس الفيفا في تعجب

- "فيه فرقة عربية هتوصل من القارة بتاعتي

- "بقولكم ايه" انتصب رئيس الفيفا، "لما طاوعتكم الكاس اللي فات و كل واحد جابلي فرقة عربية؟ الاتنين اتخطوا مع بعض في نفس المجموعة، و حصل مشاكل بين العرب و بعضهم. بالمناسبة، بم اننا بنتكلم عن الموضوع ده... كرة القدم رياضة مدبرة، و قائمة على السيناريوهات. ازاي نزنق نفسنا من غير ما ناخذ بالنا؟ يعني ازاي فجأة ألاقى تونس و السعودية يلعبوا بعض و نختاس منعرفش مين فيهم يكسب؟ لو الموضوع بيبجي بالصدفة أقول ماشي، انما الماتشات تبقى في ايدينا و في الآخر نخط نفسنا في مواقف ملهاش لازمة؟ لازم نبقى حاسبين كل حاجة من الأول. أمال احنا مبنعملش قرعة حقيقية ليه؟ مش عاوز الموضوع ده يتكرر تاني"

- "بس أنا لازم أوصل فرقة عربية. العرب في أفريقيا كتير و حضورهم قوي" أجاب رئيس الاتحاد الأفريقي

- "خلاص، يبقى مش عاوز من ناحيتك أي فرقة عربية، ماشي؟" أشار لرئيس الاتحاد الآسيوي

- "حاضر يا فندم. هيوصل من عندي كوريا الجنوبية و اليابان. ممكن كمان الصين و سنغافورة. ولا أقول ل حضرتك، الصين و تايلاند"

- "أنت مش محضرلي حاجة؟ بقولك ايه، لما الكاس كان في كوريا و اليابان عملت معاكوا أحلى واجب، ولا ناسي؟ أسهم آسيا ارتفعت من ساعتها، و الناس كانت بتشد في شعرها مش مصدقة أنهم وصلوا للمربع الذهبي"

- "ماحنا وصلنا بطريقة غير مشرفة. الأخطاء التحكيمية كانت مش طبيعية"

- "هو فيه حد بيفتكر التاريخ بتفاصيله؟ التاريخ بيعترف بالأرقام بس. لو بعد خمسين سنة جه واحد كوري بيدرس تاريخ كاس العالم، هيلقي ان كوريا وصلت لدور الأربعة بالظلم ولا هيلقي انها وصلت و خلاص؟ مفيش حاجة اسمها وصلت ازاي، التاريخ بينسي كل المآسي و كل الحاجات الجدلية في مقابل الأرقام. قولّي اللي عندك"

- "اليابان دلوقتي سيطرت على كل حاجة في التكنولوجيا و الصناعة. اليابانيين بدأوا يحكموا العالم. هنركز على فكرة أنهم بيستخدموا التكنولوجيا و التنظيم في كل تفاصيل حياتهم حتى الكورة. بالتالي، المنتخب بتاعهم يلعب بنظام كأنه كمبيوتر؛ كأن الواحد بيلعب فيفا بالظبط. اللعيب بيباضي لزميله من غير ما يبص يشوفه واقف فين. الناس هتتهبر و تقول ان اليابانيين مذاكرين كل حاجة بالكمبيوتر و يزداد إعجابهم بهم. و زي ما الكمبيوتر كسب بطل العالم في الشطرنج، برضه يبقى بطل العالم في كرة القدم. ايه رأي حضرتك؟"

- "كلام مش بطل، بس هنسب كمبيوتر يكسب بطولة؟ أنا شايف أخره معانا دور ال ١٦. ممكن ساعتها نقول النور قطع. خلاص معنديش مانع ان اليابان تعدي دور أول. عاوزك تقولي التفاصيل بالظبط في التقرير و اقنعني كل فرقة ممكن توصل ليه. مش عاوز دلع. نخش على أوروبا. عندنا كام فرقة؟ حوالي ١١ أو ١٢؟" سأل رئيس الفيفا

- "لأ يا فندم. ١٣ فرقة" ابتسم رئيس الاتحاد الأوروبي في فخر

- "اعمل حسابك ان غالباً مش هيعدي أكثر من نصهم. أنت قلت بنفسك ان الناس كلها مركزة مع أوروبا و مش ناقصة وجع دماغ. عاوزين الكاس يمشي

حلو من غير جدل. أنا هبقى واضح معاكم. المرشحين للفوز بالكاس يا إما فريق من أوروبا أو أمريكا الجنوبية. ده مش معناه انكم تبطلوا تقدموا اقتراحات وسيناريوهات كويسة تشرحوا فيها ليه ممكن فرقة من عندكم تكسب. مين عارف؟ زي ما قلت من شوية يمكن ألاقي سيناريو فيه إعجاز يخليني أندھش وأغير رأيي. نكمل كلامنا، عاوزك تشوفلي الفرق الأوروبية اللي أنت بترشحها. مش بس للصعود؛ اللي ممكن تكسب البطولة" غمز له بعدما تأكد أن لا أحد ينظر إليه، "نسمع من أمريكا الجنوبية. دلوقتي عرفت ان فرصتك كبيرة أنت كمان"

- "عاوز رأيي يا فندم؟ السنة دي الرهان لازم يبقى على البرازيل أو الأرجنتين"

- "ما هي دي الترشيحات كل سنة. بصولي تاني. أنا مبسوط انكوا كل شوية بتفكروني بحاجات كنت عاوز أقولها. شعارنا للفترة الجاية هو التجديد. عاوزين سيناريوهات جديدة تماماً. وجوه جديدة و ماتشات جديدة. كله جديد في جديد. و عشان كدة، اسمعوا مني الكلام ده... كاس العالم الجاي هتاخده فرقة محدتوش قبل كدة" دوت بعض صيحات الاستنكار و خاصةً من أمريكا الجنوبية

- "حضرتك كدة شلت من عندي ٣ فرق. البرازيل، أوروغواي و الأرجنتين كلهم خدوه" اعترض رئيس اتحاد أمريكا الجنوبية

- "ايه المشكلة؟ بقولك عاوز تجديد"

- "طب اسمع مني السيناريو ده. جه في بالي دلوقتي. خطيبير"

- "أنا برحب بالأفكار زي مانت عارف. لو أهرتني يمكن أرجع في كلامي"

- "هيعجبك أوي يا فندم" تنحنح وسط نظرات السخط من بقية الأعضاء، "مين أول فرقة أخذت كاس العالم؟"

- "أوروغواي" أجابه رئيس الفيفا

- "طب تخيل حضرتك السيناريو ده. أول فرقة تكسب كاس عالم هي أوروجواي، و آخر فرقة تكسب كاس عالم هي برضه أوروجواي" قال و ابتسم في ظفر و كأن كلامه غاية في المنطقية

- "مش فاهم أوي. آخر فرقة تاخد كاس عالم؟" ردد رئيس الفيفا في اندهاش،
"أنت بتقترح إلغاء كاس العالم؟ أنت عاوز تقطع عيشنا؟"

- "ألقي ايه يا فندم؟ لأ طبعاً. الناس اليومين دول مهووسين أوي بالنبوءات والحاجات دي. كام نظرية طلعت عن نهاية العالم أو حرب عالمية تالته و أخيرة؟ كتير جداً جداً. اللي يقولك حضارة المايا، و اللي يقولك الأزتك و اللي يقولك فراغتة، و اللي يقولك نوستراداموس، و اللي يتكلم عن احتباس حراري. كل واحد يفتي في ناحية و يطلع بنظرية عن نهاية الحياة بشكل مختلف. اللطيف في كدة ان كله بيعحسننا ان نظريته هي اللي صح و منطقية جداً. أفلام كتير أوي بترغي في الحواديت دي. فيه نظريات عن انتهاء العالم قريب أوي. ايه رأي حضرتك اننا نرمي فكرة ان ممكن ده يكون آخر كاس عالم و نأكل الناس الأونطة و أوروجواي تكسبه؟ ندعم فكرة ان احتمال تكون أوروجواي أول و آخر فرقة تاخد كاس عالم. سيناريو خطير الصراحة"

- "أول و آخر فرقة تاخد الكاس؟ مم. أنا عادةً مش بتابع السينما أوي، أولادي هم اللي غاوين. أنت فعلاً عاوز تبني بطولة كاس العالم، بطولة بمليارات، على سيناريو أفلام؟ عمرك شفت فيلم عن نهاية العالم بيعقق نجاح أصلاً؟"
- "بيحقق نجاح في شباك التذاكر"

- "هو فيه فيلم مش بيعقق نجاح في شباك التذاكر؟ الفيلم الجديد اللي بيوزل كل أسبوع هو اللي بيتصدر الإيرادات. و لما الناس تاخد بالها انه أي كلام، و عقبال ما يتكلموا عنه و يوقفوا مهزلة ان حد غيرهم يدخله و ينقذوهم من الشلل، يكون الفيلم جاب ملايين فعلاً. يعني اللي هيخسره انه جاب خمسين مليون بدل من سبعين. أنا قصدي نجاح نقدي. الناس بتخاف من نهاية العالم و بتخاف من

الجهول. أنت فاكّر لما تقول للناس الحقوا ده ممكن يبقى آخر كاس عالم في التاريخ هيركزوا في الماتشات؟ كل واحد فيهم يا هيلحق يكفر عن سيئاته يا إما هيلحق يعيشه يومين قبل ما يموت. افرض كمان العالم مانتهاش و عملنا كاس عالم تاني، نفقد مصداقيتنا؟"

- "حضرتك متخيل ان بعد أربع سنين الناس هفتكر كاس العالم اللي فات فعالياته كانت ايه؟ كله هيفتكر مين كسبه و خلاص"

- "بس هنضحى بنسبة المشاهدة في الكاس ده. احنا عاوزين نمتع الناس مش نجيبهم الضغط و السكر. عندك حاجة تانية؟"

- "البرازيل...."

- "البرازيل خدته قبل كدة أكثر من اللازم. و لو ان حضورها مهم طبعاً عشان جمهور الكورة البرازيلية كثير. أهم حاجة في جمهور الكورة انه حافظ مش فاهم. الناس كدة كدة هتقعد تنفرج على البرازيل. سواء بيلعبوا حلو أو وحش كله مقتنع انهم بيلعبوا لعب وهمي و محصلش، و بيرفعوا شعار نجوم السامبا والأفلام دي. أنا بحب وجود البرازيل؛ مهم بالنسبالي و بيحب فلوس حلوة. فيه نقطة كمان عاوز أوضحها لك لأهمية البرازيل. انها من الفرق القليلة اللي صورتها مش بتأثر مهما يحصل. بمعنى ايه؟ مثلاً لو البرازيل خسرت السنة دي هل ده هياثر على سمعتها أو على تاريخها كمنتخب؟ أو السنة اللي وراها الناس هتقول البرازيل مستواها قل؟ أبداً! البرازيل عاملة زي الشخص اللي له حضور، مهما حصل منه بيفضل كبير زي هو، عشان تاريخها و صورتها القوية ساندينها. بالتالي بحبها تبقى موجودة. يمكن نحتاج نعلي فرقة تانية فنخليها تكسب البرازيل عشان منظرها يبقى قوي. أو يمكن نعوز نعاقب فرقة بنتيجة كبيرة فنخلي البرازيل تكسبها و بالتالي الناس هتقول دي البرازيل يعني فأكيد لازم تكسب. البرازيل من الفرق اللي ممكن لما تعرف نتيجة أي ماتش هي فيه و تلاقيها كسبانة جوتين أو تلامه، تقول طبعاً دي البرازيل فلازم تكستح، مع انك لو اتفرجت ع الماتش ممكن

تلاقي الفرقة الثانية هي اللي عاملة للماتش شكل و إثارة. الفرقة اللي بنحطها في
الوضعية دي غالباً بنقى عاوزينها تعلق و بنشوف رد فعل الجمهور ناحيتها ايه، ده
بنسميه أداء صنع النجم؛ انك تلعب قدام فرقة عملاقة زي البرازيل و تعمل أداء
مشرف، فمهما خسرت بأي نتيجة ده هيعلي أسهمك و يخليك نجم. لو أثبتت
نفسك فعلاً، ممكن الكاس اللي وراه تبقى في موقع أحسن، و هكذا. شفتوا أهمية
وجود البرازيل؟"

- "و وجود الأرجنتين؟"

- "الأرجنتين تاريخها وحده لا يكفي الصراحة. أنا بفضلها سيناريو الفرقة اللي
مليانة نجوم و مش عارفة تعمل بيهم حاجة. أيام مارادونا خلصت. أنا بحب ميسي
جداً فوق ما تتخيلوا، بس الولد ده لو أخذ كاس عالم الناس مش هتبقى عاوزة منه
حاجة تاني. مينفعش و هو صغير ياخذ كل حاجة. عاوز الناس تفضل تتفرج
وتقول ميسي هيعملها المرة دي ولا لأ؟ هل ميسي هيقود المنتخب بتاعه للفوز
بكاس العالم ولا هو آخره يعمل أداء مع برشلونة و بس؟ هل زمايله في برشلونة
هم اللي شايلينه؟ عاوز الناس تتكلم. لو ميسي بمقالوش حاجة يعملها في السن
دي، الناس ممكن تفقد الاهتمام. فهمت؟! هاه...مين تاني؟"

- "أنا يا فندم" صاح رئيس اتحاد الكونكاكاف

- "معنديش عليك ملحوظات. أهم حاجة تحطلي أمريكا عشان الدوري
الأمريكي أسهمه عليت من ساعة ما بيكهام و شركاه راحوله. وجود أمريكا
ضروري. الفرقتين التانيين ميفرقوش معايا. حط أي حاجة على ذوقك. كدة احنا
خلصنا. عاوز أديكم فكرة عن السيناريو اللي في دماغى..."

- "حضرتك نستني. مع ان البطولة أصلاً بتتلعب في جنوب أفريقيا" صاح
رئيس الاتحاد الأفريقي في ضيق

- "هاهاها. معرفش بنسلك ليه. هي البطولة في أفريقيا فعلاً؟ كنت ناسي! ايه
العلاقة؟ أكيد مش فرقة أفريقية اللي هتاخده. مش فاكر غير مرتين بس اللي

كانت أفريقيا فيها مسلمة. المرة بتاعة الحاج ضيوف في السنغال، و المرة بتاعة روجر ميلا في الكاميرون. دول السيناريوهين اللي شدوني"

- "ازاي بقي؟ أفريقيا اقتحمت عالم كرة القدم الكام سنة اللي فاتوا بقوة. شوف عدد اللعبة الأفارقة المحترفين في أوروبا؛ عدد جبار. دروجبا ولا كانوتيه ولا أبيدال ولا يايا توريه و إيتو. غير أساطير الكورة الأفريقية زي جورج وايا، وإيزييو البرتغالي الموزمبيقي الأصل. الأفارقة بقوا الأساس دلوقتي خصوصاً في الهجوم. بقينا قوة لا يستهان بيها. و لو تفتكر غانا قدمت أداء هائل الكاس اللي فات و خسرت من البرازيل في أداء صنع النجم زي ما حضرتك قلت. ده شجعني دلوقتي ايني أشرح غانا تمشي كويس في البطولة"

- "أنت بتشتيني؟ عشان خاطر أنت مركز في النصايح بتاعتي همشيلك فرقة. بس متصورش ان فيه فرقة تانية هتعدى من الدور الأول"

- "حاضر. بس أنا شايف ان البطولة في ماما أفريقيا. ميصحش ماما أفريقيا ميقاش ليها حضور قوي"

- "ماما أفريقيا؟ مشاكلك العائلية دي متجهاليش في الاجتماعات. ماما دي عليكم، انما احنا مالناش دعوة. بس هرجع أقول لو أفتعني، ممكن الفرقة دي توصل قدام. مين عارف؟ مين تاني عندك؟"

- "أنا دائماً بعتمد على العداوات. بحب أخط الفرق اللي ليها مشاكل، خاصةً سياسية، قدام بعض. بتعمل أجواء جامدة و بتثير المشاعر"

- "و بتثير خناقات و الناس بتقتل بعض و الدم بيبقى في كل حتة؟ صح؟" أجابه رئيس الفيفا في انزعاج

- "للأسف سلوكيات الجمهور متقدرش نتحكم فيها. مش أفريقيا بس اللي بيطلع منها الحاجات دي؛ التاريخ ياما شاف. الكارثة بتاعة هيزيل اللي مات فيها ٣٩ واحد دي مش بين ليفربول و يوفتوس؟ كارثة السلفادور و الهندوراس اللي

مات فيها ٣٠٠٠ واحد دي مكانتش من أفريقيا. جواتيمالا و كوستاريكا لما مات

٨٢ واحد؟ ايه الحاجة المشتركة بين كل الأحداث دي؟ مالهش دعوة بأفريقيا"

- "و أنت نسيت كايزر شيفز مع أورلاندو بايرتس في جنوب أفريقيا؟" تدخل رئيس الاتحاد الأوروبي منقداً الموقف، "مصر و الجزائر سنة ١٩٩٠؟ هارتس أوف أوك و كوتوكو في غانا سنة ٢٠٠١؟ كل الحوادث دي مش كانت في أفريقيا؟ الجري ورا التاريخ مفيش أسهل منه. سهل ان الواحد يرجع و يعمل أبحاثه و يجيب المعلومات اللي تدعم نظريته بس"

- "مش هنختلف" قال رئيس الفيفا، "عداوات ايه اللي في دماغك؟"

- "تونس مع المغرب، نيجيريا مع غانا، كامبيرون مع كوت ديفوار، مصر مع الجزائر. حاجات كلها شيك و لذيدة"

- "أنا معاك ان العداوات كويسة. بس هاتلي واحدة مش متكررة. مصر و الجزائر لسة عاملينها سنة ١٩٩٠. و ساعتها قلبت حرب مش ماتش كورة. لازم تغير شوية، مش عاوز نفس السيناريوهات"

- "حاضر. هغير على قد ما أقدر"

- "مش قد ما تقدر. عاوزك تغير فعلاً. مبحش اللي يحاول يربحي. بحب اللي يربحي. كفاية رغي بقى، صدعتني. ركزوا معايا. خلوني أديكوا رؤيتي لكاس العالم الجاي. بس ده ميمعش زي ما بقولكوا دائماً...."

- "اننا نجهز السيناريوهات بتاعتنا يمكن حضرتك تقنع بسيناريو وهمي و تغير رأيك" أكمل رئيس الاتحاد الأفريقي في ملل

- "برافو! مين القارتين الوحيدتين اللي خدوا كاس عالم قبل كدة؟ أوروبا وأمريكا الجنوبية. ده معناه ان فيه عداوة و صراع أكبر من العداوات الهبلية اللي بتكلموا فيها. أنا دائماً ببص للصورة من فوق خالص؛ من عين الصقر. مش بتكلم عن صراع ناديين من مدينة واحدة، ولا بلدين من قارة واحدة. أنا بتكلم عن صراع قارتين؛ صراع السيادة بين أمريكا الجنوبية و أوروبا. عدى علينا كام كاس

عالم؟ ١٨ واحد بالتمام و الكمال و ده ال ١٩. بم انك كلكم بتحبوا تذاكروا تاريخ و شاطرين فيه، لو حد فيكوا مركز و حاسبها كويس هيلاحظ ان بالطبط أمريكا الجنوبية كسيانة تسعة، و أوروبا كسيانة تسعة. صدفة ولا سيناريو بيتحضر بقاله أكثر من سبعين سنة؟ مش مهم. المهم ان فيه تعادل بين القارتين في عدد مرات الفوز و احنا مقبلين على كاس العالم رقم ١٩. كل قارة تسع مرات بالطبط. يبقى محتاجين ايه السنة دي؟"

- "محتاجين فرقة جديدة تاخده برة القارتين عملاً بمبدأ التجديد بتاع حضرتك؟" قال رئيس الاتحاد الأسوي في رجاء

- "غلط. انتوا بتاخدوا اللي ينفعكوا من كلامي و تطبطوه على مزاجكوا؟ مش ده قصدي. احنا محتاجين كاسر للتعاادل في صراع السيادة بين أوروبا وأمريكا الجنوبية. مين القارة اللي هتفرض سيادتها على الثانية؟ السيناريو ده محدش تطرق ليه قبل كدة عشان كله بيص تحت رجله. محدش واخذ باله من الصورة الكبيرة. كله بيشف مين أكثر فرقة واخده أو مين أكثر دولة منظما. محدش اتكلم عن الصراع بين القارتين على السيادة في كرة القدم. مين أحسن، البرازيل ولا ألمانيا؟ دي بتمثل قارة و دي بتمثل الثانية. مين لعبه أمتع، الأرجنتين ولا أسبانيا؟ مين هيكسب كاسر التعادل؟ بالتالي أنا توصلت ان دور الأربعة هيتكون من فرقتين من أوروبا و فرقتين من أمريكا الجنوبية. كل واحدة من هنا هتلاعب واحدة من هنا. الممتع كمان اننا هنتحاول نخلي الأربع فرق محدوش الكاس قبل كدة. كدة مضمون مية في المية ان قارة من الاثنين هتفرض سيادتها على الثانية لمدة أربع سنين قدام وان فرقة جديدة هتاخده. تفتكروا نسبة المشاهدة هتبقى عاملة ازاى؟ لما تقدم وعد في السيناريو بتاعك و مضمون تنفيذه مية في المية هتلاقي الناس كلها بتجري ورا الماتش و هتموت عليه. المباراة النهائية لازم بين فرقتين محدوش الكاس. عاوز الناس كلها تتكلم عن البطولة دي. سيناريو مالوش حل، صح؟ عاوزكوا تحطوا الموضوع ده في اعتباركم و انتوا بتجهزولي التقارير. لازم كلها تخدم السيناريو ده. صراع السيادة"

- "طب ايه لازمة الاجتماع ده كله؟" سأل رئيس الاتحاد الأفريقي في انزعاج

- "النظام و الالتزام ماهمش دعوة بالنتيجة النهائية. لازم نعمل اللي علينا ونجتمع. بعدين مين عارف، مش يمكن حد فيكوا...."

نزل عامر من سيارة الأجرة التي استقلها لشبه انعدام أماكن انتظار السيارات في الدقي. عبر شارع مصدق و دخل أحد مطاعم الوجبات السريعة. استقر على إحدى الطاولات الخالية و جلس ينتظر في ملل. دخل شخص نحيل القوام مرتدياً سترة سوداء و نظارة ضد الشمس. أشار له عامر بالانضمام إليه. جلس أمامه و نظر حوله في ريبة و كأنه يتأكد أن لا أحد يراقبه.

- "أحنا في الشتا يا عم، و داخلين على المغرب. نصارة شمس ايه اللي جاي بيها؟" قال عامر ساخراً

- "أنت من طرف عادل؟"

- "أنا مش قتلتك في التليفون انا من طرف عادل؟ ايه لازمة السؤال الغبي ده؟"

- "أنت جاييني قزأني؟" سأل الرجل في استهجان

- "بص يا نجيب. أنت هنا في مصر، مش في أمريكا. يعني جو الأفلام ده لازم تطلع منه عشان نعرف نتفاهم"

- "أولاً أنا مسميش نجيب...."

- "أنا حاسس ان اسمك نجيب. مش الزبون دائماً على حق؟ المهم يا سيدي. أنا عارف انك راجل شاطر و مذاكر كويس و واخذ شهادة من هارفرد و كل الحوارات دي، بس مش مقتنع انك هتعرف تحبيلي اللي أنا عاوزة"

- "يا سلام؟ و اتصلت بيا ليه؟"

- "الواحد لما بيتزق في مصلحة بيضطر يجرب كل حاجة. و المرة دي مينفعش أستخدم مصادري. أدبني مش هخسر حاجة. مش أنت لو مجتثش معلومات

هترجعلني فلوسي؟ مش ده النظام ولا انتوا بتتصرفوا و تجيبوا أي معلومات عشان تعلموا القرشين؟

- "هتقعد تشتتم فيا كثير؟"

- "عشان مضيعش وقتي، مش هقول و وقتك لأنه أكيد مش مهم، عاوزك تجييلي معلومات عن حد. بتعرف مش كدة؟"

- "أستاذ عامر. نتكلم جد؟"

- "نتكلم جد. أنا أكثر حاجتين بكرههم في حياتي هم الغباء و الحشيرة. و يا سلام لو واحد بيتحشر بغباء، كدة يبقى ضايقي جامد"

- "تحت أمرك"

- "فيه حد عمال يلعب معايا اليومين دول. دي مش أول مرة يعمل كدة، بس أما عملها المرة اللي فاتت على الأقل كنت عارف ازاى و امتى و فين. المرة دي بيلعب و أنا من كتر انشغالي مش عارف أحط ايدي على المصدر"

- "أفهم من كدة انك بتحب تلعب لوحذك؟"

- "حاجة زي كدة. من صغري مبحش حد يلعب معايا؛ عقدة طفولة. مش البيئة اللي بينشأ فيها الشخص بتأثر على سلوكياته و ممكن تقوده للإجرام؟ نظرية الحقل الاجتماعي بتسموها مش كدة؟"

- "مضطوط. بتوريني انك جامد يعني؟" عقد حاجبيه في تساؤل

- "شفت ايني مش محتاج أروح أدرس عشان أعرف الكلمتين دول" ابتسم في سخرية، "عاوزك تشوفلي مين بيلعب من ورايا"

- "هي دي التفاصيل؟ أنت واخد بالك ايني محتاج خلفية عن الموضوع عشان أجيب معلومات؟"

- "تصور نسيت. أنت طبعاً مش بتفشي أسرار العملاء بتوعك. أنا شغال و كليل لاعبين في شركة اسمها الطموح؛ شغالة تبع شركة قابضة مش مهم اسمها ايه.

شركة الطموح بتموت في الحشرية. أي موظف شغال عندها بتحب تدعس وراه
عشان تعرف كل حاجة عنه"

- "مش ده انتهاك للخصوصية؟" سأل في دهشة

- "قلة أدب. أصلها شركة بتلعب بملايين، و أسرارها كتير أوي بعيد عنك.

فدائماً يجربوا يأمنوا أنفسهم"

- "طب ما تبلغ عنهم"

- "أبلغ مين يا نجيب، أنت جيت التايهة؟ لما أحب أخذ رأيك في حاجة هبقى

أسألك بلاش تتطوع... الناس دي استخدمت حد ضدي قبل كدة عشان يأمنوا

نفسهم مني، و الحد ده أنا اتصرفت معاه"

- "عملت معاه ايه؟"

- "يهمك أوي تعرف؟"

- "أي معلومة ممكن تفيدني"

- "محسني انك محامي. ما علينا، هأخذك على قد عقلك. المدير اللي فات

حاول يلعب من ورايا، و بالتالي طَفَشْتَه من المكتب. أصل بنته كانت واحدة

صاحبتنا، و صاحبة مزاج أوي. أصحاب المزاج لما بيعَلَوْا الدماغ يبقى سهل

تمسك عليهم أي حاجة"

- "أه. هددته ببنته يعني" قال في ضيق

- "و مالك بتقولها بقرف كدة؟ ما علينا، المدير ده لما مشي جابوا مكانه واحد

تاني. الفكرة انهم خافين عشان أنا عارف كل الوساخات بتاعتهم. بس اللي مش

عارفينه انك لو فضحت حد مش هتبقى ماسك عليه حاجة. و أنا أحب أذل

الناس. لو عارف حاجة و قلتها مش هبقى عندي وسيلة ضغط. الظاهر انهم

عاوزيني أبطل أضغط عليهم فيحاولوا يخلصوا مني"

- "طب ما تسيلهم الشركة"

- "لا لسة شوية. مش أطمئن على مستقبلي الأول؟" ابتسم في سخرية

- "ايه المطلوب مني؟"

- "أنا شاكك ان المدير الجديد أهبل؛ بيحاول يجيب عني معلومات لأسباب
تانية؛ أسباب شخصية. متغاض مني و عاوز يغلس عليا. انما مديري القديم كان
راجل محترف. مبيدخلش التفاهات الشخصية في الشغل. كان عنده تعليمات"

- "و استفدت ايه لما مشيته؟ ما هو لسة الراس الكبيرة بتلعب من وراك"

- "استفدت ابني وريتهم ان محدش يقدر يمسك عليا حاجة. حاول يضغط عليا
عشان قال ايه خنت مراتي، مفيش يومين و فضيحتي بقت في كل حنة و سرتي
على كل لسان. راحت وسيلة الضغط بتاعتهم. و الفضايح دي أصلاً محدش
بيفكرها بعد كام شهر"

- "و ازاي سابوك تشتغل في الشركة بعد كدة؟"

- "أنت مش مركز ولا ايه؟ بقولك بحب أذل الناس. خافين من اللي عندي"

- "يعني هددك و بعدين فضحك من غير ما يستفيد؟ تصرف غريب شوية"

- "لأ مش هو اللي فضحني. أنا اللي فضحتني. كنت فاكرني هسيه يلوي"

دراعي؟"

- "دانت مش طبيعي. طب افرض فكروا يقتلوك؟"

- "يقتلوني؟ أرجوك انسى الجو الأمريكي بتاعك ده. الناس دي مبتوسخس
ايديها في جرائم قتل؛ دي بتاعة مصالح. عاوزين حد يجييلهم فلوس بالعيط، بس في
نفس الوقت يبقى تحت سيطرتهم. أنا طبعاً بعملهم الأولانية بس، و بيحاولوا يجيبوا
آخرهم عشان يوصلوا للتانية"

- "عندك فكرة المدير الجديد بيدعس وراك ليه مادام معندوش تعليمات؟"

- "تافه. عينه على البت اللي حيلتي فييحاول ينتقم مني و خلاص. أصل

الرجالة بعيد عنك عنها زايغة. مع انه متجوز، تحيل؟"

- "البت اللي حيلتك مين؟"

- "همك أوي دي كمان؟" سأله عامر في شك

- "لأ دي فضول الصراحة" أجاب ضاحكاً
- "مش الخيانة الزوجية ليها طرف ثالث يا عم نجيب؟ صديقتي"
- "و الشركة الفاضلة بتاعتك دي. فيه ايه تاني ممكن يسكوه عليك؟"
- "أمال أنا جايبك ليه؟ تحب أشغل عندك أنا؟"
- "جاييني ليه؟"
- "عشان تتحرى عني"

- "ماسكين عليك ايه؟ انطق! اتكلم!" معلى آسف. انفعلت شوية. انطق!
- احم. ازيك يا فريد. أنا كريم، فاكربي؟" قال كريم في ارتباك
- "كريم مين؟ كريم رأفت؟ جيت غمري منين؟" سأل فريد في ضيق
- "أخذتها من واحد صاحبك. بس مش هقولك اسمه عشان متقطعش معاه"
- "مش كدة خالص، أنا بس مستغرب عشان عمرك ما كلمتني"
- "أنا بس كلمتك عشان... مفيش حد غيرك أتكلم معاه. الكورة تمثيل يا فريد" صاح و هو أقرب للبكاء
- "هنعمل ايه بقى. مضطرين نسمع الكلام" قال فريد في خيبة أمل
- "ليه؟ ماسكين عليك حاجة؟ ماسكين عليك ايه بقى؟"
- "لو قتللك ماسكين عليا ايه ما كنت أسيههم يفضحوني أحسن. أنت برضه؟"
- "لأ خالص" رد كريم في تلقائية
- "ايه؟ طب و ساكت عليهم ازاي؟" سأل فريد في دهشة
- "هه؟ قصدي مش ماسكين عليا حاجة واحدة. ماسكين عليا كذا حاجة. ده تاريخي كله عندهم" أجاب كريم مرتبكاً

- "تاريخنا كله! أنت عارف يا كريم، برغم كل ده... أحياناً لما يجيب جون بقعد أتخيل اني فعلاً جبته بمجهودي، و انه حتى لو المدافع دخل عليا مكانش هيعرف يوقفني لا هو ولا الحارس"

- "هتمثل يا فريد؟ أكيد طبعاً سايبينك تحبيه. فارق معاك الحكاية دي أصلاً؟ مش حاسس ان ممكن ميقاش فيه فرق بين اللي بنعمله و اللي الناس فاكراه؟ ساعات بحس ان لو الناس عارفة مش هيفرق معاها. ماهو ترفيه في الأول و الآخر" - "ازاي يا كريم؟ لما عيل صغير ولا راجل كبير يتحرق دمه قدام ماتش ويهتفلك لما تجيب جون، مبتحسش ان قيمة الموضوع باظت عشان كله تمثيل في تمثيل؟ دانا لما يجيب كورة في العارضة بانيسط أكثر من لو جبتها جون. أديني عملت حاجة حقيقية على الأقل. ده غير بقى المشكلة الكبيرة؛ تصفيات كاس العالم هتبدأ في مارس و مصر كلها هتبقى مستتية اننا نقدملها حاجة!"

- "أنت اتاخدت المنتخب؟ يا بختك" صاح كريم في حقد
- هتفرق ايه يا كريم؟ حتى لو وصلنا، مش هنعس اننا وصلنا بجدا. فاهمني؟
- "لا مش فاهم. أنت طلعت متشائم أوي. ده كاس العالم يابني! هتلعب في أكبر بطولة في العالم و تقولي بجدا ولا مش بجدا؟"
- "أنت بقيت تتكلم زيهم كدة ليه؟"
- "زيهم؟ هتطلعني عميل؟ ولا ايه؟" ضحك كريم، "أنت شكلك نكدى يا فريد. هقفل معاك قبل ما تعديني"

قضى كريم موسماً متميزاً في تاريخه كلاعب كرة قدم. منذ بدء مشواره في فولهام لم يغيب عن أي مباراة أو يتعرض لحالة طرد من أي نوع. أصبح هداف الفريق حيث أحرز أهدافاً بكل الأشكال؛ ضربات رأس، تسديدات، و الكثير من ضربات الجزاء. تحول من فتى مراهق جالب للمشاكل إلى لاعب ناضج محترف محرز للأهداف، و خطير أمام المرمى. مع تغير نظرة الجمهور إليه و تعاطفهم معه منذ حادثتي الهتاف العنصري و مترو الأنفاق، تغيرت شخصيته شيئاً فشيئاً أمام

الكاميرا. لم يعد الفتى المدلل المشاغب الذي ينتظر الناس أفعاله المشينة، بل أضحي اللاعب الرومانسي الهادئ المحب للأعمال الخيرية و المتعاون مع كل أفراد الفريق. ظهر في كثير من البرامج التليفزيونية للتحدث عن بطولته، و عن معاناته قبلها في ملاعب الكرة. تخفى أيضاً تحت عباءة الأعمال الخيرية حيث التزم بزيارة المستشفيات و المساهمة في تحقيق أحلام مرضى السرطان و الأمراض المزمنة الأخرى. اهتم بمتابعة تصفيات كأس العالم و احتمالية مشاركته مع المنتخب المصري. رغم أنه لم يتلق أي طلب بالانضمام، لم يمنعه ذلك من التحلي بالصبر والأمل.

لم يبدأ المنتخب المصري التصفيات النهائية بشكل مشرف. خسر أول مبارتين و أصبح عليه أن يعود من بعيد إن أراد شرف الانضمام للبطولة الضخمة. تقاعس رئيس الاتحاد الأفريقي عن أداء واجبه فلم يعرف أي فريق سيصل بعد. ترك الاختيارات مفتوحة أمامه بتسيير النتائج عشوائياً. على الأقل ضمن المنتخب المصري الفوز المباراة القادمة لإبقاء فرصه حية. لم يرتح رئيس الفيفا لتذبذب نتائج التصفيات الأفريقية خاصة أنه لم يتلق التقرير النهائي. أرسل في طلب مقابلة رئيس الاتحاد الأفريقي ليتناقش معه وجهاً لوجه. رغم عدم وجود أي تأثير لأفريقيا على أحداث البطولة، رأى أن النظام واجب و لا مفر من الإعداد المسبق لتحديد المجموعات. مثل الرئيس الأفريقي أمامه في ملل منتظراً محاسبته.

- "يا بني أنت عاوز تجنني؟" قال رئيس الفيفا في انزعاج، " و مستغرب أوي انك مرمي في الزبالة و بتعمل أكثر نتايج مقرفة في تاريخ كاس العالم؟ ماهو عشان أنت أصلاً مش منظم. تعرف انك الوحيد اللي مقدمتش التقرير؟ كل زمايلك قدموا"

- "كل زمايلي مؤثرين في البطولة. وجودي في البطولة زي قلته"

- "من امتي بتتصرف بالسلبية دي؟ مش عارف انه يهمننا نحدد الفرق اللي هتوصل عشان نركز في عامل التاريخ بتاعها، و لعبت ضد مين قبل كدة؟ دي بتختلف من منتخب للتاني و ملهاش دعوة بالقارة. اتفضل يا سيدي، حتى بتاع أوقيانوسيا اللي وجوده زي قلته باعتلي سيناريو. نيوزيلنده فريق مهضوم حقه وسيتعاطف الكل معه لو بدأ بإظهار نتائج جيدة. ليس من البعيد أن يصطف الناس خلفه و يدعمونه للفوز بالبطولة. فوز نيوزيلنده سيكون مفاجأة منعشة و سيسعد الكثيرين من عشاق كرة القدم. هو طبعاً سيناريو فاشل زيه، بس ده ميمتعش انه عمل اللي عليه. هو طبعاً كروته، بس أهو مسك كميوتر و خبط على لوحة مفاتيح. بيني و بينك هو سيناريو حقير أنا بفكر أكلمه أهزأه. مش وقته. عاوز تعرف مين تاني هيوصل؟"

- "اديني فكرة يمكن ألاقي فرق ليها خطط مع حد"

- "أمريكا الجنوبية فيها الأرجنتين، البرازيل، أوروجواي، باراجواي، و شيلي. شفت سمع الكلام ازاي؟ حطلي فرقتين جداد محدوش الكاس و في نفس الوقت سايب الكبار عشان يعملوا شكل للبطولة"

- "بس هو عنده اتنين هيوصلوا نص النهائي، أنا الفرق بتاعتي آخرها توصل المطار"

- "مش عاوز روح سلبية. ميت مرة أقولك كدة. اديني توقعات مبدئية لو سمحت"

- "أنا مستعد أحط نيجيريا لو وعدتني انها هتكسب البرازيل أو الأرجنتين. أهي إعادة للتاريخ، و لفئة ظريفة"

- "هو أنا يفرق معايا مين بالظبط اللي يوصل؟ أنت فاهم غلط. أنا فارق معايا انك تكون قايلي عليه قبل البطولة و بس. هعمل ايه لو نيجيريا وصلت ولا كوت ديفوار؟ هم أصحابي مثلاً؟ أوروبا قدامي ١٣ فرقة زي الفل أهه مع مراعاة وجود فرق محدتش البطولة"

- "كل الفرق من ناحيتي مخدّماش. هقولك على اتنين متأكد منهم. كوت ديفوار و غانا. حلو كدة؟"

- "أنت بتجاملني؟ الدولة المنظمة جنوب أفريقيا، فكدة أنا معايا ثلاث فرق من عندك. كملي الثلاثة الناقصين اللي هيوصلوا"

- "حاضر يا فندم"

- "قدامك أسيا فيها أستراليا، اليابان، كوريا الجنوبية و الشمالية. مش عاجبي أوي بس كدة كدة مالوش نصيب، أهو عمل اللي عليه. كونكاكاف سمع الكلام و حط أمريكا زي ما قتلته، و المكسيك اختيار منطقي طبعاً، الهندوراس. الهندوراس؟ جابها مين دي؟"

- "شفت بقى التقصير؟ مش لوحدي" ضحك رئيس الاتحاد الأفريقي

- "اختيار غريب فعلاً. مش بحب كاس العالم لما يلم. أنا هقرا السيناريو اللي كتبه يمكن يعجبي. تعالى نبص. يااه ده طويل أوي. تلاقيه قاصد يعمل كدة عشان عارف اني هكسل أقرا. ما علينا، هديه لأي حد يقراه و يجييلي المفيد. ركز أنت في اللي عليك. بقولك ايه أنت هتقرفني؟ أنا مضطر أندخل" فتح درج مكتبه في سرعة و أخرج ملف به كل مجموعات التصفيات

- "حضرتك بتعمل ايه؟" سأل رئيس الاتحاد الأفريقي في دهشة

- "بعمل شغللك. هبص على كل مجموعة و أقولك مين يوصل. العفو يا سيدي مش محتاج تشكركي"

- "أشكرك على ايه؟ حضرتك كدة بتلغي دوري"

- "دورك؟ متخافش. محدش هيعرف اني قتلتك توصل مين. كدة كدة الشيك بيجيلك على البيت. فارق معاك أوي تشتغل ولا لأ؟"

- "شوية. إحساس السيطرة"

- "إحساس السيطرة؟ مش المفروض حد فيكوا يحس بالسيطرة في كاس العالم. السيطرة دي في البطولات المحلية، القارية، انما البطولات العالمية دي بتاعتي. أنا

بس اللي أسيطر و أدي الإشارة. أمال لازمتي ايه، أنظم مرور؟ وريني الفرق اللي موجودة. ممم...مختار في ايه مش فاهم؟ المجموعة دي أكيد هيصعد منها كوت ديفوار. هنا أكيد غانا. أنت بتهرج؟ فين الاختيارات أصلاً ما كل الدول بتختار نفسها أهيه. أمال ايه محاضرة الظهور القوي لأفريقيا اللي اديتهاي آخر مرة؟ استنى استنى..أنت ليه حاطط فرقتين عربيتين في نفس المجموعة؟ مش قلتلك منعملش الحركة دي تاني؟"

- "حضرتك قلت منعملهاش في كاس العالم، مش التصنيفات" أجاب في غباء
- "قلت منعملهاش تاني عامة. يعني اللي يخليهم يتخانقوا جوة الكاس مش هيتخانقوا في التصنيفات؟ ما تعقل الحاجة قبل ما تعملها. مش مشكلة، أهم حاجة نتايجهم متعتمدش على بعض. يعني نتايج الفرق الثانية هي اللي تحسم. ولا أقولك عندي حل أجمل بكثير. ولا واحدة منهم تصعد، و خلي الفرقة العربية اللي في ذمتك تصعد من مجموعة تانية. ممم...خلي الجزائر توصل من المجموعة اللي هناك دي. و نيجيريا من هنا. نرجع لمجموعة الفرقتين العربيتين...خلي فرقة غيرهم هما الاتنين توصل؛ الكامبيون مثلاً. بس متضيعش فرصتهم أوي في المنافسة عشان الجمهور العربي يبقى عنده أمل لآخر لحظة"

- "يعني أخلي يا إما مصر أو المغرب تنافس لآخر لحظة و بعدين متوصلش؟"
- "بالظبط كدة. خلي الإثارة مستمرة. احنا بنمتع المشاهد"
- "مصر بطل أفريقيا آخر ثلاث مرات. أكيد الأوقع ان هي اللي تنافس"
- "آخر ثلاث مرات؟" صاح في استهجان، "واضح اني مش هسيبك السيطرة حتى في البطولات القارية. نفس الفرقة ثلاث مرات ورا بعض؟ أنت بتهرج؟ عاوز الناس تقول الكورة تمثيل؟"
- "لأ طبعاً. الناس بتعتبر الموضوع سيطرة من الدولة اللي بتكسب مش تمثيل. يعني لما أسبانيا تكسب بطولة أوروبا و كاس عالم ورا بعض ده ميقاش تمثيل؟" رد في استهجان

- "مين قالك ان أسبانيا هتكسب؟" سألّه في حذر
- "سمعنا ان أسبانيا اللي هتكسب. طرطشة كلام"
- "و مين ماشي يطرطش كأنه اتحاد أهله ده؟"
- "احم. هيكون مين يا فندم؟"
- "ابن ال... أنا هعرف أحاسبه ازاي"
- "ليه يا فندم؟" ابتسم رئيس الاتحاد الأفريقي في خبث، "أنا هوضح لحضرتك ليه مصر خدته ثلاث مرات ورا بعض"
- "اتفضل. لو أقنعني هنبسط منك. أنت عارفين بحب اللي يقنعني"
- "مصر دي بلد عالم ثالث. و عليه القوم هناك مصلحتهم ان بلدهم تفضل مشتركة في أنشطة كروية و بتاخد ألقاب عشان الناس متركزش في اللي بيحصل جوه البلد. أسباب سياسية، ما حضرتك عارف الحوارات دي. بصراحة عرفوا يقنعوني. ده احتمال ياخدوها مرة رابعة"
- "مرة رابعة؟ مستحيل طبعاً. ايه رأيك مصر دي مش هتشم كاس أفريقيا لمدة مرتين ثلاثة على الأقل؟ أقولك حاجة أحلى؟ مش هتوصل أصلاً عشان محدش يحلم انها تكسب. و بعدين تعالى هنا، لما هم أقنعوك كويس، محدش أقنعنا معاك ليه؟ اقتنعت لوحذك من غير ما تفيدنا؟"
- "احم. الاتحاد الأفريقي أولى بالفلوس دي. أنا كمان حاطط مصلحة الفيفا قدام عيني. لو اسم حضرتك جه في القصة دي هتبقى مشكلة. دي مسائل سياسية رخيصة حضرتك متترلش لمستواها"
- "هو فيه كورة مفهاس سياسة يا ابني؟ ما كله مصلحته الناس تتفرج على كورة عشان يعملولهم غسيل مخ. محسني ان كله بيجري ورا كاس العالم عشان شكله حلو. ما كله بيلعب على كله، و كله لازم يجي يقنعني عشان يضحك على الناس. و مادام فيه حد بيقنع لازم أنا أقنع معاه. مفهوم؟"

غادر رئيس الاتحاد الأفريقي الغرفة. وجد رئيس الاتحاد الأوروبي يجلس بالخارج في انتظار انتهاء الاجتماع. اقترب منه في خبث و نظر حوله قبل أن يجلس بجواره كأنه مخبر للمباحث. التفت حوله مرة أخرى.

- "أنت فضيحة ليه؟ اللي يشوفك يقول انك عامل عاملة" همس رئيس الاتحاد الأوروبي في غيظ

- "أصلي مش متعود على الحاجات دي"

- "مش متعود على ايه، أنت داخل تعمل إجهاض؟ عملت اللي قتللك عليه؟"

- "كله تمام. بس متنساش اللي وعدتني بيه"

- "وعدتلك بيه؟ أه. طب بص، أنا عندي حاجة أحسن"

- "ايه؟ قول" سأل في لهفة

- "مممكن أقععه ان الفرقة بتاعتك توصل لدور ال٨ بدل ما فرقتين يوصلوا ال١٦. فيه أحلى من كدة؟"

- "بجد؟ هات بوسة" انقض عليه في سعادة

- "مرجع في كلامي" أشار محذراً

دخل بعدها رئيس الاتحاد الأوروبي على رئيس الفيفا مبتسماً. وجده يجلس تمتعاً و يريح رأسه على كفيه.

- "صاحبنا بتاع أسبانيا بيعمل طاقة سلبية بين الدول المشتركة في كاس العالم" قال رئيس الفيفا في ضيق

- "معقولة؟ ازاي؟" سأل في دهشة مصطنعة

- "رايح جي يقول انه هيكسب كاس العالم. كدة بيهبط معنويات كل الناس. مين هيكسب سيناريوهات بمزاج لما هو حرق مين اللي هيكسب"

- "أسبانيا هتكسب؟ مش معقول طبعاً. ياااااه" استمر في تقمص الدور

- "كنت بفكر في كدة. أصل فيه سيناريو كان بيلعب قدامي و عجبني. عشان كدة كنت موصيك ان هولندا و أسبانيا لازم يكسبوا ماتشاقم كلها في التصنيفات من غير تعادلات ولا هزائم"
- "كنت ناوي تخطهم في النهائي سوا و يبقوا الفرقتين اللي لا يقهروا فنحتار مين فيهم يكسب التاني؟"
- "بالظبط. بس كنت هخلي أسبانيا تخسر لها ماتش في الأول عشان يبان ان كفة هولندا هي الراجحة. بفكر أغير الموضوع ده"
- "متضايقش نفسك خالص. بلاها أسبانيا. نجيب أي فرقة تانية. تحب أخرجهالك من التصنيفات خالص؟"
- "مش للدرجة دي. هفكر شوية في القصة دي"
- "فيه حاجة مهمة الأول عاوز أقولها لك. بتاع أفريقيا عاوزني أتوسط له ان فرقة أفريقية توصل المربع الذهبي"
- "المربع الذهبي؟ اتجنن ده ولا ايه؟ هو أنا مش موضحلله السيناريو الرئيسي؟"
- "خلاص بلاش المربع الذهبي عشان الخطط الكبيرة. نخليها دور الـ ٨ و خلاص عشان خاطرك؟"
- "دور الـ ٨؟ مممم. سيبني أفكر. لو خلاص التقرير بتاعه و جابلي سيناريوهات كويسة ممكن أوافق"
- "قلبك كبير فعلاً. بلاش تكشر أوي كدة"
- "مبحش لما حد يسبق الأحداث. بحب أشوف كل السيناريوهات الأول وبعدين أقرر. ايه خلاه يقول انه هيكسب؟"
- "هتفرق معاك أوي السيناريوهات؟ ده هياثر على قرارك مين هيكسب؟"
- "لا طبعاً. كدة كدة أنا اللي هحدد في الآخر، بس بحب الناس تعمل اللي عليها" قال في انزعاج

انتهت المقابلة ثم خرج رئيس الاتحاد الأوروبي و السعادة تملأ كل أجزاء جسده، و ضحك ضحكة شيطانية.

استمرت التصفيات كما هو مخطط لها بعد التدخل من رئيس القيفا لفرض سيطرته. ظل الأمل لدى المصريين بتحقيق حلم الوصول للكأس الذي غاب لمدة طويلة، و خاصة للشباب الذين لم يشهدوا كأس عالم وهم في هذه السن. تمنى كريم أن يشترك بنفسه في هذه التجربة. بمجرد عودته إلى القاهرة في شهر يونيو أخذ موعداً مع فريد على أحد مقاهي الكوربة ليسأله عن فرص وصول المنتخب. للأسف اكتشف أنها معلومات يصعب الحصول عليها. أبلغه فريد أنه لا يتم تحديد الفائزين في المباريات المصرية إلا في اللحظات الأخيرة قبل بدء المباراة، و أحياناً قبل نهاية المباراة بدقائق.

- "هنعرف قبل الماتش بخمس دقائق يعني؟" تساءل كريم في خيبة أمل
- "طبقاً لنتيجة الجولة الحاية اللي أخذنا فكرة بسيطة عنها، شكلها هتبقى بينا احنا و الكامرون. لسة مفيش حاجة أكيدة"
- "عارف يا فريد مصر محتاجة ايه عشان توصل؟ محتاجة قائد يقدر يحركها، محارب يقف قدام الصعاب و يقولها طظ فيكي، خبير استراتيجي يرتقي بيها فوق مستوى الأحداث. مصر محتاجة بطل. بطل اسمه كريم رأفت. بس لازم آخذ فرصتي" ابتسم كريم في نرجسية
- "وجودك هيفرق ايه؟ ما هو لو السيناريو يقلشنا من الكاس مش هتفرق"
- "أشم نفسي حتى. أخط رجلي في المنتخب. ده مش ناقص غير ثلاث ماتشات. عاوز أمثل بلدي"
- "تحيل لو الموضوع كان في ايدك أنت. يعني كنت منفرد بالجون و مطلوب منك متجيش جون، مع انك ممكن تجيبه و تفرح الملايين. الواحد لما يلعب في بلد

تانية مبيقاش فارق معاه فكرة انه يحرق دم الناس أو يفرحهم، لأنه في الآخر برضه ييلعب عشان نفسه، و الجمهور الأجنبي ميهموش. لكن أما حلمك، و حلم أصحابك و جيرانك و الناس اللي أنت عارفها و بتتكلم معاهما يبقى بين ايديك و ممكن تحققه ليهم و ليك؟ أكيد هتفرق معاك نفسياً"

- "بغض النظر عن إعلان كوكاكولا اللي عملته ده، معاك حق. خصوصاً لما الناس دي تحط أمل عليك. بس مين قالك، مش يمكن نصعد؟"

- "مش حاسس خالص. مش ملاحظ ان الجزائر ماشية حلاوة؟ تفتكر فرقتين من العرب هيوصلوا؟"

- "مش أول مرة تحصل. اتفائل أنت بس. أنا عن نفسي متخيلتش اني ممكن أحترف، لأ و كمان أكمل تعليمي عادي و أجب جيد جداً. دانا أسطورة. مش قصدي أعايرك عشان مكملتش تعليمك على فكرة. قصدي اني فلتة. يا سلام عليا، أنا مصر فعلاً محتاجاني. سوبر كاكا قائد المصريين"

- "قولي يا بسيوي أنت ليه أناي؟ و بتحب تاخذ الحاجة اللي مش بتاعتك؟"
- "أنا عمري ما خدت حاجة مش بتاعتي. ما يمكن غيري هو اللي شايفها بتاعته"

- "أنت شايف كدة؟" أشار بإصبعه

- "ايه يا جماعة. هي مش اللعبة دي سؤال واحد ولا ايه؟"

أطفاً كريم التلفاز و رمق محمد في غضب. ظل محمد مذهولاً بينما كتم حازم وفهمي ضحكاً كما بصعوبة. حذق كريم به لفترة طويلة إلى أن شعر بالتوتر.

- "بسيوي! قصدي، محمد. أنت ليه بتحب تاخذ حاجة مش بتاعتك؟" صاح به كريم

- "أنت جايينا بيتك يا كريم، و جايب الفيلم مخصوص عشان توريني اللقطة دي؟"

- "طبعاً، عشان الدراما. فاكربي هعديها لك من غير دراما؟"

- "كريم. أنا داخل على سنة دلوقتي مع فريدة. تقدر تقول عليها أعمل سنة في حياتي. حسيت مع فريدة حاجات محسيتهاش قبل كدة. أنا فعلاً حاسس ان دي الإنسانية اللي هميش معاها بقية عمري. أنا بفكر أتجوزها يا كريم"

- "تتجوزها؟! مش كفاية خطبتها، كمان عاوز تتجوزها؟ أنت اتجننت يا محمد؟ ناقص تقولي انك ناوي تخش معاها تويلايت آخر جزء"

- "أه... انا دخلناه فعلاً" قال محمد و نظر في الأرض

- "دخلت تويلايت آخر جزء؟ ليك عين تقولها؟ دخلته أي ماكس؟"

- "أه فعلاً"

- "حوار الأي ماكس ده مش كدة؟ طب خلص على ايه؟"

- "آخر لقطة..."

- "أنت كمان هتقولي آخر لقطة يا محمد؟ أنت من الهاردة لا صاحبي ولا أعرفك. أنت بقيت بالنسبة لي ماضي و انتهى. اليوم اللي تبيع فيه أقرب صاحب ليك عشان خاطر بنت مزة يبقى هو ده اليوم اللي كل واحد فينا يروح من طريق. اطلع برة بيتي. اطلع برة يا كلب"

- "كريم. أنت شكلك بتشتغلني" قال محمد في حذر

- "وسعت مني مش كدة؟ تعالى يا ض يا عبيط ألف مبروك" عانقه كريم في حرارة فضحك محمد في ارتياح

- "يا بن اللذيذا. أنت مبتطلش قلش. في يوم هديك قفا يطلع من نافوذك"

- "عيب عليك و دي تيجي؟ دانا كاكأ. محدش يشتغلني" ضحك كريم، "بس حلوة اللقطة. جاييلك فيلم و جاييلك فطير. جو خرافي"

- "مانت خلاص عذيت. أنا مبسوط انك واخذ الأمور بهدوء. كنت مرعوب"

- "أتضايق ايه يا محمد؟ دا حنا حباب. مش أوي يعني، بس أصحاب"
- "هو ده العشم برضه. تخيلوا بقى الفرح هيكون امتي؟ بعد المباراة المصرية بيومين. مصر و زامبيا. تصفيات كاس العالم. آخر ماتش"
- "يا سلام؟ اشمعنى التاريخ ده؟ أنت متفائل بالماتش؟" سأل هازم ضاحكاً
- "جت صدفة مش أكثر. بالمناسبة يا كابتن مصر و نادي فولهام. عندك فكرة هנוصل ولا لأ؟" سأل ه محمد

- "هنوصل ولا لأ؟ هعرف مين يا محمد؟ هو أنا شفت التصفيات قبل كدة؟"
أجابه كريم في ارتباك مزيجاً ريشة وهمية من على رأسه
- "قصدي... مش هتلعب و توصلنا الكاس؟"
- "في الواقع يا جماعة أنا نفسي أمثل بلدي و أوصل بها لنهائيات كاس العالم. لحد دلوقتي محدش راضي عني. بس أوعدكم لو جالي حظ و لعبت في أي من الثلاث ماتشات دي هנוصل للكاس. أنتوا عارفين كويس مين كريم رأفت، ويقدر يعمل ايه. أوعدكم يا جماعة الصيام اللي مستمر من سنة ١٩٩٠ هينتهي، و كلنا هنبقى فاطرين بمشينة الرحمن. هנוصل الكاس يعني هنوصله"

طرق أحدهم الباب على غرفة كريم. فتح ليجد أخاه. "فيه واحد عاوزك برة يا كريم". تركهم كريم و خرج ليستقبل الزائر.

- "عامر؟"
- "كريم رأفت، كاكا الشرق. رجل المفاجآت"
- "خير؟ اطربني"
- "هتعمللي فيها مهم؟ أنا عشان بهزر معاك و عاملك مقام هتعيش الدور؟"
- "خلاص يا عامر هي جت عليا؟ بلاش. اتفضل حضرتك اطربني"
- "قول أنت مين النادي اللي طلبك الموسم الجاي؟" سأل ه في حماسة

- "الموسم الجاي؟ أنا هقعد أنط كل فترة انتقالات. الناس تقول عليا ايه؟"
- "أنت أهبل يا كريم؟ أنت عارف مين النادي اللي طلبك بالاسم؟ حاجة غير مسبوقة في تاريخ الكورة المصرية. كريم رأفت. أنت عدت خلاص و مش هترجع تاني. بقيت أسطورة الكورة المصرية كلها"

- "ايه يا عامر وترتني. مين النادي اللي طلبني؟"
- "النادي الملكي يا كريم" قال عامر دون أن يفقد حماسه الطاغية
- "النادي....النادي الايه؟" ردد كريم و هو لا يصدق
- "النادي الملكي يا كريم. ريال مدريد شخصياً عاوز يضمك الموسم الجاي"
سقط كريم أرضاً و ربما فقد وعيه. خرج الشباب مسرعين بعد سماعهم صوت ارتطام جسده بالأرض.

- "عملت فيه ايه؟" صاح فهمي في دهشة
- "صاحبكوا خلاص هيبقى أسطورة كرة القدم المصرية. الواد ده كل ما أجي أقول عليه عييط يعمل حاجة توريني انه مش طبعي. صاحبكوا هيروح ريال مدريد. ما تفوق يا عييط أنت" دفعه عامر بقدمه ليستفيق من الغيبوبة بينما شهق جميعهم في ذهول

- "مين عاوزني أمضي معاه؟" سأل كريم مرة أخرى غير مصدق
- "مش عاوز دلح. فيه اختبار معين لازم تعديه عشان ريال مدريد يوافق انك تمضي معاه. المدير الفني بتاع مدريد رزل شوية"
- "المدير الفني بتاع مين؟" استمر كريم في بلاهته
- "اختبار ايه يا عامر؟" سأل محمد في اهتمام
- "اختبار بسيط خالص. لو فيه حد هيعديه، اكيد مش هيبقى غير كاكأ. هيلعب ماتش لوحده قدام ١١ لعيب"

اللعب مع الكبار

- "أنا جمعتكوا اثماردة ليه؟" سأل رئيس الاتحاد الأوروبي في غضب باجتماعه مع رؤساء اتحادات المنتخبات المشتركة في كأس العالم
- "ليه يا فندم؟" سأل رئيس الاتحاد الإيطالي
- "اتكلمت ليه من غير ما أقولك؟ هتطلع من الدور الأول. ميسوط كدة؟"
- أجابه في عنف
- "ايه؟ ليه؟ عملت ايه؟" سألته في دهشة
- "غضب و اقتدار. أنا صاحب سلطة و بحب أقهر الناس، ما انتوا عارفين. حد تاني عاوز يتكلم؟ أنا عندي ست فرق أخرجها من الدور الأول، و أدي واحد فيكوا خرج. مين تاني عاوز؟ أنت!" أشار لرئيس الاتحاد الأسباني
- "أؤمرني يا أستاذنا" أجابه متملقاً
- "مش هتبطل طريقتك السوقية دي؟ مليون مرة أقولك القرف ده مبيجيش بطولات. بطل تتمسح يا أخي. السيناريوهات الكويسة و القدرات الإقناعية هم اللي ييجيوا البطولات. امتي هتفهم؟ الكبير زعلان منك عشان ماشي تشقلب و تقول انك هتكسب كأس العالم. مقرطسني و ماشي من ورايا تقول انك هتكسب؟ ماليش دعوة بالسيناريو الكبير اللي في دماغك ولا بطموحاتك. انما متخليش منظري مسطول و مش عارف ألم الناس اللي شغالة عندي. ليه رئيس الفيفا يعمل معايا مشكلة بسببك؟ قدمتلي ايه عشان تفتكر ان ليك لازمة؟"
- "أنا امتي قلت ايني....؟"

- "متحقق معايا يا بني انت؟ الكلام خلص. بالمناسبة، عندي ليكوا خبر هابل. مش عاوز حد يتعب نفسه و يحطلي سيناريو عشان تنظيم كأس أمم أوروبا. عارفين طبعاً ان الجاي كدة كدة في فرنسا مفهوش تغيير. أنا قصدي على اللي وراه"

- "ايه السر يا فندم؟ قررت خلاص هيتنظم فين؟" سأل أحدهم في اهتمام
- "أبدأ. جالي تليفون من رئيس ديوان المحاسبة في الاتحاد الأوروبي. كلكوا واخدين بالك من الأزمة المالية اللي عايشينها الدول الأوروبية و بالتالي، قررنا نعمل حملة تقشف"

- "تقشف؟ مش هنعمل بطولات يعني؟"

- "بتجيبوا الأفكار المتخلفة دي منين؟ مش مصدق ان كيان كبير زي ده وشغال فيه ناس غبية. لولا مجهوداتي كان زمان المنظومة دي قلبت فرن عيش، ما علينا. تقشف يعني مفيش دولة أوروبية هتشيل البطولة لوحدها. بدل ما السبوبة تنقسم على بلد واحدة، هتنقسم على كذا بلد. هنختار البلاد بمزاجنا، بالتنسيق مع رئيس الديوان و نعرف منه مين البلاد المستعدة. الموضوع بقى مصالح دول، مالوش دعوة بمصالحكم الشخصية يا حلوين. مش كل البلاد عندها فلوس تصرف على إصلاحات و بنية تحتية، و مش كل البلاد تستاهل يتعمل عندها سياحة جامدة و تلملها قرشين. اللي احنا عاوزينها تاخد فلوس هي اللي هتاخذ. مش عاوزكوا توجعوا دماغكوا. خليتلكوا البطولة ٢٤ فريق، يعني الفرق هتبقى أكثر و كله هيهيص. لكن شرف التنظيم ده بتاعي"

- "فكرة هائلة فعلاً" أجاب رئيس الاتحاد الأسباني

- "لولا ان رئيس الفيفا مصر انك توصل، كان زمامي طلعتك من الدور الأول"

- "ليه التمييز؟" سأل رئيس الاتحاد الصربي في انزعاج

- "أنت بره من الدول الأول. و أنت كمان يا بتاع سويسرا"

- "طب أنا عملت ايه؟" سأل رئيس الاتحاد السويسري
- "مش مطلوب مني أبرر موقفى لحد فيكوا. هو كدة. مزاجي" أجابه في
عنف، "رئيس الفيفا معجب بسيناريوهاتكم، و بيقولكوا انه متحمس للكاس.
زيادة عن اللي أنا طلعتهم، هو مش مقتنع بسلوفينيا ولا الدنمارك. من الآخر هو
خلاص حدد فرق نص النهائي. فكله يريح نفسه و يبطل يتمسح هنا و هناك. اللي
أسمع انه حاول يعمل مصلحة كدة ولا كدة من ورايا هيطلع من الدور الأول
بفضيحة. فاهمين؟"

- "أنا عملت ايه؟ أنا مقلتش لحد اني هكسب الكاس" قال رئيس الاتحاد
الأسباني في تضرع

- "شفت اللي بيعجي عليا و يعمل نفسه جامد بيحصله ايه؟" أجابه رئيس
الاتحاد الأوروبي بابتسامة خبيثة

- "طب أنا غلطت في ايه؟ قولي أعمل ايه عشان فرصتي للفوز ترجع"
- "خلينا واضحين. اللي عاوز يكسب كاس العالم ده لازم أنا اللي أوافق عليه
الحركات القرعة و المرواح لرئيس الفيفا مبيجيش نتيجة. لازم تقنعوني لوحدي
من غير الفيفا" قال رئيس الاتحاد الأوروبي في حزم

- "طب طلبات سعادتك ايه؟" سأل رئيس الاتحاد الأسباني
- "مش هرد عليك أصلاً عشان متعيش صحي و أعصاي. كل واحد فيكوا
هيقول رقم. و اللي الرقم بتاعه يعجبني أكثر هختاره"

- "ايه مقياس الرقم اللي هيعجب حضرتك؟" سأل رئيس الاتحاد الأسباني في
غباء

- "أنت مفيكش حاجة تشفعلك؟" سأل في حدة، "يعني ملزق و بتتمسح
وبفوتلك، انما كمان غباءك مورددش على حد؟ مفكرتش مثلاً ان أكثر رقم
هيعجبني هيكون هو... الرقم الأعلى؟!!!"

- "أه تمام فهمت" رد في ذكاء يحسد عليه

- "طب يلا ابدأ و سمعي"

- "مليون يورو كويس؟" سأله في قلق

- "مليون يورو بس؟ دي متجيش مصاريف فانات اللاعبة و الجزم اللي

هيليسوها. ما علينا. اللي بعده"

- "٢٠ مليون يورو" قال رئيس الاتحاد الهولندي في ثقة

- "أوبا. حلو ده. عاوز منه كتير" قال و قد لمعت عيناه

- "٢٠ مليون يورو و نص" قال رئيس الاتحاد الألماني في ذكاء

- "الحركات دي متفgesch. اللي هيقول فرق عن التاني لازم يكون على الأقل

اتنين مليون. مش بحب التهريج"

- "بصراحة الكاس مش مستاهل كل ده. عندنا أولويات" قال رئيس الاتحاد

الألماني في حسم

- "تصور احترامك. شايفين الناس النضيفة؟ تصور عشان الحركة دي هسيك

تكسب الكاس؟"

- "بجد؟" صاح رئيس الاتحاد الألماني في لفة

- "لأ طبعاً. كدة ألمانيا خرجت من الحسبة. إنجلترا هتقول حاجة؟"

- "احنا واخدين فلوس حلوة، و هقولك ٣٠ مليون"

- "حلوة ٣٠ مليون مش وحشة. نقول مبروك على إنجلترا؟"

- "لأ، هو أنا هسكت؟ نص مليار" قال رئيس الاتحاد الأسباني في مفاجأة

للجميع

- "كام؟ ن... نص مليار يورو؟ هتجيبهم منين دول؟" تلعثم رئيس الاتحاد

الأوروبي، "أنا من زمان بقول منتخب أسبانيا ده فذ و عريق. افكرت دلوقتي انت

ليه خدت كاس أمم أوروبا. بتعرف تقنعي. ألف مبروك على المنتخب الأسباني

بطولة كأس العالم. شوف رغم سماجتك بس عندي ٥٠٠ مليون سبب ينسوبي

قرفك. مبروك عليكى اليورش يا سيسيل"

وصل كريم لاستاد ريال مدريد و قدماه بالكاد تحملانه بينما حاول عامر قدّمته في نقاد صبر. استقبلهما المدير الفني للنادي في برود شديد. لم يلتفت له عامر وطلب من كريم نفس الشيء. قادهما في عدم اهتمام إلى أرض الملعب ليبدأ الامتحان. انتظروا قليلاً إلى حين وصول أعضاء الفريق المديردي. مضت ربع ساعة و لم يأتوا بعد فبدأ كريم يتوتر.

- "سيبك منهم" طمأنه عامر، "دي حركات عشان يلعبوا بأعصابك. ملكش دعوة لحد ما الماتش يبدأ"

- "حاضر. ليه خوسينيو المدير الفني شايف نفسه علينا؟"

- "عقدة نقص. الناس اللي في مراكز السلطة بتشوف نفسها. الاتحاد الأوروبي بيحبه اكمنه مثير للجدل خصوصاً في تصريحاته فيعمل جو للكرة. زي ما الناس اتكلمت عليك في الأول عشان مثير للجدل. الصحافة تحب جنازة وتشبع فيها لطم. أول ما خوسينيو يتكلم تلاقيهم ماسكين في اللي يقول. بيعرف ازاى يلعب الصحافة و هم مستنيين منه ايه و بيديهولهم. ليه هيقول حاجة محترمة أو لطيفة لما الصحافة مستنيه يقول تصريح خطير و مثير للجدل ياكلوا عليه عيش طول الأسبوع؟ ماسك فرقة كبيرة وراها فريق إبداعى خطير. من الآخر بق على القاضي، مالوش أي لازمة. جو يوسف شاهين، أفكاره و مخططاته الرائعة سابقة عصره، و محدش فينا احنا المتخلفين يفهمها. هو ده السيناريو بتاعه. خرينا نكمل كلامنا بعدين. الشباب وصلوا"

تقدم مجموعة من اللاعبين مرتدين القمصان البيضاء لريال مدريد. دخلوا الملعب في ثقة متوقعة، فهم في النهاية فريق كامل يتحدى فتى مراهق. نظروا إلى كريم في استخفاف و بدأ يصحك بعضهم. صافحهم كريم في أدب مفتعل حيث تمنى لو صرخ في وجوههم جميعاً بأنهم ظالمون. تماسك و بدأ عملية إحماء خفيفة، بينما لم يهتم أي منهم بذلك. شعروا أنها نزهة في الحديقة الخضراء للمعهم، رغم كونهم أعضاء التشكيلة الاحتياطية للفريق.

- "ممكن نراجع القوانين؟" سأل كريم محاولاً كسب بعض الوقت

- "مفيش قوانين" قال خوسينيو، "تلت ساعة. يا تجيب جون يا مع السلامة.

ابدأوا"

بدأت المباراة الغير متكافئة بين كريم و ريال مدريد. لو قرأ أحدهم جملة كهذه في الجرائد لظن المقصود بها أن كريم هو نجم فريقه و بالتالي تعتبر هذه مباراة بين فريق كريم و فريق ريال مدريد. هذه المرة كان الأمر حرفياً؛ كريم في مواجهة ريال مدريد. بدأت ضربة البداية و سيطر المهاجم على الكرة منتظراً أن يحاول كريم قطعها منه. ظل كريم مكانه يراقبه في حذر. لم يود إضاعة مجهوده في معركة غير متكافئة فانتظر قرار المهاجم. اتبع المهاجم سياسة اختبار الخصم و سدّد الكرة تجاه مرمى كريم. في ثوان ركض كريم للحصول عليها و وقف في نصف ملعبه. نظروا إليه في شك بعدما رأوا سرعته. شعر كريم أنه أخطأ باستعراض قدراته البدنية في الدقيقة الأولى. حاول استغلال عامل المفاجأة و انطلق مهاجماً ربما يحالفه الحظ وتنتهي المباراة سريعاً. أخذ يعدو على خط التماس متخطياً بسهولة ثلاثة لاعبين متمركزين في وسط الملعب. أصبح عليه أن يميل للداخل قليلاً كي يقترب من المرمى. دفع الكرة ثم قفز متفادياً عرقلة من لاعب رابع. اقترب أكثر ثم سدّد كرة أخطأت المرمى.

لعن حظه و عاد أدراجه. صدمته حقيقة أنهم قد يلجأون للعب في نصف ملعبهم إضاعة للوقت، فهم لا يحتاجون لإحراز أي أهداف. وقف منتظراً الخطوة القادمة. ندم على تسرعه بالهجوم بعدما كان قد نصحه عامر أن يمتص حماسهم في الدقائق الأولى بإعطائهم مباراة مملّة. أفهمه أن ما يدفع لاعبي الكرة في الاستمرار بمباراة خمس و أربعين دقيقة متواصلة هو المنافسة. فلو تركهم بدون أي منافسة أو إثارة لمدة ربع ساعة سيشعرون بالملل و يبدأون في محاولة جذبه للمباراة. هكذا نصحه عامر، و لم ينفذ. ظهر السخط على وجه عامر لأجل ذلك. انطلق أحد لاعبي خط الوسط بالكرة رداً على كريم ليظهر له سرعته. ابتسم كريم و تعجب

من محاولة لاعب محترف في ريال مدريد إثبات نفسه. تذكر بعدها أن روح المنافسة عند الشخص قد تدفعه لأي تصرف. ركض نحوه ليخطف الكرة فأدار اللاعب ظهره ليحتجزها أمامه في سخافة. حاول كريم أن يدور من خلفه لكنه استمر بإعطائه ظهره. لجأ كريم للعنف و سعى لركل الكرة من أمامه فاستفز اللاعب إلى دفعه بكتفه بقوة مبالغ فيها فطار كريم و سقط أرضاً.

ضحك اللاعبون من المشهد، مما أثار غضب كريم. قفز من مكانه و خطف الكرة من اللاعب المنشغل في المرح و انطلق بها سريعاً. دخل عليه لاعب آخر فدفعه كريم بذراعه. انتبه فجأة أن عدم وجود قواعد يخدمه هو الآخر. استمر في هجمته إلى أن باغته لاعب من الخلف و جذبه من قميصه فسقط أرضاً و فقد الكرة. ركلها اللاعب بظهره في سلوك مقزز ثم مررها لأحد الزملاء. بعد خمس دقائق من اللعب اكتشف كريم أنه أمام مهمة شبه مستحيلة. نام على الأرض قليلاً ناظراً للسماء. فكر في نصيحة عامر يعطائهم مباراة مملة. قام في هدوء و تجول في الملعب دون اهتمام. نظروا إليه في حذر من ألاعبه لكنه لم يحاول الاقتراب منهم. بدأ كل لاعب يمرر لزميل آخر في جولة من التمريرات الثابتة. راقبهم في صمت مفكراً كم سيمر من الوقت قبل أن يشعروا بالملل. مرت ثلاث دقائق أخرى و هم يفعلون الشيء نفسه. بدأ يتوتر لأن أمامه أقل من اثني عشر دقيقة لتحقيق الفوز. قاده توتره إلى التسرع ثانية فاقترب محاولاً الاشتراك بلعبة القط و الفأر مما أثار حماسهم و استمروا بالخطوة المشينة.

وقف عاقداً ساعديه أمام صدره. لوح لأحدهم بإصبعه محاولاً استفزازه. انفعل اللاعب و ركل الكرة بقوة لتضرب أنف كريم فسالت الدماء بغزارة و سقط أرضاً. حاول ألا يفقد تركيزه من الألم و نهض بأسرع ما بإمكانه و أخذ الكرة. وجد هجوماً كارثياً كما توقع من لاعبي الفريق لاسترداد الكرة. فكر في استخدام استراتيجية عبور الطريق. اعتبر كل منهم سيارة يحاول تفاديها في خفة، و يقف بعدها في نصف الطريق لتفادي التالية. نجحت الخطوة مع ثلاثة منهم فتوصل البقية

إلى تطويق المنطقة عليه. وقفوا بعرض الملعب لئلا يتركوا له مجالاً. ركل الكرة لأعلى من فوق رؤوسهم ثم ركض في دائرة واسعة محاولاً المرور من خلفهم. أخذ يعدو بأقصى سرعة مما دفع خوسينيو لرفع حاجبيه مندهشاً. وصل للكرة مستغلاً عامل المفاجأة مرة أخرى و أصبح منفرداً بالرمي و البقية من خلفه. خرج الحارس من موقعه فحاول أن يحرز الهدف عن طريق إسقاط الكرة من فوقه. أخطأت الكرة المرمى ثانية و وقف كريم مشدوهاً.

تباطأ الحارس في الذهاب لإحضار الكرة. دب اليأس في أوصال كريم مع تبقي سبع دقائق على نهاية المباراة. بدأوا في التجول بالكرة ثانية مما سبب له المزيد من الإحباط. شعر بالدوار لفقدان الكثير من الدماء مع المجهود الذي تطلبته الهجمة الأخيرة. سقط على الأرض في يأس و تنفس في سرعة مع تسارع ضربات قلبه. مضت دقيقة أخرى في هذا الوضع و لم يحرك ساكناً. ضحكوا في فخر و كأنهم انتصروا على فريق برشلونة في الكلاسيكو. نهض كريم في هدوء ناظراً إليهم بابتسامة مريية.

"أداء هائل. برافو" صاح ليتأكد أنهم يسمعون، "طبعاً حاسين انكم جامدين. ما هو عشان كدة قاعدين على الدكة. الروح التعبانة اللي بتلعوا بيها هي اللي مخلياكوا احتياطي ريال مدريد. معقولة بتلعوا قدام لعب واحد و مش عارفين تجيبوا جون؟ انتوا متستاهلوش الاحتياطي حتى. كان زمان الأساسيين بتوعكوا كسبانين بعشرين جون على الأقل. بس هي قدرات"

استفز كلامه أحدهم فانطلق بالكرة في طريقه إلى المرمى. ركض كريم تجاهه ودفعه بقوة شديدة مستغلاً قوة اندفاعه فطار من مكانه كأنها مباراة رجبي. ركض كريم تجاه الكرة و انطلق في هجمة سريعة من الوسط بعد تقدم بعضهم إلى الأمام مع الهجمة السابقة. أسرع إلى الأمام حتى تبقى أمامه ثلاثة مدافعين. في حركة أكروباتية سريعة انحنى ليخلع إحدى فردي حذائه و تظاهر بالقائها عليهم. حموا وجوههم بأيديهم في حركة تلقائية. استغل كريم تلك الثانية و ركض ماراً

بجوارهم، حاول أحدهم اعتراضه فضربه بالحذاء في ضلع. صاح في ألم بينما ألقى كريم الحذاء على حارس المرمى و سدده بعدها بقوة، و اهتزت شباك ريال مدريد. وقف عامر مذهولاً و تدلى فك خوسينيو لأسفل.

قام كريم و قميصه غارق بالدماء السائلة من أنفه. سار في خطوات ثابتة بوجهه الأبيض كأنه جثة متحركة. ترنح لسيره بفردة حذاء واحدة و ملأ العرق و القذارة وجهه و جسده. اقترب من خط التماس حيث وقف عامر و خوسينيو.

- يابن المجنونة" صاح عامر في ذهول

- "من غير قوانين؟ دي لعبتنا احنا" صاح و هو في طريقه لغرفة خلع الملابس

- "مبروك يا كريم. أنت عملت سبق في تاريخ الكورة المصرية. أنت بقيت لاعب في ريال مدريد" قال عامر مهتماً بابتسامة صادقة. لم يكف عن الضحك منذ تجاوز كريم للاختبار

- "الله يبارك فيك. قرئت في العقد ان فيه تأمين صحي. مناخيري دي على حسابهم مش كدة؟"

- "بقينا نقرا العقد كمان؟ دانت بقيت جامد. هبدأ أخاف منك. بصراحة بعد مشهد الجزمة لازم كله يخاف منك. خوسينيو كان هيعمل على نفسه" ضحك في تلذذ

- "خافوا مني. أنا مرعب" أشار كريم بيديه كأنه وحش، دون أدنى ابتسامة

- كل اللي فات ده كباية مانجة، و اللي جاي كباية مانجة تانية خالص. عاوزك تاخذ بالك انك فعلاً علمت على العيال دي، بس دي آخر مرة هتعرف تاخذ فيها حق أو باطل منهم. أيام اللعب مع العيال خلصت. أنت ميقتش صغير. أنت جيت في دوري مييتحكمش فيه غير فريقين. ريال مدريد و برشلونه. أكبر دوري تجاري في العالم. دوري الفلوس. رئيس الاتحاد عامل دماغ و سايب الدنيا تضرب تقلب

في الدوري و سايب الحبل ع الغارب للفرقتين الكبار. فين و فين لما يرجع بيص على السيناريوهات. عارف كام لعب جه النادي ده و كله طموحات انه يبقى حاجة و بكل بساطة حطم أحلامه كلها؟ ريال مدريد ده مقبرة اللاعبة. ماشي بالكوسة. فيه لاعبة معينة بتكيف المدير الفني. دول بس اللي بيضطهم"

- "و أنا ازاى أكيفه؟ مع تحفظي على الكلمة"

- "معنديش فكرة بصراحة. بس لو عرفت تخش دماغه هتنجح. طبعاً هتلاقيه يقول انك لاعب مهم في النادي و أساسي. متاخذش بكلامه؛ ده للصحافة بس. هتلاقي نفسك على الدكة تاني ماتش كأنه مقالش حاجة. أنا بأكد عليك يا كريم. بس مش في ايدك تعترض. النادي ده أعلى حاجة ممكن توصلها، مينفعش فيه هزار. أنت دلوقتي بتلعب مع الكبار، و اللعب مع الكبار مينفعش فيه حركات العيال اللي أنت متعود تعملها. مينفعش تخالف سيناريو عشان تعمل مجد شخصي. كدة هتقضي على نفسك"

- "مفهوم يا عامر. بس هعمل ايه في مشكلة الجامعة؟"

- "بسيطة. اعمل تأجيل. سافر لندن و ظبط جدولك على الصيف الجاي. أكيد مش هتضيع الفرصة دي. خلّص حاجاتك المتعلقة عشان هترميها وراك، وتبدأ حياة جديدة هنا"

استعد كريم للمؤتمر الصحفي الضخم الذي سيشهد وصوله للنادي. طوال الصيف لعبت الصحافة دورها في ترويج الإشاعات التي وصفها جميعهم بالمؤكدة. التقارير المبدئية أكدت توقيعه للعلاق البافاري بايرن ميونيخ. ظهر بعدها مديره الفني ينفي الخبر و أنهم لن يقوموا بأي صفقات لهذا العام، ليعلن بعدها بأيام انضمام ماندلزو كيتش لاعب كرواتيا و خافي مارتينيز لاعب أسبانيا في تناقض مسبوق. صدرت تقارير على لسان المدير الفني لمانشستر سيتي أنه مهتم بكاكّا، والتي نفاها اليوم التالي على الفور. أعرب بعدها المدير الفني لفولهام عن سخطه

بكثرة الشائعات حول لاعبه، و أنه يأمر جميع المهتمين بكাকা أن يتعدوا عنه فهو ليس للبيع. في النهاية أعلن كريم في حسابه على تويتر عن انضمامه للنادي الملكي. المؤتمر الصحفي المقبل سيشهد الإعلان الرسمي لذلك. حضر المؤتمر كل من خوسينيو و كريم و معهم بعض الإداريين بالنادي.

"أحب أعلن عن الإضافة الجديدة للميرنجي ريال مدريد، و هو اللاعب المصري المتميز كريم رافت الشهير بكাকা" قال خوسينيو في عدم اهتمام كأنه يحاول بيع سلعة غير مقتنعة بها. صفق الحاضرون في حماس، حيث أنها الصفقة الأولى من نوعها لضم لاعب مصري. ابتسم كريم في سعادة و هو يحمل فانلته البيضاء الجديدة أثناء التقاط صورته. انتهى عرض الأزياء و استعد كريم لتلقي الأسئلة.

- "احساسك ايه يا كাকা بعد ما وصلت للي أنت فيه؟ بعد البداية المتخبطة في كريستال بالاس بلقب لاعب السبعين دقيقة، مروراً بموسم في نادي متوسط زي فولهام بالدوري الإنجليزي الممتاز. عمرك تخيلت انك هتلعب مع نادي نقدر نجادل انه أكبر نادي في العالم؟"

- "ريال مدريد فعلاً أكبر نادي في العالم. دائماً و احنا أطفال بيبقى لنا حلم واقعي، و حلم غير واقعي. الحلم الواقعي ده اللي بنسعى ناحيته و بنحس انه قريب. الحلم غير الواقعي بنستخدمه عشان نعطي سقف طموحنا. الواقعي بالنسبة لي كان اني ألعب في كريفين كوتيدج مع نادي فولهام اللي لحد دلوقتي بعتر اني كنت واحد من أفراد و عشان كدة رفضت الانتقال لأي نادي تاني في لندن. حلمي الغير واقعي اني ألبس الفانلة البيضاء و ألعب مع العملاق الأسباني، أكبر نادي في العالم. احساسي ايه؟ حاسس اني في حلم مش عاوز أصحى منه. هلعب جنب الناس اللي بشوفها في التلفزيون. حاسس الموضوع فوق الواقع" أجاب كريم في سعادة

- "كونك أول لعيب مصري ينضم للنادي، هل حاسس انك تستاهل الشرف ده، ولا فيه لاعبية تانية أحسن منك و كان لازم تسبقك؟"

- "دائماً بحب أبص للي قدامي. أنا دلوقتي في ريال مدريد، هل فيه لاعبة أحق مني؟ ممكن. بس أنا اللي وصلت مش هم. المجتهد مهما كان مستواه متوسط يوصل في الآخر. و أنا اجتهدت أوي و حاسس اني أستاهل اللي وصلته بغض النظر فيه غيري يستاهله ولا لأ. أتمنى التوفيق طبعاً لأي حد تاني" أجاب في دبلوماسية

- "لعبة كتير جت قبلك و كلها طموحات، بس بعديها اكتشفوا ان حلمهم مش سهل زي ما تخيلوا. نادي ريال مدريد كبير جداً و المنافسة فيه قوية. مش أي لعب بياخذ شرف بدء المباريات. تفتكر هتكون قد التحدي وسط لعبة بحجم لعبة النادي الملكي؟"

- "أحب أتخيل كده. حلمي عمره ما كان سهل. لما كنت عاوز أبدأ كورة محدش شجعني أو قالي روح احترف. كل الناس شككت في قدراتي و حست اني عمري ما هنجح و اني عيل صغير. دلوقتي و أنا عندي ١٩ سنة بس أثبتلهم اني أستاهل اللي أنا فيه. أظن اني هفضل أثبت للناس قيمتي و اني مش بوصل للي فيه من فراغ. الوصول لريال مدريد نفسه مكانش سهل حتى بعد ما عملت موسم حلو في فولهام. قبل ما اجي النادي هنا عملولي اختبار أشك ان حد ممكن يعديه بسهولة، تخيلوا...."

- "طبعاً عملنا له اختبارات بدنية كتير عشان يثبت كفاءته" تدخل خوسينيو بسرعة قبل أن يكشف كريم ألعابه المريضة، "هقولكوا حاجة مهمة. أنا ليا نظرة في اللعبة. أنا كسبت دوري أبطال أوروبا قبل كدة بفرقة محدش تخيل انها هتوصل. كل ده نابع من خبرتي التدريبية و قراراتي الحكيمة. عمري ما هجيب لعب لنادي الريال من غير ما أكون واثق منه. ريال مدريد نادي كبير و محدش أكبر منه. تاريخ النادي بيتكلم عنه. المدرب اللي من كام يوم رمي كلام و قال ان عنده ملحوظات على ريال مدريد ده خليه يقولي فرقته عملت ايه الموسم اللي فات. لو قعد عشر سنين عمره ما هيوصل للمستوى الفني ولا للتاريخ اللي وصله

ريال مدريد. متهياً لي لو ركز شوية في شغله و بطل يبص على النوادي الثانية وينتقدها حاله هيبقى أحسن. معلش هو كان ايه السؤال؟"

- "بم ان حضرتك نقلت الحوار لجرى تاني خالص، فرصة أسألك عن مستقبلك في النادي. سيطرة برشلونة بقاله ثلاث مواسم مش محلية حد في النادي مبسوط من حضرتك. فيه كلام كتير عن افهم بيدوروا على بديل. مش قلقان ان نهايتك ممكن تكون قربت؟"

- "هقولك جملة واحدة. أنا لا أخشى على مستقبلي مع ريال مدريد. بعدين ده مش وقت كلام على مستقبلي. احنا هنا عشان نتكلم على...؟"

- "كاكا. اللعيب الجديد"

- "أيوه بالظبط، على كاكا. آخر الإضافات للنادي اللي أنا جبتها بذكاني وبعد نظري. أنا دائماً بشوف حاجات في اللعبة محدش غيري بيشفها. ناس كتير تقولي يا خوسينيو بتزل برجمة ليه مع انه مش بييجب أجوان؟ يا خوسينيو ليه بتسيب سامي خضيرة يلعب مع انه لحد دلوقتي مقدمش المطلوب منه؟ أحب أقول لكل اللي يشكك في قدراتي ان تاريخي بيتكلم عني. أنا مدرب ثقيل" أجاب خوسينيو

- "فيه بعض الناس بتشكك في قرارات حضرتك. تفضيلك لبعض اللاعبين على غيرهم رغم فرق المستوى الواضح. فيه إشاعات انك بتسيب المسائل الشخصية تندخل"

- "مسائل شخصية؟ أنا مدرب محترف. دي بتبقى قرارات فنية مش هيفهمها غير اللي شغلته يقعد مع اللعبة و يشوف مستوياتها. عمر المسائل الشخصية ما تيجي في شغلي أبداً. أنا مدرب موهوب. و بعدين قولي أنت عملت ايه مع النادي بتاعك عشان تيجي تحاسبي؟"

- "أنا؟ أنا مجرد صحفي يا بنقل الأخبار و باخد انطباع حضرتك عنها" أجابه

في دهشة

- "بالظبط كدة. يبقى متجيش تحاسب مدرب في حجمي. أنا فاهم كل حاجة.

أنا عبقرى، أنا نابغة"

- "كلام حضرتك ده مش فيه غرور؟"

- "غرور؟ أرجوك متقولش عليا مغرور. أنا راجل واخد بطولة أوروبا، أظن

ده يخليني راجل استثنائي"

- "قلت الكلام ده قبل كدة في تشيلسي و ما خدتش بيهم بطولة أوروبا.

لقب الرجل الاستثنائي ده حضرتك اللي مديه لنفسك"

- "أنا بطل أوروبا. و أنا راجل استثنائي فعلاً. ده مش غرور؛ ده حسن تقدير

للذات. لو مش الناس كلها شايقة ايني استثنائي كنت همسك نادى في حجم ريال

مدريد؟ أحسن نادى في العالم مش هيخليني أبقي مسئول عنه إلا لو متأكد ايني

هجيله بطولة أوروبا. أوعدكم خلال سنتين بالكثير هيكون ريال مدريد بطل

أوروبا للمرة العاشرة في تاريخه" أجاب في ثقة

- "سؤال لكاك. ايه تطلعائك للمستقبل؟ أنت شايف انك وصلت لل قمة ولا

لسة ليك طموحات تانية؟"

- "لأ لسة فيه حلم نفسي أحققه. حلمي ايني أوصل بمصر لكاس العالم و نلعب

في أكبر بطولة في التاريخ. و أنا بابعت صوتي للمدير الفني لمنتخب مصر و أقوله

ايني بحلم بالتمثيل المشرف لبلدي. أرجو منه انه يسمعني و يضمني لقائمة المنتخب

و نحقق حلمنا" أجاب كريم في تضرع

- "نتمنا لك تحقيق حلمك يا كاك و نتمنا لك التوفيق في تجربتك بنادى ريال

مدريد"

- "و أنا من مكاني بتمنى التوفيق لكاك" تدخل خوسينيو ثانياً، "و أنا واثق فيه

طبعاً و من أداؤه البطولي و إلا مكنتش هأخذ الخطوة الجريئة ايني أضرم لآعب

مصري لنادى كبير زي الريال. ده يدل على مدى عبقرىتي و نبوغى....." استمر

دون أن يلحظ رحيل الصحفيين.

انتهت أول مباراة في الموسم بالفوز الساحق لريال مدريد بخمسة أهداف نظيفة. في المعتاد يعد ذلك خبراً سعيداً لأي لاعب في النادي. بالنسبة لكريم، صعب عليه الشعور بالسعادة عند قضاء المباراة كمشاهد من على دكة الاحتياط. لم يعطه خوسينيو سبباً واضحاً لإبقائه لاعباً احتياطياً، و هو أمر لم يعتده. عندما ذهب ليسأل مثله الإبداعي الجديد عن مستقبله في النادي لم يجده بمكتبه. ذهب لإحضار القهوة في بداية الموسم و لم يره منذ ذلك الحين؛ خرج و لم يعد. شعر بالإحباط و أيقن بعدم الاستقرار في النادي. تحسس عنقه شاعراً بنهايته القريبة في مقبرة اللاعبين. حاول الحفاظ على روحه الإيجابية رغم كل شئ. رأى أن يتكلم مع خوسينيو لعله يتعاطف معه. توجه إلى مكتبه، ثم طرق الباب و دخل على الفور.

- "خطبت كويس قبل ما تدخل؟" سأله خوسينيو في انزعاج

- "أيوة يا مستر خوسينيو. خطبت ثلاث مرات"

- "أنا قتلتك ادخل؟"

- "اللي فهمته ان أي حاجة بنحتاجها نيجي لحضرتك، و ان بابك مفتوح لينا"

- "بابي مفتوح ليكوا؟ شفتني سايب الباب مفتوح؟" سأل في استنكار

- "تعبير مجازي يا مستر خوسينيو"

- "تعبير مجازي؟ أنت فاكّر نفسك هتاخدني بالكلام؟ لأ مش هتغلبنى في

الجدل. أنا راجل عبقرى و يعرف ازاى أقول تعبيرات مجازية كويس. تحب أوريك كام تعبير مجازي من عندي؟"

- "مش محتاج يا مستر خوسينيو، مش قصدي..."

- "ممكن بكل سهولة أقولك كام جملة توريك اني عبقرى و مفكر. أنا مش

سهل"

- "مفيش مشكلة. اتفضل قول زى ما تحب" رد كريم في نفاذ صبر

- "ممم. الحيطان... السما... مفيش حاجة في دماغي دلوقتي. بس متفكرش عشان قلت تعبير مجازي انك أقوى مني فكراً أو فنياً. أنا استثنائي"
- "أنا واثق من ده. لو كان الممثل الإبداعي بتاعي موجود مكنتش جيت هنا"
- "و ليه متجيش؟ أنا عمري اتأخرت عن حد فيكوا؟ تعبير مجازي أهه. شفت بقي؟" ابتسم في ظفر
- "آسف اني جيت" قام كريم من مكانه
- "استنى يا كاكأ. تعالى هنا" قال في حزم
- "أفندم يا مستر خوسينيو؟"
- "عارف أنا جبتك ريال مدريد ليه؟"
- "بصراحة؟ لأ. لو أعرف حياتي هتبقى أحسن" نظر إليه كريم في تضرع
- "أقولك أنا. جبتك ريال مدريد عشان لاعب موهوب و صاعد. و احنا في النادي منحيش يبقى فيه لعب جامد مش عندنا. لازم يبقى في الفريق بتاعنا. مش مهم يلعب أو ميلعبش، المهم منسيبوش لغيرنا. أي موهبة كويسة بتفيد الفريق والدوري. أنا اللي شفتك و أنت بتلعب و أعجبت بيك. متخلنيش أندم"
- "مش هتندم طبعاً يا مستر خوسينيو. بس أنا معنديش أي فكرة عن السيناريو بتاعي. كدة بقيت شخصية دور تالت، ماليش أي بعد لا في المشاعر ولا في أي حاجة؛ شخصية ليها جانب واحد بس. محدش هيهتم بيا. اللي خلى الناس تحبني زمان مش هيبقى موجود. أنا في خطر. ده مش تقليل من حضرتك، بس خوف على مستقبلي. حبيت أعرف راسي من رجليا و أعرف أنا واقف فين"
- "أنت عاجبني يا كاكأ. و عشان عاجبني هساعدك. عارف ايه اللي خلاني محقق النجاح طول الفترة اللي فاتت؟"
- "ايه يا مستر خوسينيو؟"
- "اني معنديش أي نقط ضعف. و عقبال ما حد بيكتشف فيا نقطة ضعف، بكون حولتها لنقطة قوة" قال في غرور

- "أه. تمام. ده شئ كلنا عارفينه. نرجع لموضوعنا؟ قلت هتساعدني"
- "هساعدك في ايه؟ أه. فيه سيناريو مش بديه لأي حد. الناس اللي بحبها بس. حاجة حصرية"
- "ايه يا مستر خوسينيو؟ هدايف الفريق؟"
- "لأ. البديل الخارق"
- "البديل الخارق؟ أفضل قاعد على الدكة و أنزل في آخر عشر دقائق أجيب جون؟"
- "بالظبط. مانت حلو أه. هخليك البديل الخارق بتاعنا. مبسوط؟"
- "أه مبسوط جداً. متشكر يا مستر خوسينيو. بعد إذنك" انتعش الأمل لدى كريم و فكر أن حظه ربما يتغير
- "استنى يا كاكأ، مخلصتش كلامي" التفت كريم ثانية، "أنا جالي تليفون بخصوصك. فيه حد سأل عليك. واحد اسمه... شحتاوي... نمساوي... مش فاكر بالظبط... بيقول انه المدير الفني لمنتخب مصر"
- "محمد الشحات؟"
- "أيوة الشحات. تعرفه ده؟" سألوه في غياب
- "أعرفه؟ ده المدير الفني للمنتخب الوطني المصري" صاح كريم في لهفة
- "يلزمك في ايه يعني؟ ما علينا. بيقول عاوزك تنضم لقائمة المنتخب"
- "قائمة المنتخب؟ بتتكلم بجذ؟ أنا هلعب في المنتخب و أمثل بلدي؟ أنا حاسس اني بحلم" رقص في سعادة
- "يااه، هتعمل كل ده؟ طب مفيش حاجة علينا؟ أنت فاكر أي حد بياخد مني معاملة الفنادق الملكية دي؟" نظر إليه في خبث
- "ايه المطلوب مني؟ أي حاجة تطلبها هعملها لك" قال في حماسة

- "ما علينا. متأسف اني عملت كدة. تحب نتكلم في الشغل امتي؟"
- "من عشر دقائق فاتوا؟"
- "حاضر. كنت باعتي أخرى عنك و أشوف المعلومات اللي أقدر أوصلها عن تاريخك و وضعك الحالي"
- "دي مراجعة ما سبق دراسته؟ ما تخلص يا نجيب ورايا حاجات. حد قالك اني مخصص يوم السبت عشائك؟"
- "مش أنا اشترطت عليك تبقى صريح معايا لأن أي معلومة ممكن تساعدني؟"
- "اشترطت عليا؟ مينفعش تتشرط عليا. أنت تقول اللي عاوزه و أنا أختار أوافق عليه ولا لأ"
- "ماشي. حسب ما فهمت منك، كان عندك مدير قديم حاول يلوي دراек فطّشّته، مطبوط؟"
- "مستي جملة مفيدة"
- "لما سألتك طفشّته ازاى قتلتي ضغطت عليه باللي تعرفه عن بنته... ممكن أعرف بتستفيد ايه لما بتكذب عليا؟"
- "الواحد بيستفيد ايه لما بيتفرج على التلفزيون؟ تسالي" أجابه في برود
- "ليه مقلتلش انك لبسته في فضيحة مع مراتك؟"
- "هاهاها. ماشي يا نجيب. أنت واد ذكي. مش أوي، بس كويس. كنت بشوفك هتعرف تجيب معلومات لوحذك ولا لأ. أنا هقولك على كل حاجة؟ مش لازم تثبت كفاءتك؟" قهقهه عامر
- "أنت بتضحك يا مجنون؟ أنت خنت مراتك، و كمان لبستها في فضيحة خيانة زوجية مع واحدة تانية؟"
- "أنا كدة يا نجيب. كل واحد ليه هواياته. بحب أنزل أجري كل يوم بالليل. يوم بعد يوم بحب ألبس الناس فضايح خيانة زوجية"

- "عملت ايه سارة عشان تستاهل كل ده؟"
- و مالك متأثر أوي كدة؟ سارة افكرت نفسها ذكية عليا. طلعت واحدة متسلطة عليا. عميل متخفي عشان يجيب عليها واطيها"
- "عاوز تفهمني انما تجوزتك عشان تقضي عليك بتعليمات من الشركة؟"
- "عارف ان الموضوع فوق تفكيرك يا نجيب. فيه حاجات مهما الواحد عاش و شاف، و حتى لو راح أمريكا بتفضل فوق مستوى تفكيره. ما علينا، مش ده اللي كنت طالبه منك. احكي لي لقيت ايه يودوني بيه في داهية"
- "ملقيتش عنك حاجات تودي ورا الشمس. كلها علاقات مشبوهة وسهرات رخيصة. سمعتك مش حلوة"
- "هي السمعة بتعمل ايه للواحد؟ في شغلتنا دي السمعة مالهش أي لازمة. أنا لا شغال وزير ولا بطلع في التلفزيون. أنا راجل بيع. جمهوري عمره ما هيعرف سمعتي. كلهم عيال صغيرة متفهmesh حاجة. مش ده اللي يهمني"
- "اللي وصلته ان عشيقتك دي اسمها رنا"
- "مضبوط. ايه تاني؟"
- "قول لي عرفت رنا ازاى"
- "أنت حشري أوي يا نجيب. رنا دي صاحبة طليقتي من زمان أوي؛ أيام الجامعة على حسب ما قالتلي. ظهرت في حياتها تاني قريب في شغلها القديم. كانوا أصحاب أوي، و لما أنا و رنا بقينا أصحاب و حبايب اعترفتلي باللي سارة بتحاول تعمله من ورايا. قالتلي ان سارة في حالة تخفي عشان تضحك عليا و تسلم رقبتي للمنظومة. أنا عمري أصلاً ما كشفت ورقني لحد، مش فاهم كانت فاكدة انما هتوصل لايه. عموماً، أنت كدة وفرت عليا فلوس. مجتيلش أي معلومة مفيدة، استمر في البحث يمكن تلاقي. لو أفدتني هديك مستحقاتك"
- "سارة كانت متسلطة عليك عشان توقعك، و رنا صاحبها من زمان. انتوا الاتنين استلطفنوا بعض، مش هقول حبيتوا بعض، و دخلتوا في علاقة رومانسية أو

جسدية ميفرقش معايا. و هي في حضنك اعترفت على صاحبها بالمقلب اللي عامله فيك. رحت اتآمرت معاها عشان تنتقم من مراتك و في نفس الوقت من مدبرك القديم. قضية خيانة متلفقة! عصفورين بحجر واحد. أستاذ أنت برضه"

- "بلاش إحراج يا نجيب" ابتسم في سخرية

- "جبل يا أستاذ عامر. أنا كان معايا معلومات لوحدها ملهاش أي معنى بالنسبة لي، بس أما سمعت كلامك دلوقتي ابتدت تتقلب لرؤى واضحة قدام عيني. اللي شرحتهولي دلوقتي ان سارة اتبعت معاك تكتيك التخفي بتاع البوليس. مش كدة؟"

- "أبوة يا بتاع علم الجريمة يا جامد. متضيعش وقتي يا نجيب. لما تفيديني هديك فلوسك" قال عامر في ملل

- "استنى بس. مين قال انك مش هتديني فلوسي؟ خليني أشرحلك تكتيك تاني في علم تاني قريب من الجريمة"

لم يشغل تفكير كريم في الشهور الجارية سوى فرصته الضخمة في الاشتراك بتصفيات كأس العالم و اللعب مع المنتخب. حتى مستقبله في ريال مدريد لم يعن له الكثير حالياً. علم أن ليس بإمكانه الاشتراك في المباراة القادمة حيث لم يوافق خوسينيو على انضمامه قبل شهر أكتوبر. لا يمكن للشحات الاعتراض على السيناريوهات الأوروبية و لذلك تم الاتفاق على أن يشترك بمباراة المغرب في الرباط، ثم يعود ليلحق بالمباراة الأخيرة بالقاهرة مع زامبيا. اكتشف أن خوسينيو ربما في طريقه للخروج من النادي بالفعل رغم إصراره في المؤتمر الصحفي أنه لا يخشى على مستقبله في ريال مدريد. شرحوا له بعدها أن بمجرد قول مدير فني هذه الجملة، يتم طرده من النادي بعدها. يرى كاتبو السيناريوهات أنها مزحة لطيفة كنوع من سخرية القدر.

لم يختلف وضعه في ريال مدريد. استمر بقضاء حاجات خوسينيو ليكسب رضاه؛ فوجوده في ريال مدريد هو السبب الوحيد لضمه إلى المنتخب. أضحي

مستحيلاً ألا يشترك أول لاعب مصري محترف في ريال مدريد بالمنتخب الوطني؛ فهو أغلى لاعب مصري. أراد أن يقود مصر لأول كأس عالم في تاريخها منذ عام ١٩٩٠. لم يشهد شاب في سنه تجربة للمنتخب في الكأس، و ما أحلى أن يشهدها بنفسه من قلب الحدث. تهادى في أحلامه مع أعمال الغسيل و المكواة لخوسينيو وكأنه شاب مصري يكافح لأجل قوت يومه.

أصبحت مصر في المركز الأول بمجموعتها في الجولة قبل الأخيرة و توجب عليها الفوز في المباراة النهائية لضمان الوصول بسهولة للكأس. اقتربت المباراة الأخيرة مع زامبيا فعاد كريم إلى القاهرة و التقى بفريد عدة مرات حاملين معاً بالصعود للكأس. هرب حمزة في يوم من الجيش ليقابله و يسترجع الذكريات. التقى أيضاً بفهمي و حازم أكثر من مرة قبل المعسكر النهائي للمباراة. عندما أوشكت اللحظة الحاسمة اجتمع اللاعبون لدراسة السيناريو المصري، و معهم الخبير الإبداعي المختص بالمباريات الدولية، محمد الشحات المدير الفني و رئيس الاتحاد الذي حرص دائماً على مراجعة السيناريوهات بنفسه.

- "أهلاً يا شباب يا فخر مصر. لما بشوف كل واحد فيكوا بحس ان البلد فيها حاجة كويسة" يتسم رئيس اتحاد الكرة المصري، "الأداء المشرف اللي قدمته في التصفيات بخلي الواحد يفرح بيكوا. عاوزكوا تفرحوا باللي عملتوه"

- "مش متفائل ان حضرتك محتاج تقول مقدمة زي دي. ما كلها سيناريوهات، أداء ايه اللي بتكلم عليه؟" قال أحد اللاعبين

- "كلكوا عارفين من ساعة ما انضميتوا للمنظومة دي انها قائمة على السيناريوهات. الروح السلبية دي محدش بيشجعها لا من الإداريين ولا الرياضيين في المنظومة. كلنا شغالين عشان نمتع المشاهد. مش شغلتنا متعة المشاهد تيجي ازاي. اللي كان ساذج و ييحلم بكاس العالم...أحب أقولّه...مفيش كاس عالم. حظ أحسن المرة الجاية يا شباب، و خلي عندكوا روح ترفيحية"

- "روح ترفيهية؟ دي أصعب من الروح الرياضية" أجاب لاعب آخر، "على الأقل الواحد أما يخسر و هو عارف ان الثاني أحسن منه بيقول لنفسه دي إمكانياته. الخسارة بمزاجنا بايخة شوية"

- "بقولكوا ايه" صاح في حزم و انقلبت لهجته فجأة، "أنتوا رجالة. مش المفروض اني أدادي في عيال صغيرة. مش كل واحد هيقريف عليا. اللي مش مبسوط يقول عشان ميلعبش الماتش. لازم تبقوا قد العقود اللي مضيتها. أنتوا فنانين ترفيهيين. مش عاوز مناقشة تاني. كان عندكوا أمل نوصل كاس العالم؟ مش مصدق ان ناس بتاخذ مئات الآلاف في الشهر لسة بتفكر زي العيال. فيه ملايين نفسهم يبقوا مكانكوا. مش ممكن نكون احنا الفريق الوحيد اللي بيعترض على سيناريوهات. لازم يكون عندكوا مسؤولية أكثر من كدة"

- "حضرتك جي تتكلم مع شباب كلهم طموح، و تقولهم اخسروا بمزاجكوا و خلي عندكوا مسؤولية؟" صاح آخر في استنكار

- "طب يا شباب. هنتعادل مع زامبيا، و الكامبيون هتكسب الماتش الثاني وتوصل الكاس. اللي مش معجب بالسيناريو و مش عاوز يشترك... يتفضل بره الأودة" أشار في صرامة، قام بعضهم بالفعل ليرحل

- "لو مش عاجبنا ثمشي؟" سأل كريم و هو يقف مكانه

- "أبوة. اللي مش عاجبه يروح. ماشي ولا قاعد؟"

- "ثمشي أروح فين؟ كنت بفك عضلات رجلي بس" تراجع كريم و عاد لمقعده

- "أبوة كدة. عاوز احترافية. دي أهم حاجة. لازم نعرف دورنا و نأديه كويس. هي الاحترافية اننا نكسب و نفرح بالفوز؟ بالعكس، الاحترافية الحقيقة تبان لما نوافق على سيناريو الخسارة بصدر رحب. لما نلتزم بالسيناريوهات و نبقي محترفين الناس هتحترمنا، و بالتالي هيكافنونا بعد كدة"

- "معلش هخرج من وضع الاحترافية أقول جملة و بعدين أرجعله تاني. لو قصدك ان الكبار هيحترمونا، فاحنا عشانهم هنخسر احترام ناس كتير قمنا أكثر منهم. نرجع للاحترافية. هنخسر ازاى بقى؟" قال كريم في سخرية لاذعة

- "هسيب عادل حفطي الخير الإبداعي يحكيلكم القصة" قال رئيس الاتحاد

- "ركزوا معايا" تنحج الخير الإبداعي، "مش متوقع منكوا تضايقوا لأن المفروض روحكم تبقى احترافية. في الحلقة الأخيرة من مسلسل تصفيات كاس العالم هتتعدلوا، و بالتالي شخصيتكم هتخرج من الأحداث. فكروا فيها كدة، انتوا شخصية عملت أداء جامد بس المؤلف أو المخرج شايفين ان وقتها انتهى فخلوها تموت، مبقاش ليها وجود في بقية الأحداث. نتكلم في السيناريو، منتخب مصر هيبدأ الماتش ضاغط جامد لدرجة ان الناس تحس زامبيا هتخسر مليون صفر؛ ضغط هجومي غير مسبوق. في آخر الشوط الأول الضغط ده هيسفر عن جون و تبقى النتيجة واحد صفر لصالح مصر"

- "ليه آخر الشوط الأول بالذات؟" سأل أحدهم

- "عشان بالضغط الهجومي اللي مصر هتمشي بيه، لو جينا جون بدري ده معناه اننا هنركب الماتش. الفريق لما بيضغط و يجيب جون بدري بياخذ ثقة وطريق الرمي بيتفتح قدامه. لكن كدة بمجرد ما نتحمس بعد الجون الأول يكون الشوط خلص. الحماسة هتهدا شوية بين الشوطين و ده يدي فرصة لزامبيا يتعافوا و يلعبوا شوية على محاولة إحراز التعادل. يبدأ الشوط الثاني و زامبيا هتخطف جون مالوش أي لازمة. فكرنا ان حد من مصر يجيبه في نفسه، نوع من أنواع الشلل، و عشان نبين ان مصر حفرت قبرها بايديها. بعديها مصر هتتجنن و تحاول تفوق من صدمتها، بس زامبيا هتغلس و تكسب ثقة و تطمع في الفوز. مصر هتمارس هوايتها في إحباط الجمهور و تفضل تايها في وسط الماتش. فجأة المنتخب هينتفض في الوقت المناسب اللي كلنا بنحبه؛ آخر عشر دقائق. أصل منتخبنا ميجبش يلعب غير و هو مزنوق زي مانتوا عارفين. آخر عشر دقائق هتحمّل مفاجآت كتير. كم

كبير من الهجمات هتضيع، عاوزكوا لما تضيعوا كورة تضيعوها بتركيز. محدش يجيب جون غصب عنه مش ناقصة مصايب. لو حد جاب جون غصب عنه طبعاً هيعوضوه على طول، بس ساعتها هيبان ان مصر فرطت في الفوز بالدقايق الأخيرة، و مش ده اللي احنا عاوزينه. المقروض يبان ان مصر حاولت بس مجهوداتها لم تكف للفوز؛ سوء حظ مش تقصير. فيه نقطتين مهمين لازم نناقشهم؛ أول واحدة، مين اللي هيجيب الجون في نفسه؟"

- "مين اللي هيجيب الجون في نفسه؟ سؤال وجيه" قال الشحات المدير الفني منتظراً تطوع أحدهم دون جدوى

- "حاجة متوقعة" قال رئيس الاتحاد، "كله خايف الناس تلومه لوحده. طب هقول النقطة الثانية بالمره، محتاجين كمان حد يتطوع انه يضيع ضربة جزاء في آخر خمس دقائق" وقع قوله عليهم كالصاعقة

- "عاوز حد يقول هجيب جون في نفسي، و التاني يقول هضيع ضربة جزاء؟ انسى" قال فريد في حزم، و دعمه بقية أعضاء الفريق

- "بسيطة. كدة هنتار بمزاجنا" أجاب رئيس الاتحاد في هدوء

- "و ليه مييقاش نفس الشخص اللي يجيب الجون في نفسه، هو اللي يضيع ضربة الجزاء؟" تدخل كريم

- "ايه الحكمة؟ عاوز الناس تكرهه أوي كدة؟" سأل الشحات متعجباً

- "مش مسألة حب و كراهية. فكر فيها من الناحية دي، لعب هيجيب جون في نفسه فهيبقى عاوز يعمل أي حاجة عشان يصلح غلطته. فكرة انه عاوز يشوط ضربة الجزاء هتخط عامل من التشويق...هو الراحل ده هينقذ الموقف و يحول نفسه من فاشل إلى بطل هيترفع فوق الأعناق، ولا أعصابه هتخونه و توتره هيجليه يكمل عملية الدمار اللي بدأها؟ كفاية الدقيقة اللي ما بين احتساب الضربة و انها تتلعب، هيبقى التوتر مالوش مثيل. حتى اللي مش مهتم بالماتش هيفتح يتفرج و يشوف الحكاية هتعدى على ايه. خلي حد يكتب على تويتر مثلاً

ان الشخص الفلاني داخل يشوط ضربة الجزاء بعد ما جاب جون في نفسه، و هل
الراجل ده هيتحول إلى بطل ولا لا. لمدة دقيقتين هتلاقي ده من أكثر المواضيع
المتحدث عنها في تويتر، و الإقبال هيبقى للركب"

- "ايه ده ايه ده؟ أنت جبت التفكير الإبداعي الاحترافي ده منين؟" سأل
رئيس الاتحاد في إعجاب

- "أصلي بحب أفرا سيناريوهات كثير، و بتفرج على أفلام أكثر. تلاقيني دائماً
مطلع" أجاب في برود وسط دهشة زملائه
- "طب دلوقتي الاختيار بقى واحد. مين هيتطوع للمهمة دي، ولا برضه
نختار احنا؟" هتف الشحات في حماسة

- "هتروح بعيد ليه؟ أنا اللي هعمل كدة" قال كريم في ثقة
- "هتعمل كدة؟ يا سلام؟ ايه مصلحتك؟" سألته في انبهار

- "ايه المشكلة؟ أنا محترف و شغلتي اني أؤدي قدام الجمهور. بلعب في ريال
مدريد و كل تفكيري ازاى أطور نفسي. فلو مصر مش هتوصل لكاس العالم على
الأقل لازم أستفيد من الوضع. أنا بحب الأضواء، و يهمني أبقي حديث المباراة بعد
ما تخلص، سواء حديث إيجابي أو سلبي ميفرقش معايا كثير. المهم الناس تتكلم عني
و خلاص. مش هتبقى أول مرة في تاريخي أعمل حاجة مش فخور بيها عشان
الجمهور. خلي بالكوا كمان اني أنسب واحد للمهمة. أولاً لأن الناس بتحب
تحقد، فلما اللعب المصري الوحيد المحترف في ريال مدريد يضع الماتش الناس
هتنبسط لأنها هتلاقي فرصة تنتقد فيا و تقول فيه لاعبيه أحسن مني مليون مرة
ويلعبوا في الدوري المحلي. هيقولوا كمان اني مش مهتم بالمنتخب و مش بقدم
معاه كل اللي عندي، و اني بس أما ألعب مع مدريد بابقى كويس. اللي هيقولك
شفت وائل جمعة راجل ازاى، شفت أبو تريكة كان أستاذ ازاى، و كاكا كان
زباله ازاى، ناس بتاعة فلوس و خلاص إلخ. ثانياً، أنا اختيار منطقي جداً لتنفيذ
ضربات الجزاء، عشان من ساعة ما دخلت في الاحتراف مضيعتش ضربة جزاء.

أكيد في يوم من الأيام هضيع واحدة. فنخلي أول واحدة تضيع يبقى ليها معنى. أول واحدة أضيّعها تكون مع المنتخب و هي اللي متوصلوش كاس العالم. لما أشوط و أضيّع هتكون صدمة للكل لأنني اللعيب اللي عمره ما ضيع ضربة جزاء. زي ماحنا عارفين، كل ما يبقى فيه حاجات في خطر أكثر كل ما الحدث يبقى مهم أكثر. فيها ايه لما واحد داخل يشوط ضربة جزاء؟ عادي! بس لو الواحد ده عمره ما ضيع ضربة جزاء، و جاب جون في نفسه أول الشوط الثاني، و محترف في ريال مدريد، و عنده مليون سبب انه يجيب جون عشان يبقى بطل و يقود بلاده لكاس العالم لأول مرة من سنة ١٩٩٠؟ ده بقى اللي مش عادي"

- "دانت أستاذ" قال الشحات في ذهول، "الواد ده كان فين من بدري؟"

- "كنت موجود. بس مش واخد حقي. عندي أفكار كتير. ادوني فرصتي"

- "هتاخد فرصتك و نص. الواد ده معانا كتير هاهاها" ضحك رئيس الاتحاد في نشوة

قام اللاعبون مغادرين الاجتماع في سخط فتجنب كريم النظر لأي منهم. هرع فريد خلفه و استوقفه.

- "أنت اتجننت يا كريم؟ ايه اللي قلته ده؟" صاح في استنكار

- "سؤال يا فريد. هتعمل حاجة غير انك تطبق السيناريو؟" سأله في حسم

- "هه؟ أكيد... لأ طبعاً" أجابه في خجل

- "السفينة مخرومة و المية عمالة تدخل يا فريد. هنقعد نرقع فيها؟ بلاش قرف

خلينا نطلع بحاجة في سنتنا السودا دي. عندي مستقبل أفكر فيه، بلا كلام فاضي"

قال كريم في انفعال و صفق الباب خلفه

- "ايه جاييك عندي المكتب؟ الناس مالها زاطت كدة" قال عامر في دهشة

- "أنت مش مدير أعمالي؟ من حقي أجيلك في أي وقت" أجابه كريم في
سخافة

- "من حقت كمواطن تعمل أي حاجة، مش معناه انك تستخدم الحق ده.
بصراحة يا كريم مقابلتك بقت ثقيلة على قلبي، و أنا مبحبش الزن"

- "مش هنوصل كاس العالم" قال كريم في حسرة

- "ياااااا. مش هنوصل كاس العالم؟ هاهاها. مفاجأة جامدة أوي. مش قادر
آخذ نفسي من الصدمة"

- "كنت عارف؟" سأله في دهشة

- "طبعاً كنت عارف. أقولك عرفت منين؟ من النشرة. قالوا فيها مصر مش
هنوصل كاس العالم. أه، و قالوا كمان ان السما زرقا. تخيل يا كريم؟ كمية
المفاجآت اللي بتعدي على الواحد"

- "ليه يا عامر؟ احنا مش بلد و من حقنا نفرح و نوصل الكاس؟ ليه بقى
عادي اننا متوصلش ولا نحقق حاجة؟ الساعة كام الدقيقة كام يوم ايه بقى الفشل
بالنسبة لنا عادي؟"

- "من زمان يا بطل. بص يا كريم. أنا كنت شاطر أوي في المدرسة، و بحب
أركز في دروسي..."

- "مكن نبدأ القصة من نصها؟" قال كريم في نفاد صبر

- "ماشى يا عم المهم. الله يرحم النكت القالشة اللي كنت فالقنا بيها. خلاص
كبرت و بقيت صاحب مرض و مزاجك متعكر؟ اسمع يا عم كريم. و أنت عيل في
ثانوي اللي هو من كام سنة بس، أخذت حاجة اسمها النظام الأيكولوجي. النظام
الأيكولوجي فيه مجموعة من السلاسل الغذائية، السلسلة الغذائية بيبقى ليها مسار
معين لازم تمشي فيه. يوم ما يحصل تغيير في السلسلة أو أي تلاعب بيسبب خلل
في التوازن البيئي"

- "يعني ايه؟ خلل في أنهي توازن بالطبط؟"

- "كرة القدم عبارة عن سلسلة غذائية كبيرة و مصر مكانها تحت خاليييص.
بيتغذى عليها البلاد الأعلى نسيياً في السلسلة. مينفعش تيجي تشيل مصر من
تحت و تحطها فوق. كدة تعمل خلل في التوازن البيئي، و ده خطر"

- "يا سلام" صاح كريم مستكراً، "على أساس ان لازم نبقي تحت؟ فيها ايه
أما نعلی في السلسلة و نتغذى على غيرنا. ماظنش الموضوع بالصعوبة اللي أنت
بتقولها"

- "روح قول الكلام ده للسلاطات اللي انقرضت. الخلل في التوازن البيئي
خطر يا كريم. مينفعش تاخذ مصر من تحت، الدول اللي بتتغذى عليها ممكن
تموت. رحم الله امرئ عرف قدر نفسه. لازم تعرف قيمة نفسك. هو ده مكانك"
- "ايه الفشل ده؟"

- "فشل؟ مين قالك انه فشل؟ ده أداء للواجب. مش قلنلك قبل كدة انك
ترس؟ أنت أداة عشان صورة أكبر منك. مصر موجودة عشان تحسر و غيرها
يطلع على قفاها. و لو افترضنا انه فشل، احنا مالنا؟ الفشل ده مش مني و لا حتى
منك. مش أنت اللي خيلتنا صغيرين عشان تقول على نفسك فاشل. فاقد الشئ لا
يعطيه يا كريم. البلد فاشلة، يبقى ازاى هتديك نجاح؟"

- "مش جه الألوان اننا ننصف شوية؟ مش هنعمل حاجة عدلة في حياتنا؟ لو
الأجيال اللي قبلنا عاوزة تفضل فاشلة احنا مالناش دعوة"

- "أنت سايب كل حاجة و ماسك في الكورة؟ كل حاجة عندك فاشلة يا
أستاذ. نظام التعليم فاشل، الزبالة في كل حته، الزحمة مستمرة طول النهار و الليل
كأن الناس مبتطلعش بيوتها، مفيش و صيلة مواصلات الواحد يعتمد عليها بنضافة
اللي بنشوفه برة. كله بينهب في كله و بيجري ورا أكل عيشه، و مفيش عدالة
اجتماعية. حتى الناس من جوة يا كريم مش طيعية. احنا أكثر شعب نقول الكدبة
و نصدقها، و أكثر ناس قمرى في النكت و الاستطراف. الواحد عندنا بيقد طول
النهار يحاول يألف نكتة على الفيس بوك، و يحط صورة و كل ده عشان واحد

يخش يعملهُ تعليق. ساعتها يبقى مبسوط من نفسه و حاسس انه أنجز. كل حاجة في بلدك ماشية بالموضة. الموضة الهاردة الكورة يبقى نتكلم في الكورة، بكرة في الأفلام نتكلم في الأفلام. الأسبوع الجاي الكلام على السياسة نتكلم في السياسة. الأولمبياد بدأت، فجأة تلاقي كله ليه في ألعاب القوى و يفهم فيها. حصل زلزال تلاقي كله بيتكلم عن نهاية العالم و ظواهر طبيعية ولا أحسن عالم جيولوجيا. تسمع نكتة في التلفزيون فجأة كله يقوها كأنها بتاعته أو مالفها. شعب معندوش أي نوع من الإبداع، ماعدا الطريقة طبعاً عشان شاطر فيها، و حتى دي يبقى سارقها برضه! شعب يعرف ينتقد، لكن تطلب منه يقولك حل منطقي لأي مشكلة يتنح ويقولك معرفش. دي البلد اللي بتناقض جملة "العمل شرف". فيه شغلانات كتيرة برة مصر بيعتبروها محصلتش من كتر الرقي، و هنا في بلدك يعاملوك كأنك ولا حاجة. قيمتك مش في علمك، أنت قيمتك بتجيب فلوس ولا لأ. يعني ليه واحد يعمل فيلم و يجيب عليه ملايين و هو أصلاً فيلم سوقي و مالوش معنى؟ عشان الذوق العام في الأرض و البلد فرحانة بكدة. في حين ان المتخرج من هندسة ولا طب، اللي هي المفروض كليات قمة، بيطلع عين أهله عشان يلم قرشين. لأن بلدك اللي خلّت الناس دي رخيصة. أنت قيمتك في الفلوس اللي بتجيها. عرض و طلب! الواحد مبيروحش للدكتور غير و هو عيان. انما شغال لعب كورة؟ الناس مبتشبعش كورة! بتجيبي فلوس؟ يبقى هتاخد ملايين. شغال ممثل هابط و هتجيبي فلوس؟ خلاص تعالى أما أخليك نضيف. بتعرف تغني؟ اطلع قول أي حاجة و الناس هتهتف وراك و تنبسط. عندك القدرة تقعد قهرى ساعتين في برنامج تلفزيوني و تلم الناس حوايك؟ انزل بحر الفلوس! الموضة كمان بقت في الكلام الهابط و المسف. الواحد زمان لما كان يسمع شتيمة في التلفزيون كان يتخض، دلوقتي الرقابة شالت العري طبعاً عشان عيب، بس سابت الشتام عشان دي واقعية و فن بيقدم رسالة. ايه هي الرسالة دي؟ الفلوس. اللي يجيبي فلوس

أدبله سكة يعمل اللي هو عاوزه، و اللي ميدنيش ميلزمنيش... و أنت جاي زعلان عشان كورة؟"

- "أنا مالي البلد نضيفة ولا لأ؟ ميخصنيش! انما مبقاش أنا اللي معض! مضحكش على الناس و أخدعهم. مبيقاش الناس واقفة ورايا و حاطة عليا أمل وأديهم على قفاهم عشان أقبض القرشين بتوعي. ضميري ميسمحلش"

- "ضميرك ميسمحلش؟ ضمير ايه يا كريم أنت هتشتغلني؟ مش أنت اللي أول ما سمعت الأرقام الخيالية قعدت تريل زي الهبل و جريت تاخذ الفلوس، ولا أنت نسيت؟"

- "مكانش قدامي حل تاني" هتف مستكراً

- "متأكد؟ مش لو أنت ثابت على ميدأك كنت تجاهلت السيناريوهات وفضلت قاعد رجل على رجل لحد ما عقدك بخلص؟ ولا عشان السيناريوهات ساعتها مشيت على مزاجك و عملت منك نجم كانت عاجباك؟ أكثر لاعب مشير للجدل في كريستال بالاس. نجم و هدف نادي فولهام. البديل الحارق لريال مدريد. ضميرك؟ تلايقك هتسييني و تروح نجيب هدوم خوسينيو المعفنة من المكواة. عاوز تعمل نفسك نضيف؟ مش عليا أنا! لما جت في ايدك فرصة تلعب بالفلوس كنت مبسوط على الآخر. أنت مش زعلان دلوقتي عشان هتضحك على الناس، أنت زعلان عشان مش هتبقى البطل اللي وصل بمصر لكاس العالم! مش متضايق عشان هتخذل الناس، لأ متضايق عشان محققتش المجد الشخصي بتاعك! نفسي تنكر اللي بقوله و تطلعني غلطان و أهبل"

- "فيها ايه لما أحلم يا عامر؟ جت عليا؟ هو يا إما آخذ على قفايا جامد وأنيسط يا إما أبقي وحش و زبالة و معنديش مبدأ؟ ليه الحاجة الحلوة بقت صعبة؟ حلمي كان اني أقود منتخب مصر عشان نوصل لكاس العالم. كثير عليا؟"

- "حلمك؟ كام مرة تتكلم عن أحلامك؟ أحلامك كترت على فكرة يا كريم. مشكلة الواحد أما يحلم انه كل أما يلاقي حلم بيتحققه مش يسكت و يحمد ربنا،

لأ يبنسى حلمه القديم و يجري ورا الحديد على طول. أنا بقول بعد كدة تسهر
شوية عشان أحلامك تقل. و لا أقولك، السهر وحش عشان صحتك. ابقي
اتغطى كويس و أنت نايم أحسن. أصل أحلامك بتوسع منك و بتقلب على طمع"
- "لأ أنت غلطان. ده اسمه طموح. حاجة واضح انها مش عندك خالص. أنت
يهمك الفلوس و بس"

- "ما هي الفلوس يا أهبل اللي هتحققلك كل حاجة. حد هيفرح بيك لو
عملت مشاكل و رجعت بلدك بجيتك؟ مش هيبقى عندك فرصة لا تعمل طموح
ولا زفت"

- "هيبقى أهون عليا من ابي أضحك على الناس"

- "تضحك على مين يا عيط؟ أنت فاكر الناس فارق معاها اللي بتعمله ده
حقيقي ولا لأ؟ الناس من كتر خيبتها بتدور على أي حد تخط عليه آمالهاو تطلب
وراه عشان هم نفسهم مش عارفين يوصلوا حاجة. الواحد أما يتفرج على الأهلي
و يلاقيه بيكسب بيهون عليه فشله في حياته الشخصية، و لو الأهلي خسر هيشتم
في اللاعبة و يقولك شفت الدنيا حظوظ ازاى، أهى لاعبة بتاخذ قد كدة و مش
عارفة تكسب و أنا قاعد أشقى و مباخذش نص اللي بياخدوه. قال يعني هو
مراعي ضميره أوي و بيعمل اللي عليه في شغله و في حياته. ده برضه هيهون عليه
فشله، يعني في الحالتين هيلاقى حاجة تنيمه بالليل. بس ده هيوصله حاجة؟ خالص!
يفرق معاها اللي أدامه تمثيل ولا لأ؟ بالعكس. يآبني الناس بتسيب حالها و مالها
وشغلها و تشجع في الكورة، و تقولك أموت فداء للنادي. للدرجة دي الواحد
معدوش هدف و مسخر حياته عشان فريق كورة؟ اذا كان اللعبة نفسها مش
بتتعب كدة عشان خاطر النادي بدليل انها كل موسم في واحد مختلف. مش ده
الضحك على الناس بجذ، انك تجاريهم في تفاهتهم؟ بدمتك مش الناس تستاهل
يتضحك عليها؟ بعدين هو الأهلي مش لو لعب بجذ ممكن يكسب ماتش و يخسر
ماتش برضه؟ الفرق بس انك بتتحكم بخسر امتى و يكسب امتى عشان الموضوع

يبقى منظم. دي خدمة للناس مش ضحكك عليهم؛ خدمة ميستاهلوهاش حتى! الناس تموت في القصص يا كريم و من غير الحوارات متقدرش تعيش. هاتلهم ماتش عادي من غير قصة و محدش هيهتم بيه. الناس عاوزة بطل. عاوزة رمز و خلاص بغض النظر عن نهايته. لما الناس اتفرجت على تيتو و أحمد السقا مات في الآخر حد انتحر؟ عشان هيدوروا على غيره الفيلم الجاي. أحمد السقا زعل انه مات في الآخر؟ لأ، عشان هو ممثل، مؤدي. أنت كمان مؤدي بتعمل اللي عليك. أي ماتش بين فريقين بيبقى الاتنين مرضيين سواء الكسبان أو الخسران، ايه اللي مزعلك... مش فاهم!"

- "اتنا بنضحك على عقول المشاهدين، حتى لو أنت شايف انهم محتاجين كدة. مش المفروض نزيط في الزيتة"

- "احنا بنمتع مشاهد يا كريم" أجابه بابتسامة واسعة فاردأ ذراعيه

- "بنمتع مشاهد؟ لا يا شيخ؟ هتعمل فيها عبيط؟!"

- "ايه ده؟ يعني كانوا بيضحكوا عليا السنين اللي فاتت دي؟ أنا كل ما أسأل يقولولي كدة"

- "احنا بنستغفل مشاهد، ولا أنت مش حاسس؟"

- "أنت مبتفهمش؟ المشاهد مبسوط و متكيف على الآخر من اللي بيشفه.

أنت مش بتضحك على حد، أنت بتعملهم عرض و هم بيتجاوبوا معاه. الواحد لما بيتفرج على فيلم بيتجاوب معاه و بيعيط ساعات أو بيتحرق دمه ساعات. ده جزء من الفن اللي بيتقدم للناس. و الفن ده برضه الغرض منه الفلوس. صناعة السينما قائمة على الفلوس يا كريم عشان واضح ان مخك صغير. حد بيقول حرام المشاهدين هيزعلوا، هتخلي البطل يفوز و خلاص؟ طبعاً بتحصل كتير، بس في حالة كرة القدم مين البطل؟ كل بلد ليها بطل. ازاي هتخلي مليون بطل يكسب في نفس الوقت؟ و بعدين لما أنت زعلان كدة، ليه كملت في الموضوع من الأول؟ كان لازم تعرف ان السيناريو مش هيمشي دائماً على مزاجك"

- "أنت عارف كام واحد معتمد علينا يا عامر؟ كام مليون مصري؟"

- "ايه مشكلتك؟ هتبقى دي أول مرة البلد تخذل الناس؟"

- "بس ده تمثييل" أمسك كريم برأسه في انهيار

- "و ايه في الدنيا مش تمثيل؟ ركز في كل جانب من حياتك هتكتشف ان كله تمثيل في تمثيل. لما بتعامل مع الناس مبتقاش على طبيعتك عشان محدش ينتقدك أو يحاسبك، ده برضه تمثيل. لما اتنين يطلعوا في برنامج و يفتعلوا خناقة عشان يمتعوا الجمهور بيبقى برضه تمثيل. لما مسئول كبير يقول احنا عملنا كذا و كذا و كله يصقف رغم ان كله عارف انه بيهذي، ما هو برضه بيبقى تمثيل. لما واحد يقول قدام أصحابه ياه دانا البنات عليا كتير أوي، أنا زهقت، ما هو ده برضه تمثيل. لما الدكتور يموت على ايديه ألف عيان عشان مراعاش ضميره و يعيط و يعمل نفسه متأثر ما هو ده برضه تمثيل. لما الشركات تقول قدام الناس احنا بنعمل أنشطة خيرية و بنخدم المجتمع و خلوا بالكوا و الله احنا كويسين و بنحب البيئة ما هو ده تمثيل عشان الناس تشتري منهم أكثر و الفلوس تنزل عليهم مطر، لأن اللي عاوز يعمل خير فعلاً مش هيقول. مش الجامعات و المستشفيات منظمات غير هادفة للربح؟ جرب كدة تتعلم أو تتعالج من غير فلوس و شوف ايه هحصلك، ده برضه تمثيل. لما مطرب يقف يحرك شفايفه و هو مشغل الكاسيت و الناس تقف ترقص حواليه بيبقى برضه تمثيل.. لما مدير الشركة ولا مديرك في الفريق يطلع عينك عشان هو معقد و يقولك في الآخر يابني أنا بشد عليك عشان أنت زي ابني، و أنت تبقى عارف انه بيكذب، و هو عارف انك عارف انه بيكذب بس متأثر و تعيط قدامه و تحضنوا بعض ده بيبقى تمثيل. لما صاحبك ولا صاحبتك يجيولك هدية زي الزفت في عيد ميلادك و تقعد فاتح بقك عشان تعمل نفسك مبسوط، و تقعد بقية السنة تفكر هتجيلهم ايه عشان ترد لهم الهدية اللي أصلاً مش عاجباك، ما هو في الآخر تمثيل. هاهها، لما تبقى قاعد جنب بنت و يطلع في التليفزيون إعلان الفياجرا فتبصلك و تقولك هو يعني ايه فياجرا على أساس انها

مقتنعة الإنسان يطلع على الشجر، مش ده تمثيل؟ لما حد يستغلك عشان ياخذ منك حاجة و عامل نفسه حبيك، و أنت عارف انه بيستغلك بس عمال تضحك في وشه و تاخده في حضنك، و تضحكوا للكاميرا مع بعض، مش ده اسمه تمثيل؟ تعالى نوسعها لك أكثر. لما يحصل كارثة طبيعية و كل رئيس دولة يطلع يقول كلمتين موايسة للشعب الكفران اللي طلع عينه، و هو أصلاً مش فارق معاه شعبه ببصلة ما هو ده تمثيل، عشان لازم يبقى ليه صوت في أي أزمة دولية. لما مذيع تلفزيوني يعمل نفسه مناضل و يهاجم المسؤولين في البرنامج اللي أصلاً بياخذ فلوسه من جيوبهم، ملايين في الحلقة، و سايينه يهوو زي الكلب عشان الاتنين مستفيدين من الفلوس اللي بتيجي من وراه، أنت شايف ان ده مش تمثيل؟ لو مش عاجبك الفساد يا سيدي متاخذش فلوسه! مكافحة الإرهاب من مئات السنين من غير ماحد يوصل لحل رغم كل الإمكانيات، عشان مصلحة الدول دي ان الإرهاب يستمر و يشغل الناس، و فجأة لما يجبوا حد يصقفلهم يقبضوا على أي جاسوس ولا مجرم كانوا سايينه لوقت عوزة، مش ده تمثيل؟ الفيروسات اللي بتظهر فجأة و تقتل ملايين، و فجأة شركة أدوية تطلع معاها العلاج و تاخذ مليارات، مش ده تمثيل؟ سعر السهم الفلاي نزل ثلاث أربع ساعات، و علي بعديها تاني عشان الحيتان تستغل الفرق الكبير و يعملوا ملايين في ساعات، مش ده تمثيل؟ التدخلات العسكرية اللي الغرض منها الاستفادة من موارد البلد الغلابة مش الدفاع عنها، الحروب الأونطة، منظمات حقوق الإنسان اللي مش بتساعد غير قدام الكاميرا، المعونات، إلخ... كله قدام الكاميرات و كله تمثيل في تمثيل! التمثيل ده زي المية و الهوا يا كريم. التمثيل مش اختيار؛ ده مذهب. مفيش حد مش ييمثل. مش بلدك بس اللي بيمثل، العالم كله بيمثل على كله. عارف امتي التمثيل هيقف؟ لما الناس تقف قدام ربنا و يديها الحساب كما ينبغي. ساعتها برضه ممكن يمثلوا، بس المرة دي مش عشان فلوس، إنما عشان ميتحرقوش في النار"

- "لما أنت زعلان كدة يا عامر، سايب الدنيا تمشي ليه؟ بتمثل ليه؟"

- "مين قالك اني زعلان؟ أنا مبسوط أوي، مش باخد فلوسي و كله تمام؟ أنا

بقوم بواجبي. أنا بيع...قصدي وكيل لاعبين"

- "طبعاً بيع. بتعمل غسيل مخ للناس"

- "غسيل مخ؟ ده يوم عادي في حياة البني آدم! هو ايه لازمة وسائل الترفيه

أصلاً يا كريم؟ ما هو عشان تغسل عقول الناس. فإكر الحكومات بتشجع الرياضة

ليه أكثر من أي حاجة تانية؟ عشان هي اللي بتلهي الناس. هي اللي يبجوا

يتفرجوا عليها و يصقفوا معاها. مش الفريق اللي أنا بحبه يلعب؟ يبقى مش مهم

وراي ايه. عارف كام مليون اتفرجوا على نهائي كأس العالم اللي فات؟ ٧٠٠

مليون متفرج. هاهاهاه. سبوبة حلوة مش كدة؟ ده غير الناس اللي كانت في

الاستاد. ده لو حصل حرب يا راجل محدش كان أخذ باله من كتر ما هو قاعد

فاتح بقة قدام التليفزيون. الترفيه هو الفلوس! عارف فيلم زي أفاتار جاب كام؟

٢.٨ مليار دولار. عارف مبلغ زي ده ممكن يعمل ايه؟ و كل ده عشان تفرج

على ثلاث ساعات و تخرج منها من غير أي لازمة. أنت فإكر الناس بتجري ورا

الترفيه عشان حاجة تانية غير الفلوس؟ ممكن في الأول يبقوا عاوزين يقدموا حاجة

عشان يعبروا عن نفسهم أو عشان يظهروا. الكلام ده أول ثلاث أفلام مثلاً. طب

و بعدين معندهم حاجة يقولوها، هيسكتوا؟ لأ طبعاً! هيعملوا فيلمين ثلاثة

تصيرة لحد ما يلاقوا فكرة تانية حلوة و يستفيدوا بالشهرة. مش مهم احترام

الجمهور اللي داخل يتفرج على الفيلم، أنا عاوز فلوسهم"

- "بس دي أفلام يا عامر، و الناس كلها بتبقى عارفة انها تمثيل"

- "هتفرق أوي لو عرفوا؟ كله استخفاف بعقل المشاهد. عاوز أوريك ان أي

صناعة ترفيحية بتستخف بالناس. عارف كام ممثل، ولا كام مؤلف ولا كام مخرج

عملوا فيلم زي الزفت و جم بعدها يقولوا احنا آسفين أصلنا كنا مزنوقين في

فلوس؟ مش دي قلة أدب و استخفاف بعقل المشاهد؟ عارف ايه الاستخفاف

الأكبر، انه طالع يعترف بكدة قدام الناس، يا ريت عشان بيحترم دماغهم، انما عشان يكسب قدامهم رصيد، قال يعني عشان راجل صريح و اعترف، فبالنالي يشتغلهم تاني و يخليهم يشوفوا فيلمه الجاي بدل ما كانوا هيقاطعوه. لو كان بيحترم دماغهم مكانش عمل الفيلم ده من الأول. انخفاض الذوق العام خلى أي واحد معفن يعمل شهرة و يخلي الناس تطبل وراه، ده كفاية الموسيقى الشعبي اللي بقى كله يسمعها. الذوق العام في الأرض. الناس دلوقتي بتجري ورا أي حاجة عشان هم غنم. الفلوس في الإعلام يا كريم. اللي بيعملوا برامج تليفزيونية دول بيبقى فارق معاهم البلد بيحصل فيها ايه؟ فارق معاهم بس يبقى فيه حاجة يتكلموا عنها عشان يلما قرشين. عاملين نفسهم قلبهم على الشعب بس ياخدوا ملايين و زعلانين أوي. طب لو البلد مش عاجباهم، مين اللي بيديهم الملايين؟ ما هي البلد! بياخدوا فلوسها ليه؟ اللي صاحب مبدأ مش مضطر انه يطلع ياخذ ملايين على فكرة! انك بتاخذ الملايين دي بتلغي فكرة المبدأ. لو عندك حاجة تقولها ما تقولها على الإنترنت ولا اعملها ببلاش من أي مصدر، ما الناس برضه هتسمك. انما أنا عندي موهبة ممكن أعمل بيها سبوبة حلوة، ليه لأ؟ الإعلام أوسخ و أسرع طريقة عشان يتعمل بيها فلوس و في نفس الوقت تضحك على الناس و تحسسهم انك بتقدملهم حاجة تستاهل بيها الفلوس دي كلها. كله في خدمة الهدف الأكبر و هو تنويه المشاهد و اللعب بدماغه. مش عيب ان يبقى عندك الموهبة، و مش عيب انك تعمل بيها سبوبة حلوة، انما العيب لما تبقى منافق و تقنع الناس و نفسك انك صاحب مبدأ و تقعد تمثل. أنا يا سيدي معترف اني بعمل فلوس، حد عنده مشكلة؟ لو حد مكاني قدامه فلوس هيقولها لأ؟ عارف لو جيت دلوقتي قلتلي أنا لعبت كورة عشان أعمل فلوس هحترمك جداً. مش عيب انك تأمن مستقبلك. بس خليك صريح مع نفسك و مع الناس. متعملش فيها واد محصلش و تحاسب في اللي حواليك قبل ما تبص لنفسك! أنت عملت أي حاجة عشان تغير الوضع الجاري، ولا مشيت مع التيار و عمال تبرر لنفسك ان مالکش ذنب؟"

- "أبرر لنفسي؟ أنا فعلاً ماليش ذنب"

- "يبقى صعب علي الواحد يقول لنفسه أنا غلطان، فيبهون الموضوع علي نفسه شوية و يدي أعذار و مبررات. لما بيتزق و ميلافيش مبرر في الآخر يقول لو أي حد مكاني هيعمل كدة. لو جيت أهتمته بحاجة غلط يقولك يا سلام و أنت اللي كويس؟ يا سيدي أنت مالك؟ بتبرر غلطاتك بغلطات غيرك ليه؟ لو مش لاقى مبرر متعملش فيها صاحب مبدأ. هو ده الضحك علي العقول بجد، مش تقولي ماتش كورة! ما الناس كلها بتحب المصارعة و عارفة انها تمثيل. كله بيتفرج علي برامج المسابقات بتاعة المواهب و عارف ان كلها تمثيل في تمثيل و يتفاعل مع القصص. لما تلاقي طريقة تخلط بينها بين الخيال و الواقع زي الكورة أنت كدة بتخدم الناس. بتديهم شخصيات حقيقية يتفاعلوا معاها و هم هيعتبروها فيلم. يعني محدش شك قبل كدة ان الكورة تمثيل و ملعوب فيها؟ ما أكيد ياما ناس شكت. حد فرق معاها؟ أبداً. لو قتلهم، هيبطلوا يتفرجوا؟ مستحيل. محدش هيلومك لو بتمثل عشان أكل عيشك. يعني المطرب لما يقول للناس أنا بحبكوا كلكوا بيبقى عارف حد من اللي في الحفلة ولا بيكون قصده أنا بحبكوا عشان بتسمعونى وعاملينلي قيمة و على قفاكوا باخد فلوس؟ أنت عندك موهبة بتديك فلوس يا كريم و بكررلك مليون مرة محدش هيفرق معاها ان ضميرك يصحى. بمجرد ما الماتش يخلص هيدور على حاجة تانية يتفاعل معاها و تاخذ تفكيره. هيروح يشرب شيشة، ولا يلعب بولينج مع أصحابه؛ أي حاجة و السلام. أنت اللي هتخسر لو رميت مستقبلك. و الماتش اللي بعديه على طول لو ضيعت كورة الناس هتساللك كل اللي عملته عشانهم. و بعدين المنتخب بتاعك أصلاً ضايع. أنت فاكرو لو مكانش فيه سيناريوهات كان هيكسر الدنيا و يخربها بطولات؟ خيلنا ساكتين"

- "عرفت منين لما احنا مخدناش فرصة نثبت نفسنا؟"

- "بلاش أوهام يا كريم. أنت فاكرو لو كنا لاعبنا البرازيل بجد كنا هنجيب ولا ريع جون من اللي جنبناهم في الماتش اللي خلص ٤ - ٣ و الناس طارت من

السعادة؟ كنت فاكركنا هناخذ بطولة أفريقيا ثلاث مرات ورا بعض لو الكورة مش تمثيل؟ التمثيل اللي مش عاجبك ده خلقتك لحظات جميلة في حياتك مكتش تحلم بيها. التمثيل ده بيديك مش بياخد منك. أنت من غيره فاشل، مالكش لازمة. أنت محتاج التمثيل ده عشان يعملك قيمة. يعني لو كان مكتوب في السيناريو ان مصر هناخذ كاس العالم كنت هتقول لأ، عيب أمثل؟ يبقى أنت كدة اللي بتمثل علينا يا فالخ. و مين عارف؟ مش يمكن لو التزمت ييجوا في يوم يرضوا عنك وتلاقي نفسك وصلت كاس العالم فعلاً و بتعدي لدور ال١٦؟ أي حاجة ممكنة. صدقني ساعتها هتبقى مبسوط و هتحب السيناريوهات. لما كنت بتفترج على الكورة زمان و فاكركها حقيقية، كنت مستمتع أوي ان اللاعبة بتخسر و تحرق دم الناس و بعدين تاخذ فلوسها برضه؟ كنت فخور أوي بالخسارة الحقيقية؟ يبقى بتضحك على نفسك"

- "و أنت مبسوط كدة يا عامر؟ لو في ايدك حاجة مش هتعملها؟"

- "فاكر أول سؤال سألتهوي يا. كريم لما جيت قدملك عرض الاحتراف؟"

- "أكيد مش هفتكر. هلعب في نادي ايه؟ مثلاً؟" عقد حاجيه محاولاً التذكر

- "لأ. أنا بقى فاكرك، و ده الفرق بيني و بينك. اني مركز! ده اللي مخليني

ناجح في شغلي بتفوق، و أنت واقف هنا عمال تعيط زي العيال و معلق شماعه

فشلك على غيرك. أول سؤال سألتهوي هو أنا مستفيد ايه من كدة. طب رد أنت

يا كريم. لو في ايدي حاجة أعملها، تعالى نفترض ان ده حقيقي، أنا مستفيد ايه؟

هستفيد ايه لما مصر توصل كاس العالم و اللعبة اللي وصلت تاخذ ملايين فوق

الملايين اللي بتاخذها؟ ولا حاجة. هم اللي هستفيدوا. أنت اللي هستفيد لما تخلق

لنفسك مجد شخصي و ثراء فاحش. أنا هستفيد حاجة؟ ما ترد عليا !"

- "احم.....بصراحة....لأ"

- "أديك جاوبت. انما لما تروح تلعب في ريال مدريد، أنا كمدير أعمالك

مستفيد. يبقى اتأكد اني هزلك ورا النجاح عشان ليا مصلحة من وراه. الدنيا

ماشية كدة؛ مصالح. ده اللي لازم تحطه في بالك و دي لازم تكون أولوياتك. هو الواحد لما بيدخل الجنة ولا النار بيدخل و معاه جمهوره ولا أهل بلده ولا حتى أصحابه؟ ما هو بيبقى لوحده. الإنسان كائن مبني على البقاء. حافظ على بقائك يا كريم"

- "ياااااه. للدرجة دي الدنيا رخيصة؟"

- "أمال اسمها الدنيا ليه يا فتك؟ عشان واطية ملهاش معنى ولا قيمة. متضيعهاش في فلسفة فارغة. خلي الفلسفة لتبوع الفلسفة، ده أكل عيشهم متزاحمهمش فيه. ركز أنت في الكورة اللي هي أكل عيشك أنت، زي ما أنا مركز في التجارة بأحلام الشباب. شفت أنا صريح معاك و مع نفسي ازاي؟ أنا أحسن منك. اجري ورا أكل عيشك! بعدين احكي لي يا بتاع الضمير الصاحي، عملوا معاك ايه لما اعترضت على السيناريو و قتلهم انك مش هتشارك في المهزلة دي؟"

- "ايه؟" سأل كريم في ارتباك

- "عملوا معاك ايه لما قتلهم انك مش هتشارك في مهزلة الضحك على عقول الناس، و انه لا يمكن تطلع مع المنتخب و هو بيخسر؟"

- "يااااا...مقالوش حاجة أوي"

- "مقالوش حاجة أوي؟" ابتسم عامر في خبث، "هل يا ترى عشان أنت أصلاً مقلتش حاجة؟"

- "يعني...تقدر تقول...حاجة زي..."

- "عشان معترضتش أصلاً، مش كدة؟"

- "لأ...معترضتش. و اتطوعت كمان اني أبقي سبب الخسارة"

- "ياااااه؟ هاهاهاها أيوة بقي يا كريم. أحبك لما تعرف مصلحتك فين. أفهم من كدة انك اخترت الأضواء و المجد الشخصي. مش عيب برضه. الناس هتشتم فيك شوية بس هينسوا أول ما تعمل حاجة كويسة تاني. الناس أصلها ناكرة. بس

حلوة دماغك! كدة سيرتك هتبقى على كل لسان! هتجيلنا سيناريوهات وعروض كتير يا معلم. أيوة بقى يا عالميبيبي" صَفَّقَ عامر كالأطفال

- "مانا... مانا عارف" أجاب كريم في شرود

- "و مادام أنت عارف، ايه لازمة الحوار الطويل اللي بقاله ساعة ده؟ ليه

عملتلي فيها الشريف؟ خضتني عليك" قال في دهشة

- "لأ معملتش فيها حاجة... أنا بس كنت بقول اللي جوايا"

- "استنى. أنت هتعمل ايه في الماتش بالظبط؟" سألَه في حذر

- "هجيب جون في نفسي، و أضَيِّع ضريبة جزاء"

- "يا سلام؟" نظر إليه في شك، "بتقولها عادي كدة؟"

- "أه... ايه المشكلة؟ مش كله بيعع عشان يلاقي لنفسه سكة؟ هو أنا لوحدي

هعمل حاجة؟"

- "برضه لسة بتبرر لنفسك؟ يابني أنت مش محتاج تبرر. أنت واحد عاوز

يعيش مبسوط. هي دي جريمة؟"

- "لأ طبعاً. أنت معاك حق"

- "كريميم!" صاح عامر في ريبة، "قتلتك قبل كدة ان اللعب مع الكبار

مينفعش فيه حركات العيال بتاعك، صح؟"

- "أيوة. اللعب مع الكبار مينفعش فيه حركات العيال اللي متعود أعملها،

مينفعش أخالف السيناريو عشان مجد شخصي. فاكر كويس" رد في تيلد

- "أنا بتأكد انك لسة فاكر. أنت عارف كويس ان مينفعش تعمل حاجة كدة

ولا كدة، مظبوط؟"

- "عارف يا عامر. متقلقش. مش هعمل حاجة كدة ولا كدة. معنديش نية.

أنا فقدت الاهتمام أصلاً" استمر في بروده

- "فقدت الاهتمام؟ معرفش ليه شاكك فيك. عموماً أنت عارف مصلحتك

فين. بس عشان مصلحتي وراك هحذرك تاني و أقولك بلاش. خليك في حالك

أحسن. ركز في أداء الواجب الوطني و التمثيل المشرف لبلدك زي ما قلت قدام الصحافة. مش ده كان حلمك؟ ولا ده كان كلام صحافة؟ مانت طلعت أستاذ"

- "التمثيل المشرف؟! هو طبعاً تمثيل يا عامر، تمثيل أوي كمان.... بس تمثيل غير مشرف.... تمثيل معفن... تمثيل رخيص" قال كريم في استنزاز

- "خرج كل اللي جواك يا كريم. قولها كتير يمكن قدا. المهم في الآخر تمام وتصحى تاني يوم ناسي كل اللي قلته. المشاعر السلبية مفيدة للواحد عشان يفك. آمال بيعملوا الأفلام الحزينة ليه؟ عشان المشاهد يعيط و يخرج الكبت اللي عنده. الكورة دي أقل حاجة تزعل عليها. دي أتفه حاجة ممكن تحس انك بتغش فيها حد. و بعدين متزعش نفسك يا سيدي، أنت بقيت صاحب ملايين. خلّص اللي وراك و ادفع شروطك الجزائية و دورلك على أي رياضة حقيقية تلعبها. ممكن تلعب تنس. أهو حتى التنس مليون بنات حلوة، و أنا عارفك صاحب مزاج. بس أظن التنس قلب تجارة برضه، حاجة للذوق العام و كله بيتفرج عليه، فلأسف ممكن تجيب من وراه ملايين غضب عنك. عارفك بتكره الفلوس أوي. أصلك صاحب مبدأ"

- "لا يا عامر أنا مش صاحب مبدأ. أنا صاحب مصلحتي"

امتلاً استاد القاهرة بال جماهير الغفيرة استعداداً للمباراة المصرية بين مصر وزامبيا. بدأ الدخول قبل المباراة بساعات كما هو معتاد. وصل الفريقان إلى الملعب وسط تحية كبيرة من الجماهير. حرص على حضور المباراة أصدقاء كريم فهمي، حازم، محمد و حمزة الذي نجح في الهروب من خدمته. تواجد أيضاً والده كريم و شقيقه، ذلك بجانب كل مصري يحلم بوصول المنتخب. تم عزف النشيد الوطني لكل من الفريقين في أجواء صاخبة و حماسية. تفقد طاقم التحكيم في الملعب سلامة الاتصالات بينهم لبادل التعليمات وسط المباراة. جلس المايسترو في غرفته المخصصة بكواليس الاستاد متفقداً كاميرات الملعب. وقف المديران الفنيان

للفريقين لأداء دورهما الصوري في المباراة. تصافح لاعبو الفريقين في احترافية كبيرة استعداداً لأداء المسرحية المثيرة التي ينتظرها الملايين. اجتمع رئيس الاتحاد الأفريقي مع رئيسي الاتحاد المصري و الزامبي في غرفة مخصصة لمشاهدة المباراة. حرص كل بيت مصري على الجلوس أمام التلفاز للمتابعة. انتظر المذيع التلفزيوني بدء البث ليبدأ في التفوه بالعبارات المبتذلة التي حفظها قبل المباراة. تبقت ثوان معدودة على بدء المباراة الحاسمة....

"أهلاً و مرحباً بكم أصدقائي المشاهدين في مباراة مصر و زامبيا بالجمولة الأخيرة للتصفيات الأفريقية المؤهلة لكأس العالم. يسعى منتخب الفراعنة إلى التأهل التاريخي على حساب منتخب الرصاصات النحاسية. على الجانب الآخر معركة ضارية بين أسود الكامبيون و أسود الأطلسي. معكم من استاد القاهرة نبداً المباراة..."

سوبر كاكاف؟

دعا رئيس الفيفا رؤساء الاتحادات لمشاهدة مباريات الجولة النهائية معه. اتبع هذا التقليد منذ توليه المنصب، و اختار دائماً المباريات الهامة بالنسبة له و المفترض أنها ستمتع المشاهد. يتجنب مشاهدة المباريات المحسومة لأنه قد يسودها الملل، بينما يركز على المباريات التي تتسم بالإثارة و الحماس. تضمنت المباريات ملحق التصنيفات الأوروبية، تصنيفات آسيا مع أوقيانوسيا، تصنيفات أمريكا الجنوبية مع الكونكاكاف، و أخيراً الجولة النهائية لتصفيات أفريقيا. لم تقام كلها في نفس الوقت لكن حرص رئيس الفيفا على مشاهدة مباريات مصر أمام زامبيا، البرتغال أمام البوسنة و الهرسك و أيرلندا أمام فرنسا. ففتح زجاجات الشامانيا الفخمة للاحتفال.

- "في صحتكم. انهاردة بنخلص تصنيفاتنا و نستعد للجائزة الكبرى...كاس العالم" قالها في هدوء محافظاً على التأثير الدرامي
- "في صحتك. نتمنى الماتشات تعجب حضرتك" أجابه رئيس الاتحاد
الأسوي

- "لازم تعجبنى. مش أنا اللي مشكلها على مزاجي، هاهاها. ايه ده أنت قاعد معانا؟" نظر لرئيس أوقيانوسيا، "أحب فيك التزامك. شوفوا رغم ان الماتش بتاعه اتلعب من الفجر و هو مالوش أي لازمة بس دائماً يبقى حاضر في كل حاجة. ده مثال للتلميذ الشاطر. آمال فين بتاع أفريقيا؟ مش عنده ماتشات مهمة؟"

- "اعتذر عن الحضور. يقول انه يحب يشوف الماتشات المهمة عنده في البيت"

- "عنده في البيت؟ هاهاهاها. أتحداك انه بيتشاقى. راجل صاحب كيف" ضحك رئيس الفيفا في بلاهة

- "أيرلندا جابت جون أهيه. و البرتغال كمان" قال رئيس الاتحاد الأوروبي محاولاً إعادته لجو المباريات

- "هو ماتش فرنسا و أيرلندا هيخلص على ايه؟" سأل رئيس الفيفا
- "هيلعبوا وقت إضافي، و في الآخر فرنسا هتوصل. أنا حاططلك سيناريو هيمزجك أوي، أكيد قرينه"

- "تعرف عني كدة؟ احكي لي"
- "الناس في أيرلندا هتموت على الماتش ده. فكرة ان أيرلندا توصل السنة دي عملاهم تخلف. قررنا نحسبهم ان أيرلندا هتوصل أوي عشان في الآخر فرنسا توصل مكانها. مش كدة و بس، الجون بتاع فرنسا هيبقى ظلم أوي، لمسة ايد واضحة. الناس هناك ممكن تروح فيها"

- "تموت أنت و تشل الناس" ضحك رئيس الفيفا في تلذذ

"مضت ربع ساعة من أحداث المباراة و النتيجة دائماً التعادل السلمي بين المنتخب المصري و المنتخب الزامبي. يلا يا مصريين ارفعوا راس العرب كلهم. حصلوا المنتخب الجزائري لبطولة كأس العالم. خلي العالم كله يتكلم عننا كعرب. كورة حلوة من فيجوا في وسط الملعب بياصيها لكاك. توزيعه حلوة و عماد متعب رأسية. تخرج بره ضربة مرمى. موش مومكون على الخطورة"

سار السيناريو بسيطرة قوية للمنتخب المصري في أول ربع ساعة لم يعرف فيها اللاعبون طريق المرمى. صاحت الجماهير في الملعب لتحمس أبطالها شاعرين بالفوز في انتظارهم. للأسف لم يعرف أحد المفاجأة التي بانتظاره. تعاقبت الهجمات بقيادة

رفع رئيس الاتحاد الأفريقي سماعة الهاتف ليستفهم بالضبط توقيت إحراز الهدف الأول فأجابه المايسترو بالموعود. أمره رئيس الاتحاد ألا ينتظر لنهاية لشوط ويتم إحراز الهدف قبل النهاية بعشر دقائق على غير المتفق عليه. قرر ذلك لشعوره بحماسة الجمهور الشديدة و أراد إعطائهم عشر دقائق من نار قبل نهاية الشوط. نقل المايسترو التعليمات للحكم. استمع الحكم باهتمام و قرر إيقاف اللعب ليشرح التطورات في الأحداث. أشار الحكم بيده للآعب المحتفظ بالكرة، وهي إشارة خفية تعني توجب إيقاف اللعب على التو. همس بدوره إلى اللاعب أمامه بضرورة عرقلته. دفعه اللاعب بقوة و سقط أرضاً فقام يفتعل شجاراً وتدخل كل اللاعبين لتهدة الأجواء.

"لا لا ، لماذا تفعلون ذلك؟" صاح المذيع، "هايدي ما روح رياضية. ما هناك داعي أبداً من ذلك الشجار. يجب على المصريين أن يحتفظوا بهدوتهم" استمر التشابك، بينما في الواقع ما دار هو حوار توجيهي من الحكم ليعلمهم بالتجديدات.

"بصوا يا جماعة. جالي تعليمات من المايسترو ان الجون يدخل على طول دلوقتي. بعد الجون هتضغطوا جامد كأنها حماسة الجون، و تكملوا تضييع الفرص الخطيرة. الاقتراح ان الجون ييجي من أبو تريكة عشان الناس بتحبه و هو بطل المنتخب المصري عادةً. الجون هيكون هات و خد مع أي لاعيب. خليه معاك أنت يا فيجو. كفاية الوقفة دي عشان كدة قلبت خناقة في حارة"

عاد اللاعبون إلى المباراة و تعبيرات السخط تملأ وجوههم بعد تشابك غير مبرر بالأيدي، و بضعة إنذارات من الحكم. مرور وائل جمعة الكرة إلى كريم. انطلق بسرعة شديدة في نصف الملعب و لعب تمريرة بينية إلى فريد، مررها بدوره إلى أبو تريكة، الذي نفذ تمريرة متبادلة يشتهر بها لينفرد بالرمي. وضع الكرة في الشباك بثقة الكبار، و علت صيحات الجمهور الجنوبية في الملعب.

"أبو تريكة يا معلم، خلي الشبكة تتكلم. هو أبو تريكة الفنان، هو أبو تريكة الرسام. يعملها و يفرح الجمهور في كل مكان. موش مومكون يا أبو تريكة على العظمة. كرة تيكي تاكا جميلة مع فيجو تنتهي بجون متقوليش و متعيليش. هدف ولا في الأحلام. منتخب الفراغة واحد، منتخب الشيولوبولو صفر"

استمر الضغط الجنوبي للمنتخب المصري مضيعين فرصاً غير معقولة. لم يسفر ذلك عن أي أهداف طبقاً للسيناريو، ليعلن الحكم بعدها نهاية الشوط الأول وسط فرحة الجمهور العارمة. خرج اللاعبون متظاهرين بالسعادة حفاظاً على احترافيتهم. ابتسم رئيس الاتحاد الأفريقي بالشكل المثير الذي سارت عليه المباراة. سعد لتفكيره الفذ لسيناريو المباراة. وجد السخط على وجه رئيس الاتحاد المصري.

- "مالك زعلان ليه؟ عشان مصر مش هتوصل؟" سألته في تعجب

- "أنا أزعل عشان مصر مش هتوصل؟ لأ طبعاً. أنا متضايق عشان مش لافي مفتاح العربية. هضطر أشتري واحدة ثانية و خلاص. احنا هناخد كام بعد الماتش ده؟"

- "هناخد لوحك نص مليون دولار. فيه نص مليون ثانية هتوزع مكافآت على اللعيبة بانتهاء موسم التصفيات"

- "أبوة كدة. أحسن طريقة تنسى بيها عربية، إنك تجيب عربية غيرها و أحلى منها كمان" ابتسم رئيس الاتحاد المصري في جشع

- "و احنا لينا زيههم؟" سأل رئيس الاتحاد الزامي

- "زيهم؟" صاح رئيس الاتحاد الأفريقي في دهشة، "أنت بتقارن نفسك بيهم ليه؟ انتوا مش مهمين أوي زي مصر على الصعيد الأفريقي. استنى سنة ولا اتنين كمان تكون عليت شوية. هناخد ٢٠٠ ألف دولار بس"

- "بس؟ يجيبوا ايه دول؟" سأل في انزعاج

- "لأيجبوا كثير طبعاً" تدخل رئيس الاتحاد المصري، "محدث بيحمد ربنا أبداً؟
مش ممكن. بتقارن نفسك ببطل أفريقيا؟"

- "معاه حق" وافقه رئيس الاتحاد الأفريقي، "إذا كان الكامرون مش هتاخذ
كل ده رغم انها متصدرة المجموعة"

استمر الحوار المادي بينهم، بينما بدأت مراجعة السيناريو في استاد القاهرة
الدولي بين شوطي المباراة. تواجد الخبر الإبداعي لكل من الفريقين لتذكيرهما
بالنقاط الأساسية. راجعا على ضرورة إحراز كاكاه هدف في مرماه بعد مرور سبع
دقائق من الشوط. أكدوا أيضاً على فقدان الكرة بسهولة لصالح الفريق الزامي عن
طريق التمزيقات الخاطئة. ذكروهم بضرورة ترك الضغط للفريق الزامي بعد
الهدف مع لعب سلبي من نظيره المصري إلى موعد الانتفاضة في الموعد المناسب،
وهو قبل النهاية بعشر دقائق. راجع كل لاعب دوره بتركيز إلى أن أتى موعد بدء
اللعب.

نزل اللاعبين إلى أرض الملعب دون أن تظهر عليهم آثار اليأس. تجنب كريم
النظر إلى المدرجات و كأنه يخشى مواجهة أهله و أصدقائه الذين ينتظرون منه
تحقيق الحلم. نظر أرضاً في خيبة أمل دون أن يترك الكاميرات تلتقط ذلك. وضع
ابتسامته على وجهه ثم رفع رأسه ليستمع باللعب. بدأ الشوط الثاني و كل من في
الجمهور يظن وقوع الدمار الشامل على زامبيا.

"أهلاً بكم أصدقائي المشاهدين و الشوط الثاني من المباراة الكبيرة. كل عاشق
و محب للمنتخب المصري على موعد مع التاريخ الليلة. تريدون رأيي؟ أنا واثق من
صعودهم لكأس العالم. هذا الجيل من اللاعبين لن يتكرر، منذ أيام مجدي عبد
الغني، حسام حسن، ربيع ياسين، هشام يكن، إسماعيل يوسف و جمال عبد الحميد
لم يضع مصري قدماً في كأس العالم. جاءت الفرصة الآن للمنتخب أن يصل ويقول
ها نحن ذا. جاء الوقت اللي الفراعنة هيزكروا العالم كله انهم الأسىاد. حسام غالي

يركض بالكرة، تمريرة إلى فيجو. تمريرة بينية إلى أحمد فتحي، التوزيع و رأسية من البلدوزر عمرو زكي في يد كنيدي مويي. بداية قوية للفراغة"

مرت الدقائق، و مع كل دقيقة شعر كريم بدقات قلبه تتسارع. تذكر كيف سيحوز الهدف في مرماه. من السهل حتماً إحراز هدف عندما لا يبدي حارس المرمى أي مقاومة لكن ما وجده صعباً هو كيفية إحراز هدف في مرماه بطريقة تبدو عفوية، و في نفس الوقت لا يخطئ المرمى. عليه انتظار. كرة عرضية من لاعب زامبيا و تحويلها برأسه دون أن يقصد إلى الشباك. انتظر اللحظة التي يتلقى بها الإشارة من الحكم لإحراز الهدف. انتظر الحكم بدوره أمر المايسترو حتى جاءه. اقترب الحكم من كريم و أمره بإحراز الهدف في الهجمة القادمة. بدأت كهجمة للمنتخب المصري ثم قطع لاعب وسط زامبيا الكرة و بدأت الهجمة المرتدة المنظمة.

"هجمة مرتدة خطيرة لمنتخب زامبيا. خمسة على ثلاثة. تمريرة إلى الجناح، والتوزيع. أووووووه. موش مومكون على هذه الكرة. موش مومكون يا كاكا. لازم تركيز أكثر من هذا. كاد يحرز هدفاً في مرماه. حاول إخراج الكرة برأسه فكادت تسكن الشباك، لكنها علت العارضة بسنيمترات. كله وضع يده على قلبه في هذه الكرة. كاكا لاعب الملايين كاد يحرز هدفاً يكلف مصر الملايين"

عقد رئيس الاتحاد الأفريقي حاجبيه، و قام من موقعه متصلاً بالمايسترو. حاول المايسترو إصلاح الموقف، خاصةً بعد ظهور الارتباك على كريم. لم يصدق أنه متوتر لقلة كفاءته في إحراز هدف بمرماه. تلقى التعليمات بأن يتغير السيناريو قليلاً، فإن لم يستطع إحراز الهدف بمرماه بشكل عشوائي، عليه أن يفقد الكرة أمام المرمى ليترك فرصة هدف. أصبحت المهمة أسهل بالنسبة إليه.

"ضربة مرمى للمنتخب المصري. يمررها الحضري إلى كاكا. يسر كاكا بالكرة و محاولة للمراوغة، يخطفها كاتونجو، و خطيرة جداً!!!!. و هدف التعادل لمنتخب

زامبيا. موش معقول يا كاكا. لا أصدق ما أرى. هدف ما ليه أي داعي صراحةً. ماذا تفعل يا كاكا؟ أقصد يا كريم، فما رأيته الآن لا يمكن أن يكون صادراً من لاعب بحجم كاكا. يجلس أرضاً و يغطي وجهه بكفيه. إنه يخفي العار. يحاول زملاؤه إعادته لجو المباراة. موش موشكيلة يا شباب. لازال الشوط بأوله. منتخب الفراعنة معروف بتحديه الصعاب، بطل أفريقيا للنسخ الثلاثة الأخيرة قادر وسيعود للمباراة، خذوها مني كلمة. لكن صراحةً هدف غير متوقع و غير مستحق للمنتخب الزامبي. لكن كلنا نعلم ان الكورة غدارة و مالهاشي كبير أبداً"

كاد كريم يتقيأ من الاشتزاز. تماسك قليلاً و حاول التركيز أكثر في المباراة. علم أن مهمتهم طوال الثلث ساعة القادمة هي فقدان الكرة بطرق مستفزة والتقهقر دفاعياً باستماتة منعاً لتلقي هدف آخر لن يأت. تغيرت أجواء المباراة بالضغط من المنتخب الزامبي مع تقهقر غريب للاعبي مصر. بعد مرور عشر دقائق أخرى بدأ الإحباط يدب في الجمهور، و تذكر آلام تصفيات كأس العالم السابقة وخيبة الأمل. سكت الكل مشاهداً المباراة في توتر. تعجب المذيع من انقلاب إيقاع المباراة و بدأ يعبر عن انزعاجه.

"لا يا مصريين، لازم تفوقوا. أقترح أن يجري المدرب بعض التغييرات. موش ممكن يسكت على هذا الوضع. هيا يا فراعنة. كرروا إنجاز ١٩٩٠. لسة المباراة مانتهتشي. زي ما بحب أقول دائماً، العبرة بالخواتيم. هجمة خطيرة جداً لزامبيا عن طريق مايوكا، تسديدة قوية، و الحصري يقول لا. يا حضري يا معلم. حارس العرين المصري. يلا يا أبطال، اكتبوا بأيديكم الأبحاد"

مرت الدقائق سريعة على الحاضرين اتباعاً لنظرية النسبية الشهيرة. بدا و كأن المنتخب المصري سيستسلم للظروف. قبل النهاية بعشر دقائق بدأت الانتفاضة المنتظرة حيث أعادت هجمة مرتدة سريعة الآمال للجمهور و بدأ التشجيع من جديد. ازدادت حرارة الأجواء بعد ضياع فرصة أخرى من فريد. تحمس الجمهور و شعر بهدف قريب.

"أيوة يا مصريين، عودوا إلى أجواء المباراة. أبو تريكة المعلم يسير بالكرة، يمرر إلى سيد معوض. تسديدة قوية عالية جداً، غير معقول. تغيير أول للمنتخب المصري. نزول مهاجم ثالث، و يخرج وانل جمعة. واضح انه سيلعب بثلاث مدافعين فقط في سبيل تكثيف الهجوم اعتماداً على لاعبي خط الوسط بأداء واجبات دفاعية بسيطة. لما نشوف الشحات يفكر كيف. تمريرة متبادلة بين كاكا و فيجو. كاكا ينطلق مرة أخرى و يعطيها لأبو تريكة. أبو تريكة يراوغ. يتوغل في منطقة الجزاء. و عرقلة قوية. و الحكم يقول ماذا؟ ضربة جزاء للمنتخب المصري. ياه على الإثارة، ياه على السيناريو. من على التنفيذ؟ أه. إنه كاكا. التوتر يبدو واضحاً عليه. نقدر نقول انه من وضع زملاءه في هذا المأزق. كاكا سدد من نقطة الجزاء أكثر من عشرين مرة في أقل من عامين. هل سيفعلها اليوم أيضاً و يقود فريقه للوصول؟ لم يضع ضربة جزاء من قبل لكن أعصابه قد لا تسعفه. أنا أرى أبو تريكة ينفذ، لكن الشحات يشوف كلام تاني. ترى هل سيفعلها كاكا أم ماذا؟"

أمسك كريم بالكرة و احتضنها كطفل صغير. قبلها كما يفعل معظم اللاعبين و ثبتها على نقطة الجزاء. عاد للوراء و وقف مفكراً. لم يعتد تضييع ضربات الجزاء و بالتالي عليه أن يركز ليضيعها بشكل غير ملفت النظر. فكر في الهتافات والسياب و ما سيتعرض إليه من إهانات في الدقائق الأخيرة للمباراة. سرح بخياله في النقد اللاذع الذي سيتلقاه بعد ذلك من الصحافة المصرية. لكنه سيضيع ضربة جزاء في يوم من الأيام بالتأكيد، و كما تعود في لعبة الكرة فلا يجب إعطاء شيء للجمهور دون قيمة حقيقية. إن أضاع ضربة جزاء فعليها أن تكون غالية جداً. لن يضع ضربة جزاء في مباراة يفوز بها مع فريقه بمليد بخماسية أو سداسية. سيضيعها مع منتخب مصر، و تلك الضربة ستحرمهم من الوصول. هكذا تصبح ذات قيمة و لا تضيع دون فائدة. استفاق علي صوت صافرة الحكم لتسديد الضربة. نظر للمرمى، و فجأة أدرك أمراً خطيراً. إنه لا يتذكر بأي زاوية عليه التسديد، اليمنى أم اليسرى. عقد حاجبيه وسط صيحات الجمهور و هتافات الزملاء في الملعب. من الواضح أن أجواء المباراة أثارت توتره و تمكنت منه.

تصيب العرق على وجهه فمسحه بذراعه. أخذ يعتصر ذهنه مراجعاً ما قيل له قبل دخول الملعب. حاول أن يهتف للحارس لكنه أيقن أن الكاميرا مسلّطة على وجهه الآن إلى حين تنفيذه الضربة. لم يمكنه أن يسأل أحد عن الخطوة القادمة. حبس أنفاسه، و ركض لتسديد الكرة.

- "مالك مركز أوي في الماتش؟" داعبت رنا شعر عامر في رومانسية محاولة لفت انتباهه و استدراجه لمداعبتها بغرفة المعيشة في شقتها

- "مش وقته الكلام ده يا رنا"

- "رنا؟ من امتي بتقولها؟ أمال فين الدلع اللي كنت فالقني بيه؟"

- "مش وقته يا روني. حلو كدة؟" أجابها في سخافة و تركيز شديدين أمام

التلفاز

- "كدة؟ طب أنا هقوم أمشي" قفزت من مكانها في طفولة

- "تمشي تروحي فين؟ احنا في شقتك. بلاش شغل الهبل ده على بالليل"

- "مش شايف بتعامل معايا ازاي؟" قالت في دلال محاولة إثارة انتباهه

- "أنتي مش فاهمة. الواد ده أنا شاكك فيه. كل مرة يضحك علينا ويقرطسنا. حاسه هيعملها المرة دي برضه"

- "يادي كريم اللي أكل دماغك. مبقاش وراك غيره؟ من ساعة ما احترف في النادي الزفت ده و أنت محسسي ان معندكش لاعبية غيره. فين حبيبي بتاع زمان اللي مكانش يفرق معاه أي عيل من دول؟ من امتي الاهتمام ده بجد؟"

- "الواد ده مش سهل. أنا خايف يضيع مستقبله بايده"

- "يفرق معاك أوي؟" سألته في غيرة

- "مش أنا مدير أعماله؟ لازم يفرق معايا. أصل الغلطة بعد كدة بجون يا رنا. مينفعش يهبل تاني. الناس مش هترحمه"

- "عنهم ما رحموه يا عامر. سيبك من الماتش ده و تعالى اقعد معايا"

- "مينفعش أسيب الماتش يا رنا. ده شغلي و لازم أتابع اللي بيحصل"

- "أنت هتجني؟ مانت على طول بتنفض"

- "و دي أول مرة مانفضش. عندك مشكلة؟" صاح في غضب

- "براحتك. خلّص ماتش الكورة المهم بتاعك. أنا مستنيك جوة لما تفضالي"

قامت في سخط و تركت عامر أمام المباراة

- "أهي ضربة الجزاء جت" صاح عامر و نظر في ترقب، "ورينا هتعمل ايه يا

سي كاكا"

سكنت الكرة الشباك. أمسك كريم برأسه في حركة لا إرادية بينما انفجر الملعب في سعادة طاغية. انتبه كريم لمظهره فاعتدل و تظاهر بتحريك يديه من السعادة. هرع إليه زملاؤه في لهفة.

- "عملت ايه يا كريم؟" صاح فريد في تعجب، "أنت عملت كدة بجد؟"

- "لأ يا جماعة دي غلطة أنا هصلّحها حالاً" همس في توتر لكن لم يسمعه أحد

من الضوضاء الصاخبة و الجدالات الجانبية

صفر الحكم معلناً إلغاء الهدف، و قرر إعادة الكرة مرة أخرى. دوت صيحات الجمهور الساخط على القرار لأنه لم يوجد أي سبب منطقي لإعادة الضربة. صاح رئيس الاتحاد الأفريقي بالمايسترو في الهاتف. انتفض المايسترو مكانه و بدأ يتحدث لحكم المباراة. "الولد ده شكله متلخبط و دي ثاني غلطة ليه في الماتش. خلي حد غيره يشوط. مش ناقصة غلطات ثاني. مش عاوزين الماتش ييوط"

توجه الحكم إلى لاعبي منتخب مصر الذين تظاهروا بالاعتراض. "انتوا عاملينلي مشاكل من أول الماتش. حد غير كاكا يشوط ضربة الجزاء و يضيعها. مش صعبة للدرجة دي. حد فيكوا يروح يشوط" تراجع الحكم و انتظر تولى لاعب آخر المهمة الشاقة. أفسح كريم المجال كي ينفذ أحدهم الضربة بدلاً منه

بعدما خاتته الذاكرة و اختار الزاوية الخاطئة. أمكنه أن يعيدها و يسددها بهدوء إلى الزاوية الصحيحة، لكنه علم أنهم لن يتركوا له الفرصة. ظلت الكرة على الأرض في انتظار من يحملها لمنطقة الجراء، لكن لم يتقدم أحد. صاح الحكم في عصبية شديدة باللاعبين "يلا يا جماعة بلاش دلج! حد يروح يضيع الكورة عشان نخلص" حاول قدر الإمكان أن يتماسك لنلا يظهر للكاميرات ما يقول. لم يتقدم أي من اللاعبين لتنفيذ الضربة. اقترب منه كابتن المنتخب المصري و نظر إليه في صرامة "محدث فينا هيشوط الضربة دي و يضيعها. اللي عمل نفسه فتك و قال هيضيع هو اللي يدخل يشوط. محدش فينا هيتطوع و يعمل كدة"

عاد الحكم إلى كريم مرة أخرى يتضرع إليه كأنه يطلب صدقة "خلاص يا كاكا. ممكن بعد إذن سعادتك تضيعها المرة دي صح؟". ابتسم كريم و قد تفهم رفض زملائه لتسديد الضربة. فهي مسئوليته منذ البداية و هو من تطوع لها.

"من سينفذ الضربة؟ إنه كاكا مرة أخرى، مش معقول" صاح المذيع. "الحكم وكأنه لا يريد للمنتخب المصري أن يفوز. لا أفهم أبداً سلوكه. كاكا تمالك أعصابه و أحرز الضربة الماضية. هل سيتمكن من تكرار ما فعله مرة أخرى؟ هيا يا كاكا"

لم يصدق رئيس الاتحاد الأفريقي ما يرى. تقدم كريم مرة أخرى للتسديد. أخفى رئيس الاتحاد المصري ابتسامته، بينما جلس رئيس الاتحاد الزامبي دون أدنى اهتمام منشغلاً بالمبلغ البخس الذي سيحصل عليه مكافأة للتصفيات. صاح المايسترو في غضب و قرر الحكم تجاهله منتظراً تنفيذ الضربة.

قبل كريم الكرة مرة أخرى بشكل روتيني و وضعها أرضاً. ابتسم في سخرية غير مصدق للمعضلة التي أمامه، فهل سيقفز الحارس في الزاوية الصحيحة التي اتفقا عليها منذ البداية أم سيتذاكى و يقفز في الزاوية الخاطئة التي سددها كريم المرة الأولى؟ حنّ أنه سيلتزم بالسيناريو الرئيسي و يقفز في الزاوية الصحيحة. رأى

بدل ضائع. اوعى تصفر قبل ما زامبيا تتعادل، فاهم؟ خليهـم يجيبوا جون دلوقتي حالاً. حتى لو بتوع مصر لقوا و جابوه في نفسهم ميهمنيش. مينفعش يوصلوا للكاس، أنت فاهم؟ مينفعش يوصلوا" ذهب حكم المباراة إلى اللاعبين طالباً منهم ترك الهجمة لزامبيا و الاستسلام للتعادل. رفع الحكم الرابع اللافتة معلناً عن ست دقائق وقت بدل ضائع. تراجع لاعبو المنتخب المصري منتظرين تلقي هدف التعادل.

"هجمة سريعة من فريق زامبيا. لا بد أن يصمد المصريون. واضح التوتر على الفريق الزامبي، و على المنتخب المصري استغلال الوضع. تسديدة قوية من بعيد عن طريق شامانجا، و في القائم. مش معقول. يا للإثارة. يا للربح" شقّق الجمهور المصري من القلق. و تخلى اللاعبون المصريون عن الكرة ثانيةً لأجل هجمة جديدة لفريق زامبيا. تجول كريم في نصف ملعب فريقه بجدوء في انتظار الضربة القاصمة. شعر بحماسة و توتر الجمهور، و نظر إلى زملائه ليرى خيبة الأمل الخفية في عيونهم. ميّز التوتر و السخط على وجه الحكم. رأى مهاجم زامبيا يركض بالكرة في طريقة للمرمى. تفحصه بتركيز و ترقب و أخذ يفكر في الخطوة القادمة.

"عاوزك أول ما زامبيا تجيب الجون تصفر و خلاص. متستناش حتى أما الوقت يخلص. هيقولوا في الآخر انه فرق ساعات" صاح المايسترو في أذن الحكم ليؤكد عليه السيناريو. انتظر الحكم دخول الهدف لينهي المباراة المأساوية.

"ينطلق كاتونجو و يمر بجوار كاكا بسهولة. ماذا تفعل يا كاكا؟ غير معقول ما يحدث. تمريرة إلى مايوكا تسديدة قوية، و هدف! لا أصدق ما أرى. هدف التعادل للمنتخب الزامبي. أضاع المنتخب المصري التقدم بعدما وصل إليه بصعوبة. شئ مستحيل. موش مومكون يا مصريين على هذا التقصير" صاح المذيع في سخط بينما أثار الجمهور و لم يصدر منه صوتاً. بدت خيبة الأمل على اللاعبين المصريين و استعدادا لتنفيذ ضربة البداية مرة أخرى. أطلق الحكم صافرة النهاية قبل الوقت المقرر بدقيقتين كاملتين. ثار الجمهور و انطلقت الهتافات المشينة لكل من في

الملعب. بدأت المدرجات في إلقاء الأكياس و الفضلات تعبيراً عن الغضب الشديد. تظاهر كريم بتحية الجمهور و اصطدم حذاء أحدهم في وجهه. انتفض مكانه و استفاق من أحلامه. قرر أن ذلك السيناريو لا يعجبه.

"ينطلق كاتونجو... و يعترضه كاكا و يخطف الكرة. كاكا ينطلق في هجمة مرتدة سريعة" صاح المذيع ملتقاً أنفاسه بصعوبة. انفعل الجمهور في ترقب. دعك المايسترو عينيه في ذهول و حك رأسه بقوة و عنف. "قريرة من كاكا إلى أبو تريكة، لكنها تخرج رمية تماس لفريق زامبيا. على المنتخب المصري الصمود في الدقائق الأخيرة"

صاح كريم في غضب. تذكر استحالة أن يحقق شيئاً بمفرده بعدما ترك زميله الكرة. لو لم يضم زملاءه في الفريق إلى صفه لن يكسب المباراة. كرة القدم لعبة جماعية، و من هو ليقود فريق كامل للفوز ضد رغبته؟ تفهقر إلى الخلف بسرعة وسط دهشة زملائه. لاحظ تناقل بعض التعليمات دون أن تصل إليه. بدأ منتخب زامبيا الهجمة التالية. التزم كريم بالدفاع و صاح محاولاً لفت انتباه فريد.

- "يا فريسييد! أنت سامعني؟"

- "أنا واقف جنبك يا كريم. أنت فاكر نفسك على الجبل؟ ايه اللي بتنبيله ده؟"

تدخل كريم في كرة أخرى و ركلها بعيداً في اتجاه نصف ملعب زامبيا على أمل كسب بعض الوقت.

- "مش كان نفسك توصل الكاس عالم بجد من غير تمثيل؟" صاح كريم في ياس، "أهي الفرصة جاتلك انك توصل بجد و غضب عنهم كلهم. هتسيبها ولا هتاخذها؟"

- "أنت بتهزر يا كريم؟ ايه اللي بتقوله ده؟ سيب الماتش يعدي على خير"

تظاهر فريد بمحاولة قطع الكرة فمر منه لاعب زامبيا مما اضطر كريم إلى التدخل بنفسه و كأنه اللاعب الوحيد في المنتخب. قرر الاحتفاظ بالكرة قليلاً لإضاعة الوقت. علم أنه مهما أضاع من وقت لن تنتهي المباراة لأن الحكم

سيُسمح لها بالاستمرار. لن يخدمه سوى أن يتعاون معه الزملاء لإضاعة وقت كبير فيضطر الحكم إلى إنهاء المباراة؛ فلن يعطي خمسين دقيقة مثلاً من الوقت بدل الضائع. قرر توفير مجهوده فركل الكرة من بعيد و كأنه يهديها لدفاع زامبيا. ركض عائداً و هو يصيح بزملائه.

"جري ايه يا جماعة؟ هتسيبونا نصيغ الماتش كدة؟ مش كل واحد فيكوا مرضيش انه يشوط ضربة الجزاء و يضيّعها؟ يعني أكيد كل واحد فيكوا نفسه يوصل زي ما أنا نفسي أوصل. لو سبتونا نخسر و احنا على بعد دقائق من الفوز دي ألن من لو كنتوا ضيعتوا ميت ضربة جزاء. لو عاملين نفسكوا أصحاب مبدأ يبقى لازم تقفوا جنبي و نعتدي الماتش لصالحنا. مش هنخسر حاجة لما نلوي دراعيم و نوصل بالعافية. هيطلعونا من الدور الأول؟ ما احنا كدة كدة مكناش هنوصل. هيقفونا عن اللعب؟ مستحيل يوقفوا منتخب مصر كله، أكيد هنطلع في البطولة و أهو حضور و خلاص" التقط كريم أنفاسه بصعوبة و هو يركض في جنون قبل أن تصل الكرة لمنطقة جزاء فريقه. "أنت يا زفت يا فريد. مش عملتلي فيها شاعر و كنت حاسس انك لو وصلت الكاس هتبقى موصلتلوش بمجهودك؟ ما تورينا يا عم شطارتك و اثبتنا انك بتعرف تلعب أصلاً" لم يلحق كريم بلاعب زامبيا حيث لم يكن واجبه أن يدافع أصلاً. تسمّر فريد في الخلف حائراً، لا يدري ما يفعل. خشى التدخل في النهاية و ترك المهاجم يمر. صاح به كريم في غضب "وعامل نفسك راجل؟ ربنا يهدك" اقترب مهاجم زامبيا من المرمى فجثا كريم على ركبتيه في يأس. سدد المهاجم الكرة بقوة...فجأة وضع أحد المدافعين قدمه في طريق الكرة ليخرجها إلى ضربة ركنية. ضحك كريم في سعادة و سمع المدافع يصيح قائلاً: "بتهرجوا ولا ايه يا جدعان؟ هنسيب الناس دي تكسبنا؟ يا حنا يا هم انهارده" عاد كريم بسرعة لمنطقة الجزاء وسط صرخات الجمهور الهستيرية. دبت الحماسة في فريد و عاد لتأدية واجبه الدفاعي هو الآخر. تم تنفيذ الضربة الركنية وقفز حارس المرمى ليمسكها بكل ثقة. أصبح واضحاً إلام يسعى المنتخب المصري.

"الواد ده يطلع. خليه يعملوا تغيير. كاكنا يطلع حالاً. ده عاملي فيها مهاجم و مدافع و خط وسط. شيلوه دلوقتي حالاً" صاح المايسترو في جنون. رفع الحكم

عينه إلى أعلى في غضب شديد و نقل التعليمات بتغيير كاكّا. وقف أحد البدلاء على الخط استعداداً للتغيير على الفور. أيقن كريم أن وجوده في الملعب أصبح في خطر.

"محدث يخرج الكرة. العب ضربة المرمى على الأرض" صاح كريم. "بالراحة عشان ميعرفش يعمل تغيير. تعالوا نقسم عليهم". مرر اللاعبون الكرة إلى بعضهم البعض في أداء مدروس و كأنهم بحصة تدريبية. لم يفهم لاعبو زامبيا ما يحدث. جاءهم التعليمات بالسعي خلف المباراة و محاولة اقتناص الفوز، بينما وجدوا المصريين يخرجون عن النص.

- "قولهم يحاولوا يكسبوا الماتش" صاح المايسترو بأعلى صوت في أذن الحكم

- "يكسبوا الماتش ازاي؟ الفريق المصري عمال يهبل و مش متعاون" أجابه

الحكم في دهشة

- "يعني ايه ازاي؟ خليههم يلعبوا. يحاولوا يجبوا جون"

- "أنت عاوزهم يلعبوا بمجد؟" سأله الحكم في استنكار

- "أيوه خليههم يلعبوا بمجد. لازم يكسبوا الماتش بمجد" صاح المايسترو في جنون

- "أنت متأكد؟" لم يصدق الحكم أذنيه. لم يتلق أمراً كهذا منذ سنوات

ضغط الفريق الزامبي في محاولة لخطف الكرة إيقافاً للعب السلبي الذي اتبعه الفريق المصري و اقتناص هدف التعادل. انتهت الدقائق الستة بالفعل. "انتهى الوقت يا سيدي الحكم. موش معقول ماذا تنتظر؟" صاح المذيع في تعجب. "عليه إنهاء المباراة حالاً و إعلان صعود المنتخب المصري. لا أجد مبرراً للانتظار"

"لحظة واحدة يا رجالة. احنا بندافع ليه؟" سأل كريم فجأة بصوت عال. "أنتموا

فاكرينه تمثيل؟ من كتر ما السيناريو مسيطر علينا واقفين بنضيع وقت في نص ملعبنا؟ احنا نروح نخلص عليهم دلوقتي و نجيب جون" بدأ المنتخب المصري هجمة منظمة.

انطلقت صافرة النهاية و قفز كل من في الملعب سعيداً بالانتصار الغالي. نزل كريم لأرض الملعب يرقص و يعانق زملاءه في تأثر شديد. نظر للمدرجات باحثاً عن أي وجه يعرفه و كأنه من المنطقي أن لا يرى أحداً من مكانه. تذكر آخر مرة تذوق فيها النصر بهذا الاستاد؛ يوم فوزه ببطولة كوكاكولا. ابتسم و هو يعلم أن فوزه ببطولة كوكاكولا لا يمكن مقارنته بهذه الليلة. فالليلة هي أجمل ليلة في حياته بالفعل. الليلة هو البطل. يمكنه أن ينشغل بما سيحدث له فيما بعد. أما الآن... فهو سوبر كاك. إلى حين إشعار آخر.

اتصل عامر بكريم و طلب مقابلته في الوقت الذي يناسبه للتحديث بشأن ما بدر منه في المباراة. علم كريم حتماً أن لديه أخبار سيئة لكن سعادته بمحققه فاقت كل شيء. دعاه عامر إلى مكتبه ليصبح الأمر رسمياً بأكبر شكل ممكن. جلس كريم في هدوء دون أن يدع نظرات عامر تثير توتره.

- "خير يا عامر؟ قلت انك عاوز تشوفي ضروري"

- "وحشتني يا كريم يا ابن رأفت. مش أنا كمان وحشتك؟"

- "بصراحة؟ مش أوي. عادي"

- "أنا في الأول كنت بتفروج على الماتش و مهتم و بقول كريم هيعمل ايه، وهسمع الكلام ولا لأ. بس عارف، بعد ما الماتش خلص حسيت انه... في ستين ألف داهية. و أنا مالي؟"

- "ده سلوك متوقع منك يا عامر. أنت بيفرق معاك حد غير نفسك؟"

- "يا سلام؟ شوف مين اللي بيتكلم. سوبر كاك، نصير المظلومين و الغلبة. اللي عمل كل الفيلم ده عشان يحقق رغبة المواطن الغلبان في مشاهدة كاس العالم. المواطن اللي معندوش فلوس يدفع اشتراك انه يتفروج عليه أصلاً لأنه مش متذاع على القنوات الأرضية. ما تبطل تعملهم عليا يا كريم. أنا و أنت عارفين كويس أنت عملت الفيلم ده كله ليه"

- "أنا؟ أنا معملتش حاجة خالص. الماتش خرج من ايدينا. كانت غلطة. أنا التزمت بالسيناريو على قد ما قدرت بس شاءت الأقدار انه يحصل غير كدة. هتقف في طريق القدر يا عامر؟" قال كريم في سخرية

- "و أنا مين عشان أقف في طريق القدر؟ أنا راجل غلبان و مش قدك. يعني أما جيت ضربة الجزاء كانت غلطة؟ لما جريت و جيت الجون التالت كانت غلطة؟ شوف ازاي. و أنا اللي كنت ظالمك. سوء الظن مانت عارف البني آدم خطاء. فهمني استفدت ايه لما عملت كدة"

- "عملت ايه يا عامر؟ ما قللتك مكانش قصدي. هي شغلانة؟"

- "خليني أوضحلك نقطة مهمة. أنت فاكّر نفسك جامد؟ أنت متخيل انك أول واحد يغير نتيجة ماتش عشان عمل تصرف متخلف؟ عادي جداً ما فيه فرق كتير عملت اللي أنت عملته، و ضربت معاها ماتش ولا اتنين، بس عمرهم ما أثروا على الصورة الكبيرة. باين أوي من سير الماتش ان زمايلك مشيوا وراك وإلا كان زمان الماتش ده خلصان غصب عنك زي ما كان مكتوب. كل ده برضه مش هيفير الصورة الكبيرة. وصلت يا سيدي لكاس العالم. و بعدين؟ ايه الخطوة الجاية؟ هتكسب ماتش واحد حتى؟ بلاش دي. هتجيب جون في الكاس؟ أنت مغيرتش أي حاجة يا كريم. كل اللي عملته انك جيت لنفسك المشاكل. مكنتش عارف تكبر دماغك يا أخي؟ خلاص حرقتك أوي تعمل فيها نجم؟ عارف ضيعت على نفسك و عليا فلوس و أمجاد قد ايه؟ و قطعت عن نفسك كمان الاستمرار في عالم الأضواء و الشهرة"

- "أنت عارف كام برنامج طالبي عشان أتكلم عن إنجازي التاريخي؟"

- "إنجازك التاريخي؟ هاهاهاها. هسألك سؤال جامد أوي يا كريم، لو جاوبته أنا شخصياً هروح أتوسلك و هدفك كل ملين في جيبي عشان أخيلك مصر تكسب كاس العالم....مفيش كلب مبيتكلمش عن الجون اليتيم بتاع مصر في

كاس العالم ١٩٩٠، مش كدة؟ انما عمرك شفت حد بيتكلم عن الجون اللي مصر
جابه في التصفيات قدام الجزائر عشان توصل لكاس العالم ١٩٩٠؟"
- "لا يا عم الفيلسوف"

- "بالظبط. أنا نفسي مش فاكرو مين جابه. أراهنك عدد الناس اللي فاكرين
ميتعش على الصواع. المواطن العادي هيفتكر الحية الثقيلة في الكاس بس، لكن
وصلنا له ازاى؟ أتحدك بعد عشرين سنة ان حد هيفتكر أصلًا"

- "أنا مالي و مال كاس ١٩٩٠ ؟ أنا كنت اتولدت أصلًا؟ مالنا و مال
الماضي يا شيخ عامر؟ أنا شاب و ماليش دعوة بجو العواجيز بتاعكوا. أنا عملت
إنجاز تاريخي محدش في سني قدر يعمله"

- "في الآخر برضه موصلتش حاجة، ولا استفدت حاجة. الناس دي مش زي
مانت فاكرو. محدش بيظهر إلا لو هم عاوزينه يظهر. مينفعش حد يبقى بطل
لوحده، لازم هم اللي يدوله الإذن يبقى بطل. مكنتش محتاج تعمل أي بطولة
حقيقية عشان يصيتوك و يعملوا منك بطل؛ كنت محتاج بس تسمع الكلام
وتسبب الآلة التسويقية تشتغل وراك و تشهرك. أنت فاكرو ميسي بياخد الكرة
الذهبية كل سنة عشان هو أحسن لاعب في العالم؟ طبعاً لأ. ميسي بياخذها عشان
هو رائج و صالح للتسويق. فريق العام للفيفا ده بيبقى فعلاً أحسن ١١ لعب
موجودين في العالم؟ لأ. دول بيقوا اللاعبة اللي هم عاوزينها تبقى واجهة ليهم.
هو العالم كله مفيهوش غير ريال مدريد و برشلونه و بقية الدوري الأسباني؟ ده
حتى دوري تعبان، إنما هي دي اللاعبة اللي تنفع تبقى واجهة، اللي بتتطبق
المواصفات، اللي ببيجوا من وراهم فلوس بالعيط. اذا كان يا أخى جوايز
الأوسكار و الجرامي بتبقى ماشية بالكوسة لأن الأفلام اللي بتدعم القضايا اللي
هم شايفينها أو المطربين اللي حاسين هيجي من وراهم فلوس هم اللي بيكسبوا.
مفيش حاجة بتمشي زي مانت فاكرو، كله حسب القوانين، و كله بآلة التسويق
اللي شغالة ورا الناس اللي هم عاوزينها تبان. أنت بغاوتك افتكرت انك ممكن

تعلّا من غير ما الناس دي تبقى عاوزاك تعلّا. أنت كدة فقدت صلاحيتك وقابليتك للتسويق. بالناسبة السعيدة دي مصر بتبعثلك استمارة ستة و بتقولك مالکش لعب معانا تاني"

- "يعني ايه؟"

- "يعني لو فاكّر انك هتتاخذ المنتخب و تلعب معاه يبقى فکّر تاني. لو فاکر ان بعد کل اللي عملته ده هتروح تمثّل مصر في کاس العالم تبقى مسکين. شوف المسخرة..اللي أنت عملته غيرک هو اللي هيستفيد بيه، هاهاه"

- "يا سلام؟ هو أنا كنت بلعب لوحدي؟ ما کلهم اشترکوا معايا"

- "بجد يا کریم؟ کلهم اشترکوا معاک؟ مش کان إنجازک التاريخي و مجدک الشخصي الفردي اللي محدش قدر يحققه قبل کدة؟" ضحك عامر

- "لولایا مکنّاش وصلنا يا عامر. أبوة يا سيدي أنا وصلّتنا کاس العالم. بس مش فيه بهائم کانوا واقفين معايا ولا لعبت الماتش لوحدي؟ ما هم قصّروا ومقدروش ينعوني أخالف السيناريو. مشیوا ورايا ليه؟"

- "بتسألني أنا؟ زمایلك حمّلوک المسؤولية كاملة. قالوا ان تصرفاتک لخبطتهم وانک حرصتهم على اللي هم عملوه، و عندهم استعداد تام انهم يصلّحوا الأوضاع" ابتسم عامر في سخریة

- "نعم؟ ايه شغل العیال ده؟ هيخلوني أشيلها لوحدي؟" صاح کریم في انفعال
- "کله يا معلم بيفکر في مصلحته. و کل واحد فيهم هيروح يمثل بلده حیيته اللي شرب من نیلها و زحف على تراها في کاس العالم الجاي. إنّما کریم رأفت المتمرد، الثوري بتاع المشاكل هو اللي هيلبس اللیلة کلها. ايه رأيک في السيناريو العالمي ده؟ یجنن"

- "تصور ان مفيش حد من العیال دي يستاهل يلمس کورة أصلاً. کلهم بيحقدوا علیا عشان أحسن منهم و بلعب في ریال مدرید، و هفضل أتفوق فيه"

- "عمرك فكرت ان اللاعبة دي كلها اتآمرت عليك عشان توصلهم كاس العالم، و بعديها تلبس أنت الحوار كله و تتعاقب و هم يلعبوا من غير ما يحصلهم مشاكل؟" سأل عامر في خبث

- "عندك معلومات بتقول كدة؟" سألته كريم في شك

- "لا. أنا بعرض عليك كل الاحتمالات"

- "مستحيل يا عامر. الناس دماغها صدّت خلاص من كتر السيناريوهات.

هتيجي تقوللي ان واحد طلع بفكرة خبيثة زي دي، فيها أي نوع من أنواع الإبداع؟ مصدقش بصراحة. كله ماشي ورا بعضه زي الغنم، و محدش عارف بيعمل ايه. تقولي اتآمروا عليها؟ ولا بعد مليون سنة أصدق. قوللي الكورة مش تمثيل تكون أوقع"

- "يااه. أنا سعيد باللي سامعه منك. كان نفسي أجيلك في ظروف أحسن من دي. بس الواقع ان مش مصر بس اللي ادبتك استمارة ستة، ريال مدريد كمان اداك استمارة ستة"

- "ايه؟ هم ما لهم بالموضوع؟"

- "الكبار قرروا كدة. مش قلنتك مليون مرة ان اللعب مع الكبار مفهوش شغل العيال بتاعك؟ خلاص الحكم جه عليك انك آخر الموسم هتمشي من ريال مدريد. تروح فين يبقى هو ده السؤال... تحب الدوري الصربي ولا الدوري اليوناني؟" سألته ضاحكاً

- "صربي ايه و يوناني مين، أنت هتشتغلي؟ مين قال اني ممكن أوافق على أي

حاجة من اللي أنت بتقولها؟ فاكربي أهبل، هسمع الكلام و أقول آمين؟"

- "هممم. وجهة نظر فعلاً. أي وجهة نظر لازم نحترمها. أنت عارف انهم

يقولوا اذا أردت أن تطاع فأمر بالمستطاع، مش كدة؟ و أنا راجل عقلاي. تفكر

كنت ممكن أسكتهم على الكلام ده لو معندهم وجهة نظر أقنعوني بيها؟"

- "قصداك ايه؟" سألته في توتر

- "يعني أكيد عمري ما هاجي أقولك العب في الدوري الصربي إلا لو الناس دي ادبتني أسباب منطقية تقنعك تسمع الكلام. أنت نسيت القوانين ولا ايه يا كوكي؟"

- "كوكي؟ ايه دلح العيال ده، أنت من امتي بتقولّي... صمت كريم قليلاً محاولاً أن يستوعب

- "من امتي بقولك يا كوكي؟ لأ خالص مش أنا اللي بقولك كدة. بس أنا متأكد ان فيه واحد بيقولك كدة، أو يمكن واحدة. أنت أدري. أصل العواجز يبقى عندهم مشاكل في الذاكرة زي مانت عارف"

- "فريدة؟! صاح كريم مصعوقاً

- "فريدة؟ هي اسمها فريدة؟ ممكن برضه، وارد. معرفش الاسم ده رجع موضه ليه. بس بيني وبينك البنت جامدة. تستاهل. كانت حلوة؟"

- "هي ايه؟"

- "السهرة اللي قضيتها مع بعض؟ البوسة اللي جمعت بينكم في نص الشارع؟ لما رَوحتوا مع بعض تكملوا الماراثون؟"

- "ايه الكلام الفارغ اللي بتقوله ده؟" صاح كريم في غضب

- "ايه يا كريم، متعصب ليه؟ متعرفش ان الأدلة المادية هي أكثر حاجة بتثبت الجريمة؟ هكدب عيني و أصدقك؟" أخرج عامر ظرفاً من درج مكتبه و لَوَح به أمامه

- "ايه اللي في الظرف ده؟"

- "هيكون ايه؟ مشفتش أفلام هندي قبل كدة؟ حياتك بقت جزء من سيناريو هندي. الظرف ده يا معلم فيه الصور بتاعتك أنت و... اسمها ايه؟ أه، فريدة. عاوز أقولك ان صورتكوا في الشارع و انتوا بتبوسوا بعض دي جامدة أوي"

- "لو أنت ماشي ورايا، هتعرف كويس أوي ايني معملتش حاجة"

- "التصور هو الواقع يا كريم" وقف عامر في هدوء

- "مين ياخويا؟"

- "التصور هو الواقع. يعني اللي الناس متصورة انك عملته، هو فعلاً اللي أنت عملته. لو الناس متصورة انك قتلت واحد، يبقى أنت قتلت. لو الناس متصورة انك غلطت مع واحدة يبقى أنت فعلاً غلطت معاها. هي الدنيا كدة. لو قعدت مليون سنة تقنع الناس بالعكس هم خلاص خدوا انطباع عنك و عمرهم ما هيغيروه"

- "في ستين داهية يا عامر. ولا يفرق معايا. أنا راجل عرييد يا عم"
- "متاخدش قرار و أنت سخن بس. الكلام ده لو الموضوع واقف عليك لوحدك. أنت زنديق و مش فارق معاك، بس عندك استعداد تفضح فريدة كمان؟"
- "فريدة؟ مين فريدة، متهميش أوي"

- "هاهاها. متهمكش أوي، أنت هتقولّي؟ البنت اللي كنت هتريل عليها فجأة مبقتش قمك؟ و ميهمكش كمان انما هتبقى مرأة صاحبك بعد ٢٤ ساعة بالطبط؟ هتفضح صاحبك و مراته وقت فرحهم؟ ذنبهم ايه؟"
- "محمد مش صاحبي أوي، و فريدة دي ندلة. ايه رأيك؟"

- "هتحكم عليهم عشان في نظرك عملوا حاجة ضايقتك؟ هتحكم على الناس و تعاقبهم بالقوانين بتاعتك؟ لأ يا كريم مالكش حق. أنت كدة زيك أي واحد أنت شايفه ظالم. ذنبهم ايه الغلبانين تدمر حياتهم و تحطهم في موقف بايخ؟ دي أعراض ناس يا كريم و مجاهرة بالذنب"

- "مجاهرة بالذنب ايه يا بني آدم، أنا عملت حاجة؟ دي صورة بنت و ولد في الشارع ملحقوش يلمسوا بعض"

- "هاهاها. دي واحدة من الصور، متنساش تأثير الفوتوشوب. تكنولوجيا فظيعة. التصور هو الواقع" أشار بإصبعه مؤكداً، "أنت اللي حطيت نفسك في الموقف ده. قتللك قبل كدة تركز و متقولش لحد معلومات مش محتاج يعرفها"
- "حد زي مين؟ قصدك على مين؟"

- "شوف أنت مين أكثر واحد بتتكلم معاه و بتستأنمه على شرك. شوف كمان مين عامل نفسه بيساعدك حياً في الله. عمرك ما بتسمع النصايح اللي بقولهالك. عشان كدة رميت مستقبلك بايديك، و بدل ما كنت اسم هيفتكروه التاريخ لإنجازاته الكروية إلى الأبد، زي العبيط اخترت مجد مؤقت و بصيت تحت رجلك. هتبقى بطل لأسبوع أو اتنين بالكثير، بدل ما كان ممكن تبقى بطل لسنين كثير قدام"

- "مين يا عامر؟ قصدك مين؟"

- "و أنا أعرف مينين بقى. هو صاحبي أنا... يا برنس؟"

نزل كريم من سيارة الأجرة أمام فندق سميراميس المطل على نهر النيل. رفض المجئ مع أصدقائه لئلا يحتك بأي منهم قبل التأكد أي منهم به. صعد درجات السلم و دخل إلى صالة الاستقبال.

- "بعد إذنك. فرح محمد شريف و فريدة النحاس فين؟" سأل كريم

- "في قاعة كليوباترا يا فندم" أجابه موظف الاستقبال في آلية و كأنه أهم حفل زفاف في تاريخ الفندق

سار كريم في برود و توجه إلى القاعة. سمع بوضوح أصوات الموسيقى الصاخبة و صيحات الضيوف احتفالاً بالمناسبة. تخيل نفسه مكان محمد للحظات قليلة، ثم طرد الخاطر من ذهنه و لعن كليهما لإيقاعه بذلك المأزق. لولا أن أصر محمد بشدة على حضوره ما أتى هذه الليلة. دخل القاعة شاعراً بالملل و لم يرغب في الرقص على الإطلاق. رأى أصدقاءه من بعيد فحاول التظاهر بالانشغال في تناول المشروبات ليتبعد عنهم. للأسف لخمهم يأتون إليه.

- "سوبر كاك. نجم الجماهير. الليلة فرحك أنت يا معلم، فكك من محمد" عانقه حمزة الهارب كالمعتاد من الجيش

- "البرنس جي يقولك ان أنت اللي برنس. بس ليه علينا تفلان؟" صاح فهمي
و لكزّه في مرج

- "ازيكوا يا شباب" أجابهم في برود

- "خلاص شفت نفسك علينا عشان بقيت نجم؟ لأ متناسأ أصلك يا ض
أنت" صفعه فهمي

- "بلاش هزار الايد يا فهمي، مش ناقصاك" صاح كريم في انفعال

- "مالك يا كريم؟ فيه حاجة؟" سألّه حمزة في دهشة

- "أكيد فيه. أنا مجنون مثلاً و هتعصب من غير سبب؟ مجنون أنا ولا ايه؟"

- "بتخرف كدة ليه؟ أنت اتجننت يا بني بجد؟ احنا أصحابك على فكرة. أنت

نسيتنا ولا الدنيا غيرتك؟" صاح فهمي في انزعاج

- "أنت بالذات يا فهمي متتكلمش على الدنيا. أصلك ناصح أوي و محدش
يعرف يضحك عليك مش كدة؟"

- "مش فاهمين أي حاجة من اللي بتقولها" قال حمزة في تعجب

- "محدش فينا فاهم. البرنس بتاعنا بس هو اللي فاهم. تقدر تشرحلنا يا فهمي
ازاي دخلنا بطولة كوكاكولا أصلاً؟ ازاي ضربت معانا فجأة و الاستمارة بتاعتنا
اتقبلت؟"

- "مش فاهم أنت عاوز توصل لايه. قلتلك مامتني هي اللي اتوسطت"

- "اتوسطت ازاي؟ مش فاهمها دي"

- "هتلك ولا ايه يا كريم؟ ما تظبط" احتقن وجه فهمي

- "بلاش دي. ممكن تشرحلي ليه كنت مهتم أوي اني أحترف رغم ان
مجالكش الفرصة، و قعدت تجر رجلي"

- "أنت اللي اتقبلت يا كريم و أخذت قرارات من غير ما تحسبها. و بعدين ما
هي ضربت معاك بعد كدة، زعلان ليه؟"

- "زعلان طبعاً انها ضربت معايا على عكس الخطة مش كدة؟ مش أنا اللي أخذت قرارات، مانتوا كنتوا أخذتوهاي. عارفين ايني عيل أهبل و تافه، و بجري ورا هوايا. لما أكتشف في الآخر ان السكة مش سالكة هتصرف و أعمل أي حاجة عشان أحترف. صح الكلام؟"

- "عاوز فين يا كريم؟ ايه اللي هو بيهري فيه ده يا فهمي؟" صاح حمزة في تعجب

- "أنا ماسك نفسي بالعافية يا جماعة، فمحدث يسألني على حاجة" أجاب فهمي في انفعال

- "لأ يا واد زعلان، و محموق أوي. طبعاً عشان مش عارف ترد. ما ترد" نظر إليه كريم في تحدي

- "معنديش حاجة أقولها لك يا كريم" قال فهمي دون أن ينظر إليه

- "متوقع طبعاً، هتقول ايه؟ سلام يا رجالة. مانجلكمش في حاجة وسخة"

اجتمعت الحشود لأجل البرنامج التلفزيوني بعد المباراة المثيرة بالتصفيات، المستضيف لكل من محمد الشحات المدير الفني للمنتخب، كريم رأفت و أبو تريكة لإجابة أسئلة المذبة، بحضور الجمهور السعيد. حيّاهم الكل بالنصر الغالي وانطلقت الهتافات الحماسية تخليداً للذكرى الرائعة.

- "نحب نعرف رأي أستاذ محمد الشحات في النصر الغالي. حضرتك دخلت التاريخ من أوسع أبوابه عشان وصلت بالمنتخب لكاس العالم لأول مرة من فترة كبيرة أوي. حاسس بايه دلوقتي؟" سأله المذبة

- "أنا؟ مش عارف بصراحة" أجابها الشحات في ارتباك، "مش عارف أضحك ولا أصوت ولا ايه بالظبط..."

- "تصوت؟ فيه سبب يخلي حضرتك تصوت؟"

- "قصدي أصوت من السعادة. أي حد في مكاني هبقى عاوز ينط من أي شباك و تدوسه أي عربية من المفاجأة. انتي عارفة، لو كنتي سألتيني قبل الماتش هنوصل ولا لأ، كنت حلفتلك ميت يمين ان عمرنا ما هنوصل. لو حلفتيلي على المية تجمد اننا هنوصل كنت قلتلك انتي كدابة، و كنت هستنى معاكي نشوف هتجمد ولا لأ. حد فينا تخيل اننا هنوصل؟ مش معقول. دي حاجة فوق الوصف. حاجة فووووق أوي" رمق كريم بنظرة جانية، "من الآخر كدة. أنا ميسوط جداً"

- "ميسوط جداً؟ احم. واضح ان السعادة مأترة عليك أوي و محليك مش على بعضك. إحساس كلنا نقدر نفهمه. نحب نسأل عريس و بطل الليلة دي عن شعوره بتحقيق الفوز" سكنت و نظرت إلى كريم، "كريم؟ مفيش حاجة تقولها؟ المفاجأة أثرت عليك أنت كمان؟"

- "بتكلميني أنا؟" نظر خلفه ثم التفت إليها ثانية

- "أيوة أنت. كريم رأفت بطل مصر. ولا أه...تحب أقولك سوبر كاكا؟"

ابتسمت المذيعة في تفهم

- "أه. سوبر كاكا. ده أنا فعلاً. هقولك حاجة مهمة أوي. الكورة لعبة جماعية. و مفيش لعبة جماعية يكون الفضل فيها لشخص واحد. مينفعش نقول اني البطل لوحدي، البطل هو كل مصري حضر الماتش في الاستاد، و كل واحد هتف و حلم ان مصر توصل للكاس. العريس اتفادده مش سوبر كاكا. العريس اتفادده سوبر مصري" قال كريم في رتابة و هو يردد ما حفظه قبل المواجهة

- "كلام جميل يا كريم و ينم عن تواضع. فعلاً كل مصري وقف وراكم وفخور بيكم" قالت المذيعة في إعجاب، "أبو تريكة بطل برضه في المباراة، و دوره لا يقل عن الدور اللي أداه كريم..."

- "لحظة واحد بعد إذنك" استوقفها كريم. "مين اللي دوره لا يقل عن مين؟"

- "أبو تريكة. دوره لا يقل عن دورك البطولي في المباراة"

- "متأكدة انك شفتي نفس الماتش اللي لعبناه؟" قال كريم في غضب مفاجئ، "طب بصوا بقى عشان أنا راجل واقعي و مبحش التمثيل. خلينا واضحين و صرحا مع بعض. أنا... سواء عاوزة تقولي كريم رأقت ولا سوبر كاكا ولا أي حاجة ميفرقش معايا... أنا السبب الوحيد ان المنتخب ده وصل كاس العالم. هنمثل على بعض و نقول دور مين ميقلدش عن دور مين؟ ارجعي و اتفرجي على الماتش تاني على أي موقع في الإنترنت و شوفي أنا عملت ايه. طبعاً احنا ١١ لعب في الملعب، بس أنا متأكد انكوا لما تبصوا كويس هتلاقوا ان فيه عشر دقائق على الأقل كنت بلعب لوحدي. فيه جون دخل بسبي، بس أنا الوحيد اللي اتطوع يشوط ضربة الجزاء رغم ان كل زمايلي خافوا و جابوا ورا و قالوا مش هنشيل مسئوليتها... أنا اللي دافعت في آخر كام دقيقة في الماتش لما الضغط بدأ من زامبيا... كنت بدافع لوحدي و زمايلي واقفين بيتفرجوا كأنهم قاعدين في المدرجات... أنا اللي أدت حماسة لزمايلي و أمل في الماتش عشان يخرج بالشكل ده، و لما الحكم ساب الوقت بدل الضايغ مستمر كأنه شوط ثالث أنا اللي أخذت الكورة و جيت جون ثالث و خلصت على الفرقة الثانية، اللي هي مين مش فاكر ما كلهم زي بعضهم، و تيجي تقولي دوره لا يقل عن دوري؟ لأ هو دوره غير دوري تماماً. هو دور تاني في عمارة ثانية خالص في منطقة عشوائية. تقدري تقولي لو مكنتش في الماتش ده كان هيحصل ايه؟ خليني أنا أقولك، كان زمان الماتش وقف عند التعادل و كل واحد رجع بيته بخيبته و برضه ياخذ القرشين بتوعه، ما هو أصل الكورة دي أكل عيشنا على فكرة. انتي فاكراي دخلت الكورة ليه؟ عشان الكورة فلوس كثير أوي بالعيسيط. عارفة بتاخدي كام في حلقة البرنامج اللي أنتي عاملاه؟ ممكن الفلوس اللي أنتي بتجيها في شهر أنا أجيها في أسبوع. أنا أول لاعب مصري يحترف في ريال مدريد، فيه أي لعب تاني جاله ربع الفرصة انه يعمل كدة؟ لأ طبعاً عشان كل اللاعبة بتاعتنا فاشلين و مش جايينلنا غير اهم. شفتي حد في الماتش عمل أي حاجة ليها لازمة غيري؟ لو كان بايدي، كنت رحت للفيفا قتلهم عاوز أروح كاس العالم لوحدي و أجيب عشر لاعبة تانيين معايا على ذوقي. أنا مستخسر الفوز ده في أي حد كان معايا في الملعب. مستخسره في المدير الفني اللي قاعد جنبي، و اللي انتي شايفة انه هيدخل

التاريخ من أوسع أبوابه، هاهاهاهاه. أوسع أبوابه فعلاً، الباب اللي بيطلع على السطح. أسألي محمد الشحات كان عاوز يغيرني ليه في آخر كام دقيقة في الماتش... الفوز ده أنا مستخسره في الباشا اللي انتي شايغة دوره زي دوري... مستخسره في اللي اسمه فيجو بس عشان أول حرف في اسمه "ف". مستخسره في كل واحد وقف في الملعب و قال انه مش هيلعب ضربة الجزاء عشان جبان و خاف يشيل مسئوليتها. مستخسره في كل واحد قاعد في المدرجات و فاكدر نفسه لو نزل لعب مكاني هيلعب أحسن مني مع انه لو نزل قدامي و حاول ياخذ مني الكورة ممكن أخليه يتغدى نجيلة، و يتعشى رباط جزمي، و يروح بيته زحف عشان يهضم. مستخسره في كل واحد عمال ينتقد و خلاص في الرايحة والحماية و هو أصلاً في حياته فاشل، و مش عارف يمشيها، لأنه لو عارف يمشي حياته مكانش راح حط أمل في حد غيره يعمل حاجة تفرحه. ايه هيجلي حد فيكوا يشجع حد انه يوصل و يبقى حاجة إلا لو هو نفسه مش قادر يوصل لحاجة فييدور على مثل أعلى أو رمز يرفع معنوياته و يديله أمل في الحياة؟ كل الناس فاشلة، و كلهم غنم. كل الناس مزيفة و فالحة تنتقد و بس. أنتي نفسك عاملة برنامج مالوش أي معنى و بتسألي أسئلة مالهش أي فائدة. مستنية مني أقولك ايه؟ أنا فرحان أوي و فخور أوي و الفضل مش ليا لوحدي؟ و بعدين؟ عملتي ايه؟ كدة حللتي لقمة عيشك؟ عمرك ما صحيتي يوم و حسيتي انك بتضحكي على الناس و جايهاهم يطبلوا وراكي ولا عشان معنديش ضمير أصلاً فمش فارق معاكي الموضوع؟ ايه البرنامج الفاشل و المزيف اللي احنا قاعدين فيه ده؟ قوليلي أنا استفدت ايه لما وصلت بالبلد دي كاس العالم. الناس النافهة اللي قاعدة بتتفرج علينا دي عملتلي حاجة لما وصلتها كاس العالم اللي عمرهم ما كانوا يحلموا يشموا ريحته؟ كلهم هيعملوا نفسهم انهم أصحاب الفضل في وصول المنتخب عشان كانوا حاضرين في الاستاد، قال يعني تشجيعهم ليه لازمة. مفيش حد في الدنيا يستاهل يتعمله حاجة. كان زماي زعلان أوي لو أنا مستني منهم حاجة. انما أنا هقولك استفدت ايه. أنا معملتش كدة عشان أي واحد فيهم، ولا حتى عشان بلدي اللي أنا عايش فيها. أنا عملت كدة عشان أنا عيل فاجر و جامد فحت. أنا كدة، نزلت من بطن أمي قادر و فاجر و محدش يقدر يقوّلني مش هتقدر تعمل حاجة. اللي يقوّلني مش هتقدر تعمل حاجة أوريه كويس أوي اني أقدر أعملها،

وأعملها كويس، و من غير ما حد يساعدي. أنا دماغى جزمة. الناس اللي قالتلى مصر عمرها ما هتوصل كاس العالم ضايقتنى، فحييت أوريهم ابنى لو عاوز أوصل بمصر كاس العالم هوصلها غصب عن أي حد و لوحدي من غير أي مساعدة من أي باشا كان واقف يتشقلب في الملعب، كأنه القرد اللي كنا بنلعب بيه في ابتدائي"

- "اهدا يا كريم، فيه ايه؟" وقف فريد مكانه وسط الجمهور محاولاً تهدئته
- "الحقوا شوفوا مين قاعد في الجمهور. فيجو، نجم منتخب مصر. أكبر بق في تاريخ الكورة. أحلى حاجة في فيجو انه حالم أوي و بيحب يتكلم و يهري كثير. اقعدوا معاه هتحسوه عصفور جميل خالص. انما لما حد يطلب منه حاجة مفيدة بيحب ورا زيه زي أي كلب غيره"

- "أعصابك يا كريم. أنت مش مستوعب بتقول ايه. أنا مقدر انك زعلان"
قال فريد و قد شعر بالخرج

- "لأ أنا مستوعب كويس أوي و مبسوط من نفسي جداً على فكرة. أنا بس حببت أوري الناس كلها، و خصوصاً البلد دي ان عمري ما ضيعت ولا هضيّع ضربة جزاء، و اللي مش عاجبه يتفلق. و بصراحة كفاية عليكوا أوي لحد كدة. انتوا وصلتوا الكاس عشان مصلحتكم جت صدفة مع مصلحتي. انما أنا من مكاني ده باعلن اعتزالي دولياً، و مش عاوز أي تمثيل تاني للبلد دي، سواء مشرف أو غيره. أنا معايا فلوس تكفيني من دلوقتي لحد ما أموت. عاوز كل واحد شايف انه أجهد مني و ممكن يوصل للإنجاز التاريخي ده يوريني نفسه. مش هقول يحترف في ريال مدريد؛ عاوز أي حد يروح يحترف في نادي ليه لازمة على خريطة الكورة يعدي عليا في البيت و يقولّي يا كريم أنا احترفت و عملت لنفسى قيمة و أستاهل أكثر منك. أنا ساكن في الكورة على العموم، ممكن يجيلي عند قويدر و يسأل عليا. عاوز كل واحد يفرح بالصعود التاريخي لكاس العالم و يعوّض نفسه عن كل الفشل اللي هو عايش فيه. مش مشكلة اللي عنده مذاكرة مخلصهاش أو امتحان سقط فيه، اللي اتفرد من شغله ولا عمل مشروع فاشل، ولا اللي مقصر مع أهله

و لا اللي مش عارف يربي عياله و سايبهم يتسرحوا في الشوارع، ولا الناس اللي عندها كبت و حاقدين على غيرهم. مش مشكلة خالص! أي حد فيكوا معاه قرشين و مختار فيهم يروح يجيب تذاكر الماتشات و يسافر جنوب أفريقيا و يشجع المنتخب الوطني. أصل دي أهم حاجة. كلنا فدا للمنتخب المصري، و منتخبا فوق الجميع. لأ اسمعوا مني دي جديدة....سوبر كاكافوق الجميع. تصبحوا على خير، أنا رايح أشتريلي عربية ولأ حاجة...فلوسي بقي و أنا حر فيها" خرج كريم من الاستوديو بعنف وسط ذهول الحاضرين.

تصفية حسابات

اجتمع رئيس الفيفا مع رئيس الاتحاد الأفريقي غاسبته على فضيحة التلاعب بالسيناريو. حضر اجتماعهما رئيس الاتحاد الأوروبي لأن رئيس الفيفا يحب استشارته دائماً في القرارات الهامة. توجب عليهم إيجاد أبسط الحلول لمشكلة صعود المنتخب المصري لكأس العالم.

- "أنا حابب أعاقب المنتخب المصري حتى لو هم شايفين ان الولد بتاعهم هو السبب، محدش فيهم عرف يوقفه أو يسيطر عليه. مينفعش معانا لعب العيال، لازم يتعاقبوا هم كمان" قال رئيس الفيفا في إصرار

- "طب ايه اللي ممكن يرتحك؟" قال الرئيس الأفريقي في يأس، "عندي فكرة هائلة. ممكن نعمل أي فيلم أهبل نخلي المنتخب المصري يعتذر عن المشاركة في البطولة، و ساعتها ناخذ تاني مجموعتها اللي هي الكامبيون و توصل برضه. ايه رأيك؟"

- "يعتذروا؟ ايه ممكن يكون سبب مقنع؟" سألته في اهتمام
- "دي دولة عالم تالت. أي سبب ممكن يمنعها من الظهور. أي أزمة اقتصادية أو ثقافية أو حتى سياسية. مش هنغلب"

- "يس عاوز رأيي أنا؟" تدخل رئيس الاتحاد الأوروبي، "أنا شايف ان الاعتذار عن الظهور مش هيفيد حد. و ناس كتير ممكن تقول المنتخب المصري لو كان اشترك مش بعيد كان عمل نتايج مذهلة، انما لو ظهروا في الكاس و عملوا نتايج

زي الزفت على دماغهم، هيبقى منظرم وحش و هيتدلّوا، و يتعلموا ازاي ميعملوش حاجة زي دي تاني. مش أحسن برضه؟"

- "تصوّر فكرة. نخطها مع أقوى مجموعة و نخليها تاخذ أجوان كتير" اندمج رئيس الفيفا في حماس
- "لأ. هنعطهم في مجموعة عادية خالص عشان يبقى منظرم أوحش. مش بس هيدخل فيهم أجوان كتير، هيبقوا كمان حصالة مجموعتهم من غير ما يجيوا ولا جون. نحرّمهم برضه من الظهور في كأس أفريقيا مرتين تلاتة. مفيش بعد كدة بهدلة. شفت ان مفيش حاجة في الدنيا ترعلك ازاي؟" غمز لرئيس الفيفا في خبث

طرت رنا باب شقة عامر في إصرار. لم تره منذ ليلة مباراة التصفيات، و لم يردّ على مكالماتها الهاتفية مما أثار توترها. انتظرت قليلاً دون أن يأتيها رد. ازداد قلقها و ضربت الباب بقوة أكبر إلى أن فتح لها أخيراً.

- "ممكّن أفهم أنت فين و مش بترد عليا ليه؟" سأله في انفعال
- "مشغول يا رنا. كنت بصفي شوية حسابات" أفسح لها حتى تدخل و أغلق الباب

- "من امتي بتقعد بالأيام متعبرنيش؟ ماحنا ياما صفينا حسابات سوا، ولا أنت نسيت؟" جلست على الأريكة و خلعت حذاءها

- "لأ طبعاً مانسيتش. و دي تيجي؟ احنا عشرة عمر يا رنا"
- "مالي حاساك بتتريق؟ هو ده مش حصل فعلاً؟ مش خلصنا سوا من سارة ومصطفى، ولا خلاص خدت اللي أنت عاوزة مني و هتشوفلك غيري؟"

- "لأ يا رنا. انتي عارفة كويس ان أنا و أنتي بقينا واحد، و ان مهما حد فينا حاول يخلع من التاني مفيش أمل، مش هيعرف. احنا اللي بيتّا قوة مغناطيسية. مش

أنا برضه خلصتكم من القلق بتاع عصام و خلّيت عادل يدبّله معلومات فشك؟
وأما جه يننطط عليا عملت نفسي مخضوض و سبته يتكلم؟"

- "ما هو اتّجم عليا أصلاً عشانك. و أنا بسببك اترفدت"

- "ماظنش. عصام ده بق. الشركة بعد ما رفدت مصطفى عشان لقوه كارت
محروق أكيد قرروا انهم مش هiestخدموا نفس الطريقة تاني و مش هيجيبولي مدير
برضه عشان يركز معايا. استخدموا طريقة تانية"

- "طريقة تانية زي ايه؟" سألته في فضول

- "معلش يا رنا اعذريني، لازم أحكيلك حدوتة صغيرة الأول"

- "احكي، مش هحرمك من متعتك" ابتسمت في ملل

- "أنّي عارفة ان فيه عداوة بين أمريكا و الاتحاد السوفيتي من زمان أوي،
من ساعة الحرب العالمية، و استمرت بالحرب الباردة"

- "دي حصة تاريخ يا عامر؟ أنا مش عيل من اللي بيعجوا عندكم الشركة"

- "معلش استحمليني شوية. الحرب الباردة كانت في الأول ضربات تحت
الحزام؛ معارك خفيفة و الذي منه. بعد كدة العلم اتقدم و الحياة استمرت و انهار
الاتحاد السوفيتي. كملت روسيا المسيرة، بس الحرب الباردة مبقتش واضحة زي
زمان، بقت من تحت لتحت. تعرفي ان الأمريكان لسة ماسكين من قريب ١١
شخص اشتبهوا فيهم و اتحفظوا عليهم قبل ما يزوغوا من البلد؟ كانوا زي ما
بيسموهم كدة... عميل نائم. العميل النائم يا رنا بيبقى نفسه طويل أوي، ممكن
يقعد سنين ميعملش حاجة، بس وجوده ضروري عشان لو فجأة بقى ليه فائدة
يتدروا يستعملوه. كل واحد فيهم بيبقى ليه تخفي عميق جداً. المجموعة اللي كانت
شغالة لحساب روسيا فيهم واحدة اسمها أنا تشابمان. وصلت أمريكا في ٢٠٠٩.
استعملت اسم طليقها، و اخترعولها قصة عشان تعزز التخفي بتاعها، و عملت
كأنها مواطنة طبيعية جداً. اشتغلت في شغلانة بعيدة عن المناصب الحكومية
الحساسة عشان القلق، و عاشت حياتها. فضلت واخدة موقعها عشان تفيد العدو

الروسي. تنقل معلوماتها في الخفيف للشخص المسئول عنها و تأخذ حسابها. الأمريكان لما حبوا يثبتوا أنهم جامدين، طلعوا طلعة شديدة و قفشوها هي و كل الخلايا الثانية اللي كانت بتخدم الروس. حلقة الجاسوسية كان فيها عشرة كمان غيرها زي ما قتللك، بس مش كلهم كانوا عارفين بعض. طبعاً أنتي عارفة الاحتياطات اللي الناس دي بتأخذها بشأن لو واحد اتقفش ميفضحش غيره"

- "لأ مش عارفة يا عامر. أصلي مش شغالة زيك في المخابرات"

- "عصام... رغم انه أبل، قالي حاجة لطيفة أوي محدتش بالي منها. معرفش جاها منين، يظهر سمع حاجة من مصدر تاني غير عادل، لأن عادل ده كان تبغي. ايه أول حاجة هتيجي في بالك لو أهملتك بالخيانة؟"
- "أقولك محصلش"

- "بالظبط. لو أنا أهملتك بالخيانة أول حاجة هتيجي في بالك انك تدافعي عن نفسك. دي غريزة بشرية. تعرفي ان سارة عمرها ما حاولت تدافع عن نفسها قدامي ولا مرة، و لحد قبل ما تخلعني كانت سايباني أذل فيها. غريبة. تفتكري ده معناه ايه؟" سألمها في شك

- "معناه ايه؟ معرفش يا عامر. أنت أذكى مني"

- "مفيش غير حاجة من اتنين، يا اما هي خانتني فعلاً..."

- "سارة؟ مش ممكن طبعاً أجابت في تلقائية

- "و ليه الثقة دي؟" نظر إليها في تعجب

- "قصدي لو هي متخفية ضدك ايه هيخليها تعمل تصرف مش منطقي زي ده؟ خصوصاً ان عمر ما مصطفى كان في دماغها أصلاً، و التوقيت نفسه غريب جداً للخيانة"

- "هو فيه توقيت مناسب للخيانة؟ ما علينا. حتى لو هي خانتني، ده مش هيمنعها انما تدافع عن نفسها. تكذب مثلاً، صعبة عليها؟"
- "أكيد مش صعبة"

- "هايل. يبقى الاحتمال ده مش منطقي. خصوصاً انك واثقة لسبب مجهول ان عمرها ما تقدر تخوّني. مش فاضل غير تفسير واحد. انها كانت شايقة مفيش داعي انها تحاول تبرر حاجة. ما هو أنا فعلاً عارف انها معملتش حاجة، و بالتالي مش محتاجة تبرر موقفها"

- "قصدك ايه بالظبط؟"

- "انها عارفة اني مش شاكك فيها، و ده معناه انها على يقين اني بعمل فيها مقلب"

- "معقولة الكلام ده؟"

- "طبعاً يا رنا. سارة كانت عارفة انها مش محتاجة تدافع عن نفسها، و بالتالي عمر ما جه في دماغها انها تبرر موقفها"

- "و عرفت منين؟"

- "ده اللي كان محيري. لحد ما كلمتها في التليفون و قائلتي على كل حاجة"

- "كلمتها في التليفون؟ ازاي؟" صاحت رنا في دهشة

- "زي الناس يا رنا. كلفت واحد شاطر يلف و يدور و مرجعش إلا أما

جابلي ثمرتها. أنتي صحيح قتلتي تعرفي سارة منين؟"

- "من الجامعة يا عامر، هي شغلانة؟ مش خليت مصادرك في الشركة تعمل عني تحريات قبل كدة؟"

- "الولد الشاطر اللي أنا كلفته يوصل لسارة؛ تخيلي عرف يوصلها ازاي.

فاكرة أحمد رامي، زميلكم في الجامعة؟"

- "هه؟ أه طبعاً فاكره، ماله؟"

- "أيام الجامعة سارة كانت في علاقة معاه. الواد بتاعي دور ورا كل الناس

اللي كانوا يعرفوها، و جرب حظّه مع أحمد رامي. عرف منه ان سارة اتصلت بيه

أول لما راحت استقرت في أمستردام. و من هنا عرفنا نجيها"

- "بس سارة مش في أمستردام" أجابت في آلية

- "ايه ده؟ غريبة أوي. أنتي تعرفي منين؟" سألها بابتسامة خبيثة

- "ايه؟" انعقد لسانها و قد أدركت فداحة ما فعلت

- "أنتي عارفة هي فين ولا ايه؟ دانتي عارفة كل حاجة بقي. ده حتى أحمد رامي اللي مالوش أي وجود و لسة مختصره دلوقتي طلعتي عارفاه. أنتي جامدة أوي على كدة يا رنا. تعرفي مسلسل حريم السلطان بيتعاد امتي؟ طب بابا نويل حقيقي ولا مزيف؟" احتدت لهجته

- "عاوز ايه يا عامر؟" همست في خوف

- "عاوز ايه؟ مش عاوز حاجة خالص. أنتي اللي زي الشاطرة هتحكيلي كل حاجة، و إلا مضطر أحكيلك كل اللي وصلته. تحبي تتكلمي أنتي ولا أتكلم أنا؟" صاح في عنف و أمسك بذراعيها

- "حاضر، هتكلم" بدأت تنتحب و جلست على الفراش في استسلام. "سارة فعلاً كانت مزروعة عشان تجيب عنك معلومات، أو تحاول توصلهم أي حاجة عنك عشان يعرفوا يكسروك. بس أما عرفتك كويس و عاشرتك...."

- "ايه بقي؟ وقعت في غرامي؟" صاح في سخرية

- "أبوة، و عشان كدة قعدت تلمحك كثير، و أما طلبت ايديها للجواز وافقت. لما الشركة لقت انها خرجت عن النص و بقاها كثير مش عارفة توصل معاك لحاجة، شكوا في نواياها و إخلاصها... واعتبروها كارت محروق"

- "هنا بقي جه دورك"

- "قالوا انك بتاع ستات و أي واحدة حلوة هتبقى عاوزها لنفسك، و ان سهل عليا أوقعك و أخليك تخونها. ده اللي حصل فعلاً. عشان أكسب ثقتك كان لازم أعمل حاجة تقربني منك، و بالتالي كشفتلك حقيقة سارة. أول مرة أشوفها أصلاً كان قبل ما أشوفك بأسبوع. معرفش حاجة عنها. قعدوا يحفظوني حاجات كثير، و قصص و مواقف أحكيها لك عشان تحس ان فيه بيني و بينها صداقة وعشرة، و ده اللي ساعدني أجاريك طول الفترة اللي فاتت. بعديها خلوني أفنحك

انا نلفقلها القضية مع مصطفى عشان حبوا يخلصوا منه بالمره لأنه زي العبيط
اتسرع و حاول يكسب عندهم رصيد يانه يواجهك، و لأفهم عارفين انك عنيد
كان أبسط حل انهم يحرقوه هو كمان و ندور على غيره"

- "اللي هو حضرتك"

- "أنا كنت واحدة جنبك عشان يبقى فيه عين عليك. ماليش أي دور في
حاجة زي مانت فاكر"

- "و مين قالك اني فاكر حاجة؟ أنا معرفش حاجة"

- "متعرفش حاجة يعني ايه؟" سألته في دهشة

- "يعني أنتي اللي قتليلي كل حاجة دلوقتي. أنا كان عندي شك مش مبني
على أي أساس غير انك مكنتيش مع سارة في الجامعة"

- "مش فارقة كثير. مادام شكيت ده معناه اني بقيت كارت محروق"

- "و سارة مفكرتش تكشفكوا ليه؟"

- "انتقام شخصي. هي فعلاً حبتك و ضحت عشانك، و في الآخر أنت اديتها
على قفاها و لفتقلها قضية خيانة. سابتك لعقابك. أنت تستاهل أصلاً يا عامر.

مانت بكل سهولة خنت مراتك، متعملش فيها مصدوم" ابتسمت في حسرة

- "مانا عارف اني واطي" ابتسم في سخرية، "هيعملوا فيكي ايه؟"

- "معرفش يا عامر. اللي يعملوه. خلاص مش فارق معايا" قالت في أسي

- "متقلقش يا رنا. أنا خلاص قدمت استقالتني الهاردة الصبح"

- "ايه؟" صاحت في دهشة

- "زي ما بقولك. تركت منصبي كوكيل لاعين"

- "ايه خلاك تعمل كدة؟"

- "كفاية بقى يا رنا. كفاية تجارة بأحلام الناس و الضحك على عقولهم. أنا
قرفت من الشغلانة الوسخة دي، أنا قربت أكسر مرايات البيت اللي عندي
عشان مبقتش طابق شكلي. مش عاوز أجيب عيال صغيرة تاني و أبنيهم قصور

فوق السحاب و أعيشهم الوهم و أسبهم بعد كدة يلبسوا. أنتي عارفة... أنا لسة من يومين ضاغط على كريم و ضحكت عليه عشان يوافق انه يستسلم لمصيره السخيف. كل ده لأنه حاول يعمل حاجة عشان يحس انه بني آدم. للدرجة دي مينفعش الواحد يحس انه بني آدم؟ للدرجة دي كلنا لازم نوسخ ايدنا و رجلينا عشان نعرف نعيش؟ قرفت يا رنا خلاص. الواد ده حسني إحساس محسيتوش قبل كدة... حسني ابي رخيص" قال عامر في تأثر اندهشت له رنا

- "ياااه! و ده معناه ايه؟" قالت رنا في دهشة ساخرة

- "معناه انك بكل بساطة هتفضلي معايا... يا روني. و تفضلي تبليهم بالتقارير زي مانتي. هتعرفي؟" سألها في سعادة لم يدرك مصدرها

- "أه طبعاً. أنا جاسوسة شاطرة" أجابته مبتسمة و هي تريح رأسها على صدره، "و هتسب الفلوس دي كلها؟"

- "و دي تيجي؟ أنا جالي عرض حلو و هشتغل و أجيب فلوس كتير برضه. مش قد اللي كنت باجيه، بس حاجة قريبة منه، و مفيهاش وجع دماغ وجو شيرلوك هولمز اللي عايشين فيه. هاشتغل في الإعلانات" ابتسم في ارتياح

تلقي كريم الرسائل من أصدقائه دون أن يفكر في الرد عليها. لم يعد إلى مدريد إلى حين تصفية حساباته مع المنظومة و الاتفاق على الإجراءات اللازمة. ذهب لزيارة محمد كي يعوضه عن رحيله المفاجئ في حفل زفافه، و أيضاً لينظر في عينيه و يرى إن كان يستحق التضحية لأجله هو و زوجته.

- "كريم" فتح محمد الباب فجأة

- "خضتني يا جدع. أنت واقف ورا الباب ولا ايه؟" انتفض كريم

- "لأ فريدة شافتك من البلكونة فزلت أفتحلك"

- "أه فريدة. صح. حلوة الفيلا دي يا حمادة. التجمع الخامس منطقة فخمة برضه، بس مبتخافش بالليل؟ يقولوا الناس بتقتل هنا، بتقطع. ممكن حد يقتحم الفيلا و يخلص عليك أنت و فريدة في يوم واحد و ساعتها مش هتبقوا عبء على حد" هتف في وحشية

- "ايه؟" نظر محمد في ذهول

- "فين الحس الفكاهي يا حمادة؟ هاهاها، تعالى يا راجل" ضربه كريم بقوة في مزاح سخيف و دخل ليأخذ مكانه على المقعد

- "أنا زعلان منك أوي. تمشي يوم فرحي من غير ما تسلم؟ و كمان جاي ايدك فاضية؟ أنا قلت هتخش عليا بعربية" عاتبه محمد

- "لما تشطب الجراح قولتي و أنا أجيلك عربية على طول" أجابه في سخافة
- "فين فهمي و العيال؟"

- "لأ عادي فيه حوار حصل و مش فايق لحد فيهم. جيتلك بس عشان متقولش اني قصرت معاك. أستأذن أنا"
- "رايح فين؟ استنى لازم تشرب حاجة، و كمان تتفرج على الصور" قام محمد من مكانه بسرعة

نفخ كريم منتظراً عودته. نهض من مقعده و التفت ليجد صورة العروسين السعيدين على الحائط. تجول في الشقة مفكراً لو استحق محمد أن يرمي كل ما وصل إليه لأجله. راوده شعور غريب بأن يترك كل شئ و يتناسى عالم كرة القدم بما فيه. ربما هذه هي الفرصة ليهرب من عالم المسرحيات الهزلية. لقد أثبت ما أراد لمن حوله، و ربما حان الوقت للخروج الآمن. عاد محمد مرة أخرى بزجاجة مياه غازية صغيرة، كأس من الماء، و قرص مدمج مع الحاسوب المحمول الخاص به

- "أنت مش عارف اني راجل رياضي و ماليش في الصنف؟" داعبه كريم
- "نسيت يا كابتن كاكأ، مانت عارف الواحد بينسى من قعدة البيت" ضحك

محمد

- "أنت ليه صحيح ملعبتش كورة خالص؟" سألته في دهشة و كأنه انتبه فجأة
 - "أنا؟ مش عارف. مجاتش فرصة تشدني. بعدين الواحد لازم يختار و يرتب
 أولوياته، و أنا اخترت فريدة" ابتسم ابتسامة مشرقة
 - "هي فين صحيح؟ مظهرتش يعني"
 - "تلاقيها في الحمام ولا حاجة"
 - "وربني يا معلم الصور. افتح اللاب توب و حظ السي دي، و روح هاتلي
 عصير"

بدأ كريم يقلّب في الصور. رأى صور أصدقائه مع العروسين مما أثار غضبه.
 استمر بتقليب الصور في حركة آلية إلى أن استوقفته صورة معينة. عقد حاجبيه
 ونظر بدقة داعكاً عينيه. أغلق الصورة و اعتصر ذهنه محاولاً الوصول إلى تفسير
 منطقي. فجأة اتسعت عيناه و شهق في ذهول. عاد محمد بالعصير و جلس بجواره،
 و لمفاجأة كريم، جاءت فريدة أيضاً.

- "ايه ده فريدة؟ مش ممكن. مصدقش" صاح كريم في حماس مفتعل
 - "أهلاً يا كريم" ردت بابتسامة مرتبكة و زائفة
 - "كريم ايه؟ مفيش بينا الكلام ده. قوليلي يا كوكي"
 - "ماشي يا كوكي" أجابت في حرج
 - "أصرت تيجي تقابلك يا عم، عشان تعرف غلاوتك. عجبتك الصور، جميلة
 مش كدة؟" سألته محمد في لهفة
 - "أه طبعاً. عصفورين يا ري. مش ممكن. معلش يا فريدة، مقدرتش أكون
 موجود في فرحكهم" قال كريم
 - "ولا يهملك خالص. أديك عوضتلنا اليوم أهه. هترجع النادي بتاعك امتي؟"
 ابتسمت مجاملة

- "مش عارف لسة. قاعد بتحابل على محمد أهه عشان يبجي يحترف معايا، وهو مش موافق أبداً. عمال يقول مقدرش أعيش من غير فريدة، مينفعش أقعد يوم من غير فريدة" قال كريم مداعباً

- "فعلاً يا ميدو؟" نظرت إليه مبتسمة في خجل

- "أه طبعاً يا حبيتي" أمسك يدها في حنان

- "طب ما تقنعيه يا فريدة. ممكن تبجي معاها" قال كريم

- "ايه ده بجد؟ طب يلا بينا" قالت فريدة في لهفة

- "ما قلتلك يا فريدة مش عاوز أدخل في القصة دي"

- "مالكش حق يا ميدو، ما تفسح البنت يا جدع. إلا ايه حكاية ميدو دي،

حاجة زي كوكي؟" نظر إليها في استهزاء

- "لأ مش زي كوكي" أجابت في خجل، "ده الدلع بتاعه من و احنا صغيرين"

- "أه طبعاً... كوكي يبجي ايه جنب ميدو؟" قال كريم في استخفاف

- "طب هقوم أنا أحضرلكم العشا" قامت فريدة لتحضير الطعام، بينما اعتدل

كريم في مجلسه

- "تصور فهمي الواطي كان بيحاول يستغفلي" قال مغبراً الموضوع

- "فهمي؟ مش ممكن. أنا أعرف انكم أصحاب أوي" أجاب محمد في دهشة

- "احنا دخلنا بطولة كوكاكولا عشان مامته. و لأن أنا الوحيد اللي جاله

عرض احتراف محترم، استغل سلطة مامته عشان يعملني مشاكل. ده حتى فضحني.

تعرف انه صورني أنا و فريدة في الشارع اليوم اياه، اللي فريدة بتكسف منه؟"

- "ايه؟ ازاي؟" ارتبك محمد

- "أبدأ يا سيدي. عشان أبطل احتراف راح للناس اللي يشتغل معاهم

ووراهم صورتي مع فريدة، و قاهم اني لعب مش محترم، فالفرق بتاعي طلب مني

أسيهم و إلا هيفضحوني"

- "و هم يبجوا يفضحوك هنا ليه؟"

- "ما هي ناس واصله. صحيح، أنا عمري ما سألتك. أبوك جاب رخصة تدريب ازاي؟ ده كان محتاس أوي"
- "بابا؟ أبداً. فضل يستعمل علاقاته لحد ما وصل، أنت عارفه مش بيغلب"
- "أبوة، كان محلل رياضي فذ" ابتسم كريم في سخرية
- "بصراحة موقفه كان وحش، و كان ابتدئ يخرف فالقناة اللي شغال فيها شاطته. فضل ورا قصة التدريب دي لحد ما عرف يجيب قرارها. قولّي بس، هتعمل ايه في موضوع الصورة ده؟"
- "متخافش يا حمادة. أنا أقدر أحطك في موقف زي ده؟ فريدة في عيني. لازم أتصرف مع فهمي. قولّي بس... هو أبوك عمره لعب كورة؟"
- "أه طبعاً.... بس مش مدة طويلة"
- "مش مدة طويلة... و دلوقتي دخل في عالم التدريب.... مقالكش ان الكورة تمثيل؟" باغته مراقباً ملامحه
- "الكورة تمثيل؟ بمعنى ايه؟" عقد محمد حاجبيه
- "أي كلام، تخوير يعني. كل لعب بيمشي زي ما الكتاب يقول، بس بالمعنى الحرفي. يقول لك هات جون تجيب، و اعمل فاوول تعمل"
- "ايه الكلام الغامض ده يا كريم؟ بابا عمره ما قالني كدة"
- "هممم. طب ممكن تفهمني مين اللي في الصورة ده" فتح كريم الصورة على الحاسوب
- "هه؟ ده بابا مع واحد صاحبه"
- "واحد صاحبه؟ بابا يعرف عامر الشريبي منين؟" سأله كريم في شك
- "ياااه، تصور محدتش بالي. ده عامر. عامر مدير أعمالك، مش كدة؟"
- "فعلاً يا محمد؟ مكنتش واخد بالك؟" سأله في شك
- "أبوة يا كريم. الفرح مليون ناس، أنا هحفظ كل أصحاب بابا؟ كبر دماغك، اشرب العصير" أجابه في لا مبالة

- "حاضر هشرب. الإنسان ده كائن غريب أوي يا حمادة. بيعمل مجهود خرافي عشان يضحك على الناس، و يقعد أيام و شهور يدبر الخطه، و يبجي في الآخر يغلط غلطة هبله تكشفه و تهد كل اللي بناه. بتفكرني بنكتة الحرامي اللي دخل بنك عشان يسرقه. ادى للموظفة جواب مكتوب فيه انها تديله الفلوس اللي عندها و الا هيقتلها. طلع في الآخر كاتب عنوانه على الجواب فاتقبض عليه. شوف الأهل"

- "هاهاها. نكتة قديمة أوي يا قالش" ضحك محمد مجاملاً

- "بس فيه نكتة جديدة يا ميدو. مرة واحدة قال لأصحابه انه ميعرفش فريدة، طلع يعرفها من و هم صغيرين" فاجأه كريم

- "ايه؟ أنت جبت الكلام ده منين؟" انتفض محمد في مقعده

- "ما هي اللي لسة قايلة من شوية يا أهيل. متعلمتش قبل كدة انك لازم تركز في كل حاجة بتحصل حوايك؟ درس حلو أوي لازم تتعلمه. عارف مين علمهوني؟ واحد صاحب باباك أنت متعرفوش خالص، اسمه عامر الشربيني. باباك اللي فشل في كل حاجة و حفي عشان يوصل، و في الآخر خلاك تبيع صاحبك عشان يوافقوا يطلعوله رخصة التدريب. ما هو أصل الكورة تمثيل زي ما أنت عارف يا محمد. و أكيد ده اللي خلاك تبعدها و تريج دماغك، أو بمعنى أصح أبوك أفنك ان كلها سياسة و سيناريوهات. عارف ايه أغبي حاجة عملتها؟ انك عملت نفسك مش عارف. أكيد لازم باباك يبقى عارف، ما هو كل اللي فيها عارفين، و أول حاجة أبوك لازم يعملها لو جالك عرض احتراف انه يفهمك انها تمثيل. كل واحد شاط كورة أو مسك صفارة عارف انها كدة. يبقى ازاى معندكش فكرة؟ أمال أبوك جاب الفلوس دي كلها ازاى و معيشك في العز ده كله منين و هو حتة راجل ضايع؟"

- "كريم... أنا..."

- "أنت ايه يا حمادة؟ أنت ندل؟ أنت زباله؟ أكمل شتيمه؟ و يا ترى جالك قلب تسب فريده للمجرمين في الشارع؟ لأ... استنى، أيوة افكرت. عشان كدة كنت قلقان يوميه. مش عشاني زي ما كنت فاكِر، كنت قلقان على فرفورة، صح؟ طب كنت هتسييني أبوس حبيبتك عادي؟ أنت مش راجل يلا؟ ما ترد!! أنت مش راجل؟" صاح كريم ثانيةً و قد احمر وجهه من الغضب

- "أنا... مش فاهم أوي اللي أنت بتقوله يا كريم. أنت شكلك متوتر" ثبت محمد على موقفه

- "خلاص يا حمادة. خليك زي مانت، ولا يهملك خالص. مش فارق معايا لا أنت يا ميدو ولا فرفورة بتاعتك. أنا هروح أقولهم الواد ده مش تبقي و أخليهم يطلعوا الصور. ايه رأيك؟" التفّت كريم و توجه ناحية الباب

- "استنى يا كريم" صاحت فريده في دعر و قد استدرجتها أصواتهما

- "سييه يا فريده، مالكيش دعوة بيه" أشار إليها محمد لتهديتها

- "أنت اتجننت يا محمد؟ هتسييه يفضحني؟"

- "سييه يا فريده مالكيش دعوة بيه" صاح محمد ثانيةً

- "أنت فاكِري مش هعملها؟" هتف كريم مهدداً

- "كريم. اتكلم معايا أنا، هو قالي أضحك عليك و ألعب بعقلك شوية، بس

مكنتش أعرف أنهم ناويين على كدة" صاحت فريده

- "بس يا فريده. سييه يعمل اللي هو عاوزة" ركض محمد إليها و أمسكها

من ذراعها بقوة

- "أنت هتضرها ولا ايه؟" هرع كريم و دفعه بقوة، لكمه محمد فسقط أرضاً

في ألم

- "مفيش صور أصلاً يا فريده!! ارتحتي!!" صاح محمد و قد فقد أعصابه

- "ايه؟" اعتدل كريم و قام مترنحاً، "مفيش صور يعني ايه؟"

- "صور ايه يا كريم اللي لولد و بنت في الشارع اللي هتعمل حاجة؟ المصور اللي كان واقف ملحقش ياخذ حاجة عشان العيال طلوعوا عليكو و بوظوا الدنيا"
- "يا حلاوة. يعني كنت عاوزني أعيش معاها قصة حب فاضحة في الشارع عشان تجيب لأبوك القرشين؟ أه يا معفن! و ضحكت عليهم ازاي لما المصور مجابش حاجة؟"
- "الصور بتفضل مع مدير أعمالك، اللي هو عامر. أي مدير أعمال بيبقى هو المسئول عن فضايح لاعتيته. أقنعهم ان الصور معاها، أصل حبايه كتير في المنظومة و عرف يلعبها صح. قال كمان انه هيقدر يهددك من غير ما تشوف الصور بنفسك" انهار محمد دافئاً وجهه بين كفيه
- "و أقنعني بكل سهولة و أنا زي الأهيل صدقته. هایل! إحساس ان الواحد أهيل بيبقى جامد أوي. عمرك حسيته؟"
- "أه طبعاً حسيته" أجابه محمد في حسرة و نظر لفريدة التي أجهشت بالبكاء
- "طب و كنت سايبني أمشي ازاي و واثق من نفسك؟ مانا كنت هروح أقولهم اتفلقوا، و هيجوا يبصوا ميلاقوش صور" سأله في دهشة
- "عامر قالي ان عمرك ما هتعمل كدة"
- "يا سلام؟ ايه الثقة دي؟"
- "معرفش. هو أكدي مليون مرة. ما هو اللي حطّر ملفك النفسي. قال انك مستحيل تعمل كدة"
- "لطيف أوي عامر ده. بس الحكاية مش محتاجة ملف نفسي ولا حاجة يا حمادة. عارف هو ليه كان متأكد اني مش هعمل كدة؟"
- "ليه؟"
- "عشان أنا راجل. سلام يا حمادة" صفق كريم الباب خلفه في قوة

مضى شهر منذ المواجهة بين كريم و محمد. حاول محمد الاتصال به أكثر من مرة لكن لم يستجب. التزم كريم الصمت و قرر ألا يفشي السر إلى حين إشعار آخر. لم يتحدث إلى فهمي حيث علم أنه لن يرد عليه و قرر الانتظار حتى تهدأ الأمور. جلس في أحد مطاعم الزمالك المطلة على النيل يشرب عصير المانجو إلى أن انضم إليه ضيفه.

- "أهلاً يا عم كريم. وحشتك ولا ايه؟"

- "طبعاً يا عامر وحشتني. أmaal هكلمك ليه" ابتسم كريم في هدوء
- "أنا محدش يعرفني إلا و يحبني. دي حاجة أكيدة. أخبار الدنيا معاك ايه، مين مدير أعمالك دلوقتي؟"

- "واحد مش فاكر اسمه، كله زي بعضه. لسة متعاملتش معاه. قولّي... أنت سبت الشغلانة ليه من غير حس ولا خبر؟"

- "عادي يا كريم، كل حاجة ليها وقتها، و بتاخذ مجراها. خلصت من موضوع الكورة، و هكمل رسالتي في الإعلانات" ابتسم في سخرية
- "بس أنا لسة مخلصتش" قال بنبرة مريبة

- "أيوة طبعاً أنا عارف، وصلت لايه؟ دوري الحرافيش ولا الدوري الصربي الممتاز؟"

- "لا ده ولا ده. عملت حاجة أشيك بكثير. أنا اعتزلت الكورة" أجابه مبتسماً

- "ايه؟ اعتزلت الكورة؟ ازاي؟" سأله في دهشة

- "اسكت. مش جالي أزمة قلبية هتمنعني من الاستمرار في اللعب لأجل غير مسمى؟"

- "أزمة قلبية؟" ابتسم عامر، "سيناريو رخيص أوي يا كريم"

- "اللي جه في دماغني. أصل عندي واحد صاحبي معودني على الأفلام الرخيصة"

- "كل أصحابك عيال رخيصة، ايه الجديد؟"
- "لأ بس فيه واحد فيهم راجل أوي، تصور طلع بيساعدني فعلاً من غير أي مصلحة؟ و عشان كدة قررت أكافؤه و جبتله عرض احترام"
- "جبتله عرض احترام؟ واسطة يعني. هاهاهاه. و مش خايف عليه من الصدمة؟"
- "لأ هو كبير كفاية، و ميتخافش عليه. هيعرف ازاي ياخذ باله من نفسه"
- "مفيش حد بيساعد حد من غير مصلحة يا كريم. أنا شاكك فيك أنت شخصياً. ناوي على ايه؟"
- "ناوي أكمل معاهم و آخذ فلوسهم و أنا حاطط رجل على رجل من غير ما أعمل مجهود"
- "أحبك و أنت ناصح. في أهني مجال؟"
- "لسة مش متأكد. هرجع أكمل دراستي في الجامعة. في نفس الوقت، عاوزك تشوفلي شغلانة حلوة في المنظومة، سامع ان حبايك كثير. لسة ورايا حاجات أعملها. تقدر تسميها... تصفية حسابات"
- "تصفية حسابات؟ ماشي يا عم كريم. مع اني خلاص برة الليلة، بس أوعدك اني هفكر" غمز له في خبث
- "فاكر المكان ده؟" ابتسم كريم و نظر حوله متفحصاً المطعم
- "طبعاً فاكر يا عم الرومانسي. قصة حبنا بدأت هنا. ليه مقعدتش على نفس الترابيزة بالمرة؟" فهقه ضاحكاً
- "فيه ناس قاعدة عليها" ضحك كريم، "أصله مش المطعم بتاع أهلي"
- "أنت عارف" اتخذ عامر طابع الجدية، "أنا عمري ما اديتك حجمك يا كريم. كل ما أفتكرك عبيط تعمل حاجة تثبتلي انك أبعد ما يكون عن العبط. كل مرة أنصحك و أنت قدام مشكلة، ألاقيك بتحلها بشكل تاني خالص غير اللي قلنتك عليه. كل ما يبقى فيه حاجة بتقيدك دائماً بتلاقي طريقة سحرية تطلع بيها

منها. و مين عارف؟ مش يمكن تعرف تعمل اللي محدش قبلك قدر عليه؟ أنت سوبر كاكاز برضه. أنا واثق انك ممكن تعمل حاجة" ابتسم عامر في إعجاب لم يستطع إخفائه

- "دي الخطه يا عامر. بالناسبه. مش طلع مفيش صور، و محمد و فريده كانوا بيضحكوا عليا؟"

- "يااااه. مش معقول. ازاي الكلام ده؟ الحياه صعبه أوي يا أخي" ضحك عامر

- "أنا عارف. بس هعمل عيبط. خليههم يفكروا انهم ماسكين عليا حاجة. مش الظرف بتاع الصور المجهوله مع مدير أعمالى؟"

- "موجود طبعاً" أجابه ضاحكاً، "بس لازم تمضي معاهم عقد تاني، عقد استخدام حر. بتفضل تحت طوعهم لحد ما تلاقي شغلانة تناسبك في المنظومه. مش هتبقى صعبه... يا بتاع الوسايط!" ضرب عامر الطاولة في سخريه

- "حلوة دي. أنا عاوز آخذ فلوس برضه. الفلوس حلوة"

- "هو فيه أحلى منها؟" أوما عامر برأسه إيجاباً

- "ساعات يا عامر بحس انك مش زي مانت مين. أنت أكيد مش أقحويان للدرجة دي، مش كده؟"

- "لا يا سيدي، مفيش حد أقحويان للدرجة دي. أنا بس بعمل اللي أقدر عليه عشان أعيش، و عمري ما بضحك على نفسي. أكيد فيه درجة من الأقبحه أعلى مني" غمز له في مرح

- "أنا برضه قلت كده. بس فيه سؤال لازم أسألهولك. أنت فعلاً سلطت حد على مراتك عشان يبقى هي اللي خانتك؟" ابتسم في سخافه

- "يااااه. أنت مبتنساش حاجة أبداً؟" صاح عامر في ذهول

- "تلميذك" غمز له في إطراء

- "لازم تبقى فاهم ان مفيش راجل هيستحمل يشوف مراته في حضن راجل تاني، إلا لو هو مش راجل أصلاً"

- "رَيْحَتْنِي. أنا افتكرت الناس كلها ضاعت"
- "بمناسبة الناس... عجبتني الخطبة اللي قلتها في التلفزيون. بالراحة عليهم يا عم كريم دول غلاية" ابتسم في سخرية
- "غلاية فعلاً. بس يستاهلوا كل اللي يبجراهم" قال في حقد عجيب

- "شدّ حيلك. أنت معاك رقمي. لو عاوز أي حاجة كلمني، بس حاول قدر الإمكان متكلمنيش. أصلي دائماً أما أسمع صوتك قلبي بينقبض"
- "ربنا يوقفك أنت كمان يا عامر. أوعدك اني هكلمك حتى لو مش عاوز أي حاجة. أصل أنا بحب أفصل على الناس" أخرج كريم لسانه
- "تصور انك عيل أقحوبان!" صاح عامر في مرح وضحكا معاً بأعلى صوت كأنهما صديقان حيمان. لأول مرة لم يشعر كريم أمامه بالعجز

انتشرت الأخبار بإصابة كريم بأزمة قلبية أدت لاعتزاله. واجه صعوبة كبيرة في إقناع والديه أنها مجرد وسيلة ليخرج بها من عالم الاحتراف دون جدوى، فقد رأيا من المنطقي أن يطلب الاعتزال دون إطلاق الشائعات. قضيا أسبوعاً كاملاً يردان على مكالمات هاتفية ليطمئنا الناس على صحته. كانت الميزة الوحيدة أن سامحه أصدقاؤه على تصرفاته السابقة ظناً منهم بأنه كاد يفقد حياته. منع والداه الزيارات تنفيذاً لتعليماته. لم يحاول محمد زيارته حيث علم أن ذلك مجرد سيناريو للخروج الآمن. اتصل فهمي به كثيراً و هو في غاية القلق. في النهاية سمح له والداه كريم بالزيارة، طبقاً لتعليمات ولدهما.

- "حمد لله على سلامتكَ" عانقه فهمي في حرارة و كاد يبكي
- "ايه يا فهمي، اهدا كدة. مانا بقيت كويس أهه"

- "كنت هتروح مننا. مش مصدق. حقك عليا يا كريم، متزعش مني" احتضنه في قوة
- "أنت عييط يا فهمي؟ أنا اللي آسف. عاوزك تسامحي علي كل اللي قلته"
- "أهم حاجة انك قمت بالسلامة. أنا مش فاكر حتى ايه اللي حصل"
- "حبيبي يا برنس. مفيش أخبار جديدة؟" سأله في خبث
- "مش هتصدق! جالي عرض احتراف بره، تخيل!!"
- "ياااه؟ مبروك يا معلم، هات بوسة"
- "مش مصدق. فجأة لقيت حد بيكلمني من لندن و بيقولي على عرض في نادي فولهام"
- "فولهام؟ دانت هتبقى خليفتي بقي. هاهاهاه. عاوزك ترفع راسي يا عم انت. نقتلك مدير أعمال كويس؟"
- "أنت عارفي مش شاطر في الحكاية دي. طبعاً أنت اللي هتقدر تفيدني"
- "أه يا نذل. و أنا اللي فاكرك جي تزورني" صفعه كريم على قفاه، "عيب عليك هظبطك"
- "بس قالولي حاجة غريبة أوي. قالوا ان فيه حد في النادي موّصي عليا جامد" قال في تعجب
- "موّصي عليك جامد؟" ابتسم كريم في خبث، "واسطة يعني؟ مبروك يا معلم. جه اليوم اللي يجيلك فيه واسطة"
- "الله يبارك فيك. كان نفسي تبقى معايا. مفيش أمل تلعب تاني خلاص؟"
- "أنا؟ لأ متشغلش بالك بيا يا فهمي. أنا شفت و عرفت حاجات كتير أوي و حاسس زي ما تقول...اني عجزت، زهدت دنيا الاحتراف. رحلتي كانت طويلة. حاسس انما عشرين سنة مثلاً" أجابه كريم في حكمة
- "طب و ايه الدروس المستفادة من ده؟"

- "لأ من ناحية الدروس ففيه كتييسير أوي. اللي كنا فاكريتها ساحرة مستديرة، طلعت الساحرة الشريرة. عارف يا فهمي، قبل ما أضطر أعلن اعتزالي كنت بحارب في الكورة أوي. عمال أجري و أكافح عشان أحاول أحقق أهدافي وأوصل للي أنا عاوزة. بس بعد لما وصلت، مبيتش عارف هو ده فعلاً اللي كنت عاوزة ولا لأ. ابتديت أحس اني مشيت في سكة غلط. مش كل حاجة الواحد بيشفها حلوة بتطلع زي ما تخيل. قعدت أفكر في مليون حاجة و محي باظ من كتر ما شغلته، و فضلت مختار أعمل ايه و أروح فين و أجي منين، و فجأة جت الضربة القاضية اللي خليتني أسيب الحكاية كلها غصب عني و ما احتجتش حتى آخذ قرار. عارف لما تبقى الحاجة ثقيلة عليك و محتاجة مجهود جامد و تاخذ من تفكيرك و صحتك، و يبجي فجأة حاجة تانية تجبرك انك تسيبها و تستسلم؟ كأنك بالظبط رايح شغلك جري و وراك مليون حاجة، و أول ما تدخل المكتب يبجي المدير يقولك أنت اترفدت، لم حاجتك و امشي. الواحد بيجيله إحساس لذيد... إحساس بالاستسلام. أجل حاجة في الدنيا لما تبقى محتاج تقوم من السرير و تقرر انك هتنفض لكل اللي وراك و تستسلم للفشل و تنام. ليها طعم حلو. الشعور بالفشل ليه لذة غريبة أوي يا فهمي. عمرك جربتها دي؟"

- "هي ايه؟"

- "لذة الفشل؟ الاستسلام للواقع. انك تعرف ان مفيش فعلاً حاجة في ايديك

و ان كله راح"

- "مظنش يا كريم. و حاسس اني مش عاوز أجربها" ضحك فهمي في ارتباك

- "أنا بقولك اشرب حشيش يا فهمي؟ ما علينا. عاوزك تاخذ بالك على نفسك، و متقلقش. هيكون فيه عين بتحرسك دائماً و أنت هناك"

- "ايه جو أفلام الأكشن ده؟ هاهاها. ماشي يا عم بات مان" ضحك فهمي وعانقه في حرارة

مرت الشهور و انطلق فهمي في رحلته أخيراً إلى عالم الاحتراف. وصل إلى لندن في شهر يوليو ليتعرف على ناديه الجديد و يقابل زملاءه. توجه إلى ملعب

كريفين كوتيدج، معقل نادي فولهام، متبعاً إرشادات كريم الذي حكي له كل ما سيحتاج إليه في الرحلة قبل سفره.

- "ازيك يا فهمي؟ أهلاً بيك في كريفين كوتيدج" استقبله رئيس النادي في مودة

- أهلاً بحضرتك" أجابه فهمي مبتسماً

- "أنت متوصي عليك جامد أوي. هاهاهاها. شكل حبايك كثير"

- "متوصي عليا؟ مين اللي وصى عليا"

- "أنا يا فهمي" دخل أحدهم المكتب و صافحه في حرارة، "معلش تأخرت عليك"

- "مين حضرتك؟" سأل فهمي في أدب

- "اسمي تشارلز كيث. كبير الإبداعيين في نادي فولهام"

- "ايه ده؟ أنت بتاع محلات ال..."

- "أرجوك يا فهمي...مقولهاش" أشار بيده ضاحكاً

- "اعذريني. القافية حكمت. بس أنا مش مستوعب أوي دور حضرتك. كبير إبداعيين يعني ايه؟" ابتسم فهمي في خجل

- "عارف انك مش هتفهم أوي دلوقتي. خليني أوصلك للممثل الإبداعي بتاعك هو هيفهمك كل حاجة. تعرف ايه عن كرة القدم؟" سألوه و هو يقوده إلى خارج الغرفة

- "أعرف حاجات كثير. فرقتين ييلعبوا قدام بعض، كل فرقة فيها ١١ لاعب، و اللي يجيب أجوان أكثر يكسب. هاهاها" ضحك في ارتباك

- "لسة قدامك كثير تتعلمه. الممثل الإبداعي بتاعك محضرك سيناريوهات كثير. هو اللي جابك عندنا النادي" أجابه في هدوء

- "الممثل الإبداعي؟ مش فاهم" تساءل فهمي في حيرة و هو يتبع خطواته

قاده تشارلز إلى غرفة الإدارة الإبداعية. نظر فهمي إلى اللافتة في دهشة ودخل خلفه.

- "هو ده الممثل الإبداعي بتاعك" أشار تشارلز إلى أحد الجالسين
- "كريم؟!!!" صاح فهمي في دهشة، "أنت بتعمل إيه هنا؟"
- "فهمي البرنس. أهلاً بيك. أنا كريم رأفت، الممثل الإبداعي المكلف بمتابعة سيناريوهاتك طول مدتك هنا في كريفين كوتيدج. أهلاً بيك في منظومة كرة القدم" ابتسم كريم في ثقة.

